




Presented to
The Library
of the
University of Toronto
by
The Estate of the late
G. Percival Best, Esq.





Digitized by the Internet Archive
in 2011 with funding from
University of Toronto

OEUVRES MESLEES
DE PLVTARQVE, TRANSLA-
tees de Grec en François, reueuës & cor-
rigees en ceste seconde Édition en
plusieurs passages par le
Translateur.

Le III. Volume du II. Tome, qui
contient VII. Traitez.

I.	Contre l'Epicurien Colotes.	625
II.	Dé l'Amour.	654
III.	De la face qui apparoist au rond de la Lune.	679
IIII.	Pourquoy la prophetisse Pythie ne rend plus les oracles en vers.	646
V.	Du Démon ou Esprit familier de Socrates.	749
VI.	De la malignité d'Herodote.	784
VII.	De la Musique.	813

V. 2³

A PARIS.

De l'Imprimerie de Michel de Vascosan.

M. D. LXXIIII.

AVEC PRIVILEGE DV ROY.

DE VERTES MÉRIÈRES
DE PRIVATKOVÉ, TRANSLA-
tes de Grec en François, & cor-
rigés en cette seconde Édition en
plusieurs passages par le
Traducteur.

Le III. Volume du II. Tome, qui
contient VII. Tables.

1. Contient l'Épigramme Colotes.
2. De l'Amour.
3. De la mort de l'Amour.
4. De l'Amour de l'Amour.
5. De l'Amour de l'Amour.
6. De l'Amour de l'Amour.
7. De l'Amour de l'Amour.

L Gr

P 737 m

Fa

1574

606358


21. 4. 55

A PARIS.
De l'imprimerie de Michel de Valartan.
M. D. LXXIII.

AVEC PRIVILEGE DU ROY.



CONTRE
L'EPICURIEN
COLOTES.



COLOTES celuy qu'Epicurus souloit appeller Collo-
tare, ou Collotarion, par
vne mignarde & flatteuse
diminution, amy Saturnin,
a composé & mis en lumie-
re vn liure, lequel il inscrit,
Que ce n'est pas viure que
de viure suiuant les opinions des autres philoso-
phes: & a dedié ce liure la au Roy Ptolomeus: l'ay
pensé que tu prendrois plaisir à lire par escript, ce
qui me vint en l'entendement de dire alencontre
de ce Colotes, pour ce que tu aimes toutes choses
honnestes, & mesmement qui appartiennent à la
cognoissance de l'antiquité, & que tu estimes que
la plus belle estude & plus Royale que lon scau-
roit faire, est d'auoir bien en memoire & à la main
les propos & discours des anciens sages, le plus que
lon peult. N'agueres doncques, comme ie le fai-
sois lire, l'vn de noz amis que tu cognois bien, Ari-

Aristodemus natif d'Argie, fort passionné, & par maniere de dire, forsené sectateur de Platon, encore qu'il ne porte pas la ferule, comme les supposts de Bacchus, ie ne sçay comment se teint quoy, contre sa coustume, tant que la lecture dura, & l'ouit patiemment iusques au bout sans mot dire: puis quand ce fut à la fin, Et bien (dit-il) qui faisons nous leuer pour combattre alencontre de cestuy-cy pour la defense des philosophes: car ie ne suis pas de l'aduis de Nestor, qui commeit à l'adventure du sort l'election du plus vaillant des neuf guerriers qui se presenterent pour combattre Hector teste à teste: mais aussi tu vois, dis-ie, que luy mesme se met à ordonner & disposer du sort, de maniere que le chois des neuf se fait sous le gouuernement du plus sage,

Mais de l'armet le sort d'Aiax sortit

Lequel estoit plus à leur appetit.

Toutefois si tu me commandes que ie face l'electio,

Comment pourrois-ie estre au choisir si vain

Que d'oublier Vlysses le diuin?

Parquoy regarde & aduise bien commēt tu pourras refuter c'est hōme. Et lors Aristodemus, Voire mais tu sçais (dit-il) ce que fait iadis Platon, lequel festant courroucé à son vallet, ne le voulut pas fouetter, ains commāda à son nepueu Speusippus de ce faire, disant qu'il estoit en cholere. I'en diray
 „ autant de cestuy-cy, Prends le, & le fouette à ton
 „ plaisir, car quant à moy ie suis courroucé cōtre luy.
 Et comme tous les autres de l'assistance me priaient de prendre ceste charge, Il le fault dōcques faire,

A re, dis-je, puis qu'il vous plaist ainsi: mais j'ay peur qu'il ne semble que ie face plus de compte de ce liure qu'il ne merite, pour soustenir & defendre Socrates contre l'inciuilité, la mesdisance, & l'insolence de cest homme, qui par maniere de dire, luy presente du foin comme à vne beste, & l'interroque comment il porte la viande en la bouche, & non pas à l'oreille, là où à l'aduenture ne faudroit il faire autre chose que se rire d'une telle raillerie, mesmement quand on considereroit bien la douceur & la grace de Socrates en telles choses. Mais

B pour tout l'exercite des autres philosophes Grecs, comme Democritus, Platon, Empedocles, Parmenides & Melissus, lesquels respondans aux blasmes que lon leur donnoit, & aux iniures qu'on leur disoit, ont estimé, que se taire en telles choses non seulement estoit infame, mais que ce seroit vn sacrilege de ceder & remettre aucun point de la franchise de parler pour eux mesmes, & par ce moien ont auacé la philosophie en tel honneur & telle reputation cōme elle est. Et certes noz peres & meres avec les Dieux nous ont donné le viure,

C mais le bien viure nous viét de la raison que nous auōs apprise des philosophes, fauorisant la Loy & la Iustice, & refrenant noz cupiditez. Et ce bien viure la est viure socialement, amiablemēt, tempe- rement & iustement: de toutes lesquelles bonnes conditions ne nous en laissent pas vne ceux qui crient, que le bien souuerain de l'homme gist au ventre, & qu'ils n'achetteroient pas toutes les vertus ensemble d'un denier percé. si lon en chassoit

de tout poinct & de tous costez la volupté. Et en D
leurs discours qu'ils font de l'ame, & des Dieux, ils
tiennent que l'ame perit quand elle est separee du
corps, & que les Dieux ne se meslent point de noz
affaires. Ainsi les Epicuriens reprochent aux autres
philosophes que par leur sapsience ils ostent la vie
à l'homme: & les autres à eux, qu'ils enseignent les
hommes à viure laschement & bestialement. Et
quant à cela, il est semé par cy par là dedans les
escripts d'Epicurus, & respandu par toute sa philo-
sophie. Mais ce Colotes icy en a extraict quelque
paroles vuides de sens & de substance, & en tire E
quelques parties comme des lambeaux, sans argu-
ments quelsconques pour les prouuer, ou pour
les donner à entendre, dont il a composé son liure,
comme vn recueil ou vn tableau de monstres: ce
que vous sçauiez mieux que nuls autres, par ce que
vous auez tousiours en main les œuures des an-
ciens. Si me semble que comme le Lydien, il
n'ouure pas vne seule porte contre luy, ains qu'il
enveloppe Epicurus en beaucoup de tresgran-
des doubtes & difficultez: car il commence à De-
mocritus, lequel reçoit de luy vn beau salaire de F
son apprentissage, estant certain qu'Epicurus luy
mesme s'appella long temps Democritien, ainsi
comme d'autres le disent, & mesmement Leon-
teus, l'vn des plus sublins disciples d'Epicurus, en
vne lettre qu'il escrit à Lycophon, disant, qu'Epi-
curus honoroit Democritus, à cause qu'il auoit le
premier attainct vn peu de loing la droite & saine
intelligéce de la verité, & que generalement tout
le

A le traicté des choses naturelles s'appelloit Democritien, par ce que Democritus le premier estoit tombé sur les principes, & auoit rencontré les premiers fondeméts de la nature. Et Metrodorus dit tout ouuertemét de la philosophie: Si Democritus n'eust ouuert & enseigné le chemin, Epicurus ne fust iamais arriué à la sapience. Et s'il est vray ce que cestuy -cy dit, que viure selon les opinions des autres philosophes, ce n'est pas viure, Epicurus estoit doncques vn sot, qui suiuoit Democritus, lequel le conduisoit à non viure. Et reprint en luy

B premierement, que supposant que chasque chose ne soit point plustost telle que telle, il confond par là toute la vie humaine. Mais il s'en fault tant que Democritus ait eu ceste opinion, que nulle chose ne soit plustost telle que telle, qu'il en combatit alencontre du Sophiste Protagoras qui l'auoit dit, & escriuit plusieurs bons argumés concluans alencontre, lesquels ce beau Colotes ne veit ny ne leut iamais, non pas en songe, ains s'est abusé à faulte d'entendre vn passage qui est en ses œuures, là où il determine que Den n'est pas plus que Meden,

C nommant en ce lieu la Den le corps, & Meden le vuide, voulant entendre que le vuide auoit sa propre nature & subsistance aussi bien comme le corps. Mais celuy qui est d'opinion que nulle chose n'est plustost telle que telle, se sert de l'vne des sentences d'Epicurus, en laquelle il dit, que toutes les apprehensions & imaginations que nous donnent les sentimés sont veritables: car si deux hommes qui diront, l'vn ce vin est rude, l'autre ce vin

est doux, ny l'un ny l'autre ne ment en son sentiment, pourquoy est-ce que le vin sera plustost rude que doux? Lon verra bien souuent qu'un mesme baing l'un le trouuera chaud, l'autre le trouuera froid, par ce que l'un commandera que lon y verse de l'eau froide, l'autre de la chaude. Lon dit qu'il y eut vne dame Lacedemoniene qui alla pour visiter Berenice, la femme du Roy Deiotarus, mais quand elles furent pres l'une de l'autre, elles se tournerent incontinent arriere, l'une abhorissant la senteur du beurre, l'autre du parfum. Si doncques le sentiment de l'un n'est point plus veritable que le sentiment de l'autre, il est aussi vray semblable que l'eau n'est point plus chaulde que froide, & que le parfum & le beurre ne sont point plustost bien odorans que puants: car si quelqu'un dit qu'il sera vn à l'un, & autre à l'autre, sans y penser il affermera qu'il sera l'un & l'autre tout ensemble. Et puis ces proportions & conuenances des pores ou petits pertuits des sentiments dont ils babillent tant, & les diuerses meslanges des semences qu'ils disent estre esparfes par toutes les faueurs, odeurs & couleurs, ne conduisent elles pas manifestement les choses à n'estre point plustost vnes qu'autres? Car ceux qui pensent que le sentiment se trompe & qu'il mente, par ce qu'ils voyët de contraires euenements en ceux qui vsent de mesmes obiects, ils sauuent ceste obiection en enseignant que toutes choses estants meslees & confuses ensemble, l'une est neantmoins plus sortable & plus conuenable à l'un, & l'autre à l'autre: au

A moien de quoy il ne se fait pas attouchement ny comprehension d'une mesme qualité, ny l'obiet n'emeut pas egaleement tous de toutes ses parties, ains rencontrant chascun seulemēt celles ausquelles il a le sentiment proportionné, ils ont tort d'opiniastrer que la chose soit coloree ou non, blanche, ou non blanche, pensans establir leurs sentimens en destruisant ceux des autres: là où il ne fault pas ny combattre contre les sentimens, par ce que tous touchent à quelque qualité (chascun puisant, comme d'une viue & large fontaine, de ceste

B confuse meslange, ce qui luy est sortable & conuenable) ny accuser le tout en touchant seulement à des parties, ny estimer que tous doiuent souffrir vne mesme chose, attendu que l'un souffre par vne qualité & puissance, & l'autre par vne autre. Fault il donc maintenant douter qui sont ceux qui mettent en auant ceste opinion, que les choses ne soient point plustost telles qu'autres, sinon ceux qui tiennent que tout ce qui est sensible soit vne meslange composee de routes qualitez ensemble, comme vn instrument d'orgues où il y a

C de tous ieux? Ils confessent, que toute regle, toute touche, & toute certitude de iuger est perdue, fil n'y a pas vn obiet sensible qui soit pur & simple, ains que chascun en soit plusieurs. Voyez à ce propos ce que Polyenus au conuiue d'Epicurus discours & dispute de la chaleur du vin: car il luy demande, Dis tu Epicurus, que le vin n'eschauffe pas? Quelqu'un respōd, N'affirme pas que vniuersellemēt le vin eschauffe, mais bien que telle quan-

tité de vin eschauffe vn tel. Et puis y adioustant la **D**
 cause, il allegue les espanchemens & dispersions
 des Atomes, & les compressions & conionctions
 des autres, quand le vin se vient à mesler avec le
 corps: Et puis il y adiouste ceste conclusion, Vni-
 uersellement doncques ne fault il pas dire que le
 vin eschauffe, mais bien d'une telle nature ainsi
 disposee, & en telle quantité, & qu'une autre en
 telle quantité, il la refroidit. Car en tel amas il y
 a des natures & complexions, desquelles il se com-
 poseroit du froid, si besoing estoit, & estants con-
 ioinctes à d'autres, elles rendroient vne vertu re- **E**
 frigerante. Voyla pourquoy se trompent les vns
 disans le vin estre vniuersellement eschauffant, &
 les autres vniuersellement refroidissant. Celuy
 donc qui dit estre deceus & trompez plusieurs qui
 tiennent que ce qui eschauffe soit eschauffant, & ce
 qui refroidit soit refroidissant, luy mesme se trom-
 pe, s'il ne pense qu'il s'ensuit de ce qu'il dit, que vne
 chose n'est point plus telle qu'une autre. Il adiou-
 ste puis apres, que bien souuent le vin entrant de-
 dans vn corps ny porte ny vertu ny eschauffante
 ny refroidissante, ains que estât remuee & agitee la **F**
 masse du corps, & se faisant vne transposition des
 parties, les atomes qui produisent le chaud s'assem-
 blent maintenant en vn, & pour leur multitude
 apportent vne chaleur & inflammation au corps:
 & maintenant au rebours se desassemblants, ils re-
 froidissent. Mais encore est il tout manifeste, qu'il
 s'est auacé iusques à dire, que ce que lon appelle &
 que lon estime amer, doux, purgeant, dormitif, lu-
 mineux,

A mineux, que nul de toutes ces choses n'a vne en-
 tiere & parfaite qualité & propriété de produire
 tels effects, ny de faire plustost que de souffrir,
 quand ils sont dedans les corps, mais qu'ils y pren-
 nent autre & autre temperature & difference. Car
 Epicurus mesme en son second liure alencontre de
 Theophraste, disant que les couleurs ne sont pas
 attachees aux corps, ains qu'elles s'y engendrent,
 selon certaines situations & positions à la veuë de
 l'homme: Par ceste raison, dit il, le corps n'est point
 plustost coloré que sans couleur. Et vn peu au des-
B sus, de mot à mot il escrit ainsi, Mais sans cela ie ne
 sçay comment on peult dire que ces corps qui sont
 en tenebres aient couleur, combien que bien sou-
 uent l'air egalement tenebreux, estant espandu
 alentour, les vns distinguent les diuersitez des cou-
 leurs, les autres ne les apperçoient point, à cause
 de l'imbécillité de leur veuë: & puis entrans de-
 dans vne maison tenebreuse & obscure, nous ne
 voions d'arriuee nulle diuersité de couleur, & quãd
 nous y auons vn peu esté, nous en voions. Parquoy
 il faudra doncques dire, que chascque corps ne sera
C point plustost coloré, que nō coloré. Or si la cou-
 leur est relative, & a son estre du regard d'autre
 chose, aussi l'est donc le blanc, & le bleu aussi: & si
 les couleurs le sont, aussi le serōt le doux & l'amer,
 tellement que lon pourra veritablement affermer
 de toute qualité, qu'elle ne sera point plus tost telle
 que non telle, car elles le seront à ceulx qui seront
 ainsi disposez, & à ceulx qui ne le seront pas, aussi
 ne seront elles pas telles. Colotes donc respand

sur foy mesme, & sur son maistre, le boubrier & la D
fange, où il dit que sont embourbez ceux qui tien-
nent, que les choses ne sont point plus tost telles
que telles : mais est-ce en cela tant seulement, que,
comme dit le commun prouerbe,

! Tout vlcéré il veult guarir les autres? !

Non certainement, ains encore beaucoup plus en
sa seconde reprehension, il chasse sans s'en prendre
garde, Epicurus avec Democritus hors de ceste
vie. Car il met en auant que Democritus dit, que
les Atomes sont aux sentiméts couleur, sont doux,
sont amer par certaine ordonnance. Et que celuy E
qui vse de ceste raison la, & tient ceste opinion, ne
sçauroit luy mesme imaginer, s'il est mort ou vif.
Je ne sçay que contredire à ce propos la, mais bien
dis-ie que cela est autant inseparable des sentences
& doctrines d'Epicurus, comme eulx disent que la
figure & le pois sont inseparables des Atomes. Car
qu'est-ce que dit Democritus? Qu'il y a des sub-
stances en nombre infiny qui s'appellent Atomes,
par ce qu'elles ne se peuent diuiser, differentes
toutefois, sans qualité quelconque, impassibles, qui
se meuent, dispersez çà & là en vuide infiny, & F
quand elles s'approchent les vnes des autres, ou
qu'elles s'assemblent & conioignent, que de tels
assembléments l'un apparoit eau, l'autre feu, l'au-
tre arbre, l'autre homme, & que tout est Atomes,
qu'il appelle aussi Idees, & qu'il n'est rien autre,
parce qu'il ne se peult faire generation de ce qui
n'est pas, comme aussi ce qui est ne peult deuenir
rien, par ce que les Atomes sont si fermes, qu'ils ne
peuent

4 peuuent ne se changer & alterer, ny souffrir. Parquoy il ne se peult faire couleur de ce qui est sans couleur, ny nature ou ame de ce qui est sans qualité & sans ame. Democritus doncques est reprehensible en ce qu'il ne confesse pas ce qui aduient aux principes, ains suppose des principes auxquels cela aduient. Car il ne falloit pas supposer les principes immuables, ou bien en le supposant ne s'appercevoir pas que toute qualité s'en alloit quant & quant: Et de le nier apres que lon s'apperçoit de l'absurdité qui s'en ensuit, c'est vne impudéce tresgrande. Epicurus dit, qu'il suppose bien les memes principes que fait Democritus, mais qu'il ne dit pas que le doux, le blanc, & les autres qualitez, soient par certaine ordonnance. Or sil ne confesse pas qu'il die ce que toutefois il dit, ce n'est que sa coustume de faire: car c'est comme quand il oste la prouidéce diuine, & neantmoins il dit, qu'il laisse la pieté & deuotion enuers les Dieux: & disant que pour la volupté il choisit l'amitié, toutefois que pour ses amis il endure de tresgriefues douleurs, & qu'il suppose que l'vniuers est infiny, & toutefois il ne tollit pas le hault & le bas * *

6 Mais ce n'est pas comme quand on boit l'vn à l'autre à la table, où vous pouuez, prenant la couppe, boire tant que bon vous semble, & puis rendre le demourant: ains aux propos d'vn sage philosophe il se fault bien souuenir de ceste notable sentence,
 » Les Principes n'estants pas necessaires, les fins &
 » consequéces en sont necessaires. Il n'estoit doques pas necessaire de supposer, ou pour mieux dire de

desrober à Democritus, que les Atomes soient les **D** principes de l'vniuers: ou bien apres auoir supposé ceste doctrine, & s'estre pleu & glorifié des premieres vray-semblables & belles apparences d'icelle, il fault apres aussi aualler ce qu'il y a de fascheux, ou il fault monstrier comment des corps qui n'ont aucune qualité peuuent apporter aux autres toutes sortes de qualitez, par s'assembler & se conioindre ensemble seulement. Comme, pour prendre la premiere venuë en main, celle que nous appellons chaleur, dont est elle venuë, & comme s'est elle engendree és atomes, s'ils n'auoient point de **E** chaleur quand ils sont venus, ny ne sont deuenus chauds apres s'estre ioincts ensemble? Car l'vn presuppose qu'ils eussent quelque qualité, & l'autre qu'ils fussent idoines à en receuoir. Et vous dittes qu'il ne fault pas dire, que l'vn ne l'autre conuienne aux atomes, d'autant qu'ils sont incorruptibles: Comment donc Platon, Aristote, Xenocrates, ne produisent ils pas de l'or de ce qui n'est pas or, & de la pierre de ce qui n'est pas pierre, & plusieurs autres choses des quatre premiers simples corps? Ouy bien. Mais avec ces corps concourent **F** incontinent aussi les principes à la generation de chaque chose, portans quand & eulx de grandes contributions, c'est à sçauoir les premieres qualitez qui sont en eulx, puis quand viennent à s'assembler & ioindre en vn, le sec avec l'humide, le froid avec le chaud, le ferme avec le mol, c'est à dire, corps agés avec autres aptes à souffrir & à receuoir toute alteration & mutation, alors se fait la generation en passant

A passant d'une temperature en vne autre. Là où l'Atome estant seul est priué & destitué de toute qualité & force generatiue, & quand il vient à se rencontrer avec les autres, il ne peult faire qu'un bruit & un son, à cause de sa durezza & fermeté, & non autre accident. Car ils frappent & sont frappez tousiours, ne pouuans par ce moien composer ny faire un animal, vne ame, ou vne nature, mais non pas seulement un monceau ny un tas d'entre eulx mesmes, attendu qu'ils se heurtét & se desemparent l'un d'avec l'autre. Mais Colotes, cōme si
 B parloit à quelque Roy ignorant des lettres, attache derechef Empedocles en ce qu'il dit,

Je diray plus, il n'y a geniture
 Entre mortels, vie, mort, ny nature,
 Ains seulement meslange & vnion,
 Puis des meslez apres desvnion,
 Ce que nature ont appellé les hommes.

Je ne voy point, quant à moy, comment cela repugne & contrarie à la vie ny au viure, mesmement à ceux qui estiment qu'il n'y a point de generation de ce qui n'est pas, ny de corruption de ce qui est,
 C mais que l'assemblee & vnion des choses qui sont, s'appelle generation, & la dissolution & desvnion se nomme mort & corruption. Car qu'il ait pris nature pour generation, & qu'il l'entēde ainsi, luy mesme l'a declaré, quand il a opposé la nature à la mort: & si ceulx ne viuent pas, ny ne peuēt viure, qui mettent la generation en l'vnion, & la mort en la desvnion, que font ces Epicuriens icy autre chose? combien qu'Empedocles collant & conioin-

gnant les elements ensemble, par chaleurs, molles-
 ses & humiditez, encore leur donne il aucunement
 mixtion. & composition vnitiue: mais ceulx qui
 chassent & poulsent ensemble les atomes qu'ils di-
 sent estre immuables & impassibles, ils ne compo-
 sent rien prouenāt d'iceulx, mais bien font ils plu-
 sieurs & continuels battements d'eulx. Car l'en-
 trelancement empeschant la dissolution, augmente
 d'auantage le froissement, & le conqussent, de
 maniere que ce n'est ny mixtion ny attachement
 & collemēt, ains vne combustion & combat qu'ils
 appellent selon eulx, generation. Et si les Atomes
 maintenāt se reculent pour le choc qu'ils ont don-
 né, maintenant se raprochent apres le coup passé,
 ils sont plus que le double du temps arriere les vns
 des autres, sans se toucher ny approcher, tellement
 qu'il ne se scauroit rien composer d'eulx, non pas
 corps mesmes sans ame: mais le sentiment, l'ame,
 l'entendement & la prudence, il n'est homme qui
 peult seulement penser ny imaginer, comment ils
 se pourroient former d'un vuide, & des atomes,
 lesquels ny à part quant à eulx, n'ont qualité quel-
 conque, ny passion ou alteration aucune, quand
 ils sont assemblez ensemble, attendu mesmement
 que cest assemblement n'est point vne incorpora-
 tion, & attachement ou liaison, ains vn battement
 & vn reiallissement: de maniere que selon la do-
 ctrine de ses gens icy, le viure vient à estre osté, &
 l'estre animal, attendu qu'ils supposent des princi-
 pes vuides, impassibles, inuisibles, & encore ne pou-
 uans admettre ny receuoir mixtion ou incorpora-
 tion

A tion aucune. Comment doncques est-ce qu'ils admettent & laissent la nature, l'ame, l'animal? Tout ainsi comme ils laissent le iurement, la priere, le sacrifice & l'adoration des Dieux, ainsi comme ils l'adorent de bouche & de parole, en les nommant & feignant seulement, ce que par leurs principes, & selon leurs doctrines ils ostent & abolissent totalement: ainsi que lon appelle ce qui est né la nature, & ce qui est engendré, la generation, comme ordinairement on nomme le bois mesme, la couppe & façon de bois: ou consonance & accord, les voix

B accordantes & consonantes. D'où luy est venu en l'entendement d'obiicer de telles paroles à Empedocles? Quel tort faisons nous à vous autres, si nous auons soing de nous mesmes, & si nous appetons certaines choses, & nous gardons de certaines autres? Car nous ne sommes pas vous autres, ny ne viuôs pas pour les autres. Mais on luy pourroit dire: N'ayes pas de peur, Colotes mon amy, il n'y a personne qui t'empesche que tu n'ayes soing de toymesme, enseignant que la nature de Colotes, c'est Colotes luy mesme, & non autre

C chose, ny que vous n'appetiez certaines choses: mais ces choses la sont les voluptez, en monstrant que ce n'est pas la nature des tartes, ny des marchepans, ny des fenteurs, ny de l'amour que vous appetez, ains ce sont tartes mesmes, & parfums, & femmes. Car le grammairien qui dit, la force d'Hercules, il ne nie pas pour cela Hercules, ny ceulx qui disent que consonances ou opinions sont seulement prolations, ne disent pas pour

cela que les sons & les apparences ne soient pas, **D**
 veu que quelques vns ostant & abolissans l'ame
 & la prudence, ne semblent pas abolir ny le viure,
 ny l'estre prudent. Et quand Epicurus dit, la na-
 ture des choses est le corps & le lieu d'iceux, le pre-
 nons nous comme sil vouloit dire, que la nature
 fust autre chose que les choses qui sont, comme la
 nature du vuide, le vuide mesme, comme certaine-
 ment la nature de l'vniuers, l'vniuers mesme? Et si
 quelqu'un luy demandoit, Que dis tu Epicurus,
 que cecy est le vuide, & cela est la nature du vuide?
 Non certes, dira il. Mais ceste communication de **E**
 noms l'un pour l'autre, n'est elle point en vsage
 par loy & coustume, ou non? Je le confesse. Qu'a
 doncques fait Empedocles autre chose, qu'entei-
 gner que la nature n'est autre chose que ce qui
 naist, ny la mort autre chose que ce qui meurt?
 Mais comme les poëtes bien souuent en langage
 figuré, formans comme vne image, disent,

Là demouroit querelle, trouble, & noise,

Là cœur maling, & volonté mauuaise:

aussi appellent plusieurs generation & corruption,
 l'assemblément & desassemblément des choses. **F**
 Mais tant s'en fault qu'il ait remué & osté ce qui
 est, ne qu'il contreuienne à ce qui euidemment ap-
 paroist, qu'il ne iette pas vne seule parole hors de
 l'accoustumé vsage, ains en'ostant toute la fraude
 figuree qui pourroit nuire & porter d'omage aux
 choses, il rend de rechef l'accoustumée & ordinai-
 re signification aux mots en ces vers,
 Meilez ensemble ores vn homme ils font,

A Ores des bois & des bestes ils font,
 Ou des oyseaux, & cela est nature:
 Puis se venant à rompre la ioincture,
 Le depart d'eulx s'appelle triste mort.

Toutefois ie dy moy mesme que Colotes alleguāt cela, n'entend pas qu'Empedocles n'oste pas les hōmes, les bestes, les buissons, ny les oyseaux qu'il dit estre composez des elements meslez ensemble: & enseignant comment se trompent ceulx qui accusent & appellent ceste composition la, nature & vie: & ceste dissolution infortune malheureux, &

B mort cuitable: il n'a pas osté le moien d'vser des paroles accoustumees touchāt cela. Quant à moy il me semble qu'Empedocles ne remue point en ces lieux-la la façon de proferer & prononcer par paroles, ains realement estre en different de la generation des choses qui sont, que les vns appellent nature. Ce qu'il montre manifestement par ces vers,

Fols, ignorants, de loing pas ils ne voient,
 Qui pouuoir rien venir en estre croient
 Qui parauant ne fust aucunement,

C Ou bien perir du tout entierement.

Car ces vers la crient assez hautement à ceulx qui ont des oreilles, qu'il ne tollit pas la generation, ains la procreation de rien, ny la corruption, ains la totale destruction, c'est à dire, reduction à rien.

Car à celuy qui ne voudroit pas si sauagement & si sottement, ains plus doucement calomnier, les vers qui suiuent apres donneroient occasion coloree de charger Empedocles au cōtraire, là où il dit,

A me sembloit estre plus adherente & tenante d'une
 fuite aux premieres reprehensions : reuenons
 maintenant à Parmenides. Colotes dit qu'il a mis
 en auant des honteuses & villaines inuentions So-
 phisticques, & toutefois par ses sophisteries ce per-
 sonnage la n'a point rédu l'amitié moins honoree,
 ny la concupiscence des voluptez plus audacieuse
 & effrene. Il n'a point osté à l'honnesteté la pro-
 priété d'attraire à soy, ny d'estre venerable & re-
 commendable de soy. Il n'a point perturbé les opi-
 nions que lon doit auoir des Dieux : ains aiant dit,
 B que le tout est vn, ie ne voy pas comment pour ce-
 la, il vous empesche de viure. Car quand Epicurus
 mesme dit, que le tout est infiny, qu'il n'est point
 engendré, ny point perissable, qu'il ne peut croi-
 stre ny diminuer, il parle de l'vniuers, cōme d'une
 feule chose. Et au commencement du traitté de
 ceste matiere, aiant dit, que la nature de l'vniuers
 consiste és petits corps indiuisibles, qu'il appelle
 atomes, & au vuide, il fait la diuision, comme
 d'une chose en deux, dont l'une à la verité n'est
 point subsistante, aussi l'appellez vous impalpable,
 C vuide, sans corps, de maniere qu'en ceste sorte, le
 tout vient à vous estre aussi vn, si vous ne voulez
 vser de vaines paroles & vuides de sens, en parlant
 du vuide, en combattant en vain alencontre des
 anciens. Mais, les corps atomes (direz vous) sont
 en quantité infinie, selon l'opinion d'Epicurus, &
 est chascune chose qui nous apparoit cōposée d'i-
 ceulx. Or voy maintenant quels principes donc
 vous supposez de la generatiō, l'infiny & le vuide,

dont cestuy-cy est sans action, sans passion & sans **D** corps, & celuy la est desordonné, sans raison, incomprehensible, se confondant & dissolvant soy-mesme, par ce qu'il ne peult estre contenu, compris, ny limité. Mais Parmenides n'a osté ny le feu, ny l'eau, ny les rochers & precipices, ny les villes, comme dit Colotes, qui sont basties & habitees tant en Europe, comme en Asie, attendu qu'il dit que le monde est Iupiter : & que meslant les elements, & le lumineux & le tenebreux, de ces choses, & par ces choses il compose tout ce qui est au monde. Car il a beaucoup escrit de la terre, & du **E** ciel, du Soleil & de la Lune, & des astres, & a parlé de la generation des hommes, & comme ancien philosophe, il n'a rien laissé en nature, dont il n'ait parlé & escrit sa doctrine propre, non point empruntée d'ailleurs, & n'a point fait de difference entre les communes & principales sentences. D'avantage il a le premier devant tous autres, & devant Socrates mesme, entendu qu'en la nature il y a vne partie subiecte à l'opinion, & vne autre intelligible, & celle qui est sous l'opinion inconstante, vagabonde & errante en plusieurs passions **F** & plusieurs mutations, subiecte à diminution & augmentation, & à estre autrement & autrement disposée, & non pas tousiours d'une sorte, ny enuers vn mesme. Et quant à la partie intellectuelle, c'est tout vne autre espece,

Constante, entiere, & non point generable, comme il dit, tousiours semblable à soy mesme, & perdurable en estre. Colotes calomniant cela, en
fatta-

A fattachant aux paroles non pas aux choses, & en oppugnant ce propos, non de fait mais de paroles, il afferme que Parmenides oste & subuertit toutes choses egalelement en vn mot, supposant que tout soit vn : mais au contraire il ne tollit ny l'vne ny l'autre partie de la nature, ains rend à chascune ce qui luy appartient, & qui luy est conuenable. Car il met l'intelligible en l'espece ou idee de l'vn, & de ce qui est, disant qu'il est proprement, parce qu'il est eternal & incorruptible : & vn, parce qu'il se ressemble tousiours à soy mesme, & ne reçoit **B** point de diuersité : & au reng de l'incertain, desordonné, & tousiours mouuant, ce qui est subiect au sentiment : desquelles deux parties chascune a son propre iugement en l'ame,

Verité l'vne & certaine science,
qui concerne ce qui est intelligible, & tousiours
d'vne mesme sorte egalelement:

L'autre douteuse opinion humaine,

Dont la foy n'est pas seure ny certaine,

par ce qu'elle verse en choses qui reçoient toutes fortes de diuersitez & de mutations, & de passions: **c** & toutefois comment eust il laissé le sentiment & l'opinion, s'il n'eust quant & quant laissé ce qui est opinable & sensible ? on ne le sçauroit maintenir. Mais pource qu'à ce qui est veritablement appartient le demourer en estre, & que les choses sensibles tantost sont, & tantost ne sont pas, ains passent tousiours d'vn estre en vn autre, & changeant perpetuellement, de maniere qu'elles meritent plus tost vne autre appellation que celle de l'estre. Ce

propos la de dire que tout soit vn, n'est pas oster la pluralité des choses sensibles, ains est monstrier la difference qu'il y a d'icelles avec les intelligibles. Laquelle differēce Platon au traitté des Idees voulant encore plus declarer, donne vne prise à Colotes. Et pourtāt me semble il raisonnable de prendre tout d'vn train de reng ce qu'il a aussi dit alencontre de luy. Mais premierement nous considerons la diligence, & le grand & profond sçauoir de ce philosophe Platon, attendu qu' Aristote, Xenocrates, Theophrastus, & tous les Peripateticques ont fuiuy sa doctrine. Car en quelle partie inhabitable du monde est-ce que tu as, Colotes, escrit ton liure, où tu as compris toutes ces reprehensions contre tels personnages, dont tu n'as iamais leu les œuures, ny pris en main les liures d'Aristote du Ciel & de l'Ame, ny ceux de Theophrastus contre les naturels, ny le Zoroastres d'Heracitus, celuy des enfers, celuy des doubtes naturelles, celuy de Dicæarchus de l'ame, en tous lesquels liures ils cōtredisent & repugnent és plus grands & principaux poinçts de la Physique à Platon? & mesme le prince des autres Peripateticques Straton ne conuient pas mesme en toutes choses avec Aristote, & a toutes cōtraires opinions à celles de Platon, touchant le mouuement, touchant l'entendement, de l'ame, de la generation: en fin il tient que le monde n'est point vn animal, & que ce qui est selon nature fait ce qui est selon fortune, parce que le cas fortuit a donné le commencement, & puis tous les effects naturels en ont esté paracheuez apres.

Quant

A Quant aux Idees, touchant lesquelles Aristote reprend Platon, remuât ceste matiere à tout propos, alleguant toutes doubtes alencontre en ses liures des Ethicques, de la Physique, en ses dialogues exoteriques, plus opiniaſtremment que philosophiquement, comme il semble à beaucoup de gens, comme ſeſtant propoſé d'abaiffer & meſpriſer la philosophie de Platon, tant il eſt loing de la vouloir enſuiure. Quelle impudente temerité doncques eſt-ce, que n'ayant pas ſçeu ne veu ce que ces perſonnages ont eſcrit, & quelles ont eſté leurs

B opinions, aller controuuer ce qu'ils n'ont iamais eſcrit ne pëſé, & en ſe faiſant à croire qu'il reprouue & refute les autres, produire vne preuue eſcrite de ſa main propre, qui l'argue & le conuainct luy meſme d'ignorãce & de temeraire & eſtrôtee impudence, en diſant que ceux qui cõtredifent à Platon luy conſentent, & que ceux qui luy repugnent le ſuyuent? Platon, ce dit il eſcrit, Que les cheuaux pour neant eſtoient cheuaux, & les hommes autli. Et en quel œuure de Platon eſt-ce que Colotes a trouué cela caché? car quant à nous nous liſons en

C tous ſes liures, que les cheuaux ſont cheuaux, & les hommes hommes, & que le feu eſt par luy eſtimé feu, par ce qu'il tient que chaſcune de ces choſes eſt ſenſible & ſubiette à l'opinion. Mais ce beau Colotes icy, comme celuy qui ne ſçait rien en philosophie, a pëſé que ce fuſt vnẽ meſme choſe & tout vn de dire, l'homme n'eſt point, & l'homme eſt ce qui n'eſt point. Mais Platon eſtime qu'il y a merueilleuſement grande difference entre n'eſtre

point du tout, & estre ce qui n'est point, parce **D** que le premier emporte l'aneantissement & abolissement de toute substance, & l'autre monstre la difference qu'il y a entre ce qui participe, & qui est participé, laquelle difference les suiuaunts qui sont venus depuis ont distingué en genres, especes, differences, propres & communes qualitez & accidens seulement, & ne sont point môtez plus hault, tombans en plus raisonnables doubtes & difficultez. Mais il y a proportion entre ce qui participe & qui est participé, côme de la cause à la matiere, de l'original à l'image, & de la puissance à la passion. En quoy principalement differe ce qui est par soy & tousiours mesme, de ce qui est autre, & non iamais d'une mesme sorte, par ce que l'un ne fut iamais qu'il ne fust, ny ne sera iamais qu'il ne soit, & à ceste cause il est veritablement & totalement subsistant: & l'autre, ce qu'il n'a pas de soy, ains le participe & le prend d'ailleurs, encore ne l'a il pas ferme & constant, ains en sort par son imbecillité, par ce que la matiere en l'espece glisse & coule tousiours, & reçoit plusieurs passions & plusieurs mutations enuers l'image de la substance, **F** tellement qu'elle remue & branle tousiours. Tout ainsi donc, comme celuy qui dit que Platon n'est pas l'image de Platon, il n'oste pas le sentiment ny la subsistâce de l'image, ains monstre la difference de ce qui est par soy, & d'un autre qui est au regard de celuy la: aussi n'ostent ny la nature, ny l'usage, ny le sentiment des hommes, ceulx qui disent que chascun de nous est par participation de l'Idée d'une

A ne cōmune substance, l'image de ce qui nous baille sa similitude à la nostre naissance. Car ny celuy qui dit que le feu n'est pas le fer rouge de feu, ny la Lune le Soleil, ains comme dit Parmenides,

Flambeau portant sa lumiere empruntee

A l'environ de terre la nuictée,

ne tollit pas l'usage du fer, ny la nature de la Lune, si l ne disoit que ce n'est pas vn corps, & qu'il n'est pas enluminé, alors il contrediroit aux sentiments, comme celuy qui ne laisse ny corps ny animal, ny generation, ny sentiment : mais celuy qui par opinion imagine que ces choses la ne subsistent que par participation, & cōbien elles sont esloingnees & distantes de ce qui tousiours est, & qui leur baille l'estre, il n'omet ny ne laisse pas pour cela le sensible, ains dit que l'intelligible est, ny ne tollit & abolit pas les effects qui se font & qui se voyent en nous, ains monstre à ceux qui le suiuent qu'il y en a de plus fermes & de plus stables quant à l'essence, par ce qu'elles ne naissent ny ne perissent point, ny ne souffrent aucunement, & enseigne en touchant la difference plus puremēt par les noms, à nommer les vnes naissantes, les autres subsistantes. Et le mesme entreuint aussi aux modernes, lesquels priuent de l'appellation de substance plusieurs grādes choses, comme le vuide, le temps, le lieu, & generally tout le genre entier des dictz, où sont comprises toutes choses vraies, qui sont & ne sont, & toutefois ils en disent aucunes estre, & en vsent tant en la vie qu'en la philosophie, comme de choses subsistantes & existentes.

Mais ie demanderois volontiers à nostre accusa- **D**
 teur, si en leurs affaires ils n'apperçoient pas eux
 mesmes ceste difference, par laquelle aucunes
 choses sont permanentes & immuables de leurs
 substances, comme ils disent que les Atomes en
 tous temps sont tousiours d'une mesme sorte, à
 cause de leur impassibilité & dureté, & les com-
 posez d'iceux sont tous flexibles, muables, nais-
 sans & perissans, d'autant que infinies images s'en
 departent tousiours & en sortent, & autres infi-
 nies, comme il est vraysemblable, y recourent de
 l'air environnant, & remplissent ce qui estoit dimi- **E**
 nué de la masse qui se diuersifie & se trāsuase ainsi
 par ceste permutation, attendu mesmement que
 les Atomes qui sont au fond & au cœur de la mas-
 se ne peuvent iamais cesser de se remuer ny de s'en-
 trechocquer les vns les autres, cōme ils disent eux
 mesmes. Ainsi y a il entre les choses vne telle dif-
 ference de substance. Et neantmoins Epicurus est
 plus sage & plus docte que Platon, en ce qu'il ap-
 pelle toutes choses egaleement subsistantes, le vui-
 de impalpable & le corps solide, les principes &
 les composez: & qu'il estime que l'eternel parti- **F**
 cipe de commune & non propre substance avec
 ce qui naist, & ce qui est immortel avec ce qui se
 corrompt, & les natures impassibles, perdurables
 & immuables, & qui ne peuvent iamais decheoir
 ny estre priuees de leur estre, & celles cy qui ont
 leur estre en souffrir & en changer, & qui iamais
 ne demeurent en vn mesme estat. Mais quant bien
 Platon auroit merité le plus iustement du monde
 d'estre

A d'estre condamné d'auoir failly en cela, encore ne faudroit il qu'il fust condamné enuers ces mesfieurs icy qui parlent plus correctemēt & plus elegammēt, sinon que pour auoir cōfōndu les noms, & impropremēt parlé, non pas pour auoir osté les choses, ny pour nous auoir tiré hors de la vie, pour ce qu'il auroit appellé les choses naissantes, & non pas existentes comme ceux-cy. Mais pource que nous auons passé par dessus Socrates apres Parmenides, il le nous fault reprendre. Colotes doncques a commencé d'entree, comme lon dit en commun

B prouerbe, à remuer celuy de la ligne sacree, & en aiant recité comme Cherephon auoit apporté vn oracle de Delphes touchāt Socrates que nous sçauons tous, il dit ainsi : Or quant à tout ce narré de

» Cherephon, pour ce qu'il est fort fascheux, plein

» de faulseté, & sophistique, nous le laisserōs là. Platon doncques est aussi fascheux qui l'a couché par escript, à fin que ie ne die rien des autres: & encore plus fascheux les Lacedemoniens qui ont celuy de Lycurgus entre leurs plus anciēnes & plus authentiques inscriptions. Aussi fut ce vne feinte sophistique,

C que l'oracle de Themistocles, par lequel il persuada aux Atheniēs d'abandonner leur ville, & desfeit en bataille nauale le barbare Xerxes. Aussi sont fascheux tous les anciens legislators & fondateurs des Grecs, qui ont estably la plus part des tēples, sacrifices & festes par respōse de l'oracle Pythique. Mais fil est ainsi que l'oracle apporté de Delphes touchant Socrates, homme rauy de zeile diuin à la vertu, par lequel il est appellé & déclaré

sage, soit fascheux, feint & sophistique, de quel
 nom appellerons nous voz cris, voz bruits, voz
 hurlemens, voz plaudiffemens, voz adorations
 & canonisations dont vous exaltez & celebrez ce-
 luy qui vous incite & enhorte à voluptez conti-
 nuelles, qui en vne sienne missiue à Anaxarchus,
 » escrit en ceste sorte: Quant à moy, ie vous inuite &
 » conue à continuelles voluptez, & non pas à vai-
 » nes & inutiles vertus, & qui n'ont que des espe-
 » rances turbulentes de faiçts incertains. Et toute-
 » fois Metrodorus escriuant à Timarchus luy dit,
 » Nous ferons quelque chose de beau & sur des
 » beaux, prouueu que nous ne nous laissons point
 » plonger à des reciproques affectiōs, ains que nous
 » retirans de ceste vie basse & terrestre, nous nous
 » esleuions iusques aux veritablement sainctes &
 » diuinement reuelees cerimonies & mysteres d'E-
 » picurus. Et Colotes luy mesme escoutant vn iour
 Epicurus qui discouroit des choses naturelles, sou-
 dain s'alla ietter à ses pieds luy ambrassant les ge-
 noulx, & luy mesme Epicurus s'en glorifiant, l'es-
 » crit: Car comme si tu eusses adoré ce que lors ie
 » disois, il te prit soudainement vne enuie, qui ne
 » procedoit point de cause naturelle, de me venir,
 » prosterné en terre, ambrasser les genoulx, & d'vser
 » de toutes les prehensions enuers nous dont vsent
 » ordinairement ceux qui adorent & qui prient les
 » Dieux, tellement que tu feis que reciproquement
 » aussi ie te deisiay & adoray. Je pardonne certaine-
 » ment à ceux qui disent qu'ils achetteroient tout ce
 » que lon voudroit vn tableau où ceste belle histoire
 fust

A fust depeinte, de l'un qui se prosternast à genoulx,
 & ambrassast les iambes de l'autre, qui mutuelle-
 ment le cõtre-adorast, & luy feist ses deuotes prie-
 res. Mais toute fois ce deuot seruice, combien qu'il
 eust esté bien attitré & composé par Colotes, ne
 receut pas le fruiet condigne qu'il attendoit : car il
 ne fut pas déclaré sage, ains luy fut dit seulement,
 » Va t'en & te pourmene incorruptible, & nous re-
 » pute aussi semblablemēt incorruptibles. Ces gens
 icy sachans bien en leurs consciences qu'ils ont vsé
 de si folles paroles, qu'ils ont eu de tels mouue-
B ments, & de telles passions, osent neátmoins enco-
 re appeller les autres fascheux. Et Colotes vraye-
 ment, aiant fait ces belles premisses touchant les
 sens naturels, que nous mangeons de la viande, &
 non pas du foin ny du fourrage, & que quand les
 riuieres sont grandes nous les passons à batteaux,
 & quand elles sont basses & faciles à passer nous
 » les trauerons à gué, il exclame puis apres, Tu vsois
 » bien de vaines paroles ô Socrates, & tenois d'au-
 » tres propos à ceux qui parloient à toy, & faisois
 » d'autres choses. Mais ie voudrois bien sçauoir, cõ-
C ment les propos de Socrates estoient vains & ar-
 rogants, veu qu'il disoit ordinaiemēt qu'il ne sçau-
 uoit rien, mais qu'il apprenoit continuellement, &
 alloit enquerant & cherchant la verité. Mais si tu
 fusses tombé en tels propos de Socrates, comme
 » sont ceux qu'Epicurus escrit à Idomeneus: Enuoye
 » nous doncques des premisses pour le traitement
 » de nostre sacré corps, pour nous & pour noz en-
 » fans : Il me prent enuie de te demander, de quels

termes plus arrogants & plus insolents eusses tu^D
 peu vser? Et toutefois que Socrates ne parlât au-
 trement qu'il ne faisoit, il en baille de merueilleu-
 ses preuues en la bataille de Delium, & en celle de
 Potidee, ce qu'il fait durant le temps des trente
 tyrans, alencontre d'Archelaüs, enuers le peuple:
 sa pauureté, sa mort, ses deportements en tous
 ces endroits la ne respondent ils pas aux propos &
 à la doctrine de Socrates? C'estoit là la vraye preu-
 ue, pour monstrer qu'il faisoit autrement qu'il ne
 parloit, si se proposant que la fin de l'homme fust
 de viure ioyeusement, il a ainsi veü. voila quant^E
 aux iniures qu'il dit à Socrates. Au demourant,
 il ne s'apperçoit pas qu'il se treuve luy même en-
 taché du crime d'impieté qu'il luy obiice: car l'v-
 ne des sentences & propositions d'Epicurus est,
 Que personne ne se doit irreuocablement & im-
 muablement rien persuader, sinon le sage. Or puis
 que Colotes n'estoit pas sage, apres mesmes les
 adorations qu'il auoit faites à Epicurus, qu'il face
 premierement ces questions & interrogatoires la
 siennes, comment est-ce qu'il mange de la viande
 & non du foin, & pourquoy il vest alentour de^F
 son corps vne robbe, & non alentour d'vne co-
 lonne, veu qu'il ne se persuade pas irreuocablemēt
 que ce soit viande que la viande, ny robbe que la
 robbe. Et s'il fait cela, & ne passe pas les riuieres à
 gué quand elles sont grandes & grosses, & s'il fuit
 les serpens & les loups, ne se persuadant point irre-
 uocablement, que rien de cela soit tel comme il
 semble, ains faisant chaque chose selon ce qui luy
 appa-

A apparoist : l'opinion des sentiments n'empeschoit doncques non plus Socrates d'vser semblablement de ce qui luy apparoissoit, car le pain n'aparoissoit point pain à Colotes, ne le foin foin, pour ce qu'il auoit leu les sainctes regles descendues du ciel d'Epicurus: ny Socrates pour sa vanité, ne prenoit point fantasie que du pain fust du foin, & du foin du pain, car ces sages icy ont les opinions & les propos meilleurs que nous. Mais le sentir & le receuoir impressiõ en l'imaginatiue, est commun aussi bien aux ignorants comme aux

B sages, par ce que cela procede de causes où il n'est point besoing de discours de raison. Mais la proposition qui dit, que les sentiments naturels ne sont pas suffisans ne certains assez pour faire foy entiere, n'empesche pas que chasque chose ne nous apparoisse, ains nous en laissant vser aux actions selon ce qui apparoist, elle ne nous permet pas d'y adiouster foy comme estants du tout en tout veritables & sans erreur: car il suffit qu'en ce qui est necessaire & vtile à l'vsage, il n'y a rien de meilleur. Mais quant à la science & de cognoissance & de

C perfection, qu'une ame de philosophe desire auoir de chasque chose, les sens ne l'ont pas. Et quant à cela, Colotes nous donnera encore occasion d'en parler ailleurs, car il obiice ceste mesme objection à plusieurs autres. Au reste, ce en quoy il se mocque plus de Socrates, & la vilipede le plus, c'est de ce qu'il demande que c'est de l'homme, & fait le niais, dit il, affirmât qu'il ne le sçauoit pas bien, il appert que luy mesme qui s'en mocque n'a

iamais pensé à cela : là où Heraclitus au contraire, **D**
 comme aiant fait quelque chose de grand & di-
 gne, dit de soy, Je me suis cherché moy mesme. Et
 des sentences qui sont escrites aux portes du tem-
 ple d'Apollo en Delphes, la plus digne & plus di-
 uine semble celle la, Cognois toy mesme. Ce qui
 donna à Socrates occasion & commencement de
 doubter & enquerir de cela, ainsi comme Aristote
 le met en ses demandes Platoniques. Et cela sem-
 ble ridicule & digne de mocquerie à Colotes, &
 m'esbahis comment il ne se mocque aussi de son
 maistre mesme qui en fait autant, quand il escrit **E**
 ou qu'il discours de la substance de l'ame, & du
 principe du composé: car si ce qui est constitué des
 deux, comme ils veulent eux, de l'ame & du corps,
 est l'homme, celuy qui cherche la nature de l'ame,
 cherche consequemment aussi la nature de l'hom-
 me en son principal principe. Et qu'elle soit bien
 difficile à comprendre par la raison, mais par le
 sens exterior de tout poinct incomprehensible,
 ne l'apprenons pas de Socrates, qui est vn homme
 vain & disputateur sophistique, mais prenons le
 de ces sages icy, lesquels forgent & constituent la **F**
 substance des facultez de l'ame en la chair, par les-
 quelles elle donne chaleur, mollesse & roideur
 au corps, de ie ne sçay quoy de chaud & d'esprit
 aéré, & ne penetrent pas iusques à ce qui est le
 principal, ains demeurent las & recreus en che-
 min: mais ce dont elle iuge, dont elle se souuiet,
 dont elle aime & hait, & bref la raison qui preuoit
 & discours, se faiët puis apres de ie ne sçay quelle
 qualité

A qualité qui n'a point de nom. Nous sçauons bien que c'est vne confession d'ignorance qui a honte, faisant semblant de ne pouuoir nommer ce qu'elle ne peult entendre ny comprendre. Mais que cela leur soit pardonné, car ce n'est pas petite chose ny legere, ou facile à trouuer & comprendre au premier venu, ains qui est enfoncée au fond de quelque lieu bien arriere & fort obscurément cachée, puis qu'il n'y a entre tant de mots & de termes qui sont en vsage, pas vn qui la sceust expliquer ny monstrer. Parquoy il fault doncques

B dire, que Socrates n'estoit point vn sot ny vn lourdault, qui alloit cherchant qui il estoit, mais plustost ceux qui cherchent quelque autre chose deuant celle la, dont la cognoissance est si necessaire & difficile à trouuer: car à peine pourra il esperer de comprendre la science d'une autre chose, qui ne peult pas entendre la principale partie de soy mesme. Mais quant bien nous luy aurions confessé, qu'il n'y a rien si vain ne si inutile & facheux, que de se chercher soy mesme, nous demandons quelle confusion y a il de la vie humaine

C en cela, ou comment est-ce que l'homme ne peult demourer en vie quand il vient à compter & discourir en soy mesme, Qui suis-ie moy? Suis-ie vn suppost meslé & compoté d'ame & de corps, ou plustost vne ame qui se sert & vse du corps, comme vn cheuauteur se sert d'un cheual, & non pas vn suppost composé de cheual & d'homme? ou bien si chascun de nous est la principale partie de l'ame, par laquelle nous entendons, nous

discourons, nous faisons, & toutes les autres parties & de l'ame & du corps ne sont qu'organes & outils de celle puissance? ou si totalement il n'y a point de propre substance de l'ame à part, ains est seulement la temperature & complexion du corps ainsi disposé, qu'il a la force & puissance d'entendre & de viure? Socrates en cela ne confond point la vie humaine, veu que tous les philosophes naturels traittent ceste mesme matiere. Mais ce sont ces mauuaises questions & inquisitions qui troublent la republique sans dessus dessous, qui sont au Phedre, là où il dit, qu'il se fault examiner & considerer soy mesme, si lon n'est point vne beste sauua-ge plus cauteleuse que ne fut oncques le serpent Typhon, & plus audacieuse, & plus furieuse: ou bien vn animal plus doux & plus simple, participant de meilleure condition, & non superbe. Mais par ces discours & raisonnemens la il ne renuerse point sans dessus dessous la vie de l'homme, mais il en dechasse la presumption & l'arrogance, & les orgueilleuses & enflées opinions & outrecuidances de soy mesme: car cela est le serpent Typhon que vous a bien imprimé en la teste vostre precepteur & maistre, en faisant la guerre aux Dieux & aux hommes diuins. Apres Socrates & Platon il prent à combattre Stilpon. Et quant à ses vrayes doctrines & bons discours dont il regentoit & gouernoit soy mesme, son païs, ses amis: & quant aux princes qui l'aimoient & en faisoient estime, il n'en a rien escrit, ne combien il y auoit de magnanimité en son cœur, avec mansuetude, modestie & dou-

A ceur, ains fait mention d'un petit mot qu'il dit en iouant & se riant des Sophistes, & sans alleguer aucune raison alencontre, ny souldre l'arguce de ses obiections, il excite vne Tragédie alencontre de Stilpon, & dit que la vie est ostee & subuertie par luy, d'autant qu'il dit, que l'un ne s'affirme point del'autre: Car comment, dit-il, viurons nous, si nous ne pouuons dire bon homme, ny homme capitaine, ains qu'il nous faille dire à part bon bon, & capitaine capitaine, ne dix mille cheuaults, ny ville forte, mais gens de cheual gens de cheual, & dix mille dix mille, & autant des autres? Et qui est l'homme qui pour cela ait pirement vescu? Et qui est celuy qui aiant ouy ce propos n'ait incontinent apperceu & entendu que c'est vn dire d'homme qui se iouè galamment, & qui propose aux autres ceste question la de Dialectique pour les exercer? Ce n'est pas vn grand & dangereux scādale, Colotes, de ne dire pas hōme bon, ny dix mille cheuaux, mais bien de dire, que Dieu n'est pas Dieu, comme vous faittes vous autres, qui ne voulez pas confesser qu'il y ait vn Iupiter presidant à la generation, ny vne Ceres legifere, ny vn Neptune arrosant les plantes. C'est ceste separation la de noms qui est pernicieuse, & qui remplit la vie d'un mespris, d'impieté, & d'une temerité: quand vous destachez les noms & appellatiōs qui sont attachees aux Dieux, vous abolissez quant & quant les sacrifices, les mysteres, les processions, les festes: car à qui sacrifierons nous le sacrifice nuptial, à qui offrirōs nous le sacrifice de sa-

lut, les Bacchanales, le sacrifice des funerailles, ne
 laissans ny les presbtres Bacchanaux, ny les porte-
 torches, ny les sacrifices que lon fait auant les se-
 mailles, ny les Dieux sauueurs? car cela touche aux
 principaux & plus grands poincts estant l'erreur
 és choses, & non pas és paroles, ny en la tissure des
 propositions, ou en l'usage des termes. Mais si c'est
 cela qui trouble & renuerse la vie humaine, qui
 sont ceux qui pechent & faillent plus au langage
 que vous, attendu que vous dittes que les propo-
 sitions sont la seule substance de l'oraison, & abo-
 lissez totalemēt l'estre des simples dictions, & lais-
 sans seulemēt ce qui est par cōposition, vous ostez
 ce pendant les choses particulierement entre deux
 signifiees, par lesquelles se font les apprentissages,
 les enseignements, les anticipations, les intelligen-
 ces, les inclinations & les consentemens, & tenez
 qu'elles ne sont du tout point? Mais ce pendant le
 dire de Stilpon est tel, Si nous affermons le cou-
 rir du cheual, il dir, que ce n'est pas tout vn ce qui
 est affermé, que ce dont il est affermé, ains que la
 definition essentielle de l'homme est autre que cel-
 le du bon, & derechef que l'estre cheual est autre
 chose que l'estre courant: car si lon nous demande
 la definition de l'vn & de l'autre, nous n'en rēdons
 pas vne mesme pour les deux, & pourtant que
 ceux la faillent qui afferment l'vn de l'autre: Car si
 c'estoit tout vn, homme & bon, & cheual & cou-
 rir, comment est-ce que le bon s'affirme & d'une
 viande, & d'une drogue, & le courir semblable-
 mēt d'un lyon & d'un chien? Et si c'est autre chose,
 adonc

Adonc nous ne disons pas bien, bon homme, & cheual court. Si en cela Stilpon s'abuse lourdement, ne laissant aucune liaison ny complexion de ce que lon dit estre en subiect, ou affermé d'un subiect avec le subiect mesme, ains si chascun n'est parfaitement vn avec ce dont il est dit, n'estimât pas qu'il s'en doive dire & affermer, au moins cōme accident, s'offensant de quelques dictions, & s'opposant à l'accoustumance de parler, pour cela il ne renuerse pas la vie humaine sans dessus dessous, ny les affaires, comme il est tout euident.

Elotes doncques estant depestré des anciens se tourne aux philosophes de son temps, sans en nommer pas vn, combien qu'il eust esté meilleur d'arguer aussi bien ces modernes la comme les anciens, par leur nom, ou bien ny les vns ny les autres. Mais luy qui tant de fois a passé Socrates, Platon & Parmenides par sa plume, monstre euidemment que c'est par couardise de ne s'oser attacher aux viuans, non par modestie & reuerence, laquelle il ne portoit pas à ceux qui estoient plus excellens qu'eux: & veult, comme ie me doubte, assaillir les Cyrenaiques les premiers, & puis apres les Academiques d'Arcefilaus: car ceux-cy estoient ceux qui doubtoient de toutes choses, & ceux la mettrant les passions & les imaginations en eux mesmes, estimoient que la foy procedente d'icelles n'estoit pas suffisante pour asseurer & affermer les choses, mais cōme en vn siege de ville, abandonnans ce qui est au dehors, ils se font enfermez dedans les passions, mettrant, Il semble: & n'asseurans pas du dehors, Il est.

Et pourtant dit Colotes, qu'ils ne peuuēt viure ny
 29 vser des choses. Et puis en se farçant, Ceux-cy (dit-
 30 il) nient que l'homme, le cheual, le mur, soiēt, mais
 31 que eux deuiennent mur, deuiennent cheual, de-
 32 uiennent homme, abusant en premier lieu mali-
 33 cieusement des termes, comme font ordinaire-
 34 ment les calomniateurs, car ils sont coustumiers de
 35 ce faire. Mais il falloit prendre le faict ainsi com-
 me eux l'enseignent: car ils disent que deuenir
 doux, deuenir amer, deuenir lumineux ou tene-
 breux, se fait quand chasque chose a l'effect de ces
 passions la en soy, sans en estre distrait: mais si le
 miel est doux, l'oliuier amer, la gresse froide, le vin
 chaud, & l'air de la nuict tenebreux, il y a plusieurs
 animaulx, plusieurs choses & plusieurs hommes
 qui tesmoignent le contraire, les vns abhorrifans
 le miel, & les autres mangeans les branches de
 l'oliuier, les autres estants bruslez par la gresse, &
 refroidis par le vin, & ne pouuās regarder le Soleil,
 & voians bien la nuict. Parquoy l'opinion se con-
 tenant en ces passions se conserue sans faillir, mais
 quand elle sort dehors, en iugeant & prononçant
 des choses exterieures, elle se trouble bien souuent
 elle mesme, & combat contre d'autres, qui de mes-
 mes obiects prennent de contraires passions, & de
 differentes imaginations. Et Colotes ressemble
 proprement aux ieunes enfans, qui ne font que
 commencer à apprendre les lettres: car estants ac-
 coustumez de nommer les lettres grauees dedans
 des tablettes de bois, quand ils les voient escrites
 ailleurs, ils doubtent alors & se troublent: aussi luy,
 les

A les propos qu'il louë & approuue és escrits d'Epicurus, il ne les entend ny ne les recognoist point, quand ils sont dits par d'autres: car ceux qui disent que le sentiment est véritablement informé & moulé quand il se presente à nous vne image ronde, & vne autre rompuë, & neantmoins ne permettant pas que lon prononce que la tour est ronde, & la rame rompue, ils confirment que les passions sont les imaginations, mais ils ne veulent pas aduouer & confesser que le dehors soit ainsi. Mais comme ceux la ne disent pas qu'ils soient

B cheual, ny mur, mais bien qu'ils soient empraints d'image de cheual & de mur: aussi est il necessaire de dire que la veuë s'imprime figure rōde & triangle à trois differents costez, mais non pas que la tour soit necessairement ronde ny triangle à differents costez, par ce que l'image dont la veuë est imprimée est rompue, & la rame dont proced l'image n'est pas rompue. Puis donc qu'il y a difference de la passion, avec le subiect de dehors, ou il fault que la foy demeure en la passion, ou bien que l'estre qui est affermé par l'apparoistre soit argué

C & cōvaincu de faulseté. Et ce qu'ils crient & qu'ils se courroucent touchant le sentiment, ils disent que le dehors n'est point chaud, mais que la passion du sentiment est telle, n'est-ce pas tout vn que ce qui se dit touchant le goust, qu'il ne dit pas que le dehors soit doux, mais que c'est quelque passion & quelque mouuémēt en iceluy sentiment. Et celuy qui dit qu'il a pris apprehension de forme humaine, mais que sil est homme il ne le sent pas,

dont a il pris occasion de dire cela? N'a ce pas esté **D**
 de ceux, qui disent qu'ils prennent vne imagination & apprehension de figure & forme ronde, mais sil est courbe ne rōd, que la veuë ne l'affirme pas. Ouy bien, dit quelqu'un, mais moy approchant de la tour, ou bien touchant la rame, prononceray & affermeray que l'une est droite, & l'autre a plusieurs angles & plusieurs faces: mais luy quand il sera pres, confessera qu'il luy semble & qu'il luy apparroist ainsi, & rien plus. Ouy certainement plus que cestui-cy, voyant & gardant que toute fantasie & imagination est sembla- **E**
 blement digne de foy pour foy mesme, & pour autruy nulle, ains qu'elles sont toutes en egale condition. Et ton opinion s'en va à vau-l'eau, qu'elles soient toutes veritables, & qu'il n'y en ait pas vne faulse ny incroyable. Si tu estimes qu'il faille que celles cy prononcent de ce qui est dehors, & qu'à celle la loingtaine tu ne croies rien d'auantage que ce qu'elles souffrent. Car si elles sont en pareille condition, quand elles sont de pres & quand elles sont de loing pour estre creuës, il est iuste, ou que à toutes, ou que non à cestes cy, ne suiue le iugemēt **F**
 affirmatif de l'estre: mais sil y a difference de passion entre ceux qui sont pres, & ceux qui sont loing, il est dôcques faux qu'il n'y ait ny apprehension ny sentiment qui soit plus expres & plus euidēt l'un que l'autre, comme celles qu'il appelle attestations, lesquelles ne sont rien de plus quant au sentiment, mais ouy bien quant à l'opinion, tellement que suiuant icelles, ils veulent que lon
 afferme

A afferme & prononce des choses exterieures, attribuant le iugement de l'estre à l'opinion, & au sentiment la passion qui apparoit, & transportent le iugement de ce qui est totalement vray, à ce qui eschappe bien souuent. Toutefois il n'est ia besoing de dire maintenant combien il y a de confusion & de contradiction en cela. Mais il semble que la reputation d'Arcefilaüs fasche bien fort Epicurus qui fut entre tous les philosophes le mieulx aimé & le plus estimé de ce temps la. Car ne disant rien du sien ny de son inuention, il dit qu'il imprimoit

B aux hômes ignorants, opinion & estime qu'il fust bien sçauant & fort lettré. Mais tant s'en falloit qu'Arcefilaüs aimast la reputation d'estre remueur de nouvelles opinions, ne qu'il s'attribuast celles des anciens, qu'il reprenoit & tansoit les Sophistes de son temps, de ce qu'ils attribuoient à Socrates, à Platon, à Parmenides & à Heraclitus, les opinions & doctrines de la retention & de l'incomprehensibilité, qui n'en pouuoient mais, & n'estoient que pour en referer la probation & confirmation à tels illustres personnages. Or quāt à cela ie rends

C ces à Colotes & à tous ceux qui disent & affermēt, que la doctrine Academique a esté introduite par Arcefilaüs : mais quant à la retention & consentement & doute de toutes choses, ny ceulx qui s'en sont beaucoup trauaillez, & qui se sont tendus à en composer de gros liures, & grands traittez, ne l'ont iamais peu remuer, ains amenans à la fin de la doctrine des Stoiques, comme la fee Gorgonne pour faire peur aux gens, la cessation de toutes actions,

ils s'en sont lassez, apres qu'ils ont veu que combien qu'ils remuassent & essayassent toutes choses, l'instinct ou l'appetition ne leur obeissoit point pour faire vn consentement, ny ne receuoit point le sentiment pour origine & principe de la propension, ains se presentoit d'elle mesme aux actiōs, n'ayant point de besoing de s'adioudre à rien, mais le combat & la dispute est legitime & iuste a'encontre de tels aduersaires.

Et tout autant, comme tu leur diras,

Te replicquer de mesme tu orras.

Car de parler à Colotes de l'instinct ou appetitiō, & du consentement, c'est autant cōme, sonner de la lyre à vn asne. Mais on dit à ceux qui le peuuent confuire & entendre qu'il y a en nostre ame trois sortes de mouuements, l'imaginatiue, l'appetitiue & la consentante: quant à l'imaginatiue ou apprehension, on ne la scauroit oster quand bien on le voudroit, parce qu'il est force que quand on approche des choses, on soit informé & moulé, en maniere de dire, par icelles, & que lon recoiue impression d'icelles. l'Appetitiue estant excitee par l'imaginatiue esmeut actiuemēt l'homme à ce qui est propre & conuenable à sa nature, ne plus ne moins que quand en la Ratiocinatiue il se fait vne propension & inclination. Or ceux qui se retiennent & doubtent de toutes choses, n'ostent point cela, ains se seruent de l'appetition ou instinct naturellemēt conduisant chascun à ce qui luy est propre. Qu'est-ce dōcques qu'ils fuient: c'est l'opiner, applicquer & prester son consentement, en quoy
seul

A seul est la menfonge, & la tromperie, qui est vn ceder par imbecillité à ce qui apparoit, & qui n'a aucune vraye vtilité. Car l'actiō a befoing de deux choses, de l'apprehension ou imagination de son propre, & de l'instinct & appetition poulsant à son propre, dont ny l'vn ny l'autre ne repugne à la retention; car ce discours nous retire de l'opinion, & non pas de l'appetitiō ny de l'imagination. Quand dōcques le delectable nous semble nostre propre, il n'est point de befoing d'opiniō pour nous mouuoir & tendre à luy, ains se presente incontinent

B l'appetition qui n'est autre chose que le mouuement & allure de l'ame: & pourtant qu'il est force d'auoir sentimēt de ces choses la, & d'estre de chair & de sang, aussi semblera la volupté estre le bien. Parquoy aussi le semblera elle estre à celuy qui defend la retention, parce qu'il est participāt du sentiment, & est de chair & d'os, & depuis qu'il a pris imaginatiō du bié, il l'appete, & fait toutes choses, à fin qu'il ne luy eschappe point: mais autant qu'il luy sera possible il hantera, & conuersera tousiours avec son propre, poulsé & attiré par contrainctes

C naturelles, non pas Geometriques. Car ces doux & gracieux esclans-la de la chair attrayent assez & sans maistre, comme ils n'oublient pas à dire eulx, & conuient celuy mesme qui nie & fait semblant de n'estre point plié ny amolly par iceulx. Mais tu me demandes pourquoy c'est que le retenu, & doutant, ne s'en va courant amont vne montagne, & non pas aux estuues, & pourquoy ne donne il de la teste contre la muraille, & non

droit à la porte, quand il veult sortir pour aller **D**
sur la place? Me demandes tu cela toy qui tiens
que les sentimens sont infallibles, & les apprehen-
sions de l'imaginatiue certaines & veritables?
C'est par ce que l'estuue luy apparroist, & non pas
la montaigne, & la porte, non pas la muraille,
& ainsi de chascune des autres choses. Car le pro-
pos de la retention ne subuertit pas le sentiment,
ny ne luy apporte pas d'estranges passions & mou-
uements qui luy troublent l'imaginatiue, ains oste
& subuertit seulement les opinions, se seruant au
demourant des autres choses, selon leur naturel. **E**
Mais il est impossible de ne consentir point aux
euidences: car nier ce que lon croit est plus hors
de raison, que ne nier ny n'affirmer rien. Qui sont
doncques ceulx qui nient ce qu'ils croient, & qui
combattent contre les euidences? Ceux qui ostent
& tollissent la diuination, & qui disent qu'il n'y a
point de gouvernement de prouidence diuine, ny
que le Soleil n'est point animé ny la Lune, aus-
quels tous hommes sacrifient, les honorét & ado-
rent. Mais vous ne tollissez vous pas ce qui semble
& qui paroist à tout le mōde, que les enfans soient **F**
contenus dedans les parents, & qu'entre douleur
& volupté il n'y ait rien de moien? ne l'affirmez
vous pas contre ce que tous hommes experimen-
tent, disans que s'esjouir est ne se douloir point, &
souffrir ne faire point? mais à fin que ie laisse tout
le demourant, quelle chose est plus euidéte ny plus
creuë de tout le monde, que ce que les malades de
melâcholie, & qui ont le cerueau troublé & le sens
trans-

A transporté, pésent voir & ouir choses qu'ils n'oient
 ny ne voient, quand l'entendement vient à estre
 ainsi alteré & transporté: comme de celuy qui dit,
 Femmes aiants des habits noirs me dardent
 Contre les yeux brandons de feu, qui m'ardent
 Tout le visage espouventablement. Et,
 Entre ses bras elle soustient ma mere.

Et beaucoup d'autres illusions encore plus estranges
 & tragiques, ressemblans aux monstres & pro-
 diges que descrit Empedocles, dont ils se rient & se
 moquent, iambes torses, teste de belier, corps de
 B bœuf, & deuant d'homme, & toute autre sorte de
 figure monstrueuse & de nature estrange meslee
 ensemble, prise des illusions de songes, & du trans-
 port d'esprits esgarez, ils disent qu'il n'y a rien de
 tout cela qui soit esgarement ou erreur de veuë, ny
 menfonge, ains que ce sont toutes vrayes imagina-
 tions de corps & de figures qui viennent de l'air
 circonstant & environnant. Et puis qu'est il plus
 impossible de doubter en la nature, sil est possible
 de croire telles resueries? Car ce que iamais faiseur
 de masques, ny potier de terre, ou mouleur de fi-
 gures estranges, ny peintre habile n'oza ioindre
 C ensemble pour abuser les regardans, ou leur don-
 ner du passe-temps, ceux-cy supposans à certes que
 telles choses subsistent à bon escient, & qui plus est
 affermans que toute fermeté de creance, toute cer-
 titude de iugement & de verité s'en va perissant, si
 telles choses ne subsistent. Ce sont ceux qui iettent
 toutes choses en obscurité incertaine, qui ostent
 l'apparence de toutes choses, & qui induisent aux

iugemens des frayeurs, aux actions des soupçons, & si les ordinaires apprehensions, & qui nous sont tousiours prestes à la main, sont portees en mesme imaginatiue avec mesme seureté & certitude de creance que ces illusions la enormes, estranges, & extrauagantes : car l'egalité qu'ils supposent en toutes, oste plus tost la foy aux ordinaires, qu'elle ne la donne aux estranges & extrauagantes. C'est pourquoy nous cognoissons beaucoup de philosophes qui confesseroient plus tost, & plus volontiers, que nulle imaginatiō n'est veritable, que que toutes le soient, & qui plus tost refuseroient à croire tous hommes qu'ils n'auroient pas hantez, toutes choses qu'ils n'auroient pas experimentees, & generalement tous propos qu'ils n'auroient pas ouys, que de se persuader qu'une seule de ces telles imaginations & illusions la qu'ont les furieux enragez, ou les fanatiques possedez de fureur diuine, ou que ceulx qui resuent en dormant prennent. Puis donc qu'il y a des imaginations que lon peut oster, & d'autres non, on peut doncques se retenir & doubter des choses, si elles sont ou non, quand il n'y auroit autre cause, que celle discordance-la qui est suffisante pour faire soupçonner si les choses sont ou non, & ainsi rien d'asseuré ny de certain, ains vne incertitude & perturbation grande. Car quant à l'infinité des mondes, à la nature des atomes, aux diuersitez & differences des torfes & declinations, encore qu'elles troublent & empeschent beaucoup de gens, si y a il au moins ceste consolation, qu'en cela il n'y a rien qui soit pres de nous,

A nous, & que toutes ces questions la font oultre & par de là les sentiments. Mais ceste deffiance, ceste perturbation, ceste ignorance, touchant les choses sensibles, & les imaginations, à sçauoir si elles sont faulses ou vrayes, quelle opinion est-ce qu'elles n'esbranlent, quel consentemēt, & quel iugement est-ce qu'elles ne mettēt sans dessus dessous? Car si des hommes, n'estans point yures, ny enforcelez, ny hors du sens, ains sobres, sains d'entendement, & faisans professiō d'escrire de la verité, des regles & instruments de bien iuger, és plus euidentes passions & mouuemens du sentimēt posent & mettent pour vray ce qui ne subsiste point, ou pour faulx ce qui subsiste: il ne se fault pas esmerueiller ny mescroire, s'ils ne font aucun iugemēt des imaginations qui apparoissent, mais plus tost s'ils en ont contraires iugemens. Car il est moins esmerueillable ne poser ny l'vn ny l'autre, ains se retenir entre choses opposites, que non pas affermer choses repugnantes & contraires. Car celuy qui n'affirme ny ne nie, ains se tient quoy, repugne moins à celuy qui affirme & qui pose vne opinion, que celuy qui la nie, & moins à celuy qui nie, qu'à celuy qui affirme. Et s'il est possible de doubter de cela, aussi n'est il pas impossible des autres, au moins selon vous, qui estimez qu'il n'y ait rien qui soit de differēce entre sentiment & sentimēt, imagination & imagination. Ce n'est doncques pas vne fable ny vn esbat de ieunes gens temeraires qui ont enuie de babiller & de causer, cōme dit Colotes, que le propos de la retention: ains est vne habitude &

disposition certaine d'hommes qui se veulent garder de mesprendre ny de tomber, & qui n'abandonnent ny ne iettent pas à la volée leur iugement à l'appetit des sentiments si decriez & si ambigus, & ne se laissent pas deceuoir avec ceulx qui tiennent que les choses apparentes ont la foy, & doivent estre creuës comme certaines, voians vne si grande obscurité & si grande incertitude és imaginations & choses apparêtes, mais bien est-ce vne fable que l'infinité que vous mettez, & les images que vous refuez: & imprime bien vne temerité de babil affecté aux ieunes gens celuy qui escrit de Pythocles, lequel n'auoit pas encore dixhuit ans, qu'il n'y auoit pas en toute la Grece vne meilleure ny plus excellente nature, & qu'il exprimoit ses conceptions monstrueusement bien. Et si fait, comme les femmes celuy, qui prie que ces excessiues louanges qu'il donne à ce ieune adolescent ne luy tournent point à haine ny à enuie. Mais bien sont Sophistes & hōmes vains ceux, qui contre les grands & excellents personnages escriuent si impudemment & si superbement. Et toutefois Platon, Aristote, Theophraste & Democrite, ont bien contredit à ceux qui ont escrit deuant eulx, mais il n'y eut iamais homme qui osast composer vn liure alencontre de tous ensemble avec vne telle inscription que celuy la. Et puis, comme ceux qui ont offensé les Dieux, à la fin de son liure, cōfessant ses fautes, il dit, que ceux qui ont estably les loix & ordōnances, qui ont institué les Royautez & les gouuernements des villes & citez, ont mis la vie humaine en

grand

A grand repos & grande seureté, & l'ont deliuree de grands troubles, & que si lon ostoit cela, nous viurions vne vie de bestes sauuages, & que l'vn mangeroit l'autre, le premier qu'il rencontreroit, car ce sont les propres mots, dont il a vsé, mais iniustement & non veritablement. Car qui osteroit les loix, & laisseroit les doctrines & liures de Socrates, de Platō, & d'Heracitus, il s'en faudroit beaucoup que nous ne mangeissions les vns les autres, & ne vescuissions vne vie sauuage: car nous craindrions les choses deshonestes, & honorerions pour l'honesteté seulement la iustice, les Dieux, les superieurs & magistrats, croians que nous auons des esprits & dæmons qui sont gardiens & surintendans de la vie humaine, & n'estimans pas que tout l'or qui est dessus, ny dedans la terre, soit à contrepeser à la vertu, & faisans volontiers pour la raison, ce que nous faisons maintenant à force, par crainte de la loy. Quand doncques deuiendra nostre vie sauuage & bestiale? Ce sera quand les loix serōt ostées, que lon laissera les liures & doctrines qui incitent les hommes à la volupté, & que lon croira que le monde ne soit point regy ny gouuerné par la providence diuine, & que lon iugera sages ceulx qui cracheront contre l'honesteté mesme, s'elle n'est conioincte avec volupté, & qui se mocquent de tels propos & de telles sentences,

Par tout s'estend l'œil diuin de Iustice.

Et cest autre,

Dieu tousiours est pres de nous, qui tout voit.

29 Et ceste autre notable sentence, Dieu (ainsi que dit

„ le mot ancien)tenant le commencement, le milieu, & la fin du monde, se promene par la nature, faisant vne ligne droite, & apres luy marche la Iustice vegeresse de ce qui a esté commis ou forfaité contre la loy diuine. Car ceulx qui mesprisent ces enseignements-la, & qui estiment que le souuerain bien de l'homme consiste au ventre, & aux autres endroits par où lon iouist de la volupté, ce sont ceux-la qui ont besoing de loy, de crainte, de fouet, d'vn Roy, & d'vn prince & magistrat qui ait la iustice en la main, à fin qu'ils ne déuoyét leurs voisins par leur gloutonnie, se confians en leur impieté de ne craindre point les Dieux. Car c'est la vie des bestes sauuages, par ce que les bestes ne scauent rien de meilleur ny de plus honneste que la volupté, ne cognoissent point la iustice des Dieux, ny ne reuerent point la beauté de la vertu, ains si la nature a mis en elles quelque poinct de hardiesse, de ruse, d'efficace, elles en vsent à assouuir leurs voluptez & accomplir leur cupidité. Et pourtant est estimé par eulx vn grand sage hōme Metrodorus, quand il dit : Toutes les belles, subtiles & ingenieuses inuentions de l'ame ont esté trouuees pour le plaisir & la volupté de la chair, ou pour l'esperance d'y pouuoir paruenir & en iouir, & est vain & inutile tout acte qui ne tend à celle fin. Les loix ostees, il y a des ongles de lions, des dents de loups, des ventres de bœufs, des cols de chameaux. en tels discours & en telles raisons de philosophie, & à faulte de scauoir escrire ou parler, les bestes enseignent & preschent telles opinions & telles doctrines par

Ce sont les
 paroles de
 Platon au
 4. des loix.

A buglements, héniffements, & brayements, & toute leur voix est pour leur vêtre, & pour la volupté de leur chair, qui leur rit presente, ou qu'ils attendent, si d'auéture ce n'est quelque espece d'animaux qui aiment à cacquetter & à gazouiller. Nul doncques ne pourroit assez suffisamment louer ceux qui font des loix alencontre de ces affections-la si furieuses, qui ont estably l'estat & gouuernement des villes, ont ordonné les magistrats, & dressé les bôs edicts. Mais qui sont ceux qui confondent cela, & qui l'abolissent du tout? Ne sont-ce pas ceux qui disent

B que la couronne de tranquillité & de vie reposee n'est point comparable, ains vault mieux que tous les Royaumes & principautez du monde: Ne sont-ce pas ceux qui tiennent que l'estre Roy, & regner, est vn faillir le chemin, & s'esgarer de la droite voye de felicité? & qui escriuent en ces propres

» termes, Il fault dire comment on pourra mainte-

» nir & garder la fin de nature, & comment on cui-

» tera des le commencement d'entrer de gré, & vo-

» lontairement és offices & magistrats des peuples.

» Et encore ces autres paroles. Il n'est d'ócques point

C de besoing de se tuer le cœur & le corps pour sau-

» uer les Grecs, ny pour obtenir d'eulx vne couron-

» ne de sagesse, mais bien boire & manger, Timo-

» crates, sans faire dommage, ains donnant plaisir à

» la chair. Et toutefois le premier article de l'establif-

» sement des loix, & de la police que Colotes louë

» tant, & le plus inportât, c'est la creance & persua-

» sion des Dieux, par le moien de laquelle Lyncurgus

» sanctifia iadis les Lacedemoniens, Numa les Ro-

mains, Ion les Atheniens, & Deucalion tous les **D**
 Grecs vniuersellement, en les rendant deuots &
 affectionnez enuers les Dieux, en prieres, serments,
 oracles & propheties, par le moien de la crainte &
 de l'esperance qu'ils leur imprimerent, de sorte
 qu'allant par le monde, vous trouuerez des villes
 qui ne sont point closes de murs, qui n'ont point
 de lettres, qui n'ont aucuns Roys, voire qui n'ont
 point de maisons, ny point d'argent, ny ne se ser-
 uent point de monnoye, qui ne sçauët que c'est de
 theatres ny des exercices du corps: mais vous n'en
 trouuerez iamais qui soit sans Dieu, qui n'ait point **E**
 de serment à iurer, qui n'vse point de prieres ny de
 sacrifices, pour obtenir des biens & destourner des
 maux, iamais homme n'en veit, ny n'en verra ia-
 mais: ains me semble que plus tost vne ville seroit
 sans sole, que vne police ne s'y dresseroit & establi-
 roit sans aucune religion ou opinion des Dieux, &
 sans la conseruer apres l'auoir eüe. C'est ce qui
 contient toute societé humaine, c'est le fondement
 & appuy de toutes loix, lesquelles subuertissent &
 renuersent ceux-cy, qui ne s'appans point alentour
 ny secretemēt & par circuit de paroles couuertes, **F**
 ains de primfault ouuertement assaillent la princi-
 pale des opinions de la religion, & puis comme
 estants agitez de furies, ils viēnent à confesser qu'ils
 ont griefuement peché, en ostant ainsi les loix, &
 confondant les ordonnāces de la iustice & police,
 à fin qu'ils ne soient pas dignes de pardon. Car
 faillir en opinion, encore que ce ne soit pas fait
 de sages hommes, si est-ce pour le moins que c'est
 fait

A fait d'hommes : mais de vouloir imputer à autrui les erreurs & pechez qu'ils commettent eulx mesmes, qui se tiendroit de les appeller par les noms qu'ils meritent ? Car si escriuant alencontre d'un Antidorus, ou d'un Bion le Sophiste, il eust fait mention des loix, de la police, de l'ordre & de la iustice, on ne luy eust point dit, comme fait Electra à son frere furieux Orestes,

Demeure quoy miserable en ton liçt,
 enueloppant bien & tenant chaudement ta pauvre chair. C'est à faire à ceux qui ont vescu en gens
 B d'estat & d'honneur, & en bons mesnagers, à reprendre de cela tels comme sont ceux que Colotes en son liure a iniuriez. Entre lesquels Democritus admoneste par ses escripts d'apprendre la science militaire, comme la plus grande de toutes, & s'accoustumer à supporter les travaux d'icelle, dont les grands biens & grands honneurs viennent aux hommes. Et Parmenides orna & decora son pais de tresbõnes loix qu'il y institua, de sorte que tous les ans encore fait on iurer aux officiers, quand ils entrent nouvellement en l'exercice de leurs estats,
 C qu'ils obserueront les loix & ordonnances de Parmenides. Et Empedocles meit en iustice, & feit cõdamner des principaux de sa ville qui abusoient insolentement, & desfroboient tous les deniers publiques, & si deliura son pais de sterilité & de peste, ausquels maux il estoit au parauant subiect, en faisant boucher & murer des trous de mōtaignes, dont il sortoit vn vent chaud de midy, qui couroit toute la campagne. Et Socrates, depuis qu'il eut

esté cōdamné à mort, ses amis luy dōnants moien ^D
de se sauuer, fil eust voulu, il n'en voulut point vsfer,
pour conseruer l'autorité des loix, ains aima mieux
mourir iniustement, que se sauuer en desobeissant
aux loix de son païs: & Melissus estant capitaine
general de sa ville, desfeit les Atheniens en vne
bataille nauale. Et Platon a bien laissé par escript
de beaux discours touchant les loix, le gouuernement
& la police: mais il en imprima encore de
plus beaux és cœurs & esprits de ses disciples & fa-
miliers, qui furent cause que Dion deliura la Sicile
de la Tyrannie de Dionysius, & Python deliura la ^E
Thrace avec Heraclides, qui tuerēt le Roy Cotys:
Chabrias & Phocion, deux grands Capitaines des
Atheniens, sont sortis de l'Academie, eschole de
Platon: là où Epicurus enuoya iusques en Asie tan-
ser Timocrates, & le retirer de la court, pource qu'il
festoit courroucé à Metrodorus estant son frere,
& cela est escrit dedans leurs liures. Et Platon en-
uoya de ses disciples & familiers Aristonymus aux
Arcadiens, pour ordōner leur republique: & Phor-
mion aux Eliens, Menedemus à ceulx de Pyrrha,
Eudoxus aux Gnidiens, & Aristote à ceulx de Sta- ^F
gira, qui tous estants ses disciples escriuirēt & esta-
blirent des loix: & Alexandre le grand demanda
à Xenocrates des regles & preceptes pour bien re-
gner. Et celuy qui fut enuoyé deuers Alexandre
par les peuples Grecs habitans en Asie, & qui l'en-
flamma & l'esguillonna le plus à embrasser & en-
treprendre la guerre cōtre le Roy barbare de Per-
se, ce fut Delius Ephesius, qui estoit l'un des fami-
liers

A liers de Platon : & Zenon le familier de Parmenides entreprit de tuer le tyran Demylus, & aiant failly à son entreprife, mainteint la doctrine de Parmenides, comme vn or fin, sans tare, espuré par le feu, montrant par effect qu'il n'y a rien qui soit espouventable à l'homme magnanime, sinon le deshonneur, & qu'il n'y a que les enfans & les femmes, ou bien les hommes qui ont cœur de femmes, qui craignent la douleur : car tronçonant luy meisme sa langue avec les dents, il la cracha au visage du tyran. Mais de l'eschole & de la doctrine d'Epicurus, ie ne demāderay pas qui soit fort y pour tuer vn tyran, quel vaillant homme ait fait de grandes apertises d'armes, quel legiflateur, quel magistrat, quel conseiller de Roy, ou gouuerneur de peuple, qui soit mort, ou qui ait esté tormenté pour soustenir le droict & la iustice : mais seulement quel de tous ces sages icy a iamais fait vn voyage par mer, pour le bien & seruice de son pais, qui a esté en ambassade, qui a despensé quelque argent, ou qui a escrit aucun beau faict de gouuernement que vous aiez oncques fait. Et toutesfois pource que Metrodorus descendit vn iour depuis la ville iusques au port de Pyree, & feit environ quatre ou cinq lieuës pour aller secourir vn Mithres Syrien, des gés du Roy de Perse, qui auoit esté pris & arresté prisonnier, il l'escriuit à tout le monde : & magnifie & exalte Epicurus ce voyage la en plusieurs missiues. Qu'eussent ils doncques fait au pris, s'ils eussent fait vn tel acte qu'Aristote, qui feit restaurer & rebastir la ville de sa naissance

Stagira, qui auoit esté destruite par le Roy Phil-
 lippus, ou comme Theophrastus qui par deux fois
 deliura sa ville occupee par des tyrans? Le Nil eust
 plustost cessé de porter l'herbe du papier, qu'eulx
 se fussent lassez d'escrire de leurs beaux faicts. Et
 n'est ce pas chose indigne que de tant de sectes de
 philosophes qui ont esté, eulx seuls iouissent des
 biés qui sont és villes sans y auoir iamais rien con-
 tribué du leur? Il n'est pas les Poètes des Tragédies
 ou Comédies qui ne s'efforcét de faire & dire touf-
 iours quelque chose de bon pour la defense des
 loix & de la police: Mais ceux-cy, si d'auenture ils
 en escriuent, ils escriuēt de la police, à fin que nous
 ne nous entremettions point du gouuernemēt de
 la Republique: & de la Rhetorique, à fin que nous
 ne facions acte quelconque d'eloquence: & de la
 Royauté, à fin que nous nefuyons de hanter &
 conuerser autour des Roys: & ne nommēt iamais
 les grands personages qui se sont meslez d'affai-
 res, sinon pour s'en mocquer, ou pour abolir leur
 gloire, comme ils disent d'Epaminōdas, qu'il auoit
 bien quelque chose de bon, mais encore bien min-
 ce, car ils vsent de ce propre terme. Au demourant
 ils l'appellent cœur de fer, & demādent qu'il auoit
 à s'aller ainsi promenant avec son armee par tout
 le Peloponèse, & pourquoy il ne se tenoit plus-
 tost quoy en sa maison, avec vn petit chappellet
 en la teste, entendant à faire bonne chere & à se
 bien traiter. Mais il me semble que ie ne dois pas
 omettre en cest endroit, ce que Metrodorus escrit
 en son liure de la philosophie, abiurant toute en-
 tremise

A tremise du gouvernement de la Republique, &
 » dit ainsi : Quelques vns de ces sages par abondan-
 » ce de vanité & d'arrogance enueloppent tellemēt
 » l'ouurage d'icelle, qu'ils se laissent emporter aux
 » cupiditez de Lycurgus & de Solon, en traittant
 » des preceptes de la vie & de la vertu. Comment,
 c'estoit doncques vanité & abondance de vanité
 & d'arrogance, de rendre la ville d'Athenes libre,
 de rendre la Sparte policee & gouueree de bon-
 nes loix, que les ieunes gens ne feissent rien licen-
 cieusement, & n'engendrassent point d'enfans de
 B courtisannes & putains publiques, & que la riches-
 se, les delices, l'intemperāce & la dissolution n'eust
 point la vogue ny le commandement par les citez,
 ains la loy & la iustice: car c'estoient là les cupidi-
 tez de Solon. Et Metrodorus, en se moquant &
 » gaudissant adionste vne telle conclusion, Parquoy
 » il est bien-seant que lon s'en rie d'un rire libre, &
 » de tous autres hommes, & mesme de ces Solons
 » & de ces Lycurgues icy. Mais certainement ce
 n'est pas là vn rire libre, Metrodorus, ains seruile,
 dissolu, & qui auroit besoing de fouët, non pas de
 C celuy dont on fouëtte les personnes libres, mais où
 il y eust à chasque bout de corde de petits osselets,
 dont on punit & chastie les chastrez sacrificateurs,
 quand ils ont failly aux cerimonies & sacrifice de
 la mere des Dieux. Mais qu'ils ne feissent pas la
 guerre au legislateur, ains aux loix mesmes, on le
 peult ouir & entendre d'Epicurus: car il demande
 » en ses questions, Si le sage, assureé que lon n'en
 » scaura rien, commettra & fera quelque chose de


ce que les loix defendent. Et respond vne respon- D
 se qui n'est point ouuerte ny plaine & ronde, Il le
 fera : mais ie ne le veux pas confesser. Et derechef
 ailleurs, escriuant, ce me semble, à Idomeneus, il
 l'admoneste de n'asseruir point sa vie aux loix, ny
 aux opinions & reputations des hommes, sinon
 autant qu'elles preparent vne fascherie par de pro-
 chains coups de fouët. S'il est doncques ainsi que
 ceux qui abolissent les loix & les gouuernemens
 & polices des hommes, peruertissent & destrui-
 sent la vie des hommes, & Epicurus & Metrodo-
 rus le font, diuertissans leurs familiers & disciples, E
 de s'entremettre du gouuernement des villes, &
 haïssans ceux qui s'en meslent, mesdisans des pre-
 miers & plus sages legislateurs, & admonestans
 de mespriser les loix, prouueu qu'il n'y ait point
 de crainte ny de danger du fouët & de la
 punition, ie ne voy point que Colotes
 ait tant proposé d'accusation faulse
 contre les autres philosophes,
 comme il en a allegué & mis
 en auant de vrayes con-
 tre les escripts & do- F
 ctrines d'Epi-
 curus.

☞

*

A DE L'AMOUR.

*Autobulus fils de Plutarque recite à ses compagnons
les contes qu'il avoit autrefois ouy faire à
son pere touchant l'Amour.*



A LAVIANVS. Fut-ce en la ville de Helicone, ô Autobulus, que furent tenus les propos & discours de l'Amour, que tu nous as promis de nous reciter presentemét, soit que tu les ayes mis par escript ou bien que tu les ayes imprimez en ta memoire, pour en auoir souuent enquis & interrogé ton pere? **AUTOBVLVS**. Cefut en Helicone voirement, la ville des Muses, lors que les Thespiens y solennisoient la feste de l'Amour: car on y celebre des ieux de pris de cinq ans en cinq ans, en l'honneur del'Amour, aussi bien comme en l'honneur des Muses, avec grande pompe & grande magnificence. **FLAVIANVS**. Sçais tu doncques de
B **C** quoy nous te voulons prier tous ceux qui sommes icy venus pour t'ouir? **AUTOB.** Non, mais ie le sçauray quand vous me l'aurez dit. **FLAVIA.** C'est que tu ostes de ton recit pour ceste heure, tous ces preambules de descriptions que font ordinairement noz versificateurs, quād ils nous peignent de belles prairies, de beaux ombrages, des tapisseries de lierre, & des ruisseaux de fontaines, qui vont voltigeant alentour, & autres tels lieux

communs, aufquels ils ſ'amuſent, cuidant contre-^D faire la deſcription de la riuere d'Iliffus, le bel ombrage de l'oſier franc, & l'herbe drue & menue au deſſous, la terre allant vn peu en montant tout doucement, qui ſont au commencement du Phe-
 drus de Platon, avec plus de peine & de diligence que de grace ny de beauté. A V T O R. Ceſte narra-
 tion n'a point beſoing de telles prefaces, bel amy Flauianus : car l'occafion de laquelle procederent les propos, ne demande qu'audience & lieu com-
 mode pour raconter le fait, par ce qu'au demou-
 rant, de tout ce qui eſt requis à vne plaiſante Co-^E medie, il n'y deſaut rien qui ſoit, ſeulement prions la mere des Muſes, Memoire, qu'elle nous ſoit propice, & nous aide à pouuoir conſeruer, retenir, & bien reciter tout le diſcours du conte. Mon pere
 doncques, long temps auant que ie fuſſe né, aiant
 nouvellement eſpouſé ma mere, eſtoit allé en He-
 licone, expreſſément pour ſacrifier à l'Amour, à
 cauſe de quelque differét qu'il auoit eu alencontre
 des parents d'elle, & l'y auoit menee quand & luy,
 pour ce que c'eſtoit elle principalement qui faiſoit
 la priere & le ſacrifice. Si l'accompagnerent de ^F
 noſtre ville quelques vns de ſes plus familiers amis
 & en la ville de Theſpies il trouua Daphneus, le
 fils d'Archidamus, lequel eſtoit amoureux de Ly-
 ſandra fille de Simon, & y auoit plus de credit que
 nul autre de ceux qui la demandoient en mariage,
 & Soclarus fils d'Ariſtion venu de Tithore, auſſi y
 eſtoit Protogenes de Tharſe, & Zeuxippus Lace-
 demonien, tous deux ſes hoſtes, & diſoit mon pere,
 que

A que les plus notables hōmes de la Bœoce y estoïēt aussi. Si furent deux ou trois iours par la ville, fentretenans les vns les autres tout doucement de propos de lettres, & se trouuans ensemble, tantost aux parcs des exercices où la ieunesse s'esbat, & tantost aux Theatres, mais depuis pour euiter le fascheux combat des Musiciens & ioueurs de Cithre, où tout se menoit par brigues & faueurs, ils se deslogerent de là, la plus part d'eux, ne plus ne moins que de pais d'ennemy, & s'en allerent logger en Helicone, chez les Muses, là où le lendemain matin arriuerent vers eux Anthemion & Pifias hommes notables, tous deux affectionnez à Bacchon, surnommé le beau fils, & aians ie ne sçay quoy de ialousie l'vn contre l'autre, pour l'affection qu'ils luy portoient, d'autant qu'il y auoit en la ville de Thespies vne Dame nommee Ismenodora, de maison noble & riche, & au demourant sage & honneste en tout le reste de sa vie: car elle f'estoit longuement contenue en viduité, sans aucun blasme ne reproche, combien qu'elle fust ieune, & de visage assez belle, mais en traittant le mariage de luy qui estoit fils d'vne sienne familiere amie & voisine, avec vne fille qui estoit sa parête, & se trouuant à deuiser souuent avec luy, elle s'affectionna enuers luy, en disant & oyant dire beaucoup de bien de luy, & voyant le grand nombre de gens de bien & d'honneur qui l'aimoient, petit à petit elle mesme en deuint aussi amoureuse, avec intention toutefois de ne commettre rien indigne d'elle, ains de l'espouser legitimement, & de viure

publicquement avec luy. Si sembla de prime face D
la chose estrange, & la mere du ieune fils d'un co-
sté redoutoit la grandeur de la maison d'elle, la
noblesse & magnificence de sa race, & de l'autre
costé les compagnons du ieune fils qui alloient à
la chasse quand & luy, estants de son aage, luy im-
primoient des peurs en l'entendement, luy don-
nans à entendre qu'elle seroit bien sa mere, qu'elle
n'estoit pas d'aage pour luy, & s'en mocquoient de
luy, tellement qu'ils empeschoient plus le mariage
que ceux qui à bon esciant faisoient tout ce qu'ils
pouuoient pour le rōpre, par ce qu'il auoit honte E
estât encore fort ieune, & la barbe luy cōmençant
seulement à poindre vn petit, d'espouser vne veuf-
ue. Toutefois à la fin, sans plus s'arrester au dire des
autres, il s'en remeit à Anthemion & à Pifias, pour
luy en dire & cōseiller ce qui luy seroit plus expé-
dient de faire. Anthemion estoit son cousin, beau-
coup plus aagé, & Pifias le plus austere de tous
ceux qui luy faisoient l'amour, au moien de quoy il
resistoit plus asprement à ce mariage, & s'en atta-
choit à bon esciant à Anthemion, de ce qu'il aban-
donnoit ainsi ce ieune garçon à Isimenodora. An- F
themion au contraire disoit que Pifias ne faisoit
pas bien, ains quoy qu'il fust hōme de bien au de-
mourât, qu'en cela toutefois il imitoit les mauuais
amoureux, de vouloir ainsi priuer son amy d'un si
beau mariage, & d'une si grande maison, où il y
auoit tant de biens, à fin qu'il eust le plaisir de le
voir plus longuement despouiller à nud au parc
des exercices, frais & entier, sans auoir encore tou-
ché

A ché à femme: mais à fin que par disputer ainsi l'un cōtre l'autre, ils n'entraissent peu à peu en cholere, ils esleurent pour arbitres & iuges de leur different, mon pere, & tous ceux qui estoient avec luy, & les vindrēt trouver là où ils estoient, assistez, l'un de Daphneus, & l'autre de Protogenes, comme si c'eust esté chose expressémēt apostee, d'autant que Protogenes mesdisoit à bouche ouuerte de la Dame Ismenodora: parquoy Daphneus se print à dire, ô Hercules, quelle chose ne pourroit aduenir en ce mode, s'il est ainsi que Protogenes soit icy venu

B pour faire la guerre à l'amour, attendu que toute sa vie, tout son ieu & tout son affaire a esté de l'amour & pour l'amour, qui luy a fait oublier l'estude des lettres, voire & son propre pais mesme: lequel n'est pas distāt de cinq iournees seulement, cōme estoit iadis celuy de Laius: car l'amour de celuy la estoit pesant, & n'alloit que par terre, mais le tien estendant ses legeres eiles est volé d'outre mer, depuis la Cilicie iatques à Athenes, pour y veoir les belles personnes, & conuerser avec elles: car à la verité la

C premiere cause du voyage de Protogenes hors de son pais, au commencement auoit esté celle la. De quoy festant la compagnie prise à rire: Comment, dit adonc Protogenes, te semble il que ie face la guerre à l'amour, & non pas pour l'amour contre l'intemperance & la violence, qui soubs honnestes & venerables paroles veulent courir à force de tres-villaines actiōs, & tres-laides passions? Quoy, dit adonc Daphneus: appelles tu tres-villaines actiōs le mariage, & la coniectiō legitime

de l'homme avec la femme, qui est la plus digne & D
la plus saincte liaison qui puisse estre? Cela, dit
Protogenes, comme estant necessaire à la genera-
tion, à bon droit est loué & recommandé par les
legislateurs, qui en disent bien deuant le commun
populaire: mais quant au vray amour, les femmes
n'y ont aucune part ne portion: ny ie n'estime pas
que vous autres qui estes affectiōnez aux femmes
ou aux filles, les aimiez non plus que la mousche
n'aime pas le laiēt, ny l'abeille la gauffre à miel, cō-
me les viuandiers & cuisiniers qui tiennēt en mue
& engraisent en lieu obscur les veaux, les oiseaux, E
& autres animaux, ne les aimēt pas pourtant. Mais
tout ainsi comme la nature conduit l'appetit de
l'homme au pain & à la viande modereement, &
autāt qu'il en a de befoing, & le trop & l'exces qui
fait de l'appetit naturel vne passion vicieuse, s'ap-
pelle gourmandise ou friandise: aussi procede bien
de la nature le desir qu'ont l'homme & la femme
de la volupté l'vn de l'autre: mais ceste impetuosi-
té qui y poulse l'homme avec force & vehemen-
ce, telle qu'il est malaisé de la retenir, ce n'est pas
dignement ny pertinēment parler, que de l'appel- F
ler amour, d'autant que l'amour s'attachant à vne
ieune ame bien nec, se doit terminer par amitié en
vertu, là où de ces affectiōns & conuoitises de fem-
mes, si elles succedent heureusement, il en aduient
à la fin que l'on en a quelque fruition & iouissance
d'vne ieunesse & d'vn beau corps: comme respon-
dit anciennement Aristuppus fort à propos à quel-
qu'vn, qui pour le degouster de la courtisanne

A Lais, luy disoit, qu'elle ne l'aimoit point : Aussi ne
 22 fais ie pas moy, respondit-il, le bon vin, ne le bon
 23 poisson, mais si en vse-ie de l'vn & de l'autre avec
 24 plaisir. Car le but & la fin où tend concupiscence,
 c'est la volupté & iouissance d'icelle, mais l'amour
 depuis qu'il perd l'attente & l'esperance d'amitié, ne
 veult plus demourer & caresser pour sa beauté ce
 qui le fasche, quelque fleur d'aage qu'il y ait, sil ne
 luy rend & rapporte le fruiet qu'il demande, qui
 est vn naturel disposé à l'amitié & à la vertu. C'est
 pourquoy vous oyez vn certain mary Tragique en
 B vne Tragedie, parlant ainsi à sa femme,

Tu me veux mal, & ie porte à mon aise

Facilement ta volonté mauuaise,

Tirant profit de ta haine & mespris.

Car plus amoureux que celuy la n'est point celuy
 qui non pour profit pecuniaire, mais pour volupté
 corporelle supporte & endure vne femme mau-
 uaise & peruerse où il n'y a rien d'amiable, comme
 Philippides le poëte Comique, se mocquant de
 l'orateur Stratocles, luy reproche en ces vers,

Elle se tourne artiere tellement

C Que tu ne peux luy baiser seulement,

Que le dessus à peine de la teste.

Mais sil est force d'appeller ceste passio la Amour,
 pour le moins sera-ce vn amour effeminé & ba-
 stard, qui ne comparoistra qu'au cabinet des fem-
 mes, ne plus ne moins qu'au parc de Cynosarges à
 Athenes, où il n'y a que les enfans bastards qui
 s'exercent: ou plustost, ainsi cōme lon dit, qu'il n'y
 a qu'vn seul genre d'Aigle royal qui soit naif de

montagne, celuy qu'Homere appelle l'Aigle noir **D** & le chasseur: les autres sont bastards, qui ne prennent que des poissons, ou des oiseaux lasches, pe-fans, & paresseux, & qui bien souuent pour disette qu'ils endurent, jettent vn cry lamentable de famine. Aussi l'amour naif & legitime est celuy que lon porte aux ieunes enfans, lequel n'estincelle point d'ardeur de concupiscence, comme fait celuy des filles, ce dit Anacreon, ny n'est point parfumé ny fardé, ains tousiours simple & naif, sans affecterie ny mignardise quelconque, parmy les escholes des Philosophes, ou és parcs, là où s'exerce & adresse **E** la ieunesse, & là ne fait que chasser aux ieunes gés, les encourageant, & excitant viuement à la vertu ceux qui sont dignes que lon en prenne soing & sollicitude: là où ce mignard icy, casanier, lasche & failly de cœur, qui ne bouge iamais du giron, ou des courtines des femmes, qui ne demande que toutes choses molles & delicates, enerué de voluptez effeminees, où il n'y a point d'amitié reciproque, ny de rauissement d'esprit, il le fault chasser au loing, cōme Solon le chassa de sa Republique, quād il defendit aux esclaués d'aimer les enfans, & de **F** s'huiler à nud, pour les exercices de la personne, là où il ne leur defendit pas d'habiter avec les femmes, par ce que l'amitié est chose belle, hōneste & gétille, & la volupté chose basse, sale & vile. Pourtant n'est il pas raisonnable ne bien seant qu'vn esclaué face l'amour aux enfans, d'autāt que ce n'est point vn amour charnel qui porte dommage, cōme fait celuy des femmes. Protogenes vouloit
encores

A encores continuer son propos, mais Daphneus l'entrerompant, Tu as (dit-il) allegué Solon fort à propos, & le nous fault prendre pour iuge du vray amour, là où il dit,

Tu aimeras les enfans iusqu'à ce
Que le poil fol leur cottonne la face,
Leur douce aleine & cuiffes cheriffant.

Et si tu veux encore y peux tu adiouter *Æschylus* d'auantage, là où il dit,

O homme ingrat des cuiffes respecté,
Tu n'as les droits & saincte saincteté,

B Tant de baisers mettant en oubliance.

Voila de beaux iuges de l'amour! aussi les autres se mocquent bien d'eux, en ce qu'ils veulent que les amoureux regardent aux cuiffes & aux reins, ne plus ne moins que font les Sacrificateurs & Deuins: mais ie tire de là vn grand argument pour la cause des femmes: car si la cohabitation avec les masles, qui est contre la nature, ne tollit point la bien-vueillance de l'amour, ny ne luy preiudicie point, il est bien plus vray-semblable, que celle des femmes qui suit la nature s'en aille par grace, finif-

C fant en amitié: car à fin que tu le sçaches, *Protogenes*, les anciens appelloient grace la soubmission que fait la femelle au masle. C'est pourquoy *Pindare* dit, que *Vulcain* estoit né de *Iuno* sans grace, & *Sapho* parlant d'une ieune fillette, qui n'estoit pas encore en aage de marier, dit ainsi,

Tu me sembles fillette
Bien petite & ieunette,
Sans grace entierement.

Et y a quelqu'un qui demande à Hercules,
 Luy as tu fait la grace malgré elle,
 Ou si tu as eu de gré la pucelle?

Mais la soumission du masle au masle, si elle est violente, se nomme force & rapt: & si elle est volontaire par vne lascheté effeminee se laissant sail-
 lir, ainsi que dit Platon, comme vne beste brute, elle est du tout infame, detestable, sans grace ny amour quelconque. Parquoy i'estime quant à moy, que Solon ait escript ces vers la, estant enco-
 re ieune, & plein de beaucoup de semence, ainsi que dit Platon: mais au contraire il escriuit ceux-
 cy estant desia sur son aage,

Dame Venus est ores mon deduit,
 Et de Bacchus le breuvage me duit,
 Les dons aussi des Muses, car ce sont

Les poincts qui viure en plaisir l'homme font:
 apres qu'il eut retiré sa vie cōme d'une tourmente
 & tempeste de l'amour des masles, en vne tranqui-
 lité calme du loyal mariage, de l'estude des lettres
 & de la philosophie. Or si nous voulons de pres
 considerer la verité, Protogenes, la passion de l'a-
 mour, soit des masles, soit des femelles, est toute
 mesme & vne, mais si par opiniafreteté tu la veu
 diuiser, tu trouueras que cest amour des masles ne
 se porte pas ny ne se contient pas modestement
 enuers l'autre, ains qu'estant le dernier venu, quasi
 hors d'aage, par maniere de dire, au cours de la vie
 humaine, bastard, & conceu à la desrobée, il en
 veult dechasser à tort le naturel legitime, & celuy
 qui est le plus ancien: car ce n'est que d'hier ou de
 deuant

A deuant hier,ainfi que lon dit communément,mon
bel amy, depuis que les ieunes garçons ont com-
mancé en la Grece à se despouiller & deuestir nuds
pour les exercices de la personne, qu'il s'est gliffé
és parcs & lieux où la ieunesse s'adresse à la luitte
& s'y estant tout bellement coulé, logé & installé,
& depuis peu à peu y aiant fait des çles,il est à la fin
deuenu si insolent, que lon ne le peult plus tenir,
ains oultrage & iniurie l'amour nuptial & legiti-
me, qui aide la nature humaine à s'acquérir im-
mortalité en la rallumant incontinent par gene-
Bration, à mesure qu'elle vient à s'estaindre par
mort. Et puis cestui-cy nie qu'il tende à volupté,
par ce qu'il a honte de le confesser, & craint de
l'aduouer: aussi fault il bien qu'il cherche quelque
belle apparence pour toucher & manier les beaux
ieunes enfans. La couleur doncques & la couuer-
ture qu'il prend, est l'amitié & la vertu. Il se fault
poudre de poulsiere pour luitter, il se baigne en
eau froide,il fronce ses sourcils,& dit qu'il philoso-
phe, & qu'il est chaste & continent: mais c'est au
dehors pour la crainte des loix,& quand ce vient
C la nuit que chascun est retiré,

Doux est le fruiet quand point n'y a de garde

Qui le cueillir secrettement engarde.

Et si,comme dit Protogenes, cest amour des mas-
les ne tend point à copulation charnelle, commét
doncq est il amour, si Venus n'y est point? attendu
que c'est celle des Dieux & Deesses,à laquelle seule
seruir & faire la court il est destiné & deuoué,
n'ayant d'honneur ny de puissance & d'authorité,

qu'autant comme elle luy en depart. Si tu me dis **D** qu'il y a bien quelque amour sans Venus, ne plus ne moins qu'il y a de l'yuresse sans le vin, quand on boit d'un breuvage fait de figues, ou d'orge: Je te respons, que c'est vne boisson flatueuse, dont on se fasche & se laisse bien tost: aussi est vostre amour chose imparfaicte, & qui ne porte aucun fruct. Cependant que Daphneus parloit ainsi, il estoit bien evident que Pifias s'en sentoit fort picqué, & en estoit bien courroucé alencontre de luy. Parquoy si tost qu'il eut fait vn peu de pause, ô Hercules (se print il à dire) quelle insolence, quelle impudence **E** & temerité de gens qui confessent estre comme les chiens liez & attachez par leurs natures aux femelles, de vouloir ainsi dechasser & bannir le Dieu Amour des parcs publiques, & des proumenoirs & allees descouertes, d'une conuersation pure & nette, au Soleil, à l'ouuert, deuant tout le monde, pour le renger & reduire enfermé aux petites farfouettes à fouiller les racines, & aux hachettes pour les hacher, & aux drogues à faire les fards, les charmes & sorcelleries des femmes impudiques? car quant aux honnestes & pudiques, ie **F** dis, qu'il ne leur est conuenable d'aimer ny d'estre aimees. En cest endroit mon pere dit, que luy mesme s'attacha à Protogenes, en luy disant ces vers du poëte,

Ce propos la fera les armes prendre
Aux Argiens.

car certainement Pifias par son insolence nous fait renger du costé de Daphneus, & prendre sa cause
en

A en main, attendu qu'il fort ainsi excessiue-
 hors des bornes de toute raison, en voulant in-
 troduire és nopces & mariages vne societé sans
 amour, priuee de toute amitié diuinement inspi-
 ree & gouuenee, là où nous voions qu'on a bien
 à faire à la maintenir avec tous les iougs, toutes
 les brides & les mords de crainte & de honte, si le
 gré & l'affection cordiale n'y est. Et Pisias, ie ne me
 soucie (dit-il) pas gueres de cela, mais il m'est aduis
 que ie voy aduenir à Daphneus ce qui aduient au
 cuiure, lequel ne se fond pas tant par la force du
 feu, comme par d'autre cuiure fondu qui le fait
 fondre quand & luy, si on le verse dessus. Aussi la
 beauté de Lyfandra ne le fond & ne le trauaille
 pas tant, comme fait ce qu'il s'est approché long
 tēps, & attaché à quelqu'vn qui estoit tout enflā-
 mé & tout plein de feu, dont il s'est ainsi rēply luy
 mesme, & est tout euidēt, que si bien tost il ne s'en
 retire deuers nous, il se fondra entieremēt. Mais ie
 voy que ie fais ce que plus doit desirer Anthemiō,
 c'est que i'offense & les iuges & moy mesme, &
 pourtant ie me tais. Tu me fais grand plaisir, res-
 pondit Anthemion, car il falloit des le commence-
 ment, que tu disses quelque chose sur le subiect
 dont il est question. Je dy doncques, respōdit Pisias
 (mais c'est apres auoir premierement protesté tout
 hault & clair, que quāt à moy ie n'empesche point
 que les femmes n'aient chascune leur amy) que ce
 ieune homme Bacchon se doit garder de la riches-
 se & opulence de Ismenodora, autrement qu'en
 se mettant dedans la magnificence & grandeur

d'une telle maison, il trouuera qu'à faute d'y prendre garde, il aura fait perdre l'estain dedans le cuire, par ce que ce seroit beaucoup fait à luy estant si ieune qu'il est, quand bien il auroit espouzé vne femme de simple & moien estat, sil pouuoit en telle meslange retenir le dessus, comme le vin ou lon met de l'eau: & nous voions que ceste cy s'attent resoluëment de luy commander & d'estre la maistresse, autrement elle n'eust pas refusé tant de marits nobles, puissants & riches, pour venir demander à espouser vn ieune garçon sortant de page, par maniere de dire, & qui auroit encore be-
 ioing d'estre sous vn pedagogue. Voyla pourquoy les marits qui sont sages reiettent d'eux mesmes, ou retrenchent & rongnent les eiles à leurs femmes, c'est à sçauoir leurs biens & leurs richesses qui les rendent superbes & fieres, & leur apportēt des vaines gloires legeres & sottes, avec lesquelles fesseuans bien souuent, elles prennent leur vol & s'en vont à l'effor: ou bien si elles demeurent fermes à la maison, il vaudroit mieux au mary estre attaché à des ceps avec des chaines d'or, comme lon enchaine les prisonniers en Æthiopie, que non pas avec les biens & richesses d'une femme. Mais tu n'allegues pas encore, ce dit Protogenes, qu'en ce faisant nous renuersons sans propos, & avec mocquerie/ la sentence d'Hesiodé qui nous conseille ainsi,

Quand tu seras en l'age de trente ans,
 Ny beaucoup plus ny beaucoup moins mōtās,
 C'est la saison vraye de mariage:

A La femme est preste à marier en l'aage
De quatorze ans, & à quinze il luy fault
Donner mary.

Et nous au contraite attacherons vn ieune garçon, non encore meur ny prest à marier, à vne femme qui d'autant d'annees presque qu'il en a est plus vieille que luy, ne plus ne moins que lon attache les fruiçts des palmiers & figuiers masles aux femelles pour les faire meurir? Voire mais, on me dira, elle est amoureuse de luy, & meurt d'enuie de l'espouser. Je m'esbahy donc qui empesche qu'elle
B ne va en masque iouer à sa porte, donner des aubades la nuict, chäter des plainctes amoureuses à son huys, couronner ses images de festons & de chapeaux de fleurs, combattre alencontre de ses corriuaux qui luy font l'amour, car toutes ces choses la sont actes d'amoureux. Quelle tienne doncques les sourcils bas, qu'elle ne face plus la braue, & qu'elle prenne le geste & la contenāce qui est propre à telle passion: mais si elle a honte de ce faire, & si elle est sage & hōneste, qu'elle demeure honestement en sa maison, attendant que lon l'aille
C requerir & demāder en mariage. Car femme qui confesse ouuertement qu'elle est amoureuse, tant s'en fault que l'hōme la doie rechercher ne prendre, qu'il la doit fuir & hair, puis qu'elle commence son mariage par vne si honteuse incontinence. Protogenes aiant icy fait vn peu de pause, Vois tu Anthemion, dit Daphneus, comment ils nous remettēt encore en la premiere dispute, & nous contraignent à parler de rechef de l'amour nuptial,

nous qui ne nions pas d'en estre des supposts, & ne
 fuions pas d'y entrer en la danse. Ouy certes, res-
 pondit Anthemion, & te prie que tu prēnes à de-
 fendre vn peu plus au long l'amour, & à secourir
 aussi la richesse, de laquelle il semble que Pisias, plus
 que d'autre chose, nous face peur. Et quelle chose,
 dit adoncq mon pere, ne tournera lon en crime à
 vne femme, si nous voulons reietter Ismenodora,
 pource qu'elle nous aime, & pource qu'elle a beau-
 coup de biēs? Voire-mais elle est braue & sumptu-
 euse. Qu'en peut il chaloir, si elle est belle & ieune?
 Elle est de grande & de noble maison. Quel mal y ^E
 a il, quand elle a bon nom & bonne reputation? Il
 n'est pas necessaire, que les femmes, pour estre hō-
 nestes & sages, soient austeres ou mal propres, ny
 fascheuses, & aient mauuaises testes: & toutefois il
 y en a qui les appellēt des Furies, & disent qu'elles
 veulēt mal à leurs marits, quād elles sont modestes,
 hōnestes & sages. Pour ces folles opiniōs la, vaudra-
 il dōc mieux espouser vne Abrotonon de Thrace,
 que lō aura achetee en plein marché, ou vne Bac-
 chis Milesiēne que lon aura fiācee, en achetant des
 cuyrs conroyez: & toutefois encore sçauons nous ^F
 qu'il y a eu assez d'hommes qui se sont fort hon-
 teusement asseruis à telles femmes, car des mene-
 strieres de Samos & des baladines, comme vne
 Aristonica & vne Oenanthe avec son tabourin, &
 vne Agatoclia, ont foullé aux pieds, par maniere
 de dire, les courōnes & diademes des Roys: & Se-
 miramis du pais de Syrie estoit serue & concubine
 d'vn esclauue du grand Roy Ninus, lequel Roy de-
 puis

A puis qu'il l'eut vne fois halenee, en fut si fort espris, & elle le maistrifa & mesprisa tât, qu'elle oza bien luy requerir qu'il la laissast seoir tout vn iour dedans son throsne avec le diademe royal autour de la teste, donner audiéce & despescher affaires comme luy. Ce que Ninus luy aiant ottroyé, & commandé que chascun luy rendist obeissance, comme à luy mesme, & feist tout ce qu'elle ordonneroit, elle vfa modestement de ses premieres ordonnances enuers les gardes du corps, & quand elle veit qu'ils ne luy contredisoient en rien, elle leur

B commanda de le prendre au corps, & puis de le lier, & finalement de le tuer. Ce qui aiant esté entierement executé, elle regna, & commanda en grâde magnificéce à toute l'Asie par vn bien long tēps. Et Belistiche, au nom de Iupiter, n'estoit elle pas vne femmelette barbare achetee entre les autres au marché? de laquelle neantmoins ceux d'Alexandrie ont aujourd'huy des tēples & des autels, que le roy Ptolomeus qui en estoit amoureux feist intituler de Venus Belistiche. Et Phryne qui est au temple de Cupido, & icy, & en la ville de Delphes,

C dont la statue toute doree est entre celles des Roys & des Roynes, par quel douaire est-ce, qu'elle maistrifa tant ceulx qui furent amoureux d'elle? Mais comme ceulx la par leur bestise & lascheté, sans y prendre garde, se sont trouuez proye & pillage de telles femmes; aussi au contraire s'en treuue il d'autres de petite & basse condition, qui s'estants mariez avec femmes nobles & riches, ne se sont point perdus: ny n'ont rien rauallé de la grâdeur &

generosité de leur cœur, ains ont vescu tousiours **D** aimez & honorez d'elles, & tousiours esté maistres iusques à la fin de leurs iours. Mais celuy qui renga & reduit sa femme à peu d'estat, pource qu'il est luy mesme petit & estroict, cōme celuy qui estremit vn anneau, craignant qu'il ne luy tombe du doigt, ressemble proprement à celuy qui tond les crins de ses iumets, & puis les meine boire en quelque fontaine, ou en quelque lac & riuere, parce que lon dit que se voians ainsi tondues & enlaidies, elles en perdent le cœur, tellement que puis apres elles se laissent couvrir à des asnes. Au moien dequoy, **E** choisir & preferer la richesse à la vertu ou à la noblesse de la race, est chose trop vile & trop basse: mais aussi de la faire, quand elle se trouue cōioincte à noblesse & à vertu, c'est vne sottise. Antigonus escriuant au Capitaine qu'il auoit mis à Athenes en la forteresse de Munichia, laquelle il reparoit & fortifioit en toute diligence, luy manda qu'il feist non seulement le collier & la chaine forts, mais aussi le chien foible, voulant luy donner à entendre qu'il ostast aux Atheniens les moiens de se rebeller & soubleuer: Non pas qu'il soit bien seant **F** au mary qui a belle femme & riche, de la rendre ny laide ny pauvre, mais bien de se maintenir luy mesme par sagesse & prudence, & par ne se monstrier iamais estonné de chose qu'il y ait, tousiours egal & non point asseruy ny assubietty, donnant par ses mœurs & ses deportements le contrepois à la balace, pour la tenir ferme, ou la faire pancher là où il est expedient à tous deux. Il y a plus, que
 / son

A son aage est propre à faire mariage, & la disposition de sa personne apte à porter des enfans : car i'entens qu'elle est en la fleur de son aage, & qu'elle n'est point plus vieille (disant cela en se riant à Pissias) que ses corriuaux, & si n'a point encore de cheueux blancs, comme quelques vns de ceux qui sont si fort affectionnez à Bacchon. Or si ceulx la ne s'estiment pas hors d'aage pour hanter & conuerser familiarement avec luy, qui empeschera qu'elle ne soit pour prendre aussi bien soing de sa personne qu'autre quelconque ieune fille, qu'on **B** luy scauroit bailler ? Les ieunes gens sont quelquefois malaisez à mesler, vnir & incorporer ensemble, & malaiseement, sinon avec bien long temps, peuuent ils laisser leur fierté gaillarde, se tourmentans du commencement, sans se pouuoir accoustumer au ioug, de tant plus mesmement, s'il y a quelques amourettes au dehors, qui, comme vn vent, troublent & trauaillent leur mariage, n'estant pas le gouverneur, qui est le bõ sens, en la nauire, d'autant que les parties ne veulent pas obeir, & ne scauent pas commander. Et puis s'il est ainsi, que la **C** nourrice commande au petit enfant de māmelle, le pedagogue au ieune garçon, le maistre d'escrime à l'adolescent, l'amant au ieune fils qu'il aime, & puis apres tout, la loy & le capitaine à l'homme, fait tellement qu'il n'y a personne qui ne soit commandé, ne qui demeure entierement libre, quel inconuenient y a il qu'vne femme plus prudente, gouuerne la vie d'vn sien ieune mary : luy estant vtile, pource qu'elle est plus sage, & le gouuernant

plus doucement, pource qu'elle l'aime : mais après D
 tout, encore fault il que nous autres qui sommes
 Bœotiens portions honneur à Hercules, & que
 nous ne nous offensions point du mariage inegal
 d'aage, attendu que nous sçauons que luy maria
 sa femme Megare, qui auoit trente trois ans, à Io-
 laus qui n'en auoit que seize. Ainsi comme ils te-
 noient ces propos, à ce que mon pere disoit, il ar-
 riuua vn des amis de Pisias, venant de la ville tout
 batant à cheual, qui racontoit vne chose merueil-
 leusemēt hardie, parce que Ismenodora se persua-
 dant, comme il est vray-semblable, que Bacchon e
 n'auoit pas trop à cōtre cœur ce mariage, mais qu'il
 portoit respect & reuerence à ceulx qui l'en diuert-
 tissoient, se resolut de ne quitter point sa poursuite
 pour cela. Si enuoya querir de ses amis ceux qu'elle
 sçauoit estre les plus gaillards & amoureux com-
 me elle, & des femmes celles qui luy estoient les
 plus amies & plus fidelles : & les aiant tous & tou-
 tes assemblez en son logis, elle espia l'heure que
 Bacchon auoit accoustumé de passer par deuant sa
 porte, allant hōnestement au parc des exercices.
 Quand doncques il en approcha tout huylé qu'il f
 estoit avec deux ou trois hommes, elle luy alla au
 deuant iusques à sa porte, & luy toucha le mâteau
 seulement : & lors les amis d'elle tous ensemble
 enleuans le beau fils de belle façon, avec son man-
 teau & sa cazacque double, l'emporterent au de-
 dans, & fermerent incontinent la porte sur eulx. Si
 tost qu'il fut leans les femmes le despouillant de
 son manteau le reuestirent d'vne belle robe nu-
 ptiale

A ptiale de nouveau marié, & les seruiteurs courans çà & là par toute la maison, courônerent de festôs & de rameaux de lierre & d'oliue les huis & portes non seulement d'Ismenodora, mais aussi de Bacchon, & par mesme moien vne menestriere alla iouer des flustes parmy la rue. Quant à ceux de la ville de Thespies, & aux estrangers qui estoient en icelle, les vns en rioiét, les autres s'en courrouçoïét, & irritoïét les maistres & gouuerneurs qui presidét aux exercices de la ieunesse, lesquels ont grande autorité sur les ieunes hommes, & ont soigneusement l'œil à regarder de pres & considerer tout ce qu'ils font. Si ne fut plus question de vacquer aux exercices, ains laissant tous les parcs, & les theatres, s'en vindrent deuant le logis d'Ismenodora, où ils eurent de grands propos & grandes disputes entre eulx. Apres donc que cest amy de Pisias fut arriué courant à toute bride, comme s'il eust apporté quelques grandes nouvelles de guerre, & qu'il eut seulement dit estant tout hors d'haleine, Ismenodora à rauy Bacchon: mon pere disoit que Zeuxippus s'en meit à rire, & prononça ces vers du Poëte Euripide, dont il estoit grand amateur,

Planté de biens, femme, te fait chercher

En tes desirs le plaisir de la chair.

Mais Pisias se leuant en cholere se prit à crier, ô Dieux, où se terminera à la fin ceste licence qui ruine nostre ville, veu que nous voions desia l'audace si effreneé, qu'elle supplante toutes loix? Mais que dis-ic, toutes loix? c'est vne mocquerie Il n'est pas

question de transgresser les loix ciuiles seulement: **D**
 car on viole la nature mesme par l'insolence & la
 temerité des femmes. Quelle chose fut oncques
 faite telle en l'Isle de Lemnos? Allons, allons nous
 en, & quittons desormais le parc des exercices, le
 Palais de la iustice, & le Senat mesme aux femmes,
 si la ville est si lasche & si eneruee que de souffrir
 vne telle insolence. Pisias doncques se partit ainsi
 de la compagnie, & Protogenes le suyuit, se cour-
 roussant en partie autant comme luy, & en partie
 aussi l'adoucissant & le remettant vn peu. Et lors
 Anthemion, A dire la verité, c'est, dit il, vne hardie **E**
 entreprise, & qui sent la hardiessse des femmes de
 Lemnos. Nous sçauions bien qu'elle en estoit fort
 amoureuse. Et Soclarus, en se soubfriaunt: Com-
 ment, penses tu que ce soit vn rapt, ny vne prise à
 force, non pas vne habilité & subtile ruze du ieune
 homme, pour auoir dequoy se couvrir & excuser,
 de ce que fuyant les ambrassements de ses amou-
 reux, il s'est ietté entre les bras d'une belle ieune &
 riche Dame? Ne dittes point cela, & n'aiez point
 ceste opinion de Bacchon, dit alors Anthemion:
 car sil n'estoit bien simple de nature, & bien gros- **F**
 sier de iugement, il ne me l'eust iamais celé, veu
 qu'il me dit tous ses autres secrets, & qu'il sçait bié
 qu'en ce forfait ie fauorisois fort affectueusement
 à ce que pretendoit Ismenodora. Mais il est bien
 malaisé de combattre contre l'amour, & non pas
 contre l'ire, comme disoit Heraclitus: car quoy que
 ce soit qu'il desire, il l'ose bien acheter au peril de sa
 vie, de ses biens, & de sa reputation. Qu'il soit vray,
 est

*Les femmes
 de Lemnos
 tuerēt iadis
 tous leurs
 hommes.*

A est il rien plus sage ny plus honneste qu'Isinendora, en toute nostre ville? Quād a lon iamais ouy qu'il soit sorty en public vne mauuaise parole, ny vne seule suspicion d'aucun faict deshonneſte de ceste maison la? Il fault certainement dire, qu'elle a esté surprise de quelque inspiration diuine plus forte que la raison humaine. Dequoy Pemptidius se prenant à rire: Vrayemēt, dit-il, comme il y a vne maladie du corps qui s'appelle sacree, aussi ne se faut il pas esbahir, si aucuns appellent la plus grande & la plus furieuse passion qui soit en l'ame, sacree & diuine. Mais il me semble que vous estes en mesme erreur que ie veis vne fois deux voisins en Ægypte, qui disputoient & debattoient l'vn contre l'autre sur ce, que s'estant presenté deuant eulx au milieu du chemin vne couleuvre se traissant par la terre, tous deux estoient bien d'accord que c'estoit vn heureux presage & bon augure, mais chascun tenoit que c'estoit pour luy: aussi ie voiois tantost que les vns de vous tiroient l'amour és salles des hommes, & les autres és cabinets des femmes, comme vn singulier & diuin bien, & ne

C m'en esbahissois pas, veu que ceste passiõ a obtenu si grande force, & tant d'honneur entre les hommes, que ceulx qui luy deuoient rongner les æles, & le chasser arriere d'eulx de tous costez, ce sont ceux qui le magnifient plus, & en idolatrent. Or m'en suis ie teu sur l'heure de la dispute, pource que ie voiois que c'estoit vn debat de chose prinnee plus tost que publique: mais maintenant que ie suis deliuré de Pisias qui s'en est allé, ie scaurois &

entendrois volontiers de vous, à quoy visioient & **D**
tendoient ceux qui meirent en auant les premiers,
que l'Amour estoit vn Dieu. Pemptidius aiant a-
cheué sa proposition, ainsi comme mon pere com-
mançoit à luy respōdre, il suruint encore vn autre
messager, que Ismenodora enuoyoit de la ville
pour amener Anthemion, par ce que le trouble de
la sedition croissoit en la ville, d'autāt que les deux
maistres des exercices publicques estoient en diffé-
rent l'vn contre l'autre, disant l'vn qu'il falloit re-
demander Bacchon, & l'autre estant d'aduis qu'ils
ne s'en deuoient point mesler plus auant. Si se leua **E**
iacontinēt Anthemion, & s'en alla en diligence: &
lors mon pere appellat Pemptidius, & adressant
sa parole à luy: Tu me sembles, dit-il, Pemptidius,
toucher vne grande & hardie question, ou pour
mieux dire, remuer vn poinct, auquel on ne deust
aucunemēt toucher, c'est l'opinion & creance que
nous auōs des Dieux, en nous demātant la preuue
& la raison de chascun d'iceux. Car l'ancienne foy
& creance, que nous en auons de noz ancestres en
ce pais, nous doit suffire, ne s'en pouuant dire ne
imaginer de plus suffisante ne plus euidēte preuue, **F**

Dont sens humain par subtile finesse,

N'inuenta oncq la profonde sagesse.

Ains estant ceste tradition, le fondement & la base
cōmune de toute religion, si la fermeté & la crean-
ce d'icelle receuē de main en main vient à estre es-
branlee & remuee en vn seul poinct, elle deuiet
suspecte & douteuse en tous les autres. Tu peux
bien auoir ouy dire comment Euripides fut sifflé

A & rabroué pour le commencement de sa Tragédie Menalippe qu'il auoit ainsi commancee,

O Iupiter, car de toy rien sinon

Je ne cognois seulement que le nom.

Il se fioit fort de ceste Tragédie la, comme estant magnifiquement & exquisement bien escrite, mais pour le tumulte & murmure qu'en fait le peuple, il changea le premier vers ainsi comme il se lit maintenant,

O Iupiter, combien en verité

Ce nom conuient à ta diuinité!

B Et quelle differéce y a il de reuocquer par paroles en doute, & rendre incertaine l'opinion de Iupiter ou de Mercure, ou celle de l'Amour? Car il ne commence pas de ceste heure à demander des autels & des sacrifices, ny n'est point vn Dieu estrange, venu de quelque barbare superstition, comme vn ie ne sçay quel Aty & Adonis, qui se soit glissé clandestinement en l'adoration des hommes, par le moien de quelques Hermaphrodites, ou de quelques femmes, & aiant vsuré secrettement à la desrobée des honneurs qui ne luy appartiennent pas, de sorte qu'il puisse estre accusé de bastardise, & d'auoir esté à faulx tiltre mis au catalogue des Dieux. Car quand tu entendras, mon bel amy, dire à Empedocles,

Auec l'esprit regarde la longueur

Et la largeur pour considerer mieulx,

Et ne te laisse esblouir à tes yeux:

il te faut penser que cela soit dit de l'Amour, d'autât que ce n'est point vn Dieu qui soit visible, ains

se comprennent par opinion & creance, entre les plus anciens Dieux: de chascun desquels si tu veux auoir la demonstration & la preuue, mettant les mains sur chasque temple, & y appliquant la touche de sophistique argumentateur sur chasque autel, tu ne laisseras rien à regratter ny à calomnier. Car, pour n'aller pas loing,

Ne vois tu pas combien la deité
De Venus est de grande dignité ?
Celle qui a d'Amour esté la mere,
Qui nous le donne, & de qui la premiere
Conception de tous hommes dépend.

Car Empedocles l'appelle fertile, & Sophocles féconde, tous deux fort à propos & fort pertinement, & toutefois ce grād & admirable chef d'œuvre principal de Venus & accessoire de l'Amour, qui est la generation, si l'Amour y est present il est agreable & plaisant, mais au cōtraire s'il n'y assiste, il demeure sans zele d'affection, sans estre honoré, ny prisé, ny aimé: par ce que la conionction de l'homme avec la femme sans amour, ne plus ne moins qu'une faim & vne soif, qui a pour son but l'intention de se saouler seulemēt, ne se termine en rien de beau ny de bon: mais la Deesse Venus, par le moien de l'Amour, engendre vne amitié & mélange de deux en vn. C'est pourquoy Parmenides afferme que l'Amour est le plus anciē chef d'œuvre de Venus, escriuāt ainsi en sa Creation du monde:

Premierement l'Amour elle fait naistre
Deuant que nul autre Dieu fust en estre.

Mais Hesiodé plus naturellemēt, à mon aduis, fait
que

A que l'Amour est le plus ancien de tous, à fin que tout le demourant prenne naissance par luy. Si doncques nous deboutons l'Amour des honneurs que lon a accoustumé de luy faire, ceulx de Venus ne demourerôt pas non plus, & ne sçauroit on dire avec verité que lon iniurie l'Amour, que lon n'iniurie quant & quant Venus. Car de dessus les mesmes eschaffaux nous entédons proferer ces iniures,

Communément l'Amour s'engendre en ceulx
Qui comme luy sont mols & paresseux.

Et d'autre costé Venus ne s'appelle pas seulement

B Cypris ains porte encore plusieurs autres noms,

C'est vn enfer, c'est vne violence

Qui point ne cesse, ains tousiours recomméce:

C'est vne rage enragee & fureur.

Comme aussi n'y a il presque pas vn des autres Dieux qui euite la langue iniurieuse de l'ignorant.

Considere vn petit le Dieu Mars, qui comme en vne reuolutiō iudiciaire & table Chaldaïque, tient la place diametralement opposite à celle de l'Amour, combien il a d'honneurs que les hommes luy ont decerneez, & combien à l'opposite on luy

C dit d'iniures,

Mars est aueugle & priué de lumiere,

Dames, & est sa façon coustumiere,

Dessus dessus tout mettre en vn monceau,

Comme vn sanglier fouille avec le muzeau.

Homere l'appelle meurtrier, homicide & variable, faultant de l'vn à l'autre. Chrysippus mesme donnant l'etymologie de son nom, le calomnie & accuse, disant que *ἀγνος* est deriué de *ἀνομιαν*, qui signi-

ne perdre & destruire, dōnant occasion à ceulx qui
 viennent que la force belliqueuse & courageuse
 qui est en nous s'appelle Mars, comme les autres
 aussi au cas pareil, diront que la concupiscence en
 nous s'appellera Venus, & la parole Mercure, les
 arts & sciences les Muses, & la prudence Minerue.
 Vois-tu en quelle fondriere & quel precipice d'im-
 pieté nous nous allōs precipiter, si nous distribuōs
 ainsi les Dieux, selon les passions, puissances & fa-
 cultez qui sont en nous? Le le voy bien, respondit
 Pemptidius, mais comme ce seroit irreueremment
 & impieusement fait, de faire des passions Dieux, **E**
 aussi seroit ce de croire que les Dieux soient des
 passions. Comment, dit mon pere, que penses tu
 doncq, que Mars soit vn Dieu, ou vne passion no-
 stre? Pemptidius respondit, qu'il estimoit que c'est
 vn Dieu, lequel ordonne, gouuerne & modere no-
 stre cholere & nostre courage. Comment Pemp-
 tidius, s'escria mon pere alors, doncq la partie mi-
 litaire & guerriere qui est en nous, aura vne deité
 pour la regir, & celle qui est amiable, sociable & pa-
 cifique, sera sans aucune diuinité; & y aura vn Dieu
 belliqueux & guerrier, qui aura la superintendēce **F**
 & presidence des hōmes, tuans & tuez, des armes,
 des traitts, des assaults de villes, & des pillages, &
 il n'y aura Dieu quelconque qui soit tesmoing,
 guide ne conducteur de l'affection nuptiale, qui se
 termine en vnion & concorde? Il y aura quelque
 Dieu sauuage qui aidera aux veneurs à courir &
 crier apres les cheureux, les ceffs & les liēures: &
 ceux qui attrappent les loups & les ours avec des
 fosses

A fosses & des pieges, ferōt prieres à Aristeus, pour ce que ce fut le premier qui inuenta la maniere de les prendre aux pieges & avec des lacs courans : Hercules mesme prenāt son arc pour tirer à vn oiseau, inuocque vn autre Dieu, comme dit *Æschylus*,

Phœbus chasseur luy dirige sa flèche:

Et de celuy qui estude à la plus belle chasse du monde pour prédre vne amitié, il n'y aura ny Dieu ny Ange, qui dirige, qui adresse, ne qui fauorise son intention? Quant à moy ie n'estime pas, amy Daphneus, que l'hōme soit plante ou arbre, moins à estimer que le chesne, ou l'oliuier, ou la vigne, laquelle Homere pour la louer surnomme domestique & priuee, veu qu'en sa saison il monstre vn instinct à germer & produire vne grande grace & beauté, tāt de l'ame que du corps. Et qui est celuy, ce dit Daphneus, qui a iamais parlé au contraire? Qui? respondit mon pere: Ce sont tous ceulx qui estiment que le soing de labourer, de semer & de planter appartiene aux Dieux, pour ce qu'il y a des Nymphes Dryades, qui ont la duree de leur vie egale à celle de l'arbre, & disent que Bacchus est ce celuy qui fait croistre les arbres, & la saincte beauté des fruiçts, ainsi que parle Pindare, & que la nourriture & croissiance des ieunes enfans & garçons qui se formēt & se dressent en leur fleur & beauté, n'appartienne & ne conuienne à pas vn des Dieux ny demy-Dieux, & qu'il n'y ait aucune diuinité qui ait le soing de faire que l'hōme naissant croisse droit en vertu, & que ce qu'il a de vigueur genereuse ne tombe, & ne soit point abattu ne rompu, à

faulte de directeur qui en préne sollicitude, ou par ^D
 la malice de ceulx qui hantent autour de luy: ce se-
 roit vne grande ingratitude & impertinēce de dire
 cela, en ostant à Dieu sa bonté & benignité, qui se
 respand & distribue par tout, & ne default nulle
 part, non pas és actiōs mesmes, dont la fin est bien
 souuent plus necessaire que belle à voir: comme
 est nostre naissance, laquelle n'estant ny belle ny
 honneste à la veuë, à cause du sang & des douleurs
 de l'enfantement, a neantmoins vne diuinité qui
 luy preside, laquelle se nomme Ilithia & Lochia,
 autrement il valloit mieulx ne naistre point du tout, ^E
 que de naistre mauuais, à faulte de bonne guide &
 de bon gardien. Mais la diuinité n'abandōne point
 l'homme, ny estant malade, ny venant à mourir,
 ains y a tousiours quelque Dieu qui exerce son of-
 fice & sa puissance en cela, de transporter les ames
 de ce monde en l'autre, & de mettre en repos,
 conduire & accompagner ceulx qui sont arriuez à
 la fin de leurs iours, ainsi que declare cestui-cy,

La nuit ne m'a point enfanté pour estre
 De bien sonner de la Lyre le maistre,
 Ny les secrets incogneus deuiner, ^F
 Ou pour les corps mal sains medier,
 Mais pour des morts les esperits conduire.

Et toutefois il y a en ces administrations la plu-
 sieurs choses fascheuses & hydeuses, là où au con-
 traire on ne scauroit dire entremise plus saincte: ne
 vacation ny sollicitude plus conuenable à vn Dieu,
 que d'auoir l'œil à ordonner & regir les desirs &
 prochas des ieunes amoureux qui sont en fleur &

A en vigueur d'aage & de beauté : car il n'y a rien ny de laid, ny de contrainct & forcé, mais tout gré & grace par amiable composition qui rend l'amour agreable, & adresse la peine & le trauail à la vertu & amitié, laquelle sans Dieu ne peut attaindre à la fin qui luy est propre & conuenable, & n'a autre Dieu pour guide, maistre ne conducteur, que l'amour qui est le compagnon des Muses, des Graces & de Venus, ainsi que tesmoigne Melanippides en ces vers,

Cupido venant à semer

B Vn gracieux desir d'aimer,

Au cœur de l'homme sage assemble

L'honneur & le plaisir ensemble.

Ou bien sil n'est ainsi, qu'en pensons nous Zeuxippus? l'en pèse certes cela mesme plustost qu'autrement, par ce que le contraire me semble tout euidemment faux, ioinct que l'amitié, selon que les anciens l'ont diuisee, se depart en quatre diuerses especes, La premiere est la naturelle, la seconde celle de la parenté, la tierce celle de la compagnie ou societé, & la quatriéme celle de l'amour, chacune desquelles a vn Dieu qui luy preside & qui la gouerne, comme nous surnommons vn Iupiter, φίλος, ξένος, εὐόγνος, & πατρός, comme qui diroit protecteur des amis, des hostes, des parents, & de ceux d'vn mesme pais: & l'amitié de l'amour seule, côme impieusé & interdite demourera elle sans dominateur ne gouuerneur, attendu mesmement qu'elle a plus affaire de cure, de sollicitude, & de gouuernement que nulle des autres? Il

est

est certain qu'elle en a voirement, ce dit Zeuxip-^D
 pus, & non point d'estrangers, mais de propres.
 Qui plus est, dit mon pere, la doctrine de Platon,
 mesme en passant, se pourroit alleguer à ce propos
 la, qu'il y a vne espece de fureur qui vient du corps
 à l'ame, procedant de quelque mauuaise tempera-
 ture d'humeur maligne, ou de la meslâge de quel-
 que mauuais vent & esprit pernecieux, mais ceste
 fureur la est fascheuse & maladie dangereuse. Il y
 en a vne autre espece qui ne s'engendre pas sans
 quelque diuinité, ny ne se concree pas en l'ame ou
 dedans nous, ains est vne inspiration estrãgere, qui^E
 vient de dehors, vn deuoyement de la raison, du
 sens & de l'entendement naturel, prenant son ori-
 gine & le principe de son mouuement de quelque
 puissance diuine, laquelle passion en general s'ap-
 pelle enthufiasme, comme qui diroit inspiration
 diuine: car ainsi comme ἐμπνοῦν, se nomme reple-
 tion d'esprit, & ἔμφρον, qui est à dire prudence &
 repletion de sens: aussi telle agitation de l'ame se
 nomme ἐνθουσιασμός, qui n'est autre chose qu'une
 repletion de quelque puissance diuine. De cest en-
 thufiasme il y a vne partie diuinatrice qui predict^F
 les choses futures, & celle la s'inspire par Apollo.
 Il y en a vne autre Bacchanale, qui s'inspire par
 Bacchus, cõme Sophocles dit en quelque passage,
 Dansez avec les Corybantes.

Car quãt aux fureurs de Cybele mere des Dieux,
 & aux Panicques, elles tiennent des Bacchanales.
 La troisiéme espece est celle qui procede des Mu-
 ses, laquelle saisissant vne ame delicate, non pollue

A ne contaminee de vices, excite en elle l'inspiration poëtique & musicale. Et quant à la Martiale & guerriere, il est tout notoire qu'elle est inspiree par le Dieu Mars, & que c'est vne sorte de fureur où il n'y a nulle grace ny douceur de musique, fascheuse, empeschant d'engendrer & nourrir enfans, & faisant prendre les armes à tout vn peuple. Il ne reste plus d'alienation d'entendement & de fouruoyement d'esprit en l'homme qu'une seule sorte, qui n'est ny obscure à cognoistre, ny gueres quoye ne paisible, touchant laquelle, Daphneus,

B ie veux vn petit demander à ce Pemptidius,

Qui est le Dieu qui secouë & conduict

Le iavelot portant de si beau fruiët?

i'entens le rauissement d'amour, tant enuers les beaux & bons enfans, comme enuers les sages & honnestes femmes, veu que c'est le plus chaud & le plus vehement transport d'entendement qui soit entre tous. Ne vois tu pas que le guerrier mesme venant à en estre surpris pose soudain les armes, se desuest de toute belliqueuse fureur?

Lors ses vaillets grande ioye en sentans

C Luy vont du dos le cercelet ostans.

& luy mesme n'ayant plus volonté de combattre, demeure assis à regarder faire les autres. Et quant aux mouuements & aux faults Corybantiques, & courses Bacchanales, on les appaise & fait on cesser en changeant seulement à la mesure, le pied trochee en spondee, & au chant le Phrygien en Dorien: & semblablement la prestresse Pythie sortant de la machine à trois pieds, sur laquelle elle

reçoit l'esprit qui l'incite à fureur, demeure quoye, **D**
 en paix & en tranquillité, mais depuis que la fureur de l'amour a vne fois attainct l'homme au vif à bon escient, il n'y a plus musique, ny charme ny changement de lieu, ny chant lenitif qui la peult arrester, par ce que les amoureux aiment presents & regrettent absents: de iour ils prochassent, de nuict ils veillent sobres, & à ieun ils reclament & inuocquent leurs amours, & apres boire ils les chantent: & ne font pas les inuentions poëtiques, comme quelques vns des anciens ont dit, pour leur viue expression songes des veillants, mais plustost **E**
 des aimants, qui parlent & deuissent à leurs amours absents, comme s'ils estoient presents, les caressent & se complaignêt à eux, encore qu'ils ne les voient pas, pour ce qu'il semble que la veuë paigne en l'entendement les autres apprehensions & imaginations avec couleurs liquides, lesquelles s'effacent incontinent, & s'ecoulent hors de l'ame, mais les imaginations des amoureux estants imprimees & peintes à huille avec bruslure de feu, laissent en leur memoire des images viues engrauees, lesquelles se meuuent, viuent, parlent, & y demeurent à **F**
 tousiours, suivant ce que le Romain Caton disoit, que l'ame de l'aimant viuoit & habitoit en celle de celuy qu'il aimoit, d'autant qu'il s'imprime le visage, les meurs, le naturel, la vie, & les actions de ce qu'il aime, par lesquelles estant conduit il abbrege en peu d'heure beaucoup de chemin, & treuve vne voye courte & droite, comme parlent les poëtes Comicques, pour paruenir à la vertu:

A car il passe de l'amour en l'amitié, estant porté & guidé par la faueur du Dieu d'Amours sur l'instinct de son affection, ne plus ne moins que dessus vne vague. Je dy doncques en somme, que le rauissement & enthousiasme des aimants n'est point sans diuinité, & qu'il n'y a autre Dieu qui le guide & gouuerne, que celuy duquel nous solennisons au iour d'huy la feste, & auquel nous sacrifions. Toutefois pour ce que nous mesurons la grâdeur d'un Dieu à la puissance & à l'vtilité, & que suiuant ceste taxe la nous estimons & nommons entre les biens **B** humains la royauté & la vertu les plus diuins, il nous fault premierement considerer si l'amour cede à aucun des Dieux en puissance, combien-que, comme dit Sophocles,

Venus à vaincre a de pouuoir beaucoup.

Aussi est bien grâde la puissance de Mars, & voïos que de tous les autres Dieux la force & puissance est diuisee egaleement en deux parts, dont l'vne consiste à nous approcher & faire aimer ce qui est beau & bon, & l'autre à nous faire hair ce qui est laid & mauuais, qui sont les premieres impressiōs, **C** qui des le commencement s'engrauent en noz ames, ainsi comme Platon en quelque lieu parle des Idees. Or considerons doncques tout premierement, que quant à l'acte de Venus nous le pouuons acheter avec vne drachme, c'est à dire avec vne bien petite piece d'argent, & n'y a homme qui pour iouir de telle volupté endurast aucun travail, ny s'exposast à aucun dâger si n'estoit amoureux. Et à fin que nous n'alleguions icy vne Phryné &

vne Laïs, nous trouuerons quelquefois sur le soir **D**
 Gnathenion sans lanterne, attendant de la lumie-
 re, ou appellant quelqu'un, nous passerons outre
 sans nous y arrester: peu de temps apres il suruie-
 dra vn vent d'affection & d'amour vehemente,
 qui fera que nous estimerons autant que les thre-
 fors & la seigneurie de Tantalus, comme ion dit,
 ce dont nous ne faisons n'agueres aucun compte,
 tant le plaisir & la grace de Venus est foible, &
 faoule promptement l'homme, si l'amour n'y in-
 spire sa vertu. Ce que vous verrez encore plus
 euidemment par cest autre argument icy, c'est **E**
 qu'il y a plusieurs hommes qui communicquent à
 d'autres leurs voluptez, iusques à leur produire &
 prostituer non seulement leurs amies & concubi-
 nes, mais aussi leurs propres femmes espousees,
 comme lon recite d'un certain Galba Romain, le-
 quel donnoit à soupper à Mecenas, & voiant qu'il
 commançoit à escrimer des yeux & de petits re-
 gards amoureux avec sa femme, il laissa tout dou-
 cement aller sa teste sur le couffin, comme faisant
 semblant de dormir, ce pendant il y eut quelqu'un
 des vaillets qui s'aprocha de la table tout bellemét, **F**
 & essaya de desrober du vin, ce que voiant Galba,
 „ Malheureux, dit-il, ne vois tu pas que ie ne dors
 „ que pour Mecenas? Et quant à celuy la à l'aduen-
 ture n'est il pas de merueille, pour ce que ce n'e-
 stoit qu'un plaisant & bouffon: mais en la ville
 d'Argos il y auoit deux des principaux citoyens cō-
 currents & contraires l'un à l'autre au gouuerne-
 ment des affaires, l'un nommé Nicostratus, & l'autre
 Phaulius

A Phaulius. Passant doncques vn iour le Roy Philip-
 pus par là, l'opinion commune estoit que Phaulius
 ne faudroit pas de se prochasser & effectuer quel-
 que domination tyrannique & principauté en la
 ville, par le moien de sa femme qui estoit belle &
 ieune, si vne fois elle couchoit avec le Roy. De-
 quoy se doubtant bien Nicostratus s'en alla pour-
 mener expressément deuant la porte de son logis:
 & Phaulius feit chauffer des bottines à sa femme,
 luy donna vn manteau à la Macedoniene, luy meit
 vn chapeau sur la teste, & la conduisit luy mesme
B en cest habit iusques au logis du Roy, cōme si c'eust
 esté vn page. Or veu que par le passé & encore de
 present il y a eu si grād nombre d'amoureux, auez
 vous iamais leu ne veu, qu'aucun ait esté courtier
 de ses propres amours, voire quand bien c'eust
 esté pour gagner la maiesté souueraine, & les hō-
 neurs diuins de Iupiter? Je croy, quant à moy, que
 non: car comment seroit il possible, veu qu'il n'y
 a personne qui contredie, ne qui s'oppose aux
 actions des Princes & tyrans, & au contraire il y
 en a plusieurs qui sont leurs cōcurrents en amour,
C & qui leur font teste à aimer de belles ieunes per-
 sonnes: comme lon lit, qu'Aristogiton Athenien,
 Antileon Metapontin, & Menalippus Agrigen-
 tin, ne s'attacherent point aux tyrans tant qu'ils les
 veirent gaster & ruiner le public, & faire tous les
 excès & cruautez du môde: mais si tost qu'ils com-
 mancerent à solliciter & tascher de corrōpre leurs
 amours, alors ils oublierent toutes choses, & ha-
 zarderent leur vie à tout peril. Aussi dit on qu'Ale-

xandre escriuit à Theodorus, frere de Protheas, D
 » Enuoye moy la ieune fille musicienne que tu as,
 » pour six mil escus que ie t'enuoye, si ce n'est que tu
 » en sois amoureux. Vn autre de ses mignons An-
 tipatrides estant venu en masque iouer en son lo-
 gis, avec vne ieune garce qui iouoit de la fluste. Ale-
 xandre la trouua gentille, & y prit plaisir. Si luy
 » demanda, N'es tu point amoureux de ceste ieune
 » garce? Et comme l'autre luy eut respondu, que si
 » estoit bien forr: Que maudit-sois tu doncq, dit-
 » il, malheureux que tu es. & s'en absteint, sans la
 » vouloir toucher. D'autre costé voyez vous en E
 faicts d'armes. combien l'amour y a de pouuoir,
 n'estant ny lasche ny paresseux, comme dit Euripi-
 des, fuyant les armes, & habitant és delicates iouës
 des ieunes Damoiselles: car l'homme remply d'a-
 mour n'a que faire de l'assistance de Mars, pour
 combattre les ennemis, ains aiant son Dieu quand
 & soy qui luy assiste, il est prest de passer à trauers
 le feu, à trauers la mer, & les tempestes de l'air,
 pour son amy, quoy que ce soit qu'il luy comman-
 de. De tous les enfans, tant fils que filles, de Nio-
 bé, qui en la Tragedie de Sophocles sont tuez & F
 tirez à coups de flesches, il n'y en a pas vn qui ap-
 pelle à son secours en mourant, autre defenseur ne
 protecteur que son amoureux,

O Iupiter enuoye à mon secours,

Celuy qui est mes loyalles amours.

Vous scauez (ie croy) tous, comment & pourquoy
 mourut en combattant Cleomachus le Thessa-
 lien. Non pas moy, dit Pemptidius, mais ie le
 scaurois

A ſçauois volontiers. Auffi eſt-ce choſe bien digne de ſçauoir, dit mon pere. Il eſtoit venu au ſecours des Chalcidiens, eſtant la guerre Theſſalique en ſa plus grande force contre les Eretriens. Or eſtoient les Chalcidiens aſſez forts de gens de pied, mais de cheual, non, & leur eſtoit bien malaiſé de rompre la cheuallerie des ennemis. Si prièrent Cleomachus leur allié & confederé, homme vaillant & magnanime, de commander la charge, & de donner le premier dedans les gens de cheual des ennemis. Et luy demanda à ſon amy qui là eſtoit, ſ'il

B verroit le combat. Le ieune adolescent reſpondit que ouy, & l'embrassa fort affectueuſement, en luy mettant ſon armet en la teſte. Dequoy Cleomachus aiant le cœur eſleué, aſſembla autour de luy vne troupe des meilleurs & plus hardis hommes d'armes Theſſaliens, & donna vaillamment dedans les ennemis, de maniere qu'il les eſbranla des la premiere charge, & finalement les rompit tout à fait: ce que voians les gens de pied, prindrēt auffi la fuitte: & ainſi les Chalcidiens gagnerent la bataille entiere: mais il aduint que Cleo-

C machus y fut tué, & monſtrent encore au iourd'huy les Chalcidiens ſa ſepulture ſur la place, où il y a vne haulte colonne deſſus: & là où les Chalcidiés reputoient au parauant choſe vituperable & infame que d'aimer les ieunes enfans, depuis ils en aimerent la façon, & l'honorèrent plus que nuls autres des Grecs. Toutefois Ariſtote eſcrit, que Cleomachus mourut bien aiant gagné la bataille contre les Eretriens, mais que celuy qui fut baiſé par

son amy estoit de la ville de Chalcide en Thrace, **D**
 aiant esté enuoyé au secours de ceux de Chalcide
 en Eubœe, d'où vient que iusques au iour d'huy
 lon y chante vne telle chanson,

Enfans extraicts de noble race,
 Douez de belle & bonne grace,
 N'enuiez de vostre beauté

La familiere priuauté

Aux hommes vaillans à la guerre,

Pour ce qu'on fait en ceste terre

De vaillance profession,

Et d'amoureuse affection. **E**

l'aimant se nommoit Anthon, & l'aimé Philistus,
 ainsi que le poëte Dionysius l'escrit en son liure
 des causes. Et en nostre ville de Thebes (dit-il)
 Pemptidius Ardelas ne donna il pas au ieune hō-
 me qu'il auoit aimé, vn harnois complet de toutes
 pieces, le iour qu'il fut enroollé entre les gens de
 guerre? Et Pammenes homme bien experimenté
 en l'amour, ne changea il pas l'ordonnance en bat-
 taille de noz gens de pied? reprenant Homere,
 comme n'ayant rien entendu en l'amour, de ce
 qu'il rengeoit & ordonnoit les Acheiens par na- **F**
 tions & lignees, & ne mettoit pas l'aimant aupres
 de l'aimé, par ce que cela eust esté proprement ce
 que dit Homere,

Vn escu l'autre en ordre soustenoit,

Et vn armet à l'autre se tenoit.

Ce qui est la seule ordonnance d'armee inuinci-
 ble en bataille: par ce que les hōmes quelquefois
 abandonnent bien au peril ceux de leurs lignees,
 leurs

A leurs parents & alliez, voire leurs propres peres & leurs enfans, mais il n'y eut iamais ennemy qui euadaft ne qui passaft à trauers vn aimant & vn aimé, attendu que bien souuent, sans qu'il en soit befoing, ils leur montrent leur hardieffe alleuree, & qu'ils ne craignent point leur peau: comme fait Theron le Theffalien, lequel mettant sa main gauche dessus vne muraille, & desguainant son espee avec la droite, s'en couppa le poulice deuant son amy, prouocquant son corriual à en faire autant, s'il auoit le cœur bon. Vn autre estant par cas de

B fortune tombé sur le visage en combattant, comme l'ennemy haulsoit l'espee pour luy donner le coup mortel, le pria d'attendre qu'il se fust retourné, de peur que son amy ne le veist blessé par derriere. Aussi voions nous, que non seulement les peuples & nations qui ont esté plus adonnees à l'amour, ont aussi esté les plus belliqueuses, comme les Bœotiens, les Lacedemoniens, & les Candiots: mais aussi les anciens Princes & capitaines, comme Meleager, Achilles, Aristomenes, Cimon, & Epaminondas, lequel auoit deux ieunes hommes qu'il aimoit, Asopicus & Zephiodorus, qui mourut quand & luy à Mantinee, & est enterré tout au pres de luy. Et Euchnamus Amphissien, qui le premier osa faire teste à Molus, le plus terrible & le plus redouté qui fust entre tous les ennemis, & l'ayant tué en fut honoré par les Phociens d'honneurs heroïques. Quant à Hercules il seroit malaisé de nôbrer ses amours, tât il y en a: mais entre les autres on reuere & honore iusques au iour-

d'huy Iolaüs, d'autant qu'on estime qu'il ait esté ^D
 aimé de luy, & valon prendre le serment & l'as-
 seurance d'amour que lon se iure reciproquemēt
 l'vn à l'autre dessus sa sepulture, & dit on qu'Apol-
 lon estant expert en la medecine sauua Alcestis
 d'vne maladie desesperee, en faueur d'Admetus,
 qui estoit amoureux de sa femme: car les poëtes
 faignent qu'Apollon aimant Admetus, le seruit,
 comme son vallet, vn an tout entier, & nous est
 venu Alcestis bien à propos en la memoire, par ce
 que les femmes n'ont pas ordinairement rien de
 commun avec Mars, mais toutefois le rauissement ^E
 d'amour les poulse iusques à oser faire choses qui
 sont contre leur naturel, & de volontairement
 mourir. Et si les fables des Poëtes ont quelque
 puissance de faire foy, cela est prouué par ce que
 lon lit d'Alcestis, de Protefilaüs, & de Eurydicé
 femme d'Orpheus, que Pluton n'obeit à autre
 Dieu, & ne fait ce qui luy est commandé par autre
 que par Amour, combien qu'enuers tous les au-
 tres, ainsi que dit Sophocles,

De grace il n'vse & de douce equité,

Ains de iustice en toute austerité: ^F

encore toutefois porte il quelque respect aux
 amoureux, & enuers ceux la seuls se monstre gra-
 cieux, & non pas rigoureux & inflexible. Parquoy
 ie dis, mon amy, que c'est bien bonne chose que
 d'estre receu en la religion & confrairie des myste-
 res d'Eleusine, mais ie voy que les supposits & de-
 uots de l'amour sont encore en meilleure cōdition
 en l'autre monde enuers Pluton: non que ie croye
 du

A du tout aux fables des Poëtes, mais aussi ne les decroy-ie pas du tout: car ils disent bien, & par ne sçay quelle diuine rencontre ils touchët au poinët de ce qui est & de la verité, disans qu'il n'y a que les aimants qui retournent des enfers en ceste lumiere: mais comment, & par quel moien, il n'en sçauent rien, comme s'estants esgarez, & en aiants failly le droit chemin, que Platon le premier des hommes, par le moien de la philosophie a retrouué & recogneu. Il y a bien parmy les fables des *Ægyptiens* quelques vmbres obscures de la verité

B espādues par cy par là, mais elles ont besoing d'vn bien experimenté & habile veneur, qui de peu de trace sache bien cognoistre & iuger beaucoup. Apres doncques auoir discouru de la force & puissance de l'amour qui est si grande, ie viens maintenant à examiner & considerer sa largesse & liberalité enuers les hommes, non pas s'il fait beaucoup de biens à ceux qui sont aimez, par ce qu'ils sont notoires à tout le mōde, mais s'il porte encore plus de profit & de plus grād à ceux mesmes qui aimēt. Car Euripides, quoy qu'il soit au demourant grād

C partial de l'Amour, si est-ce qu'il louë & admire ce qui est le moindre en luy, quand il dit,

Amour enseigne à l'homme la musique,

* Quoy qu'il n'en eust deuant nulle prattique.

Car on peut dire qu'il le rend habile homme, encore qu'il fust lourdaut au parauant: qu'il le fait hardy & vaillant, encore qu'il fust au parauant lasché & couard, comme ceux qui brussent & mettēt au feu le bois, le rendent ferme & dur, au lieu

qu'il estoit mol au parauant. Aussi tout amoureux deuiant large, liberal & magnifique au lieu qu'il estoit chiche, taquin, & tenant: car l'auarice & la chicheté se fondent & amollissent par l'amour, ne plus ne moins que le fer par le feu, de maniere qu'ils prennent plus de plaisir de donner à leurs amours, que non pas de prédre & de receuoir des autres: car vous sçauiez bien comme Anytus le fils d'Anthemion estant amoureux d'Alcibiades, ainsi cōme il traittoit quelques siens hostes en vn festin magnifique, Alcibiades y vint en masque folastrer, & prenant la moitié de la vaisselle d'argent, s'en alla à tout: ce que les conuiez trouuerent fort mauvais, & dirent qu'il festoit en cela monstré trop insolent & trop outrageux enuers luy: Mais bien courtois & gracieux, leur respondit Anytus: car il pouuoit prendre le tout s'il eust voulu, & il m'en a laissé la moitié. Zeuxippus adonc tout resiouy: ô Hercules, peu s'en faut, dit-il, que tu ne m'ayes osté toute l'inimitié hereditaire que i'auois alencontre d'Anytus, à cause de Socrates & de la philosophie, puis qu'il estoit ainsi courtois & gentil en amour. Ainsi soit, ce dit mon pere: mais au reste poursuivons nostre propos. L'amour rend les personnes qui autrement estoient melancholiques, seueres & chagrines, plus gentilles, plus douces & gracieuses, à ceux qui les frequentent.

La maison est à voir plus honorable,

Où il y a feu luyfant perdurable,

Aussi est l'homme plus ioyeux & plus gay, quand il est eschauffé de la chaleur d'amour: mais le vulgaire

A gaire des hommes iuge peruerfement en cela, car
 ſils voient de la lueur celeſte ſur vne maifon la
 nuit, ils eſtiment que ce ſoit choſe diuine, & ſ'en
 eſbahiffent: au contraire voians vne ame petite,
 baſſe & vile, qui ſe remplit incontinent de coura-
 ge, de franchiſe, de deſir d'honneur, de grace, de li-
 beralité, ils ne ſont point ſemonds de dire ce que
 dit Telemachus en Homere,

Certes vn Dieu habite la dedans.

Mais, par toutes les graces, ce dit Daphneus, n'eſt
 ce pas vn eſſect de cauſe diuine, que celuy qui eſt
 E eſpris d'amour meſpriſe preſque toutes autres
 choſes, ie ne diſ pas ſeulement ſes familiers, ſes
 amis & domeſtiques, mais auſſi les loix, les magi-
 ſtrats, les Princes & les Roys. il ne craint, n'eſtime
 ny n'admire rien, ains eſt ſi hardy qu'il ſe preſente-
 roit deuant la fouldre meſme penetrante guerrie-
 re: & touteſois ſi toſt qu'il voit ſes amours,

Il ſe tappit de peur, comme le coq

Qui baiſſe l'ele, & va fuiant le choq.

ſon audace luy tombe, la guayeté de ſon ame pa-
 rauant eſleuee ſe raualle. Et ne ſera point imper-
 C tinent de faire entre les Muſes mention de Sappho.
 Les Romains eſcriuent que le fils de Vulcain, Ca-
 cus, iettoit feu & flamme par la bouche: mais de
 Sappho les paroles, à la verité, ſont meſſees de feu,
 & par ces vers elle monſtre au dehors la chaleur
 enflammee de ſon cœur,

Allegeant la douleur cuyſante

De ſon amour par la plaiſante

Voix des Muſes.

ainsi que dit Philoxenus. Mais si d'adventure, D
 Daphneus, l'amour de Lyfandra ne t'a fait oublier
 les ieux, aufquels tu foulois iadis passer le temps, ie
 te prie remets nous en memoire les vers de la belle
 Sappho, esquels elle dit, que quand son amie se
 presentoit deuant elle, elle perdoit la voix & la pa-
 role, son corps fondoit en sueur froide, elle de-
 uenoit passe, & vn esblouissement & euanouisse-
 ment la surprenoit.

LA CHANSON DE SAPPHO.

E
 Egal aux Dieux, à mon aduis,
 Est celuy qui peult vis à vis
 Ouir tes gracieux deuis,
 Et ce doux rire,
 Qui le cœur hors du sein me tire,
 Qui tout l'entendement me vire
 Dessus desfoubs, tant il l'admire.
 Quand ie te voy,
 Soudainement ie m'apperçoy,
 Que toute voix default en moy,
 Que ma langue n'a plus en soy
 Rien de langage.
 Vne rougeur de feu volage
 Me court soubs le cuir au visage,
 Mes yeux n'ont plus de voir l'usage.
 Ie sens tinter
 Mes oreilles sans escouter,
 Froide sueur me degoutter
 Par tous les membres, & suinter

A D'humeur glacee.
 Puis d'un tremblement conuassée
 Le demeure passe effacee,
 Plus que l'herbe iaulne passée.
 Finablement
 Je me treuve en ce troublement
 A demy morte, ensemblement
 Aiant perdu tout mouuement,
 Pouls & haleine.

Après que Daphneus les eut recitez, N'est-ce donc
 B pas, adiousta mon pere, ie vous prie au nom de Iu-
 piter, vn saisissement & rauissement diuin tout ma-
 nifeste que cela ? N'est-ce pas là vne celeste emotiō
 de l'ame ? Quelle passion si grande saisit iamais la
 Prophetisse Pythie pour estre montee sur la ma-
 chine à trois pieds ? Qui est celuy de ceux que lon
 estime espris de fureur diuine, que la fluste, le ta-
 bourin, ou autre dependance des cerimonies de la
 mere des Dieux Cybele, transporte si fort de son
 sens ? Plusieurs regardent vn mesme corps & vne
 mesme beauté, & n'y en a qu'un qui demeure pris :
 C pour quelle cause ? Certes nous ne scauōs, ny n'en-
 tendōs pas ce que veult dire Menāder en ces vers,
 Amour qui est maladie de l'ame,
 Fatalement les amoureux enflamme:
 Mais non tous ceulx qui en sont offensez,
 Egaleme[n]t s'en ressentent blesez.
 Et de cela le Dieu Amour en est la cause, qui tou-
 che l'un, & laisse l'autre. Mais ce qui deuoit auoir
 esté dit tout au commencement, puis qu'il me vient

encore en la bouche, comme dit *Æschylus*, ie ne le **D**
 passeray point sous siléce, pource qu'il est de bien
 grande importance. Car de toutes choses qui nous
 entrent en l'entendement, non par le ministère des
 cinq sens de nature, les vnes des le commencement
 ont eu foy & autorité par les fables, les autres par
 les loix, & les autres par le discours de raison. Or
 de la creance & opinion des Dieux, les premiers
 maistres & enseigneurs nous ont esté les Poëtes, les
 Legislateurs & les Philosophes, estants tous bien
 d'accord en cela de supposer, comme chose certai-
 ne, qu'il y a des Dieux, mais au demourant estants **B**
 entre eulx en grand discord, touchant le nombre,
 l'ordre, le rang, l'essence & puissance d'iceulx. Car
 ceulx des philosophes ne sont point subiects à de-
 uenir malades ny à vieillir, ny ne sçauent que c'est
 de sentir labeurs & trauaux,

Seurs de ne passer point le port

D'Acheron bruyant à la mort:

de maniere qu'ils ne reçoient point les Herides
 des Poëtes, ny les Lites, c'est à dire, les dissensions &
 reconciliations, ny *Dimus* ny *Phobus*, qui sont la
 peur & la frayeur, car ils ne veulent point aduouër **F**
 qu'ils soient Dieux ny enfans de Mars, & combat-
 tent mesmes de plusieurs alencontre des Legisla-
 teurs, cōme *Xenophanes* qui disoit aux *Ægyptiës*,
 25 touchant *Osiris*, Si c'est vn Dieu, ne le lamentez
 25 point: si c'est vn hōme, ne l'adorez point. Au con-
 traire aussi les poëtes & les legislateurs ne daignent
 pas seulement escouter & ouir certains Philoso-
 phes qui font des Dieux de quelques Idees des
 nombres,

A nombres, des vnitez, & des vents, & ne les peuuēt pas entendre. Bref, il y a touchant cela vne grande inegalité & differēce entre leurs opinions. Mais tout ainsi comme anciennement il y auoit trois ligues & factions à Athenes, toutes aduerfaires & ennemies les vnes des autres, & nonobstāt quand ils furent tous ensemble, ils esleurent d'vn commun consentement, & donnerent tous leurs voix à Solon, l'eslisans pacificateur, gouuerneur & legislateur, d'autant que sans dispute ils luy deferoient tous la principauté & premier degré de vertu &

Bd'honneur: aussi les trois ligues des opinions des Dieux, dōnans leurs voix les vns d'vn costé, les autres de l'autre, & ne receuans pas facilement celles des autres, toutes ensemble s'accordent en vn: & vnanimement admettent & reçoient Amour en la liste des Dieux, les plus excellēts Poētes, les meilleurs Legislateurs, & les plus excellēts Philosophes, le loiant haultement par leurs escrits: Et comme Alceüs dit, que tous les Mytileneiens d'vn accord & cōsentement esleurent Pittacus pour leur prince: aussi Hesiodé, Platon & Solon amenēt & condui-

Csent Amour de la ville de Helicon en l'Academie pour nostre Roy, nostre prince & gouuerneur couronné de chapeaux de fleurs, honoré & accompagné de plusieurs couples d'amitié & de société, non ia telle que la décrit Euripides, quand il dit,

Estants liez de fers sans fer forgez,
 les attachāt d'vne pesante, certes, & froide chaine,
 qui est, le besoing & la necessité, mais d'vne autre
 liaison qui avec des œles les raut & emporte aux

plus belles & plus diuines choses qui soient au m^o-**D**
 de, desquelles d'autres ont mieulx & plus ample-
 ment traicté. Mon pere aiant ainsi parlé, Soclarus
 se prit à dire, Vois-tu comment estant retombé de-
 rechef pour la secôde fois en vne mesme matiere,
 ie ne sçay comment tu te destournes à force, pour
 n'entrer point en ce sacré propos, fuyant iniuste-
 ment, sil fault dire ainsi ce qui m'en semble, de
 payer la debte que tu nous as promise? Car *Æg*ue-
 res aiant vn peu en passant, & comme enuis, fait
 mention des *Ægyptiens* & de Platon, tu as passé
 oultre, & maintenant encore en fais tu tout autãt. **E**
 Or quant à ce que Platon en a diuinement escrit,
 ou plus tost les Muses d'icy par luy, ie sçay bié que
 quand nous t'en prierions, tu ne le nous dirois pas:
 mais pource que tu nous as touché en passant, que
 la fable des *Ægyptiens* s'accorde assez à ce que les
 Platoniques escriuent touchant l'amour, il ne fe-
 roit pas raisonnable que tu refusasses à nous des-
 couvrir & declarer comment, & nous nous con-
 tenterons quand nous en entendrons vn peu de
 beaucoup. Les autres de la compagnie l'en prie-
 rent aussi. Parquoy mon pere recommença à dire, **F**
 que les *Ægyptiens*, conformément aux Grecs, re-
 cognoissent deux Amours, l'vn vulgaire, & l'autre
 celeste, mais ils en croient encore vn troisieme qui
 est le Soleil, & ont Venus en grande reuerence.
 Quãt à nous, nous voions bien qu'il y a beaucoup
 de similitude entre l'Amour & le Soleil: car ny l'vn
 ny l'autre n'est feu materiel, comme quelques vns
 pensent, mais la chaleur de l'vn & de l'autre est
 douce

A douce & generatiue . Car celle qui procede du Soleil, donne au corps nourriture, lumiere, & deliurance de l'hyuer, & celle qui procede de l'amour fait les mesmes effects aux ames : & comme le Soleil entre deux nuees ou à trauers vn brouillas est plus ardent, aussi est l'amour apres vn courroux & vne ialousie, quand on a fait appointment avec ses amours, plus doux & plus vehement. D'auantage tout ainsi comme il y en a qui estiment que le Soleil tous les soirs s'esteingne, & tous les matins se rallume, autant en cuydent ils de l'amour,

B comme estant mortel & perissable, non pas constant en vn estre : & puis la dispositiõ du corps qui n'est bien exercitee à supporter froid & chaud, ne peult endurer le Soleil, aussi ne fait le naturel de l'ame, qui n'est bien apprise & bien endoctrinee, supporter l'amour sans peine & falcherie : ains & l'vn & l'autre s'en altere, & en sort de son ordinaire, s'en trouuant également indisposé, & s'en prenant à la force & puissance du Dieu, & non à sa propre imbecillité & impuissance : excepté qu'il y a difference en ce, que le Soleil monstre sur terre

C à ceulx qui ont des yeulx, autant les laides que les belles choses, & l'amour n'est la lumiere que des belles seulement, ne faisant regarder les amants qu'à celles la seules, & se tourner deuers elles, & au contraire ne tenir compte de toutes les autres. Au demourant ceux qui appellent la terre Venus, n'en content aucune similitude, mais si bien ceulx qui appellent la Lune Venus, d'autât qu'elle est diuine & celeste, & la region où est la meslâge du mortel

avec l'immortel imbecille de soy mesme, obscure & ombrageuse, quand le Soleil ne luy luit pas, ne plus ne moins que Venus, quand Amour ne luy assiste pas. Et pourtant est il plus croiable que la Lune ressemble à Venus, & le Soleil à l'Amour plus que à nul autre Dieu, mais non pas pourtant que ce soient du tout les mesmes, par ce que le corps n'est pas mesme chose que l'ame, ains autre, comme aussi le Soleil est sensible & visible, & l'amour spirituel & intelligible: & si cela ne sembloit un peu trop dur, on pourroit dire, que le Soleil fait tout au contraire de l'amour, par ce qu'il diuertit l'entendement de la speculation des choses intelligibles à la contemplation des sensibles, en l'abusant & deceuant par le plaisir & la splendeur de la veüe, & luy persuadant de demander & de chercher en luy ou par le moien de luy, toutes autres choses, & mesmemēt la verité, & riē ailleurs, estants ravis de son amour, pource que nous le voions

Tel & si beau reluire sur la terre,
 comme dit Euripides, à faulte de sçauoir & auoir experience de l'autre vie, ou pour mieulx dire, à cause de l'oubliance des choses que l'amour nous F
 reduit en memoire. Car tout ainsi comme, quand nous nous esueillōs en vne grande & claire lumiere s'esuanouissent soudainement toutes les visions & apparitiōs nocturnes, que nostre ame auoit eues en dormāt: aussi semble il que le Soleil esblouisse, charme & enchāte d'aïse & d'estonnement, la memoire & l'entendement de ceulx qui naissent & qui viennent en ceste vie, oublians ce qu'ils ont
 sçeu

A ſçeu en l'autre. Combien que veritablement là
 ſoit la vraye & reale ſubſiſtance des choſes, & icy
 l'apparence ou le ſonge, & par maniere de dire, en
 dormant noſtre ame embraille & admire ce qui eſt
 le plus beau & le plus admirable de tout le monde:

Mais alentour ſont les ſonges friuoles,
 Illuſions deceuantes & folles.

Se perſuadât que tout ce qu'il y a de beau, de grand
 & de digne, ſoit par deçà: ſi ce n'eſt qu'elle rencon-
 tre de bonne aduenture vn diuin, chaſte & honne-
 ſte amour pour ſon medecin, ſon guide & ſon ſau-
 ueur, lequel paſſant de l'autre monde par les biens
 corporels, la guide & cōduit à la verité & au chāp
 d'icelle, là où eſt logee la parfaite, pure & naiſue
 beauté, ſans aucune meſlange de faulſeté, deſirant
 ſ'entr'embrasser & deuifer enſemble, cōme de bōs
 amis qui de long temps ne ſe ſont entre-veus, luy
 aſſiſtant touſiours amour, ne plus ne moins qu'vn
 Secretain qui meine par la main les profes d'vne
 religion, & leur monſtre toutes les ſainctes & ſe-
 crettes ceremonies l'vne apres l'autre: puis quand
 ils ſont derechef renuoyez par deçà, l'ame par elle
 meſme ne ſ'en peut pas approcher, ains par l'orga-
 ne du corps, tout ainſi que les ieunes enfans ne
 peuuēt pas d'eux meſmes cōprendre les choſes in-
 telligibles, au moien dequoy les Geometres leur
 baillent en main des formes palpables & viſi-
 bles de la ſubſtance incorporelle & impaſſible,
 c'eſt à ſçauoir des representations de ſpheres, de cu-
 bes ou corps quareez, ou de dodecaèdres, c'eſt à
 dire de corps à douze faces egalles. Auſſi l'amour

celeste nous presente & monstre des miroirs beaux D
 pour contempler les choses belles, mais mortels
 pour y admirer les diuines, & sensibles pour y ima-
 giner les spirituelles & intelligibles : ce sont les
 beaux traicts de visage, belle couleur, & figures
 plaisantes des ieunes personnes en fleur d'aage, &
 nous resueille tout doucement nostre memoire,
 qui peu à peu s'enflamme par cela : d'où vient que
 quelques vns par la sottise de leurs amis & parêts,
 taschant à estaindre ceste affection & passion par
 force & sans raison, ne font rien qui vaille pour
 eulx, ains se remplissent eulx mesmes de trouble & E
 de fume, ou se laissant aller la teste deuant en des
 voluptez villaines & deshonestes, se fondent &
 desseichent. Mais ceulx qui avec vn sage discours
 de raison accompagné de vergongne honeste, ont
 osté à l'amour l'ardeur bruslante de son feu, & en
 ont laissé en l'ame la lueur & splendeur avec la cha-
 leur, laquelle n'excite point vn coulement ny vn
 glissement de seméce, comme dit Epicurus, estants
 les atomes serrez & estraincts, à cause de leur po-
 lisseure & chatouillement, mais bien esmeut elle
 vne dilatation & ouuerture merueilleuse, fertile & F
 generatiue, ne plus ne moins qu'il se fait en vn ar-
 bre qui iette feuilles, fleurs & fruiçt, à cause qu'il
 prent nourriture en ouurant les pores & pertuis
 de facilité d'obeir & de se laisser persuader, en re-
 ceuant amiablement les douces remonstrances: il
 ne passe gueres de temps que ceulx là, dis-ie, ne pe-
 netrent plus auant que le corps de ceulx qu'ils ai-
 ment, & qu'ils n'entrent au dedans de l'ame, & ne
touchent

A touchent aux mœurs, en rappelant leurs yeux du regard du corps, & qu'ils ne s'entreuoient intérieurement, & conuersent ensemble par communication de bons propos, le plus souuent, pourueu qu'ils aient quelque marque & image de la vraye beauté empreinte dedans leur entendemēt: sinon, ils les quittent là, & se tournent à en aimer d'autres, ne plus ne moins que les abeilles qui laissent plusieurs verdures & plusieurs fleurs, pource qu'elles n'y treuuēt point de miel: mais là où ils rencontrēt quelque trace, quelque influence ou semblance de

B la diuine beauté qui leur rit, & qui les caresse, alors estants ravis d'aise & d'admiration, & l'attirans à eulx ils s'en delectent, & se resiouissent de cela qui veritablement est aimable, desirable & cherissable à tous. Or est il vray que les Poëtes escriuent la plus part de ce qu'ils disent de ce dieu d'amour, en iouant, & le chantent en follastrāt, & y a peu de choses qu'ils dient à certes ny à bon escient, quand ils veulēt toucher la verité ou par iugement & discours de raison, ou par inspiration diuine, cōme est entre autres choses ce qu'ils disent de sa generatiō,

C La gente Iris, de fin or cheuelee,
 S'estant avec le Zephyre meslee
 A engendré le plus ruzé des Dieux.

Si ce n'est que vous adioustez foy aux Grammairiens, lesquels tiennent que ceste fable a esté inuentee pour exprimer la varieté & diuersité des couleurs qui apparoissēt en l'arc celeste. Et pourquoy doncq, dit Daphneus? Je le vous diray, ce dit mon pere. Nous sommes contraincts par manifeste eui-

dence de croire que l'accident de l'arc en ciel n'est D
 autre chose qu'une reflexion du ray de nostre veuë
 qui dõne dedãs vne nuee humide, egale & moyen-
 nement espeffe, où elle rencontre & touche au So-
 leil, en voiant par reflexion sa clarté & lueur, elle
 imprime en nostre entendemēt ceste opinion, que
 telle apparition soit empreinte dedans la nuee.
 Telle est l'ingenieuse habilité & subtile inuention
 de l'amour, qui és ames gentilles & bien nees fait
 vne reflexion de memoire des beautez qui appa-
 roissent, & sont ainsi nommees icy au regard de
 celle diuine, veritablemēt aimable, heureuse & ad- E
 mirable beauté, mais la plus part des hommes vul-
 gaires, poursuiuants & manians vne image d'icelle
 qui apparoit és belles & ieunes personnes, ne plus
 ne moins que dans des miroirs, n'en peuuent tirer
 fruct aucun plus assureé ne certain, que vn peu de
 volupté meslee de douleur, ce qui n'est autre chose
 qu'un esblouissement & erreur du vulgaire, qui en
 des nuees & des vmbres cherche & poursuit en
 vain le contentemēt de son desir, ne plus ne moins
 que les enfants qui taschent à prendre à belles
 mains l'arc en ciel, attirez & trompez par l'espece F
 qui apparoit à leurs yeux : mais l'amoureux hon-
 neste, pudique & chaste, fait bien autrement, car
 il esleue son desir de là vers la diuine, spirituelle &
 intellectuelle beauté, & rencontrāt la beauté d'un
 corps visible, s'en sert comme d'un instrument de
 sa memoire, l'aime & le careffe, & en conuersant &
 hantant avec luy, d'aïse & de ioye enflamme en-
 core sa pensee d'auantage. Tels amoureux estants
 par

A par deçà avec les corps, ne s'y arrestent pas à les desirer ny admirer, ny quand ils sont par delà apres leur mort ne retournent pas derechef par deçà, cōme fugitifs, pour s'amuser aux chambres ny aux cabinets des nouveaux mariez, qui ne sont que vaines illusions de songes apparentes à hommes & femmes trop adonnez à la volupté & à l'amour des corps, que lon appelle iniustement & à faulces enseignes amoureux. Car celuy qui veritablement est amoureux, & aiant approché des vrayes beautez, autant comme il est loysible à l'homme, prend

B des aëles, deuiet sanctifié, & demeure pour tout iamais là sus, ballant, & se promenāt touliours alentour de son Dieu, iusques à ce que paruenant derechef aux vergers de la Lune & de Venus, il s'y endort & repose, & recommance à reprendre vne autre generatiō : mais cela est vn subiect plus hault & plus grand que ce que nous auons pour le present entrepris de discourir : parquoy pour retourner à nostre Amour, il a cela, comme tous les autres Dieux, ainsi que dit Euripides,

Il aime à estre honoré des humains.

c Et au contraire il luy desplaist d'en estre mesprisé, car il se monstre doux & bening enuers ceulx qui le recoiuent dextremēt, & rude & aspre enuers ceulx qui se montrent rebelles à luy. Car ny Iupiter hospital ne chastie & venge si promptement les torts faicts aux hostes & aux supplians, ny le Genital les maledictions des peres & meres offensez, comme l'Amour exaulce tost les prieres des amants qui ingratement sont traittez de leurs

amours, en punissant les superbes & mal gracieux. **D**
 Car que pensez vous que ce soit de Euxynthetus
 & de Leucomantide que lon appelle encore au
 iourd'huy en Cypre, la Regardante par la fenestre.
 Et à l'adventure n'avez vous point ouy conter la
 vengeance de Gorgo en Cádiz, qui fut punie tout
 ainsi, comme la Regardante, excepté que celle la
 fut conuertie en vne roche ainsi qu'elle vouloit re-
 garder par la fenestre le corps de son amy que lon
 portoit en terre. Et de ceste Gorgo fut iadis amou-
 reux vn ieune homme appellé Asander, honneste
 & de bõne lignee, & qui aiant autrefois esté riche **E**
 estoit deuenu pauvre & petit en biens, mais pour
 cela n'auoit il point perdu le cœur, ny ne s'estimoit
 point indigne de fortune quelque grande qu'elle
 fust. Car il poursuiuoit en mariage ceste Gorgo qui
 estoit sa parête, combien qu'elle fust pour ses biens
 & ses richesses fort poursuiuie & pourchassée par
 plusieurs autres, & quoy qu'il eust beaucoup de
 gens de bien & d'hõneur pour corruaux & com-
 petiteurs, toutefois il auoit gagné tous les tuteurs,
 curateurs & proches parents d'icelle. *

En cest endroit y a vne grãde breche en l'original Grec. **F**
 D'auantage les causes de l'Amour que lon dit, ne
 sont point propres ny peculieres à l'vn ny à l'autre
 sexe, ains sont cõmunes à tous deux. Car les ima-
 ges qui penetrēt au dedãs des amoureux, selon les
 Epicuriens, & discourent par tout, esmeuent &
 chatouillent toute la masse du corps glissante &
 coulante en semence par certaines dispositions des
 Atomes : il ne se peut dire que cela soit possible,
 procedant

A procedant des masles, & impossible procedant des femelles, ny aussi ces belles & saintes rememorations que nous referons à la diuine, vraye & parfaite beauté, selon les Platoniques, moyénant lesquelles l'ame se forme des æles, qui empesche que telles recordations ne procedēt des ieunes enfans, aussi bien cōme des ieunes filles ou femmes. Quād on voit vn bon naturel, chaste & hōneste cōioinct avec vne fleur de grace & de beauté, & quand le beau soulier, cōme disoit Ariston, monstre la bōne façon du pied, c'est à dire, quand soubs beaux vi-

B sages & en corps pudicques & nets, ceux qui sont exercitez à cognoistre & iuger telles choses, apperçoiuēt des traces cleres & euidētes d'vne ame droicte, sincere & nō point affairtee : il n'y auroit point de propos de dire que le voluptueux interrogué,

L'affection tienne à aimer est-elle

Encline au masle ou plus à la femelle?

& aiant respondu,

Où beauté est, ambidextre ie suis,
eust fait vne responce pertinente, selon sa concupiscence charnelle, & quel l'honneste & genereux ne dirigeast ses affections à la beauté & gentillesse de la nature, ains à la difference du sexe. Le bon Escuyer qui aime les cheuaux, n'aimera pas moins la bonté & vistesse du cheual Podargus, que celle d'Ætha la iument d'Agamemnon : Et le veneur ne prend pas plaisir seulement à auoir des chiens, ains nourrit aussi des lisses de Candie & de Laconie. Celuy dōcques qui aime la beauté & la douceur, ne sera-il pas egal à l'vn & à l'autre sexe, ains pen-

fera qu'il y ait difference, comme entre les habillemens, entre aimer les hommes & les femmes? Et toutefois on dit, que beauté est la fleur de vertu. Or de dire que le sexe feminin ne florit point, & ne donne aucune apparence de nature disposee à produire rien de bon, il n'y auroit point de propos, car *Æschylus* dit bien,

La ieune femme à qui l'œil estincelle

Me fait iuger qu'elle n'est pas pucelle.

Et comment, y aura il doncques des marques & signes apparens sur les visages des femmes, qui tesmoigneront vne nature fiere, lasciuue & corrompue, & au contraire n'y aura sur leur face nulle lumiere d'honesteté & de pudicité? Ou bien y en aura il qui apparoiſtront en plusieurs, mais elles ne prouoqueront ny n'exciteront personne à aimer? Ny l'vn ny l'autre n'est ny vray ny vray semblable, ains y est tout commun, autant en l'vn comme en l'autre sexe, ainsi que nous auons demonſtré.

Icy y a vne autre grande defectuosité en l'original.

O *Daphneus* combattons alencontre de ces propos la que *Zeuxippus* vient de discourir, supposant que ce soit vne mesme chose que l'amour, & la concupiscence qui est desordonnee, & tire l'ame en toute dissolution: non que ie pèse qu'il le croye, mais pour ce qu'il l'a souuent ainsi ouy dire à des hommes hargneux, & qui n'ont rien de commun avec l'amour, dont les vns tiennent sous leur main de pauures femellettes qu'ils ont attirees avec des douaires, & les iettent avec leur argét en des menageries, & en des comptes mechaines & sordides,

A dides, querellants tous les iours a lencontre d'elles: les autres aiãts plus de desir d'auoir des enfans que des femmes espousees, ne plus ne moins que les Cygales iettent leur semence sur l'esquile ou l'oignon marin, ou autres semblables herbes: aussi eux engendrans à la haste en des corps les premiers trouuez, apres en auoir cueilly le fruiçt qu'ils demandent, au reste ils ne font plus compte de mariage ny de leurs femmes, ou bien s'ils demeurent avec elles, ils ne s'en soucient point, ny ne font plus cõpte de les aimer, ny d'estre aimez d'elles, & toutesfois Stergin & Stergesta, qui signifient cheremēt aimer, semblent estre deriuez de Stegin, qui signifie contenir, n'y aiant difference que d'une lettre: ce qui monstre que c'est vne mutuelle beneuolence, procedant de la longueur du temps & de la cohabitation. Mais celuy auquel amour s'attache, & qui en est inspiré, premierement, cõme s'il estoit de la republique de Platon, il n'aura point de mien & de tien: car tous biens ne font pas cõmuns entre tous amis, ains entre ceulx qui estants separez de corps conioignent leurs ames par force, & les fondent ensemble, ne voulans ny ne croyans pas que s'en soient deux, mais vne seule. Et puis quant à la pudicité & loyauté de l'un enuers l'autre, dont le mariage a principalement besoing, celle qui vient du dehors, & des loix, tenãt plus du forcé que du volontaire, & procedant de honte & de crainte, Ouurage estant de plusieurs mords de bride, De maint timon ensemble qui la guide, a tousiours affaire de songneuse & estroite garde

entre ceulx qui sont mariez, là où en amour il y a D
tant de continence, d'honnesteté & de loyauté,
qu'encore que quelquefois il touche vne ame im-
pudique & lasciuue, il la diuertit de toutes autres a-
mours, & luy retrenchant toute audace effrontee,
luy rabaisant route arrogance, & ostant toute dis-
solution, luy apporte au lieu vne honneste honte,
vn silence, vn geste posé, & vne contenance rassise,
& la rend desormais obeissante à vn seul amant:
comme vous auez certainement bien ouy parler
de ceste tât renommee courtisanne Laïs, qui estoit
appetee & recherchee de tant de gens, & sçauiez E
bien comme elle enflammoit de son amour toute
la Grece, ou pour mieulx dire, cōme les deux mers
Ionicque & Ægee combattoient à qui l'auroit in-
continent qu'elle fut attrainte de l'amour de Hip-
polochus Theffalien, elle quitta & abandonna le
mont d'Acrocorinthe, baigné de belle fontaine
fraische, & s'enfuyant secrettement au desceu de
tous ses autres amoureux, s'en alla honnestement
au grand Camp d'Alexandre, là où les autres fem-
mes par enuie & ialousie l'aiants menee dedans vn
temple de Venus la lapiderent & assommerent à F
coups de pierre, d'où vient qu'encore iusques au
iourd'huy lon appelle ce temple la, le temple de
Venus homicide. Nous cognoissons des esclaves
& seruantes qui fuyent la cohabitation de leurs
maistres propres, & des hommes priuez qui mes-
prisent la compagnie des Roynes & des Princesses,
quād ils ont les ames esprises d'autre amour qui les
domine: car tout ainsi qu'à Rome, quand le Di-
ctateur

A Etateur estoit esleu, soudain tous ceux qui auoient d'autres offices & magistrats estoient deposez. Aussi tous ceux de qui amour est deuenu le maistre, soudain sont francs, quittes & deliures de tous autres seigneurs, & demeurent au reste en toute liberte. Et vne honneste dame liee d'amour coniugal avec son espoux legitime, souffriroit plustost d'estre abraffee de quelques Ours ou quelques Dragons, que d'estre touchee ou de coucher avec vn autre homme que son mary. Et bien qu'il y en ait vn nombre tresgrand d'exemples, mesmēt chez vous

B qui estes du pais & des supposts familiers de l'Amour, si ne seroit il point raisonnable de passer celuy de Camma, du pais de Galatie. C'estoit vne fort belle ieune Dame mariee avec vn Seigneur du pais, nommē Sinnatus, de laquelle Synorix le plus puissant homme qui fust entre tous les Galates deuint amoureux. Et voiant qu'il ne la pouuoit forcer ne persuader pendant que son mary viuoit, il le fit mourir. Camma pour le refuge de sa pudicitē, & le reconfort de sa douleur, choisit le temple de Diane, & de se rendre religieuse d'icelle

C selon la coustume du pais: elle se tenoit le plus du temps au temple sans vouloir ouir parler aucun de ceux qui la poursuiuoient, combien qu'il y en eust plusieurs & de grands Seigneurs qui la demandoient en mariage, mais Synorix aiant pris l'audace de luy en faire parler: elle monstra de ne refuir point sa poursuite, ny ne se plaignit point du passē, comme si pour l'amour d'elle, & pour l'ardente affection qu'il

luy portoit, non pour autre meschanceté, il eust
 esté induit à faire ce qu'il en auoit fait. Si y vint
 à la fin luy mesme, & luy teint propos de maria-
 ge : elle luy alla au deuant, & monstrant estre
 d'accord luy donna la main, puis l'approcha de
 l'autel de Diane, là où elle fait offrande à la Deesse,
 en respandant vn peu d'vn bruuage de vin & de
 miel empoisonné qu'elle auoit mis dedàs vne cou-
 pe, & en aiant beu presque la moitié donna l'autre
 au Galathe. Puis quand elle veit qu'il l'eut toute
 beuë, alors iettant vn soupir trenchant elle se prit
 „ à dire, I'ay vescu sans toy depuis ton trespas en E
 „ griefue douleur & grand regret, mon trescher es-
 „ poux, attédant tousiours ceste iournee, mais main-
 „ tenant reçooy moy ioyeusement, puis que i'ay eu
 „ l'heur & la grace de venger ta mort sur ce meschât
 „ icy, estant tres-aïse de t'auoir esté compagne en la
 „ vie, & de luy en la mort. Synorix doncques em-
 porté de là, dedans vne litiere, trespassa bien tost
 apres : Et Camma l'ayant suruescu vn iour & vne
 nuit, mourut aussi fort constamment & ioyeuse-
 ment. Il y a eu par le passé plusieurs tels exemples,
 tant en la Grece, comme entre les Barbares : qui F
 pourroit doncques supporter ceux qui blasment
 & iniurient Venus, comme si assistant & estant
 adioustee à l'amour, elle empeschoit l'amitié? Là
 où au contraire, la cohabitation du masle avec le
 masle se doit nommer intemperance desordon-
 nee, & fault crier alencontre,

C'est villanie & violent oultrage,

Non pas Venus qui guide tel ouurage.

Voilà

A Voila pourquoy ceux qui volontairement endurent vne telle villanie, sont estimez les plus lasches, & entachez du plus detestable vice du monde: lon ne se fie point en eux, on ne leur porte ny honneur ny amitié, ains à la verité, comme dit Sophocles,

Ceux qui de tels amis perdent, en rient:

Et qui en ont, de les perdre aux Dieux prient.

Et ceux qui n'estants pas lasches & meschants de nature ont esté en ieunesse abusez ou forcez de l'endurer, toute leur vie puis apres les regardét de
 B mauvais œil, & ont en haine mortelle ceux qui les y ont disposez, voire & s'en végent bien aspremet quand ils en peuuent auoir le moien. Ainsi Crateuas tua Archelaüs, duquel en ses premiers ans il auoit abusé, & Pytholaus semblablement Alexandre le tyran de Pheres. Periäder le tyran d'Ambra-
 C cie demäda vn iour au garçon qu'il entretenoit, si estoit point encore gros: de quoy le garçon fut si irrité, qu'il le tua tout roide sur le champ. Là où aux femmes, & mesmement à celles que lon a espou-
 C sees, ce sont les arres & gaiges d'amitié, cōme obligation & societé de tressainctes cerimonies, & y fait on peu de compte de la volupté, mais grand de l'honneur, de la grace, foy & loyauté mutuelle qui iournallement en sourd: tellement que par là on cognoist que les Delphiens ne faillent point en ce qu'ils appellent Venus Harma, c'est à dire, le chariot attelé, ny Homere quand il nomme telle conionction *εὐφροσύνη*, qui est à dire amitié: & iuge lon aussi que Solon a esté legiflateur bien entédu

en ce qui concerne le mariage, ordonnant que le mary aille veoir sa femme pour le moins trois fois le mois, non pour la volupté seulement: mais ainsi comme les villes renouellent par interualles de temps les alliances qu'elles ont les vnes avec les autres, aussi vouloit il que lon renouellast l'alliance des nopces, en maniere de dire, par les propos que lon s'entretient en telle careffe & visitation. Voire mais il se commet plusieurs mauuaises & furieuses choses par ceux qui sont amoureux des femmes. Et ne s'en fait il pas encore d'auantage par ceux qui aiment des garçons? comme celui qui dit,

Tout aussi tost que i'eu ietté ma veüe
 Sur ce tendron au visage lissé
 Beau ieune fils, ie suis à bas glissé,
 A mon souhait qu'entre mes bras ie l'eusse,
 Et que mourir en l'embrassant ie deusse,
 Proueueu qu'apres ma mort il en fust fait
 Vn Epigramme, en memoire du faict.

Mais comme cela est vne furieuse passion enuers les femelles, aussi est cecy vne forcenee affection enuers les masses, & ny l'vn ny l'autre n'est amour. C'est doncques chose manifestement faulse de dire, que les femmes n'ayent aucune vertu: car qu'est il besoing de parler de leur temperance, prudence, foy, loyauté & iustice, veu que la force mesme, la constance & magnanimité en plusieurs d'icelles est apparente? Or de dire que leur naturel ne soit pas mal propre aux autres vertus, mais que à l'amitié seule, comme on leur impute, il ne soit aucunement

Anement conuenable, il n'y auroit point de propos: car il est tout notoire qu'elles aiment leurs enfans & leurs marits, & la charité naturelle qui est en elles, cōme vn champ fertile, apte à receuoir & porter amitié, n'est point destituee de grace, de persuasion & de raison: ains tout ainsi comme la poësie aiant accommodé à la parole le chant, la mesure & la cadence, en a rendu ce qu'il y a de profitable, plus attrayant & plus esmouuant, & ce qu'il y a de dangereux, plus malaisé à s'engarder. Aussi la nature aiant orné la femme de gracieux attraiçt

B des yeux, douceur de parole, & beauté de visage, luy a donné de grands moiens, si elle est impudique, de deceuoir l'homme, en luy donnant du plaisir, & si elle est honneste & pudique, de gagner la bonne grace & amitié de son mary. Or Platon cōseilloit à Xenocrates, excellent philosophe & grād personnage autrement, mais vn peu trop rebours & austere de sa nature, qu'il sacriast aux Graces: mais aussi pourroit on admonester la dame sage & honneste qu'elle sacrifie à l'Amour, à fin que propice & fauorable à son mariage, il demeure

C avec elle en la maison, de peur que le mary ne se laissant aller & couller ailleurs, ne soit contrainçt de dire ces paroles prises des Poëtes Comiques,

O moy chetif, quelle dame d'honneur

Le traitre mal, & luy fais deshonneur!

Car certainement en mariage, l'aimer est encore plus grād bien que l'estre aimé, par ce qu'il engarde le mary de tomber en beaucoup de fautes, lesquelles ruinent & gastent le mariage. Et quant à la

passion qu'il y a, vn petit poignante au commen-
 cement de l'amour coniugal, ie te prie beau sire
 Zeuxippus, qu'elle ne te face point de peur, non
 plus que si c'estoit vne petite esgratigneure, ou
 quelque mal de dents, combien qu'encore n'y au-
 roit point de mal, quand bien ce seroit avec esgra-
 tigneure, de se coller & incorporer avec vne fem-
 me honneste, ne plus ne moins que les arbres que
 lon ente. Et quand tout est dit, le commencement
 de la groisse est comme vne maniere d'vlcere, & ne
 se peut faire meslange de deux en vn, qu'ils ne
 soient alterez & affectionnez l'vn enuers l'autre. E
 Les sciences Mathematiques que lon monstre aux
 ieunes enfans, les tourmentent du commencement,
 aussi fait la philosophie les ieunes hommes: mais
 comme à ceux la ne demeure pas tousiours perse-
 uerante la pointure de fascherie, aussi ne fait elle
 pas aux amants, ains semble que l'amour à son cō-
 mencement face ne plus ne moins que quād deux
 liqueurs se meslent & incorporent ensemble, qu'il
 y a comme vn bouillonnement, mais apres quand
 il est rassis & bien espuré, il apporte aux amants
 vne tresferme & asseuree disposition, laquelle est F
 proprement la mixtion que lon appelle vniuersel-
 le de tout en tout: mais celle des autres amis qui vi-
 uent ensemble, se rapporte à la mixtion qui se fait
 par attouchements ou entrelassemens, comme di-
 soit Epicurus, & est subiecte à receuoir des rompu-
 res, separations & brisures, & ne peut faire vne
 telle vnion comme fait l'amour coniugal, aussi ne
 sont les voluptez des autres amours point plus
 grandes,

A grandes, ny les vtilitez plus continuelles des vns enuers les autres, ny la beauté plus honorable ny plus desirable que,

Quand le mary en loyal mariage

Auec sa femme accorde en bon mesnage.

mesmement quand le lien de la generation cōmune y aide:& nous monstre la nature, que les Dieux mesmes ont besoing de tel amour: car ainsi disent les poëtes, que le Ciel aime la Terre: & les Naturels tiennent, que le Soleil aime ainsi la Lune, laquelle tous les mois se conioinct avec luy, & de celle conionction en deuiet enceinte. **B**rief n'est il pas force que la generation mere des hommes, des animaux, & de toutes les plantes, se perde & s'estaigne totalement, quand l'amour, qui est vn desir diuinement inspiré, abandonnera la matiere, & que la matiere aussi cessera de desirer & de rechercher ce principe & cest engrossement? Mais à fin que nous ne nous esgarions pas, & que nous n'vions de langage superflu, tu sçais toy mesme que ceux qui vsent de ces amours la de garçons s'en gaudissent, comme n'aians point de fermeté ny de tenue, & comme ils s'en mocquent, **C**disans que leur amitié se diuise avec le poil comme vn œuf, & que quant à eux, qu'ils ressemblent les Scythes Nomades, qui campent tousiours où il y a primevere, & où le pais est verd & fleury, mais que si tost qu'il blanchit ils en descampent. Et le sophiste Bion disoit encore plus cruëment & plus brusquement, car il appelloit les premiers poils de barbe des beaux ieunes fils Ar-

modiens & Aristogitons, par ce que les amoureux ^D estoient deliurez de tyrannie par eux incontinent qu'ils commançoient à poindre. Il est vray que ie ſçay bien que cela ſe dirroit & obiiceroit à tort aux vrais amants, & que le dire d'Euripides eſt plus gétel: car en abraſſant le beau Agathon qui auoit deſia de la barbe, il dit que des beaux l'arriere faiſon en eſtoit encore belle: mais ie dy plus, que des belles & honneſtes femmes la beauté & amitié ne ſ'en paſſe point, ny avec les rides, ny avec les cheueux blancs, ains perſeuere touſiours iuſques au ſepulchre, & iuſques au monument. Auſſi pourroit ^E on compter bien peu de couples de garçons, là où de femmes il ſ'en trouueroit innumerables qui ont iuſques au bout gardé fidellement loyauté & cordiale amitié à leurs marits: mais ie vous en veux raconter vn exemple entre autres, qui eſt aduenu de noſtre temps à Rome, ſoubs l'Empereur Veſpaſien. Iulius, celuy qui ſuscita la rebellion de la Gaule, auoit pluſieurs conſors & complices de ſa conſpiration, comme lon peut penſer, & entre autres vn Sabinus ieune homme de grand cœur, & le premier de la ville de Rome en biens & en reputa- ^F tion, mais aiants failly à leur entrepriſe, & ſ'attendant bien qu'ils en ſeroient punis par iuſtice, les vns ſe tuerent eux meſmes, les autres en ſ'en cuidât fuir, furent ſurpris. Quant à Sabinus il luy eſtoit bien aiſé de ſe ſauuer en païs eſtrange parmy les barbares, mais il auoit eſpouſé vne ieune Dame, la meilleure & la plus honneſte qui fuſt au monde, que lon appelloit à Rome Emponina, comme qui diroit

A diroit en langage Grec, Heroïque, laquelle il ne pouuoit ny abandonner, ny mener quand & luy. Parquoy aiant en quelque sienne maison aux champs des cachettes creusees bien profondement en la terre, pour y ferrer & retirer des biens, lesquelles n'estoient sceuës ny cogneuës que de deux de ses affranchis seulement. Il enuoya dehors tous ses seruiteurs & esclaves, leur dōnant à entendre qu'il auoit resolu de s'empoisonner, & retenant avec luy ces deux ausquels il se fioit, descendit en ces caueaux sous-terrains, puis enuoya l'vn de ses

B affranchis nommé Martialis à sa femme, luy dire qu'il s'estoit fait mourir avec du poison, & qu'il auoit brulé toute la maison avec son corps: car il se vouloit seruir du deuil que sa femme meneroit à bon escient, pour plus certainement & plus seurement faire croire le bruit qui courroit de sa mort, comme il aduint. Car si tost qu'elle entendit ceste nouvelle, se iettant cōtre terre avec grands crys & lamētations, elle demeura trois iours & trois nuicts sans vouloir boire ny manger. Ce qu'entendant Sabinus, & craignant qu'elle ne se feist mourir, il

C commanda à Martialis de luy aller secrettemēt dire en l'oreille qu'il estoit viuant & caché dessous terre, mais qu'il la prioit de perseuerer encore en son deuil, & de cōtinuer en sorte qu'on ne se peust apperceuoir qu'il y eust de la fainte. Si fit la ieune Dame tout ce qui est possible de faire, pour confirmer l'opinion diuulguee de sa mort. mais desirāt le veoir, elle s'y en alla vne nuict, & reuint la nuict mesme, sans que personne s'en apperceust: & cōti-

nua plus de sept mois de rang à hanter ainsi aux D
 enfers, par maniere de dire, avec son mary. Du-
 rant lesquels vn iour elle le deguisa d'habillemens,
 & luy rasant la barbe & les cheueux, & luy bandât
 la teste, le rendit tel qu'on ne le pouuoit cognoi-
 stre, puis le feit porter à Rome parmy quelques
 siennes hardes, là où n'ayant peu rien faire elle s'en
 retourna derechef aux champs, & se tenoit la plus
 part du temps avec luy dessoubs terre, & puis au
 bout de quelques iours elle reuenoit à Rome, & se
 faisoit veoir aux autres femmes qui luy estoient
 familiares. Mais ce qui est encore plus malaïse à E
 croire que tout le reste, c'est qu'on ne s'apperceut
 iamais qu'elle fust grosse, combien qu'elle se lauast
 & baignast avec les autres Dames: car l'oignement
 duquel les femmes frottent & huillent leurs che-
 ueux pour les rendre blonds comme fin or, a ie ne
 sçay quoy de gras qui enfle & fait leuer la chair,
 tellement qu'il la rend plus laxé, & vsant de ce me-
 dicament là à s'oindre toutes les autres parties de
 sa personne, elle cacha par ce moien l'enfleure de
 son ventre qui s'esleuoit à la iournee, & suppor-
 ta les douleurs de son enfentement toute seule, F
 sans aide de sage femme quelconque, estant des-
 cendue dans le caueau avec son mary, ne plus ne
 moins que la Lionne dedans sa cauerne, là où
 elle nourrit elle mesme de sa mamelle deux pe-
 tits iumeaux dont elle accoucha, desquels l'vn
 fut depuis tué en Ægypte, & l'autre passa il n'y
 a pas encore long temps chez nous en la ville de
 Delphes, aiant nom comme son pere, Sabinus.

A Ce neantmoins Vespasian à la fin la feit mourir: mais il en a aussi depuis esté puny, car toute sa posterité a esté en peu de temps entieremēt estainte. Il ne fut en tout le regne de cest Empereur la faict acte si cruel ne si pitoyable à veoir, & n'y eut spectacle que les Dieux & les Dēmons abominassent plus à veoir que celuy la, combien que la constance & magnanimité d'elle en son parler diminuast la compassion de ceux qui la regardoient, mais ce fut ce qui plus irrita Vespasian alencontre d'elle: car quand elle veit qu'elle ne pouuoit sauuer la vie à son mary, elle voulut qu'on la feist mourir quand & luy, disant qu'elle auoit vescu plus ioyeusement en tenebres sous la terre quand & luy, que Vespasian n'auoit fait en la lumiere du Soleil avec tout son Empire. En cest endroit dit mon pere, se termina leur deuis de l'amour, comme ils estoient pres de la ville de Thespies, là où ils apperceurēt de loing venir à eux plus viste que le pas, vn des amis de Pisias, nommé Diogenes, auquel Soclarus de tout loing cria: Et biē, nous annonces-tu point la guerre? Diogenes luy respondit, Vsez de paroles de meilleur presage, car vous estes tous conuiez aux nopces: & doublez le pas, car on n'attend plus que vous pour commander les sacrifices nuptiaux. Ces paroles resiouirent toute la compagnie, & apperceut on que Zeuxippus mesme n'en estoit pas trop mal content: car il fut le premier qui approuua ce que Ismenodora auoit fait, & dit qu'il estoit content de prendre vn chapeau de fleurs sur sa teste,

avec vne robe blanche, & de marcher le premier **D** auuers la place, pour aller rendre graces au Dieu Amour, de ce mariage. C'est bien dit, par Iupiter, respondit mon pere, allons nous y en, à fin que nous rions, & nous mocquions de cest homme. Allons adorer & remercier le Dieu, car il est tout euidēt qu'il a pour agreable & fauorise ce faict icy.

DE LA FACE QUI APPAROIST
dedans le rond de la Lune.



SYLLA doncques dit cela. Car il conuient à mon propos, lequel depend de là. Mais ie demanderois volontiers premierement, quel besoing il est de faire vn tel preābule pour venir à ces opinions qui sont en la main & en la bouche de tout le monde, touchant la face de la Lune. Pourquoy non, dis-ie, veu que la difficulté qu'il y a en ces propos icy, nous a reiettez en ceux là? Car ainsi **F** comme es longues maladies, apres que lon est las d'esprouuer tous ordinaires remedes, & accoustumees regles de viure, & dietes, finablement on vient à des expiations & purifications, à des breuers que lon attache au col, à des interpretations de songes: Aussi est il force en si obscures & si difficiles questions & speculations, quand les communes, apparentes & ordinaires raisons & opinions

A ne satisfont pas, essayer encore les plus extrauagātes, & ne les mespriser point, ains nous enchanter, par maniere de dire, mesmes des discours des anciens, pour essayer par tous moiens de trouuer la verité. Car tu vois de la premiere rencontre, cōbien est impertinente l'opinion & le dire de ceux qui tiennent, que la face qui apparoist en la Lune est vn accident de la veuë, laquelle pour son imbecillité cede à la clarté reluyfante d'icelle, ce que nous appellons esblouissement, & ne s'apperçoient pas que cela se deuroit beaucoup plus faire

B au Soleil dont la lueur est bien plus brillante, plus viue, & les rayons plus perceans, comme Empedocles mesme en quelque passage en a assez plaisamment noté la difference, quand il dit,

L'aigu Soleil, & la Lune pierreuse,
 nommant ainsi la lueur amiable, douce, & non malfaisante de la Lune. Et puis ils rendent raison pourquoy ceux qui ont la veuë foible & basse, n'apperçoient en la Lune aucune differēce de visage, ains leur apparoist son cercle tout plain & tout vny, & au contraire ceux qui ont les yeux plus

C aigus & plus perceans discernent mieux les traictz du visage, & remarquent plus parfaitement l'impression d'vne face, & en distinguent plus euidement les parties. Car, à mon aduis, ce deuroit estre tout l'opposite, si l'imbecillité de l'œil vaincu caufoit ceste apparence, que là où l'œil patient seroit plus debile, là deuroit estre l'apparēce plus expresse & plus euidente. Et puis l'inegalité refute entierement ceste raison: car on ne voit point ceste face,

la en vne vmbre continue & confuse, ains Ageſia-
 nax le poëte la depaignant ne dit pas mal,

De feu luyſant elle eſt environnee

Tout alentour, la face enluminee

D'une pucelle apparoiſt au milieu,

De qui l'œil ſemble eſtre plus verd que bleu,

La iouë vn peu de rouge coloree.

Car à la verité les choſes vmbreageuſes & obſcures
 environnees de luyſantes & claires ſ'enfoncent deſ-
 ſous, & rehauffent reciproquement, eſtans par el-
 les repoulſees, & bref ſont entre-laſſees les vnes
 dedans les autres, de ſorte qu'elles representent la
 figure d'un viſage naïſuemēt depainte: & ſemble
 qu'il y auoit bien grande apparéce en ce que diſoit
 Clearchus alencontre de voſtre Ariſtote. Car ce
 personnage la Ariſtote eſtoit bien Peripateticien,
 aiant eſté familier de l'ancien, encore qu'il ait ren-
 uerſé pluſieurs poincts de la doctrine des Peripa-
 teticques. Et quelle eſtoit l'opinion de ceſt Ariſto-
 te? demanda Apolloniades. Il ſeroit plus conuen-
 able à tout autre, diſ-ie, de l'ignorer, que non pas
 à toy qui fais ta principale profeſſion de la Geo-
 metric. Car il dit que ce que lon appelle viſage
 en la Lune, ſont les images & figures de la gran-
 de mer Oceane, representees & apparoiſſantes en
 la Lune, comme en vn mirouer. Car la circonfe-
 rence du rond, eſtant rebattue de pluſieurs en-
 droits, a accouſtumé d'abuſer la veuë es choſes que
 lon ne peut pas veoir de droit fil. Et la pleine
 Lune eſt le plus beau & le plus net mirouer en
 poliſſure vnie, & en luſtre, qui ſoit au môde. Tout
 ainſi

A ainsi doncques, comme vous autres tenez que l'arc en ciel apparoyst, quand la veüe est rebattue vers le Soleil en vne nuee qui a pris vn peu de pollissure humide & de consistance : aussi disoit il, que lon voyoit en la Lune la grande mer Oceane, non pas en la place où elle est situee, mais au lieu où la reflexion en fait la veüe par attouchemēt de sa lueur reuerberée & renuoyee, comme derechef Agesianax a dit en vn autre passage,

En vn mirouer l'image flamboyante
De la grand' mer vis à vis ondoyante

B Elle sembloit.

Apollonides adonc se persuadāt qu'il estoit ainsi, O opinion, dit-il, veritablement bien sienne, & quād tout est dit, bien estrangement & nouvellement cōtrouuee par vn hōme temeraire, mais aiant bien des lettres & du sçauoir. Mais cōment est-ce que Clearchus le refutoit? En premier lieu, dis ie, Si la grand' mer Oceane est toute d'vne nature, il fault qu'elle soit toute d'vn tenant, cōfluente d'vn bout en autre, & l'apparence des noirceurs & obscuritez que lon apperçoit en la face de la Lune

C n'est pas toute continuee, ains y a des entredeux clairs & reluyfans, qui diuisent & separēt ce qui est obscur & vmbrageux. Parquoy chasque lieu estāt distingué & aiant ses propres bornes à part, les approchemēs des clairs aux obscurs prenās vne semblāce de hault & de bas, exprimēt & representēt la similitude de la figure qui apparoyst des yeux & des léures, tellemēt qu'il est force de supposer qu'il y ait dōc plusieurs Occans & grandes mers distin-

guez par des entre-deux de terres fermes. Ce qui **D**
est euidément tout faux, ou s'il n'y en a qu'une cō-
tinuée, il n'est pas croyable que son image apparust
ainsi distraicte & dissipée en piéces: & qu'à cecy,
il est plus seur, & y a moins de danger à l'interro-
guer, que non pas à l'affirmer en ta présence. Si la
terre habitable estant égale de longueur & de lar-
geur il est possible que toute la veüe repliée & ren-
uoyée par la Lune touche également toute la grād'
mer, & tous ceux qui nauigent, voire & qui habi-
tent en icelle, cōme font les Anglois, mesmement
que vous dittes que la terre n'a pas la proportion **E**
d'un poinct seulement au regard de la sphere de la
Lune. C'est à toy, dis-je, à regarder & cōsiderer ce-
la: il est vray que quand au repliement & à la refle-
xion de la veüe de la Lune, ce n'est plus à toy ny à
Hipparchus, cōbien que, amy Lāprias, il y ait plu-
sieurs naturels qui ne trouuēt pas bon de dire que
la veüe soit ainsi rebattue, & disent qu'il y a plus de
verisimilitude, qu'elle ait vne temperature & com-
paction obeïssante & accordante, que non pas vn
battement ny vne repercussion, telle comme Epi-
curus feignoit que les atomes auoient: & ne croy **F**
pas, à mon aduis, que Clearchus nous veuille sup-
poser que la Lune soit vn corps pesant ny massif,
ains vn astre celeste rendant lumiere, auquel vous
dittes que telle refraction de la veüe appartient,
tellemēt que toute reflexion & reuerberation s'en
va à vau-l'eau. Mais si lon me prie de la receuoir &
admettre, ie demanderay, Pourquoi est-ce donc
que ce visage de la mer se voit seulement au corps
de la

A de la Lune, & non en pas vn des autres tels astres?
 Car la verisimilitude requerroit que la veuë souffrist également cela en tous, ou totalement en nul.
 Mais ie te prie, dis-ie, en iettant les yeux sur Lucius, reuets moy vn petit en memoire de ce qui a esté le premier dit par les nostres: mais plus tost, respōdit Lucius, de peur qu'il ne semble que nous faisons trop d'iniure à Pharnaces, en passant ainsi oultre & par dessus l'opinion Stoique, sans luy rien opposer: dy, ie te prie, quelque chose alencontre de cest hōme, lequel suppose que la Lune soit vne

B mixtion de tout l'air & d'vn feu mol, & puis dit que comme en vn calme, il aduient quelque fois vn peu d'haleine qui frize le dessus de la mer, aussi l'air se noircit, & que de là se fait vne apparence de forme de visage. Tu fais, dis-ie, courtoisement, Lucius, de reuestir & couvrir ainsi de paroles honnestes vne si absurde & si faulse opinion. Mais ainsi ne faisoit pas nostre amy, ains disoit ce qui est vray, que les Stoiques meurtrissoient la Lune au visage, en la remplissant de taches & de macheures noires, en l'appellant Diane & Minerue, & ce pendāt

C en faisant vne masse paistrie d'vn air tenebreux, & d'vn feu de charbons qui ne se peult ny allumer, ny rendre lumiere propre de soy mesme, vn corps difficile à iuger & cognoistre, tousiours fumant, & qui tousiours brusle, ne plus ne moins que ces foudres que les poëtes appellent sans clarté & enfumez: mais que vn feu rutilant de charbons, comme ceux-cy veulent que soit celuy de la Lune, ne dure point, ny ne peult pas du tout consister seulement,

fil ne rencontre quelque matiere solide & qui le **D**
 puisse tenir , conseruer , & nourrir. Je pense que
 ceulx qui en se iouant ont dit que Vulcain estoit
 boiteux, l'ont mieulx entédu que n'ont pas ces phi-
 losophes la , pource que le feu ne peut aller auant
 sans bois, non plus que le boiteux sans baston. Si
 doncques la Lune est de feu, d'où est venu qu'il y a
 tant d'air en elle? Car ce lieu la sublime qui se meut
 en rond, n'est point d'air, mais de quelque plus no-
 ble substance, laquelle peut subtiliser & allumer
 toute autre chose. Et fil s'y est engendré depuis,
 comment est-ce qu'il ne se perit, change & transf- **E**
 mue par le feu en la substance ætheree & celeste?
 Et comment se peut il maintenir & se conseruer
 durant avec le feu si longuement, comme vn clou
 fiché & attaché tousiours en vn mesme lieu? Car
 demourant rare, diffus & espandu, comme il est de
 sa nature, il est conuenable qu'il se resoluë & qu'il
 se dissipe, & qu'il se reserre & espaisisse: il est im-
 possible, tant qu'il est meslé avec le feu, & n'y aiant
 ny eau ny terre qui sont les deux elemens seuls qui
 le peuuent figer & faire prendre. Et puis la celerité
 & impetuosité du mouuemēt a accoustumé d'en- **F**
 flammer l'air qui est dedans les pierres, & dedans
 le plomb mesme tout froid: à plus forte raison,
 s'enflammeroit il bien plus tost, estant tourné de-
 dans le feu mesme avec vne celerité & impetuosité
 si grāde. Car mesme ils rabrouent Empedocles de
 ce qu'il fait la Lune vn air congelé, comme gresse,
 contenu en vne Sphere de feu qui contient de l'air
 espars çà & là, & encore qui n'a en elle ny rompu-

Ares ny concautez, ny profondeurs, cōme ceulx qui la font de terre luy en laissent, ains veulēt qu'il soit superficiellement sur la voute de son dos: ce qui est contre la raison, s'il a à y demeurer, & ne peut estre si nous adioustons foy à ce que nous en voions és pleines Lunes. Car il ne le falloit point diuiser & mettre à part, estant noir & tenebreux, ains falloir ou qu'estant caché il fust du tout obscurcy, ou qu'il fust illuminé par le Soleil quand & la Lune. Car icy bas celuy qui est en des creux profonds & basses fondrières, où la lumiere ne peut penetrer, demeure vmbreux & obscur sans clarté: & celuy qui est espandu alentour de la terre, a de la clarté & couleur lumineuse. Car à cause de sa rarité il est fort aisé à transmuer en toute qualité & toute faculté, mais principalement de lumiere & clarté, de laquelle s'il est tant soit peu attainct & touché, incontinent se changeant, il est aussi tost tout illuminé. Ceste mesme raison doncques semble bien aider & estayer l'opinion de ceulx qui poulsent l'air en ie ne sçay quelles profondes vallees & fondrières de la Lune, & coarguer la vostre, qui meslez &

Composez ie ne sçay comment sa sphère de feu & d'air. Car il est impossible qu'il demeure vmbre ny obscurité en sa superficie, quand le Soleil esclaire & enlumine de sa clarté tout ce que nous pouuons discernier & tailler de la Lune avec nostre veuë. Comme ie parlois encore, Pharnaces se prit à dire: Voyla derechef l'ordinaire ruze de l'Academie venue en ieu alencontre de nous, qui est de s'amuser à tout propos à dire contre les autres,

& ne donner iamais moien de pouuoit reprendre **D**
ce qu'ils disent eulx, & rendre tousiours defendans
ceux avec qui ils parlent & disputent, non pas as-
faillants ny accusants : mais quant à moy, vous ne
m'attirerez d'aujourd'huy à rédre raison de ce que
vous reprenez aux Stoiques, que premierement
vous ne m'avez vous mesmes rendu compte de ce
que vous mettez le monde dessus dessous. Lucius
adonc en se riant, Je le veux bien, dit il, beau sire,
prouueu seulement que tu ne nous accuses point
d'impieté, cōme Aristarchus estimoit que les Grecs
ensemble deuoient mettre en iustice Cleanthes le **E**
Samien, & le condamner de blaspheme encontre
les Dieux, comme remuant le foyer du monde,
d'autant que cest homme taschant à sauuer les ap-
parences, supposoit que le ciel demouroit immo-
bile, & que c'estoit la terre qui se mouuoit par le
cercle oblique du Zodiaque, tournant alentour de
son aixieu. Mais quant à nous, nous ne disons rien
que nous prenions d'eux, mais ceux qui supposent
que la Lune soit terre, pourquoy est-ce qu'ils met-
tent le monde sans dessus dessous, plus tost que
vous qui dittes que la terre demeure icy suspendue **F**
en l'air, estant de beaucoup plus grande que la Lu-
ne, ainsi que les Mathematiciens les mesurent, par
les accidents des eclipses, & par les passages de la
Lune à trauers l'vmbre de la terre, colligents com-
bien elle occupe? Car l'vmbre de la terre est moin-
dre qu'icelle, d'autant qu'elle est ietee par vn plus
grand luminaire. Et que le bout d'icelle vmbre soit
plus estroit & plus pointu, on dit qu'Homere mes-

A me ne l'a pas ignoré, ains l'a exprimé quād il a appellé la nuict Thoen, c'est à dire aiguë, à cause de la poincte aiguë de l'vmbre de la terre, & neātmoins la Lune és eclipses estant comprise dedans icelle vmbre, à peine en peult elle sortir en passant trois fois autant de longueur d'espace, comme elle est grande. Considerez doncques maintenant combien de fois la terre doit faire la grandeur de la Lune, sil est ainsi qu'elle iette vne vmbre, de laquelle la plus estroite pointe en largeur est autant que la Lune trois fois. Mais à l'adventure que vous craignez que la Lune ne tombe, si lon aduouë qu'elle soit terre. Et quant à la terre Æschylus vous a assurez à l'adventure, disant,

Atlas est or assuree coulomme

Qui sur son dos a du ciel la couronne,

Fardeau bien mal-aisé à embrasser,

& au dessoubs de la Lune court l'air leger, & non assez ferme pour soustenir vne solide masse, là où au dessoubs de la terre, il y a des coulomnes & piliers de diamant qui la soustiennent, comme dit Pindare. C'est pourquoy Pharnaces est hors de crainte que la terre ne tombe: mais il a pitié de ceulx qui sont à plomb au dessoubs du cours de la Lune, comme les Æthiopiens & ceux de la Taprobane, de peur qu'un si pesant fardeau ne tombe sur eulx, & toutefois il y a le mouuement de la Lune qui engarde qu'elle ne tombe, & la violence de sa reuolutiō, ne plus ne moins que les pierres & cailoux, & tout ce que lon met dedās vne fonde, sont empeschés de tomber, par ce que lon les tourne

violentemēt en rond. Car chasque corps se meut, **B** selon son mouuement naturel, si il n'y a autre cause qui l'en destourne. C'est pourquoy la Lune ne se meut point selon le mouuement de sa pesanteur, estant son inclination deboutee & empeschee par la violence de la reuolution circulaire. A l'aduenture y auroit il plus de raison de s'esbahir qu'elle demourast totalement ferme sans se remuer, ne plus ne moins que la terre, mais maintenāt la Lune a vne grande cause qui l'empesche de tendre icy bas. Et la terre qui n'a autre mouuemēt quelconque, il est vray-semblable qu'il n'y a autre cause qui **B** la meue, que sa pesanteur, car elle est plus pesante que la Lune, non seulement pource qu'elle est plus grande, mais aussi pource qu'elle est chaulde, à cause du feu qu'il y a dedans, qui la doit rendre plus legere. En somme il semble, par ce que tu dis, si est vray que la Lune soit feu, qu'elle ait besoing de la terre ou de quelque autre matiere, sur laquelle elle se pose & s'attache pour y maintenir & nourrir sa puissance. Car il n'est pas possible d'imaginer, comment vn feu se puisse maintenir sans matiere apte à brusler, & vous autres dites que la terre **F** demeure ferme sans aucun soubassement ny pied qui la soustienne. Ouy certainemēt, ce dit Pharnaces, estant en son lieu naturel, qui est celuy du milieu: car c'est celuy auquel toutes choses graues & pesantes tendent, enclinent, contrepoullent, & aspirent naturellement de tous costez. Et la superieure region si d'aduenture il y a quelque chose terrestre & pesante qui y soit ietee contre-mont par violence

A lence, incontinent elle la repoulse à toute force çabas, ou pour mieux dire, elle la laisse aller à sa propre inclination, qui est de tendre à bas, selon son naturel. A quoy refuter, voulât donner tēps à Lucius de se resouvenir des raisons, appellant Theon ie luy demanday, qui est le poëte Tragique qui dit,

Les medecins destrempent la cholere

Amere, avec vne autre drogue amere.

Theon m'ayant respondu que c'estoit Sophocles, Il leur fault, dis-je, conceder cela, quant à eulx, pour la necessité: mais il ne faut pas prester l'aureille aux **B** philosophes qui veulent soustenir des opinions estranges par d'autres encore plus estranges, & qui pour oppugner des sentences extrauagantes & esmerueillables, en forgent d'autres encore plus esmerueillables, cōme ceulx-cy introduisent & mettent en auât le mouuemēt vers le milieu. En quoy, quelle sorte d'absurdité y a il qui ne s'y trouue? Ne tiennent ils pas, que la terre est ronde comme vne boule, & neantmoins nous voions qu'elle a de si grandes hauteurs, & si grandes profondeurs, & telles inegalitez? Ne tiennent ils pas, qu'il y a des Antipodes qui habitent à l'opposite l'vn de l'autre, attachez de tous costez à la terre, mettant dessus ce qui est dessous, & dessous ce qui est dessus, comme si c'estoient des artisans & des chats qui s'attachassent à belles griffes? Ne veulent ils pas, que nous mesmes soions posez sur la terre, nō à plomb & à angles droicts, mais penchans à costé comme font ceux qui sont yures? Ne font ils pas ces comptes, que sil y auoit des fardeaux de mille quintaux

qui tombassent dedans la profondeur de la terre, D
que quand ils seroient arriuez au centre du milieu,
ils s'arresteroient sans que rien les sousteint ny leur
vint au deuant, & si d'adventure tombans à force,
ils oultre-passoïét le milieu, ils s'en retourneroient
& rebourseroient derechef en arriere d'eulx mes-
mes? Ne disent ils pas que qui sieroit deux troncs
de poultre d'vn costé & d'autre de la terre, ils ne
tomberoient pas tousiours cōtrebas, ains que tom-
bans tous deux sur la superficie de la terre par le
dehors, egalement ils contrepoulséroient pour se
cacher au milieu? Ne supposent ils pas que si vn E
torrēt impetueux d'eau couloit contre bas, & qu'il
rencontraist le poinct du milieu, lequel ils tiennent
estre incorporel, il s'amasseroit tournant en rond,
tout alentour, demourant suspendu d'vne suspen-
sion perpetuelle & sans fin? Il n'est homme qui se
peust alencontre de la verité forcer de rendre par
imagination cela possible. Car cela est proprement
mettre le hault en bas, & toutes choses renuersees
sans dessus dessous, parce que ce qui est iusques
au milieu sera le bas, & ce qui est dessous le milieu
aucontraire sera le hault: de maniere que si quel- F
que homme par souffrance & consentement de la
terre auoit son nombril contre le milieu d'icelle, il
auroit par ce moien tout ensemble & les pieds &
la teste en hault contremont, & si lon venoit à ca-
uer le lieu qui est par dela le milieu, quand on le
viendroit à deterrer & tirer dehors, le hault seroit
tiré cōtrebas, & le bas contremont tout ensemble.
Et si lon en imaginoit quelque autre place à l'op-
posite

A posite de celuy la, les pieds qui seroient au contraire l'un de l'autre seroient neantmoins tous deux appelez contremont. Aians doncques sur leurs espauls, & trainnans apres eulx, ie ne dis pas la basse, mais la gibeciere d'un triacleur, & bougette d'un ioueur de passe-passe, pleine de tant d'absurditez ils disent neantmoins que les autres errent, quand ils mettent la Lune, qu'ils disent estre terre, en hault, & non pas là où est le milieu du monde: & toutefois si tout corps pesant incline en mesme endroit, & de toutes ses parties oppositement tend

B au milieu, certainement la terre ne s'approchera & ne s'appropriera pas les masses pesantes, qui sont ses parties, pource qu'elle soit le milieu de l'univers, plus tost que pource qu'elle est un tout: & l'amas des corps graues alentour d'elle, ne sera pas signe qui monstre qu'elle soit le milieu du monde, mais bien sera ce indice pour prouuer & tesmoigner que ces corps la qui en auoient esté arrachez, & qui derechef y retournent, ont communication & conformité de nature avec la terre. Car ainsi comme le Soleil conuertit en soy les parties dont

C il est composé, aussi la terre reçoit la pierre, comme partie à elle appartenante, de sorte qu'avec le tēps chascune de ces choses s'unit & s'incorpore avec elle. Et si d'adueture il y a quelque autre corps qui des le commencement n'ait point esté contribué à la terre, ny distraict d'avec elle, ains ait eu à part sa consistence & sa nature propre & peculiere, comme ceux la pourroient dire la Lune, qui empesche qu'il ne demeure à part separé, estrainct, composé

& relié de ses propres parties? car ils ne demon-
 strent point que la terre soit le milieu de l'vniuers:
 & la congregation des corps graues qui sont icy, &
 assemblage avec la terre, nous monstre la maniere
 comment il est vraysemblable, que les parties qui
 sont là assemblees au corps de la Lune, y demeu-
 rent. Mais celuy qui chasse & reнге les masses pe-
 santes & terrestres en vne mesme place, & les fait
 parties d'un mesme corps, ie m'esbahis comme il
 ne baille la mesme force & contraincte aux sub-
 stances legeres, ains laisse à part l'un de l'autre tant
 d'assembléments de feu, & qu'il n'amasse ensem-
 ble tous les astres, & n'estime qu'il y doiuue auoir E
 vn seul corps de toutes les substāces flamboyantes,
 & qui montent contre-mont. Mais vous autres
 Mathematiciens, amy Apollonides, affermez que
 le Soleil est distāt du premier mobile d'une quan-
 tité innumerable de stades, & apres luy Venus &
 Mercure, & les autres planettes semblablement,
 lesquelles au dessoubs des estoiles fixes distantes
 les vnes des autres de grands interualles, font leurs
 reuolutions, & ce pendant vous estimez que le
 mōde ne baille pas aux corps pesants & terrestres F
 vne place large & grande, distante des vns aux au-
 tres. Vous voiez manifestement que ce seroit vne
 consequence ridicule de nier, que la Lune soit terre
 pource qu'elle n'est pas au bas du mōde, & ce pen-
 dant affermer qu'elle soit astre, estant esloignee du
 firmanēt & premier mobile d'une si grande mul-
 titude de stades, comme si elle estoit plongee en
 vn fond. Car elle est si basse au dessoubs de toutes
les

A les autres estoiles, que lon ne le scauroit exprimer, ains vous defaillent les nombres à vous autres Mathematiciens, quand vous le voulez supputer & sommer, & semble qu'elle touche presque à la terre, faisant sa reuolution toute prochaine des cymes des môtagnes, ne plus ne moins que l'orniere d'un chariot, ainsi que dit Empedocles. Car bien souuent elle ne surpasse pas l'ombre de la terre qui est bien courte, pour la grandeur excessiue du corps du Soleil illuminant, ains semble qu'elle tourne si pres de la superficie, & par maniere de dire, entre

B les bras, & au sein de la terre, qu'elle nous bousche la veuë du Soleil, d'autât qu'elle ne surpasse point ce lieu vmbreux, obscur comme la nuict, & terrestre, qui est en maniere de dire, le finage de la terre. Et pourtant peult on dire hardiment, que la Lune est dedans les bornes & confins de la terre, attendu mesmement qu'elle est offusquee par les haultes croupes des montaignes d'icelle. Mais pour laisser là les estoiles tant errantes que fixes, voiez ce que preuue & demonstre Aristarchus en son traicté des grandeurs & interualles, que la distance du Soleil est plus grande que la distance de la Lune, dont elle est eslongnee de nous dix huit fois, & moindre de vingt. Et celuy qui esleue la Lune le plus hault, elle est, dit il, cinquante & six fois autant esloignee de nous, comme il y a depuis le centre de la terre iusques à nous, laquelle distâce est de quarante mille stades, selon ceux qui en font la supputation moienne, & à ce compte la le Soleil doit estre eslongné de la Lune quarante millions

& trois cents mille stades, tant elle est distante du **D** Soleil, à cause de sa grauité, & tant elle s'approche de la terre : tellement que si par les lieux il fault distinguer les substances, la part, portion & region de la terre s'attribue à la Lune, & à raison du voisinage & de la proximité, elle a droit d'estreensee & repute'e entre les natures & les corps terrestres: & ne faillons point, à mon aduis, si aiants donné au dessus que lon appelle si basse, & si profonde hauteur, & distance si immense, nous laissons au bas aussi quelque espace à discourir, & quelque largeur, autant comme il y a depuis la terre iusques à la Lune: **E** car ny celuy qui appelle la seule superficie du ciel le dessus, & tout le reste le bas, n'est moderé ne tolerable, ny celuy qui definit le bas à la terre, ou plustost au centre d'icelle seulement, n'est supportable, attendu que la grâdeur & vastité du monde, donne moien d'assigner encore à ce bas la quelque espace tel qu'il fault pour quelque mouuement, & alencontre de celuy qui voudroit maintenir, que tout ce qui est depuis la terre fust incontinent le hault, le dessus & le sublime, il y a incontinent vne autre opposition qui luy vient au deuant & luy **P** contredit : c'est, qu'il faudroit donc aussi dire, que tout ce qui seroit depuis le premier mobile & mouuement des estoiles fixes, se deuroit appeller le bas. En somme, comment est-ce que la terre est assise au milieu, & au milieu de quoy est elle? Car le tout ou l'vniuers est infiny, & à l'infiny qui n'a ne commencement ny fin, il n'est point conuenable qu'il y ait de milieu : car le milieu est vne sorte de
finisse-

A finiffement, & l'infinité est priuation de toutes sortes de fins : & celuy qui afferme que la terre n'est point au milieu du tout, ains du mōde est plaisant, si il ne pense pas que le monde mesme soit subiect à mesmes doubtes & difficultez: car l'vniuers ne laisse point, non pas au monde mesme, le milieu, ains est sans siege certain, sans pied ny fermeté en vuide infiny se mouuant, non à aucun lieu qui luy soit propre. Et si d'adventure il a rencontré quelque autre cause de demeure qui l'ait arresté, non selon la nature de lieu, on en pourroit autant coniecturer de la Lune, que par le moien d'une autre ame & d'une autre nature, ou pour mieulx dire, d'une autre difference, la terre demeure ferme icy bas, & la Lune se meue. Et oultre cela, voiez qu'ils n'ignorent vn grand inconuenient & erreur: car si il est vray que tout ce qui est hors du centre de la terre, comment que ce soit, soit dessus & hault: il n'y a donc point de partie du monde qui soit le bas, ains & la terre mesme, & tout ce qui est sur elle sera hault & dessus: & brief tout corps qui sera autour & à l'environ du centre sera dessus, & n'y

B aura bas ny dessous que vn seul poinct qui n'a point de corps, qui sera teste & sera opposé necessairement à tout le reste de la nature du monde, si par nature le dessus est contremont opposé au dessous, & le hault au bas. Et n'y a pas seulement ceste absurdité, ains les fardeaux & corps pesans perdent la cause pour laquelle ils tendent & se meuuent vers icy bas: car il n'y aura point de corps vers lequel ils se meuuent, & ce qui est sans corps, il n'est

pas vray-semblable, & aussi ne le veulent ils pas **D**
 eux mesmes, qu'il ait tant de puissance que d'attirer à soy, & de retenir alentour de soy toute chose. Et toutefois si trouue lon desraisonnable, & est contraire à la nature, que tout le monde soit le dessus, & qu'il n'y ait rien qui soit le dessous, sinon vn terme ou bout sans corps & sans espace. Mais cela que nous disons est plus raisonnable que la region du dessus, & celle du dessous estant diuisee l'vne de l'autre, ont neantmoins chascune sa largeur grande & spacieuse. Toutefois supposons si tu veulx, que les corps terrestres aient des mouueméts **E**
 contre la nature au ciel. Considerons tout doulcemét à loisir, non violement, que cela ne preuue pas que la Lune ne soit pas terre, mais bien que la terre soit en lieu où par nature elle ne doit pas estre: car le feu du mont *Ætna* est bien soubs terre contre la nature, mais toutefois il ne laisse pas d'estre feu. Et le vent qui est contenu dedans des outres est bien leger de sa nature, & tendât contre-mont, mais par force il est venu où sa nature ne portoit pas qu'il fust. Et l'ame mesme, ie vous en prie au nom de Iupiter, n'est elle pas cõtre nature detenue **F**
 dedans le corps qui est pesant, elle qui est legere: froid, elle qui est de feu, comme vous mesmes dites: palpable, elle qui est inuisible? pour cela nous ne disons pas que l'ame ne soit rien dedãs le corps, ny que ce ne soit vne chose diuine soubs vne masse pesante & lourde, & qui en vn momét va par tout le ciel, toute la terre, & toute la mer, & qui penetre dedans la chair, les nerfs, & les mouëlles, & est cau-

A se d'infinies passions avec les humeurs. Et vostre Jupiter, tel comme vous le paignez & imaginez, n'est il pas quand il vsc de son naturel, vn grand feu continuel? Mais maintenant il se soubmet, il se plie & se transforme, en toute chose par diuerses mutations. Parquoy prens garde, beau sire, qu'en transferant & ramenant chasque chose à ce qui lay est naturel, tu ne nous excogites vne dissolution de tout le mōde, & ramenes és choses la querelle ancienne d'Empedocles, ou pour mieux dire, que tu ne nous remuës ces anciës Titans & Geans
 B contre la nature, & que tu ne trauailles pour receuoir encore ceste fabuleuse & espouuentable erreur & confusion, où tout le pesant soit à part, tout le leger à part,

Où du Soleil la belle claire face,
 Point ne se voit, ny l'herbue terrace,
 Et là où point ne se cognoit de mer,

comme dit Empedocles: la terre ne sent aucune chaleur, ny l'eau aucun vent, il n'y a rien en hault de pesant ny rié au bas de leger, ains sont les principes des choses solitaires, sans amour ny dilection
 C les vns avec les autres, ne receuans aucune societé ny mixtion ensemble, ains les fuyans & les diuertissans, & se mouuans à part de mouuements particuliers, & desdaigneux, superbes, & se portans en sorte que se porte tout cela où Dieu n'est point, comme dit Platon, c'est à dire, cōme se portent les corps où il n'y a ny ame ny entendemēt, iusques à ce que par la prouidēce diuine desir reuiēne en nature, & amitié, Venus & Amour y estāts engēdrez,

ainsi comme Empedocles, Parmenides, & Hesio-
 de disent, à fin que permutans leurs lieux naturels,
 & s'entrecommunicans leurs puissances, les vnes
 estants astraintes à mouuement, les autres à demeure
 & arrest par necessité, le tout tendant à mieulx,
 chascune relaschant vn peu de sa force, & cedant
 de son lieu, elles refacent vne harmonie, accord &
 societé ensemble: car sil n'y auoit aucune autre
 partie du monde qui fust contre sa nature, ains que
 chascune fust & au lieu & en la qualité où elle doit
 estre selõ nature, sans auoir besoing d'aucun chan-
 gement ny d'aucune transposition, & sans en auoir ^E
 eu affaire des le commencement, ie ne sçay quel
 ny en quoy est l'ouurage de la prouidence, ou de-
 quoy c'est que Iupiter a esté pere, ny createur, ny
 ouurier: car en vn camp il ne seroit point de be-
 soing d'homme qui entendist bien l'art de dresser
 & ordonner les batailles, si chascque soudard de
 luy mesme sçauoit & entendoit son reng, & son
 lieu & sa place, & l'occasion qu'il deuroit prendre
 & garder, non plus que de iardiniers ny de maçons,
 si l'eau de foy mesme estoit pour aller à ce qui en
 auroit besoing, & pour arroser où il faudroit en ^F
 coulant par dessus, & si les bricques, les bois, les
 pierres vsans de leurs naturelles inclinations, &
 mouuements estoient pour se renger d'elles mesmes
 és places & ordres qu'il appartiendroit. Et si ce pro-
 pos la tout manifestement oste du mode la prouidence
 & l'ordonnance, & si la distinction des choses
 qui sont en ce mode appartient à Dieu, pourquoy
 se faut il esbahir que la nature ait ainsi esté disposee

A & ordonnee par luy, que le feu soit icy, & les astres là, & derechef icy bas la terre, & là sus la Lune logee, en plus seure & plus ferme prison, celle qui est selon la raison, que non pas selon le premier ordre de la nature: car s'il falloit de necessité absoluë que toutes choses suiussent leur naturel instinct, & se meussent du mouuement auquel elles sont nees, ny le Soleil ne se mouueroit plus circulairement, ny Venus, ny autre planette quelconque, par ce que les substances legeres & de nature de feu naturellement vont à droit fil contremont. Et si d'auenture la nature mesme reçoit telle permutation & changement à raison du lieu, tellement que le feu se mouuant icy, se meue à droite ligne contremont, & puis quand il est arriué au ciel, que avec la reuolution du ciel il se tourne en rōd, qu'y a il d'esmerueillable si semblablement les corps graues & terrestres sortans hors de leur naturel, sont forcez & vaincus par l'air circōstant, de prendre vne autre sorte de mouuement: car il ne se pourroit dire avec raison, que le ciel eust selon nature ceste puissance la, d'oster aux substances legeres la propriété de se mouuoir contremont, & qu'il ne peust auoir la puissance de vaincre les pesantes & qui tendent contre bas, ains aucunes fois il a vsé de sa puissance, aucunes fois du propre naturel des choses, pour les ordōner tousiours en mieux. Mais sil nous fault despoiller des habitudes & opiniōs asseruies, & ausquelles nous nous sommes asseruis, pour dire librement & franchement ce qui nous en semble, ie pense qu'il n'y a partie quelcon-

que separee de l'vniuers qui à part ait son rend, sa situation, son mouuement, que lon peust simplement dire estre son naturel. Mais quand chascune partie rend & exhibe vtilement ce à quoy elle est nee, à quoy elle est destinee, & pourquoy elle a esté faite, se mouuant elle mesme, faisant ou souffrant, ou estant disposee, ainsi comme il luy est expedient & conuenable, ou pour son salut, ou pour sa beauté, ou pour sa puissance, alors il semble qu'elle a son lieu, son mouuement & sa disposition qui luy est selon nature. Qu'il soit ainsi, l'homme qui est disposé selon nature s'il y a autre chose au monde qui le soit, il a au dessus les choses pesantes & terrestres, principalement alentour de la teste, & au milieu, les choses chaudes & qui tiennent du feu: & des dents les vnes viennent & naissent dessus, les autres dessous, & toutefois ny les vnes ny les autres ne sont contre nature: ny le feu qui est au hault reluisant dedans les yeux n'est selon nature, & celuy qui est au cœur & en l'estomach contre la nature, ains est en chascque lieu colloqué proprement & vtilement. Et toutefois,

Conques de mer & coquilles voustees
 De dos pesans, & tortuës croustees,
 De tectz massifs aussi durs comme pierre,
 Dessus leurs corps monstrent auoir la terre.

Et toutefois ceste crouste la dure & pesante comme vne pierre, estant posce dessus leurs corps ne les presse ny ne les foule point, ny au contraire la chaleur naturelle qu'ils ont, pour sa legereté ne s'enuole pas contremôt & se perd, mais sont mes-

A lez & composez les vns avec les autres selon la nature de chascun. Aussi est-il vraysemblable que le monde fil est vn animal, a en plusieurs endroits de son corps de la terre, & en plusieurs autres du feu & de l'eau, non ietté & chassé là par force, mais ordonné & disposé par raison: car l'œil n'a pas esté par force de sa legereté poulsé alendroit du corps où il est, ny le cœur n'a point esté deprimé par sa pesanteur en l'estomach, ains pour ce qu'il estoit meilleur & plus expedient que l'vn & l'autre fust ainsi colloqué. Aussi ne faut il pas que nous pënsions que

B des parties du mōde ny la terre soit gifante où elle est, pour y estre tumbée par sa pesanteur, ny que le Soleil ait esté par sa legereté poulsé contremont, cōme vn outre, ou vn ballon plein de vent, qui seroit au fond de l'eau, viendroit incontinent au dessus, ains cōme se persuadoit Metrodorus natif de Chio, ny les autres astres non plus, comme qui les eust mis en vne balance que chascune chose eust tēdu pour sa legereté ou grauité aux lieux où elles sont assises maintenant: mais la raison aiant dominé en la constitution du monde, les vnes, à sçauoir

C les astres, comme des yeux esclairans, ont esté attachés au ciel, ne plus ne moins qu'au front du mōde, pour tourner continuellement: & le Soleil aiant la force & la vigueur du cœur, enuoye par tout & distribue, comme du sang & des esprits, sa chaleur & sa lueur: & la terre & la mer sont au mōde, ne plus ne moins que le ventre & la vessie au corps d'vn animal: & la Lune, qui est entre le Soleil & la terre, comme le foye ou quelque autre molle

partie des intestins entre le cœur & le ventre transf-
 met icy bas la chaleur des corps superieurs, & atti-
 re alentour d'elle les vapeurs qui montent d'icy,
 en les subtilisant par vne maniere de concoction
 & de purgation: & si sa qualité solide & terrestre
 a quelque autre propriété, nous ne le sçauons pas,
 mais en tout il est tousiours plus seur & meilleur
 de tenir ce qui est necessaire: car que pouuōs nous
 ainsi tirer de ce qu'ils disent, vray-semblable? Ils di-
 sent que de l'air la partie plus subtile & plus lumi-
 neuse, à cause de sa rarité, a esté faite ciel, & ce qui
 s'en est espaisi, reserré & compressé, a esté fait ^E
 les astres, entre lesquels la Lune estant la plus pe-
 sante fut concreée de la matiere la plus trouble &
 plus grosse: toutefois encore peult on bien veoir
 cōment elle n'est point separee ny diuisee de l'air,
 ains qu'elle se meut & fait sa reuolution atrauers
 celuy qui est alentour d'elle, à sçauoir la region des
 vents, & là où se font les cometes, ainsi n'a ce pas
 esté par inclinations naturelles, selon que chascue
 corps estoit pesant ou leger, qu'ils ont esté situez
 & colloquez, ains par autre raison qu'ils ont tous
 esté renez & ordonnez. Ces choses dittes, comme ^F
 ie baillois le propos à suiure & continuer à Lucius,
 ne restant plus à adiouster que les demonst-
 rations de ceste doctrine, Aristote se prenant à rire, Je suis
 bien resmoing (dit-il) que tu as fait tous tes contre-
 dictz, & toute ta refutation, alencontre de ceux qui
 supposent, que la Lune soit demy feu, & qui di-
 sent que generalement tous corps tendent d'eux
 mesmes ou contremont, ou contrebas: mais sil y a
 quel-

A quelqu'un qui die, que les astres de leur nature se meuent en rond, & qu'ils soient de substâce toute differente des quatre elements, il ne vous est pas incidemment & de cas d'aduenture venu en memoire d'en parler, tellement. que ie suis hors d'affaires. A quoy Lucius: Si vous mettiez, dit-il, les autres astres & tout le ciel vniuersel à part en vne nature pure & nette, exempte de toute mutation & alteration de passion, & que vous meissiez vn cercle par lequel ils feissent leur mouuement de perpetuelle reuolution, à l'aduenture ne trouueriez vous pas qui maintenant vous contredist, **B** encore qu'il y ait en cela des doubtes & difficultez infinies. Mais quand le propos descend iusques à toucher à la Lune, elle ne peut plus retenir celle perfection d'estre exempte de toute passion & alteration, ny celle beauté celeste, ains à fin que nous laissions les autres inegalitez & differences, la face mesme qui apparoist au corps de la Lune vient necessairement de quelque passion de sa substance, ou par la meslange d'une autre: car ce que lon mesle souffre, par ce qu'il perd sa premiere sincerité, se **C** remplissant par force de ce qui est pire. Au demourant sa lentitude & tardité de son cours, sa chaleur foible & debile,

Par qui iamais le raisin ne meurit, ce disoit Ion, à quoy l'attribuerons nous, sinon à vne imbecillité d'icelle, & à vne passiõ, si vn corps eternal & celeste peut estre subiect à passion? En somme, amy Aristote, Si la Lune est terre, comme terre c'est vne tres-belle & esmerueillable chose:

mais comme vn astre ou corps diuin & celeste, i'ay peur qu'elle ne soit laide, difforme, & faisant deshonneur à son beau nom, si de tous les corps qui sont au ciel en si grand nōbre, elle seule, selon Parmenides a besoing de lumiere empruntee d'ailleurs, regardant tousiours & beant aux rayons du Soleil. Or nostre familier aiant demonstré en sa lecture ceste proposition d'Anaxagoras, que le Soleil baille à la Lune ce qu'elle a de clarté, en a esté bié estimé. Mais quāt à moy ie ne veux point dire ce que i'ay appris de vous, ou avec vous, mais l'aiāt pour cōfessé ie passeray outre. Il est dōcques vray semblable que la Lune est illuminee, non cōme vn verre ou vn crystal, quand la clarté & les rayons du Soleil passent atrauers, ny derechef aussi par collustration & conionction de lumiere & de clarté, comme des torches allumees augmentent la clarté l'vne de l'autre : car autrement elle ne seroit pas moins pleine au croissant & au premier quartier, qu'en son opposition, si elle ne soustenoit & rebattoit les rayons du Soleil, ains les laissoit passer atrauers, à cause de sa rarité, ou si par vne con-
 téperature il reluisoit & allumoit sa clarté en elle : car on ne scauroit pas alleguer ses biaisemens & destournemens en la conionction, comme lon fait quand elle nous apparroist demie, ou bossue deuant & derriere, ou comme en croissant, ains estant lors à plomb, comme dit Democritus, au dessoubs de celuy qui l'enlumine, elle recueille & reçoit le Soleil, tellement qu'il seroit vray semblable qu'elle mesme nous apparroistroit, & si nous monstre-

A roit atravers soy le Soleil. Mais tant s'en faut qu'elle le face, qu'elle mesme ne nous apparoit pas lors & si nous cache & empesche de veoir le Soleil bien souuent, comme dit Empedocles,

Du clair Soleil les rayons elle empesche

Là sus, d'attaindre à bas en terre seiche,

Obscurcissant d'iceluy tout autant

Que la largeur de la Lune s'estend.

comme si ceste lumiere du Soleil tomboit en vne nuit & en vnes tenebres, non pas en vn autre astre. Et quant à ce que dit Posidonius, que pour la profondeur du corps de la Lune, la lumiere du Soleil ne penetre pas atravers iusques à nous, cela se refute manifestement: car l'air qui est infiny, & qui a vne profondeur beaucoup plus espaisse que n'est le corps de la Lune, est neantmoins tout esclairé & illuminé des rayons du Soleil. Il reste donc que selon l'opinion d'Empedocles, la lumiere de la Lune, qui nous apparoit, vienne de la repercussion & reflexion des rayons du Soleil. Voila pourquoy elle n'arriue iusques à nous ny chaude ny claire, comme il seroit vraysemblable, si tant estoit que telle clarté procedast ou d'inflammation, ou de cōmixtion des deux lumieres: ains tout ainsi cōme les voix reuerberées rendent vne Echo & retentissement plus obscur & moins exprimé que n'est la parole, & les coups des flesches & traicts reiallisans de contre quelque muraille, sont plus mols: aussi le rayon venant à frapper dedans le large rond de la Lune a vne imbecille & debile refluxion & refusion de clarté vers nous, sa force estant

diffoulte & affoiblie par la reflexion. Sylla prenant la parole : Certainement , dit-il, il y a bien du vray semblable en tout cela, mais la plus forte objection qui soit alencontre, vous semble il qu'elle ait esté aucunement adoucie, ou si nostre amy a passé par dessus sans s'y arrester ? Quelle est l'opposition que tu veux dire, ce dit Lucius ? Est-ce point la doutte de la Lune, quand elle est demie ? Ouy, respondit Sylla : car il y a quelque raison, attendu que toute reflexion se fait à angles egaux, quand la Lune demie se trouue au milieu du Ciel, que la clarté venant d'elle ne doive point donner sur la terre, mais tomber oultre & dela la terre : car le Soleil estant lors sur l'orizon, touche de ses rayons la Lune. Parquoy il fault que la reflexion se face à l'opposite bout de l'orizon, & par ainsi elle n'enuoyera pas icy la lumiere, ou il se fera vne grande torse & grande difference de l'angle, ce qui est impossible. Et ie vous assure, dit Lucius, que cela mesme ne fut pas oublié ne mis en arriere. Et iettant ses yeux sur le mathematicien Menelaüs, l'ay honte, dit-il, d'entreprédre de subuertir & destruire, en ta presence, vne position de Mathematique, laquelle est supposee comme vne base & fondement en matiere de mirouers : mais il est force, par ce que ny il n'apparoist en ceste exemple cy, que toute reflexion se face à angles pareils, ny n'est vniuersellement vray, ains est contredit & refuté es mirouers esleuez en bossé ronde, quand ils font les images apparentes à vn poinct de la veuë plus grandes que soy. Et est aussi refuté par les mirouers doubles,

A doubles, lesquels estants ioincts l'un deuant l'autre, l'angle se fait au dedans, & chacune des glaces rend double image apparente, les deux respondentes au costé gauche, & les deux autres obscures & peu euidentes au costé droict, tout au fond des mirouers, là où ils rendent les images apparentes plus grandes que soy mesme à vn seul poinct de la veüe. Aussi se desment il és mirouers qui sont concaues & creux, dont Platon rend la cause efficiente: car il dit, que le mirouer venant à se releuer & rehaulser d'une part & d'autre, les veües contre-eschāgent la reflexion qui vient à tomber d'un costé en l'autre. Ainsi donc, comme des veües, les vnes recourent incontinent deuers nous, les autres glissantes en la part opposite du mirouer, de-rechef retournent de là par deuers nous, il n'est pas possible que toutes reflexions se facent à angles egaux, tellement que venans à combattre de pres, ils pensent par ces oppositions oster aux fluxions de lumiere de la Lune en terre l'equalité des angles, estimans estre bien plus vray-semblable en l'un qu'aux autres.

B Toutefois quand bien il faudroit donner & conceder cela à la bien-aimée Geometrie, Premièrement il est vray-semblable que cela aduient és mirouers qui sont parfaitement & exquisement polis & lissez, là où la Lune a beaucoup d'inegalitez & aspretez, de maniere que les rayons sortans d'un grand corps, & venans à donner dedans des hauteurs non petites, renuoyent de l'un à l'autre, & s'entrecómuniquent leurs lueurs qui se rebattēt & s'entrelassent de tou-

tes sortes, & les contrelumieres se viennent à ren-
 contrer, comme si elles venoient de plusieurs mi-
 rrouers à nous. Et puis encore que nous meissions
 & supposissions les angles egaux en la superficie de
 la Lune, il n'est pas inconuenient que ces rayons
 la venàs iusques à nous par vn si long interualle ne
 puissent auoir des flexions, fractions & glissemés,
 à fin que la lumiere en soit composee & en esclai-
 re mieux. Et y en a qui preuent par demonstra-
 tion lineaire, qu'elle iette beaucoup de sa lumiere
 selon la ligne droite tiree à plomb au dessoubs de
 la couchee, mais d'en faire la description & deli-
 neation, en lisant & discourant ainsi publiquemēt,
 mesmement où il y auoit tant d'auditeurs il n'e-
 stoit pas bien facile. En somme ie m'esmerueille
 comment ils vont ainsi remuer contre nous la Lu-
 ne demie, & bossuë des deux costez, & cornue:
 car si le Soleil l'enluminoit comme vne masse de
 matiere celeste ou de feu, il ne luy laisseroit pas la
 moitié de sa boule tenebreuse & sans clarté touf-
 iours, ainsi que lon la voit, ains pour peu qu'il
 luy touchast en tournoyant alentour, il seroit con-
 uenable qu'elle fust remplie totalement, & du
 tout en tout renuersee par la clarté, qui s'espand
 facilement, & va aisement par tout: car veu que
 le vin touchant à l'eau en vn poinct seulement, &
 vne seule goutte de sang venant à tomber dedans
 quelque liqueur, la teint & colore toute de rouge,
 & dit on que l'air mesme est alteré de la lumiere,
 non par aucuns decoulemés, ny par aucuns rayons
 qui se meslent parmy, ains par mutation & con-
 uersion

A uersion qui se fait par vne seule pointure, comment peuuent ils penser qu'un astre venant à toucher vn autre astre, & vne lumiere vne autre, ne se meslent pas, & ne se confondent, & ne se tournent pas entierement l'une avec l'autre, ains qu'elle enlumine seulement par dehors ce dont elle vient à toucher & atteindre la superficie? car le cercle que fait le Soleil en tournoyant deuers la Lune, tantost tombant sur le departement de ce qui en est visible & non visible, tantost se leuant droit à plomb, de maniere qu'il la coupe, & est aussi reciproquement coupé d'elle en deux, par diuers regards & diuerses habitudes du luisant au tenebreux, estant la cause des diuerses formes de demie, de bossue deçà & delà, & de cornue en croissant que lon apperçoit en elle, cela plus que nulle autre chose monstre que ce n'est vne meslange de deux lumieres, ains vn attouchement seulement, ny vn assemblément de diuerses lueurs, ains vn esclairement alentour, que toute ceste illumination de la Lune. Mais pour autant que non seulement elle s'enlumine, mais aussi elle renuoye par deçà l'image de son illumination, cela nous confirme encore d'auantage, en ce que nous disons touchant sa substance: car les reflexions & reuerberations ne se font contre rien qui soit rare & de menues & subtiles parties, ny n'est pas facile d'imaginer seulement comment vne lumiere puisse reiaillir, ny vn feu d'un autre feu ou lumiere, ains fault que ce qui doit faire la reuerberation & reflexion soit solide & ferme, à fin qu'il se donne coup contre,

& se face reiallissement en arriere. Qu'il soit vray, D
 l'air donne passage à trauers soy au Soleil, à cause
 qu'il ne le rebat ny ne le repoulse point: & au con-
 traire des bois, des pierres, & des vestemens que
 lon met au Soleil, nous voions qu'il se fait plusieurs
 reflexions de lumiere, & plusieurs illuminations
 alentour. Ainsi voions nous que par luy la terre
 est enluminee, non iusques au fond, comme l'eau,
 ny en tout & part out, comme l'air, les rayons du
 Soleil passans tout à trauers, ains tout tel cercle
 que fait le Soleil tournoyant vers la Lune, & au-
 tant comme il en coupe d'elle, autant en fait il E
 vers & alentour de la terre, & autant en illumine
 il, & autant en laisse il à illuminer, car ce qui est en-
 luminé en l'vne & en l'autre, est vn peu plus que
 demie spher. Permettez moy doncques que ie
 conclue maintenāt ainsi à la maniere des Geome-
 triens par proportion: S'il y a trois choses desquel-
 les la lumiere du Soleil s'approche, l'air, la Lune, &
 la terre, & nous voions que l'vne n'est point enlu-
 minee de luy comme l'air, ains cōme la terre, il est
 doncques force que ces deux choses la aient mes-
 me nature, qui d'vne mesme cause seuffrent mes- F
 mes effects. Et pource que toute la cōpagnie se prit
 à louer grandement le discours de Lucius: Fort à
 propos, dis-ie, certes, Lucius, tu as à vn beau dis-
 cours adiousté pour conclusion vne belle propor-
 tion: car il ne te fault point frustrer de ce qui t'ap-
 partient. Et luy s'en riant, Ie veux doncques enco-
 re y adiouster vne seconde autre proportion, à fin
 que nous demōstrions que la Lune ressemble tou-
 te à

A te à la terre, non seulement par ce qu'elle seuffre & reçoit de mesme cause mesmes accidents, mais aussi par ce qu'elle fait de mesmes effectts à l'endroit d'un mesme obiect. Car vous me concederez bien, qu'il n'y a accident qui aduienne au Soleil, qui ressemble plus à son coucher que fait l'eclipse, si vous voulez vous souuenir de la cōionction qui se fait il n'y a pas long temps, laquelle nous fait veoir incontinent apres midy, en plein iour, plusieurs astres en diuerses parties du ciel, & rendit la temperature de la lumiere en l'air telle, comme est celle du crepuscule, auant le leuer du Soleil. Si nō, cestuy Theon nous amenera vn Mimnermus, vn Cydias, vn Archilochus, & oultre ceux la encore Stefichorus & Pindare se lamentants, que aux eclipses la lumiere du monde a esté desrobée, & disans qu'au milieu du iour la nuict est venue, & que le rayon du Soleil est entré en la fente des tenebres. Et apres tous encore Homere, qui dit qu'au commencement de la naissance des hōmes, tout estoit occupé de nuict & de tenebres, & que le Soleil festoit perdu à l'endroit de la Lune: & cela naturellement aduient, à fin que l'use de ses propres termés,

Lors que des mois l'un va & l'autre vient.

Car le demourant de la demonstration, à mon aduis, est aussi certainemēt & exactement concluāt comme sont les demonstrations des Mathematiciens. Que si la nuict est l'ombre de la terre, & l'eclipse du Soleil est l'ombre de la Lune, quand la veuë retourne en soy mesme: car le Soleil se cou-

chant est offusqué par la terre, & defaillant en son D
 eclipse par la Lune, & l'une & l'autre est offusca-
 tion de tenebres, celle du Soleil couchant par la
 terre, celle du Soleil eclipsant par la Lune, qui de
 son vmbre empesche nostre veüe, il est facile de
 cela cōclure le reste. Car si l'effect est mesme, mes-
 mes sont les efficients, par ce qu'il est necessaire
 que mesmes accidents en mesme subiect aduien-
 nent par mesmes causes efficientes. Et si les tene-
 bres de l'eclipse ne sont pas si profondes, & ne fai-
 sissent pas si fort, & si entierement l'air, comme
 font celles de la nuit, ne nous en esmerueillons E
 pas: car la substance du corps qui fait la nuit, &
 de celuy qui fait l'eclipse est bien mesme, mais la
 grandeur n'est pas egale. Car les Ægyptiens, ce
 me semble, tiennent que la Lune soit en grādeur la
 soixante douziesme partie de la terre: & Anaxago-
 ras dit, qu'elle est aussi grande que le Peloponese.
 Et Aristarchus escrit que la ligne transuersale, ou le
 diametre de la Lune a vne proportion à celle de la
 terre, qui est plus grande que de soixante & dix-
 neuf, & moindre que de cent & huit à quarante
 trois, dont vient que la terre nous oste tout entierement F
 la veüe du Soleil pour sa grandeur. Car il
 y a vn grand obstacle, & opposition qui dure autāt
 comme fait la nuit: & la Lune, encore que quel-
 quefois elle cache tout le Soleil, elle ne dure pas
 rant de temps, ny n'a pas telle largeur, ains appa-
 roist tousiours alentour de sa circonference quel-
 que lueur, qui ne permet pas que les tenebres soiēt
 bien noires & profondes, & parfaictement obscu-
 res.

Ares. Et Aristote l'ancien rendant la raison, pourquoy lon voit plus souuēt aduenir eclipses de Lune, que non pas de Soleil, entre autres causes amène ceste cy, que le Soleil eclipse par obstruction de la Lune, & la Lune par obstruction de la terre, qui est beaucoup plus grande & plus spacieuse, & par consequent s'oppose bien plus souuent, au moins pour quelque sienne partie. Et Posidonius définissant ainsi cest accident, Eclipse de Soleil est la conionction du Soleil & de la Lune, de laquelle l'vmbre offusque nostre veü. Car il n'y a eclipse que

B pour ceux la, desquels l'vmbre de la Lune occupāt la veüë, les empesche de veoir le Soleil. En quoy cōfessant que l'vmbre de la Lune descēd à nous, ie ne sçay pas qu'il se laisse à dire, par ce qu'un astre n'a point d'vmbre: car ce qui n'est point enluminé s'appelle vmbre, & la lumiere ne fait point d'vmbre, ains au cōtraire elle la chasse. Mais quels indices & argumēs, dit-il, allegua il puis apres? La Lune, dis-ie lors, souffroit mesme eclipse. Tu me l'as, dit il, bien remis en memoire, mais voulez vous que ie me mette à poursuiure le reste du propos, cōme

C si vous auiez desia supposé & concedé que la Lune eclipsast, estant entreprise dedans l'vmbre de la terre? ou si vous voulez que pour le subiect d'une declination, ie prenne à vous en faire la demonstration, en vous recitant tous les arguments les vns apres les autres? Je t'en prie, respondit Theon, fais nous le discours de cela. Certainement, dit-il, j'aurois besoing de quelque persuasion, aiant seulement ouy dire, que quād ces trois corps, la Terre, la

Lune & le Soleil, sont en droite ligne, les eclipses d'arriuer, parce que ou la Terre à la Lune, ou la Lune à la terre oste le Soleil. Car luy seuffre eclipse & default quand la Lune, & la Lune quād la terre est au milicu des trois, dont l'vn se fait en la conionction, & l'autre en l'opposition, lors que la Lune est pleine. Et Lucius: Ce sont là, dit-il, les principaux poincts, & le sommaire, de ce qui s'en dit: mais prens premierement, si tu le treuues bon, le premier argument qui est tiré de la forme & figure de l'vmbre, qui est la figure d'une pyramide renuersee, attendu qu'un grand feu, ou grande lumiere rōde, embrasse vne masse rōde aussi, mais moindre, dont vient qu'és eclipses de la Lune, les circōscriptions du noir & obscur d'avec le clair & luyfant, ont tousiours leurs sections rōdes. Car les approches d'un corps rond, quelque part qu'il aille, soit qu'il baille ou qu'il reçoive les sections, pour la similitude, tiennent tousiours de la forme rōde. Le second argumēt. Je pense que tu sçais bien que la premiere partie qui eclipse en la Lune, c'est tousiours celle qui regarde vers le leuant, & du Soleil à l'opposite, celle qui regarde vers le couchant: & se meut l'vmbre de la terre de l'orient vers l'occident, & le Soleil & la Lune, au contraire, de l'occident vers l'oriēt. L'experience des apparēces nous donne cela visiblement à cognoistre, & n'est pas besoing de beaucoup de paroles pour les donner à entendre, & de ces suppositions la se confirme la cause de l'eclipse. Car d'autant que le Soleil eclipse par estre attainct, & la Lune par aller au

deuant

A deuant de ce qui fait l'eclipse, vray semblablement ou plus tost necessairement l'vn se surpront par le derriere, & l'autre par le deuant, par ce que de là commence l'obstruction, dont premierement approche ce qui se met au deuant. Or est il que la Lune va trouuer le Soleil venant de l'occident, comme estriuant de la course avec luy, & de l'vmbre de la terre venant du costé d'orient, comme de celle qui a son mouuement au contraire. Le troisieme argument est celuy du temps & de la grandeur des eclipses. Car quand la Lune eclipse estant **B** bien haulte & fort esloignee de la terre, elle demeure peu de temps en default: & quand elle seuffre le mesme, estant basse & prochaine de la terre, elle est fort oppressee, & sort à tard & lentement hors de l'vmbre d'icelle, combien que quand elle est basse, elle ait son mouuemēt plus viste, & quād elle est haute, plus tardif. Mais la cause en est en la difference de l'vmbre, laquelle est la plus large au pres de la base, comme sont les pyramides, & va tousiours en estroississant petit à petit, en poincte vers la cyme, iusques à ce qu'elle se termine en vn **C** bout pointu. Dont vient que quand elle est basse, elle se trouue ambarassée dedās plus grāds cercles, & traaverse le fond de l'vmbre, & ce qui en est le plus obscur & plus tenebreux. Et quand elle est en hault pour l'estroicte espace de l'vmbre, estāt comme vn peu fouillee de limon, elle en sort incontinent. Je laisse à dire les effects qui ont des causes particulieres. Car nous voions que le feu d'vn lieu tenebreux & obscur apparoit & reluit d'auantage,

à cause de la densité de l'air tenebreux qui ne souffre point d'effluxions ny de diffusions de la vertu du feu, ains en contient & reserre la substance en soy : ou bien si cela est passion du sentiment, comme les choses chaudes aupres des froides sont trouuees plus chaudes, & les voluptez plus vehementes aupres des trauaux, ainsi les choses claires apparoissent mieulx, quand elles sont aupres des obscures par diuerses passions qui tendent plus roide l'imagination de l'entendement, combien qu'il y ait plus de vraysemblable apparence en la premiere raison. Car au Soleil toute nature de feu, non seulement perd sa puissance d'esclairer, mais aussi deuiét plus mouffe & plus debile à brusler, parce que la chaleur du Soleil dissipe & espend toute sa force. S'il estoit doncques veritable, que la Lune eust vn feu mol & imbecille, cōme estant vn astre limoneux & trouble, ainsi comme disent les Stoiques, il seroit conuenable qu'elle ne souffrist maintenant rien de ce que lon la voit souffrir, ains tout le contraire qu'elle se monstraist quand elle se cache, & qu'elle se cachast quād elle se montre, c'est à dire, qu'elle se cachast tout le reste du temps obscurcie par l'air enuironnant, & qu'elle reluisist & se rendist apparente & manifeste par six mois durant, & puis au contraire qu'elle disparust par l'espace de cinq mois, entrant en l'vmbre de la terre. Car de quatre cents soixante & cinq reuolutions d'eclipses lunaires, les quatre cents & quatre se font de six en six mois, & les autres de cinq en cinq mois. Il faudroit dōcques durāt ce temps

A la, que la Lune apparust reluisante en l'vmbre, & au cōtraire nous voions qu'en l'vmbre, elle eclipse & perd sa lumiere, & la recouure derechef puis apres quand elle est eschappée & sortie del'vmbre, & apparoist souuent sur le iour, de sorte que c'est plus tost toute autre chose, que non pas vn corps de feu, & ressemblant vn astre. Quand Lucius eut dit cela, accoururēt ensemble Pharnaces & Apollonides, cōme pour cōbattre ce propos: & dit Pharnaces assisté d'Apollonides, C'est cela qui principalement monstre que la Lune est vn astre, ou du feu,

B par ce que és eclipses elle n'est pas du tout obscurcie & disparente, ains se monstre avec ie ne sçay quelle couleur de charbon espouventable à voir, qui luy est propre: & Apollonides fait instance & opposition de ce mot vmbre, par ce que les Mathematiciens appellent tousiours ainsi le lieu qui n'est pas enluminé, mais que le ciel ne receuoit point d'vmbre. A quoy ie respondis, que ceste instance la estoit plus tost alleguee contre le nom opiniairement, que contre la chose naturellement ou mathematiquement. Car le lieu qui est offusqué

C par opposition de la terre, si lon ne le veut pas appeller vmbre, ains lieu priué de la lumiere, commēt que ce soit, il est tousiours necessaire que la Lune y estant deuieue obscure. Et en toute sorte, disois-ie, c'est vne sottise de dire, que l'vmbre de la terre n'arriue pas iusques là, dont l'vmbre de la Lune venant à tomber sur la veuë contre terre, fait l'eclipse du Soleil. Et pourtāt ie me tourne à toy Pharnaces, car ceste couleur la charbōniere & bruslee de la Lune,

que tu dis luy estre propre, appartient à corps qui a D
 espesseur & profondeur. Car il n'a point accou-
 stumé de demourer reste, marque, ne vestige quel-
 conque de flamme és corps qui sont rares, ny ne se
 peult faire charbon, là où il n'y a point de corps so-
 lide, qui dedans soy puisse receuoir l'ardeur du feu,
 & la noirceur de la fumee, comme Homere mes-
 me le monstre en quelque passage,

La fleur du feu s'en estant enuolee,

La flamme esteincte, & du tout escoulee,

Le brasier plat demeure.

Car le brasier n'est pas feu proprement, mais vn E
 corps espris & alteré de feu, s'arrestant & demou-
 rant en vne masse solide, & aiant pied ferme, là où
 les flammes sont allumements & fluxions de pa-
 sture & matiere rare, qui pour son imbecillité ne
 resiste gueres, & est incontinct resoluë & consom-
 mee, tellement qu'il n'y auroit point de plus eui-
 dent & plus manifeste argument, pour monstre
 que la Lune seroit solide & terrestre, que si sa pro-
 pre couleur estoit la couleur de charbon: mais elle
 ne l'est pas, amy Pharnaces, ains quand elle est en
 eclipse, elle change de plusieurs couleurs, & les di- F
 stinguent les Mathematiciens en ceste sorte, deter-
 minant le temps & la place. Si elle eclipse du costé
 de l'occident, elle apparoist fort noire iusques à
 trois heures & demie. Si c'est au milieu du ciel,
 elle iette vne couleur rougeastre, & qui ressemble
 au feu: apres les sept heures & demie, ceste rougeur
 s'en va: & finalement, quand ce vient sur l'aube
 du iour, elle prent vne couleur bleuë & perse. C'est
 pour-

A pourquoy les poëtes, & mesmement Empedocles, l'appelle Glaukopis, comme qui diroit, aux yeulx pers. Attendu donc que nous voions à l'œil, comme la Lune chāge de tant de couleurs en l'vmbre, ils font mal de luy attribuer seulement celle de charbon ardent, laquelle on pourroit dire luy estre moins propre que nulle autre, ains vn peu de reste & semblance de lumiere qui apparoiſt reluyſant à trauers l'vmbre, & que ſa propre couleur ſoit la noire & terreſtre. Et veu qu'icy bas les fleuues & les lacs qui reçoient les rayons du Soleil, en prenant, à voir leur ſuperfice, couleur tantost rouge, tantost violette, les lieux circonuoifins vmbrez en prennent meſmes apparéces de couleurs, & en ſont enluminez, reiettants & renuoyants, à cauſe des reflexiōs, pluſieurs rebattues ſplendeurs. Quelle merueille eſt-ce, ſi cōme vn grand fleuue d'vmbre venant à donner, ne plus ne moins qu'en vne vaſte mer dedans la lumiere celeſte, qui n'eſt point vne lumiere ferme ny arreſtée, ains agitée & promenee d'innombrables aſtres, & qui prend de toute ſortes de meſlange & de différentes mutations, en prenant de la Lune impreſſion tantost d'vne & tantost d'autre couleur, elle la renuoye icy bas: Car on ne ſçauroit deſauouer, que vn aſtre ou vn feu ne peult apparoir en vne vmbre ou noir, ou bleu & violet, veu que lon voit courir ſur les mōtagnes, ſur les campagnes, & ſur les plattes marines, pluſieurs diuerſes ſortes d'apparences de couleurs par reflexion de Soleil, qui ſont les teintures, que la clarté meſlée d'vmbres & de nuages, qui ſont

comme les drogues des couleurs des peintres, y amene : lesquelles teintures Homere a tafché à aucunement nommer & exprimer, quand il appelle quelquefois la mer violette, ou rouge comme vin, vne autre fois, le flot de pourpre, & ailleurs la mer perse, & la bonace blanche. Quant aux diuerfitez des teintures & couleurs qui apparoissent deffus la terre, il les a, ie croy, laiffées, parce qu'elles font en nombre infiny. Si n'est pas vrayfemblable, que la Lune n'ait qu'une superficie toute plaine & vnue, comme la mer, ains plus toft qu'elle refsemble de fa nature principalement à la terre, de laquelle l'ancien Socrates en Platon faisoit des contes à plaifir, foit qu'il vouluft, fous paroles couuertes, donner à entendre ceste-cy, ou qu'il parlaft de quelque autre. Car il n'est point incroyable ny esmerueillable, si n'ayant rien de corrompu en foy, ny de limoneux & fangeux, ains iouiffant d'une lumiere pure & nette du ciel, & eftât pleine d'une chaleur, non de feu brulant & furieux, ains gracieux, & ne faifant aucû mal, elle a en foy des lieux beaux & plaifans à merueilles, des montagnes refplendiffantes, comme feu clair, des ceintures de couleur de pourpre, force or & argent, non point espars çà & là dedans le fond d'icelle, ains fortant à fleur de terre par les campagnes en grâde abondance, ou bien semé par des collines & montagnes rafes. Et si la veuë de toutes ces choses la arriue iufques à nous à trauers vn vmbre, tantoft en vne forte & tantoft en vne autre, pour la diuerfité & differente mutation de l'air circonftant, pour cela

A la Lune ne perd pas la venerable persuasion, ny la reputation de diuinité, estant estimee par les hommes vne terre celeste, ou plus tost vn feu trouble, vn mar ou vne lie, comme disent les Stoiques. Car le feu mesme est honoré d'honneurs barbaresques empres les Assyriés & Medois, qui par crainte seruent & adorent ce qui peult nuire, en le sanctifiant plus tost que ce qui est de soy sainct. Quant au nom de la Terre, il est à tout Grec venerable, & est reçeuë par toute la Grece la coustume de l'adorer & reuerer autant que nul autre des Dieux: & sommes bien loing de penser que la Lune, que nous tenons pour vne terre celeste, soit vn corps sans ame & sans esprit, exempt & priué de tout ce que lon doit offrir aux Dieux. Car & par la loy nous luy payons les recompenses & actions de graces des biens que nous en receuõs, & par nature nous adorons ce que nous recognoissons de plus excellente vertu, & de plus honorable puissance, & pourtant ne pensons pas pecher en supposant que la Lune soit vne terre. Et quant à ceste face qui nous apparroist en elle, tout ainsi comme ceste terre, sur laquelle nous sommes, a de grandes sinuosittez de valles, aussi est il probable que celle la est ouuerte & fendue de grandes fondrieres & baricaues, esquelles il y a de l'eau, ou bié de l'air obscur, au fond desquelles la clarté du Soleil ne peult atteindre ne penetrer, ains y default, & en renuoye icy bas la reflexion. Adonc Apollonides prenant la parole: He dea, ie vous prie, dit il, par la Lune mesme, vous semble il qu'il soit possible qu'il y ait

là des vmbres de fondrieres & baricaues, & que la D
 veuë en vienne iusques icy à nos yeux? ne prenez
 vous pas garde à ce qui en aduient? Je vous diray
 quoy, & l'escoutez, encore que vous ne l'ignoriez
 pas. Le trauers de la Lune, selon la grandeur qui
 nous apparoint, quand elle est au milieu du ciel est
 de douze doigts, & chascune destaches noires &
 vmbreuses est plus grande que vn demy doigt,
 de sorte qu'elle est par consequent plus grãde que
 la vingt & quatriesme partie de la ligne trauerfan-
 te, & toutefois si vous supposez que le tout & la
 circonference soit de trente mille stades, & la ligne E
 trauerfable de dix mille, selon la presupposition,
 chascune de ces vmbreuses marques ne sera pas
 moins grande que de cinq cents stades. Conside-
 rez donc premierement, sil est possible qu'en la
 Lune y ait de si grandes fondrieres, & de telles in-
 egalitez, qu'elles puissent faire vne telle vmbre: &
 puis, comment il est possible qu'estants si grandes
 elles ne soient point veuës de nous. Et adonc me
 prenant à rire: Tu m'as fait plaisir, dis-ie, Apollo-
 nides, d'auoir trouué vne telle demonstration, par
 laquelle tu prouueras que toy & moy serons plus F
 grands que les Geans Aloades, non pas à toute
 heure du iour, mais principalement le matin & le
 soir. Penfes tu que lors que le Soleil fait nos vm-
 bres si lôgues, qu'il baille ceste belle racionation
 à nostre sentiment, que si ce qui est adumbré est
 grand, qu'il faille que ce qui adumbre soit en-
 core bien plus excessiuement grand? Je sçay bien
 que ny l'vn ny l'autre de nous n'a esté en l'Isle de
 Lemnos,

A Lemnos, mais aussi que & l'un & l'autre a bien souvent ouy dire ces vers,

Le mont Athos couvrira le costé

Du bœuf qui est dedans Lemnos planté.

Car l'ombre de ceste môtagne atteint l'image d'un bœuf de bronze, qui est en Lemnos, s'estendât vne longueur par dessus la mer, non moindre que de sept cents stades, non que la haulteur du mont qui fait l'ombre en soit cause, mais pource que l'esloignement de la lumiere fait les ombres des corps beaucoup de fois plus grandes que les corps ne sont. Considere donc icy que quand la Lune est au plein, & qu'elle rend la forme d'un visage plus expresse, à cause de la profondeur de l'ombre, c'est alors qu'elle est plus eslongnee du Soleil: car le reculement de la lumiere est ce qui faict l'ombre grande, non pas les grandeurs des inegalitez qui sont sur la superficie de la Lune. Et puis tu vois que l'illumination du Soleil tout alentour, ne permet pas que lon voye en plein iour les cymes des montagnes, & au contraire le bas, & ce qui en est creux ou umbragé en apparoit de tout loing. Il n'y a doncques rien d'absurdité ny d'estrange, si lon ne peult pas bien exactement veoir ce qui est du tout esclairé & illuminé de la Lune, & si par approchement des choses obscures & tenebreuses aupres des claires & reluyfantes pour ceste diuersité, la veüe en est plus exquisite. Mais cela, dis-ie, semble plus refuter & arguer la reflexiõ & reuerberation, que lon dit qui se fait en la Lune, parce que ceulx qui sont dedans les rayons repliez, voient non seu-

lement ce qui est enluminé, mais aussi ce qui enluminé. Car quand la lueur iallissant d'une eau contre quelque muraille, la veüe se fait au lieu qui est ainsi enluminé par reflexion, l'œil y voit trois choses, à sçavoir le rayon ou la lueur qui est rebattue, l'eau qui fait la reflexion, & le Soleil mesme, dont la lumiere venant à donner contre la superficie de l'eau est rebattue & renuoyee. Cela estant confessé, comme ce qui apparoist manifestement, on obiice à ceulx qui disent, que la terre est esclairee de la Lune par reflexion de la lumiere du Soleil en elle, qu'ils monstrent de nuict le Soleil apparent sur la superficie de la Lune, ne plus ne moins que lon le voit de iour apparoissant dedans l'eau, où il donne, quand il se fait reflexion de ses rayons. Et comme ainsi soit qu'il n'y apparoist point, ils en inferent que c'est doncques par quelque autre maniere, & non par reflexion que se fait l'illumination de la Lune: & si la reflexion ne se fait point, que la Lune n'est point doncques vne terre. Que leur fault il doncques respondre, ce dit Apollonides? Car l'argument de ceste obiection contre la reflexion est cōmun aussi bien alencontre de vous que de nous. Il est voirement commun, dis-ie, en quelque sorte, & en quelque autre aussi, non. Mais premierement regarde la comparaison, comment ils la prennent bien au rebours, & tout à l'enuers. L'eau est icy bas sur la terre, & la Lune est la-sus au ciel, de sorte que les rayons rebattus & repliez font vne forme d'angle toute opposite, l'une aiant la pointe la-sus contre la superficie de la Lune, l'autre

ça bas

A çabas. Qu'ils ne demandent doncques pas que toute face soit également visible, ny que de toute distance & esloignement, il se face pareille & semblable reflexion, parce qu'en ce faisant ils repaigneroient à l'apparence toute notoire & manifeste. Et ceulx qui tiennent que la Lune soit vn corps non lissé ny également plat & vny comme l'eau, ains pesant & terrestre, ie ne sçay comment ils nous demandent l'apparence speculaire du Soleil: Car le laiçt mesmes ne rend point de telles images speculaires, ny ne fait point de reflexions de nostre veuë, à cause de l'inegalité & aspreté rabotteuse de ses menues parties. Comment doncques seroit il possible que la Lune renuoyast arriere de sa superficie la veuë, comme la renuoyent les mirouers qui sont plus polis, & encore ceulx la fil y a quelque rature, ou quelque ordure, ou quelque ternissure en la superficie, dont la veuë repliée a accoustumé de prédre forme, on voit bien les mirouers, mais ils ne rendent point de contre-lueur. Celuy doncques qui demande que le Soleil apparaisse en la Lune, ou que nostre veuë soit rebattue & repliée au Soleil, qu'il demande quand & quand que l'œil soit le Soleil, la veuë, la lumiere, & l'hôme le ciel. Car il est vray-semblable que la reflexion des rayons du Soleil qui se fait en la Lune, pour leur veheméce & grâde splédeur reiallit avec coup vers nous: mais nostre veuë qui est debile & gresle, quelle merueille est ce, si elle ne donne point de coup qui face reiallit, ou si encore qu'elle reiallist, elle n'entretient pas maintenant sa continuité, ains

fesuanoit & vient à defaillir, n'ayant pas telle a-^D
 bondance de lumiere qu'elle ne soit disgregee &
 dissipée dedans les inegalitez & aspretez? car il n'est
 pas impossible que la reflexion de nostre veuë, qui
 se fait sur l'eau & sur les autres sortes de mirouers,
 estant encore nostre veuë forte & puissante & pro-
 chaine de son origine ne puisse reiallir contre l'œil.
 Mais de la Lune encore qu'il se puisse faire quel-
 ques gliffemens, ils seront tousiours foibles & ob-
 scurs, & qui defaudent en chemin, à cause de la
 longueur de distance: car autrement les mirouers
 creux & concaues rendent les rayons reuenans & ^E
 rebattus plus forts que les allans, de sorte que bien
 souuent mesmes ils s'allumēt & renuoyent du feu,
 & les bossus & courbez en forme de boule, d'autāt
 qu'ils ne contrepoulsent pas de tous costez, les ren-
 dent foibles & obscurs. Vous voyez certes, quand
 deux arcs en ciel apparoissent, vne nuee en com-
 prenant vne autre, que celle qui enuironne l'autre
 par le dehors, fait des couleurs obscures, & non as-
 sez distinctes & exprimees, par ce que la nuee ex-
 terieure estant plus eslongnee de nostre veuë, ne
 fait point vne roide & forte reflexion. Et quel be-^F
 soing est il d'en dire d'auantage, veu que la lumie-
 re mesme du Soleil rebattue & renuoyee par la
 Lune perd toute sa chaleur, & de sa clarté il n'en
 arriue à grand' peine iusques à nous qu'vn bien
 peu de reste, bien petit & bien foible? Est il donc-
 ques possible que nostre veuë passant la mesme
 carriere, il en arriue aucune parcelle de reste de la
 Lune au Soleil? Quant à moy, ie ne le pense pas:
 mais

A mais confiderez, dis-je, vous mesmes, que si nostre veüe estoit de mesme affectionnee & disposee enuers l'eau & enuers la Lune, il faudroit que la pleine Lune representast les images de la terre, des arbres, des plantes, des hommes, & des astres, comme fait l'eau, & tous les autres genres de mirouers. Et sil ne se fait point de reflexion de nostre veüe à nous rapporter telles images, ou pour la foiblesse d'icelle nostre veüe, ou pour la raboutteuse inegalité de la superficie de la Lune, ne demandons non plus qu'elle reiallisse au Soleil. Or auons nous

B doncques rapporté, autant qu'il ne nous est point eschappé de la memoire, tout ce qui fut là discouru : maintenant il est heure de prier Sylla, ou plustost d'exiger de luy, qu'il nous face sa narration, par ce qu'il a esté receu à ouïr tout le rapport à telle prefixe condition. Parquoy si bon vous semble, cessans de nous promener & nous asseans sur ces sieges, donnons luy vne audiéce reposee & rassise. Chascun le trouua bon ainsi. Aians d'ócques tous pris place à se seoir, Theon se prit à dire : Je desire certes, autant que nul autre de vous, ouïr ce qui se

C dira : mais deuant ie voudrois bien entendre quelque chose touchant ceulx que lon dit habiter dedans la Lune, non sil y en a quelques vns qui y habitent, mais sil est possible d'y habiter : car sil n'est pas possible qu'on y habite, aussi est il hors de raison de dire, que la Lune soit vne terre, autrement elle auroit esté créée pour neant & à nulle fin, ne portant fruiçts aucuns, & ne seruant de siege à la naissance ou nourriture d'hommes quelsconques,

pour lesquelles causes, & auxquelles fins nous tendons, que ceste-cy où nous vivons, comme dit Platon, a esté faite & créée pour estre nostre nourrice & vraye gardienne, produisant & distinguant le iour d'avec la nuict. Tu sçais que lon dit beaucoup de choses & en ieu & à bon escient, à certes & par rusee, de cela: car à ceux qui habitent au dessoubs de la Lune, on dit qu'elle leur pend dessus la teste suspendue, comme si c'estoient des Tantalus: & à l'opposite ceulx qui habitēt au dessus, qu'ils y sont attachez & liez, comme des Ixions, mais qu'ils sont tournez d'une si roide impetuosité, qu'ils ne peuvent tomber, combié qu'elle ne se meuve pas d'un seul & simple mouuement, ains de trois, qui est aussi la cause pour laquelle les poëtes l'appellent aucunes fois Triuia, se mouuant & selon la longueur, & selon la largeur, & selon la profondeur du Zodiaque, dont le premier mouuement s'appelle reuolution: le second volute, qui signifie ligne torse en rond, sans que les deux bouts s'entrentrencontrent: & le troisieme que les Mathematiciens nomment ne sçay comment inegalité, combien qu'ils voyent bien qu'elle n'en a pas vn autre qui soit si egal ne si certain en ses reuersions, que cestuy-la. Parquoy il ne se faut pas esmerueiller si quelquefois de la roideur de ce mouuement il est tombé vn Lion au Peloponese, ains plustost se fault esbahir comment nous ne voions tous les iours dix mille cheutes d'hommes, & secoullēs d'animaux, tombans les pieds contre-mont de là-sus: car ce seroit moquette de disputer de leur demeure là, s'ils n'y peuvent

A ny naistre ny confister : car veu que les *Ægyptiens* & *Troglodytes*, sur la teste desquels le Soleil est à plomb aux Solstices vn moment d'vn iour seulement, & puis s'en retourne, peu s'en fault qu'ils ne soient tous ards & bruslez, pour la siccité excessiue de l'air. Comment seroit il possible que ceulx qui habiteroient en la Lune y peussent durer douze estez par chascun an, quand le Soleil leur seroit à plomb sur la cyme de leur teste, lors que la Lune seroit en cōionction ? Quant aux vents, aux nuees, & aux pluyes, sans lesquels les fruiçts de la terre ne sçauroient ny naistre ny se conseruer, il est impossible d'en imaginer là, tant l'air y est subtil, sec & chauld, veu qu'icy bas mesmes les plus hautes montagnes ne reçoient point d'aspres yuers annuels, ains y estât l'air pur & net sans agitation quelconque pour sa legereté, il euite toute ceste concretion & espaisissement qui est icy, si d'adventure nous ne disions, que comme *Minerue* instilla à *Achilles* du Nectar & de l'*Ambrosie* quand il ne receuoit point de nourriture : aussi que la Lune qui est & qui s'appelle *Minerue*, nourrit les hommes là, en leur produisant & enuoyant tous le iours de l'*Ambrosie*, comme l'ancien *Pherecydes* dit, que les Dieux mesmes se nourrissent : car quant à celle racine Indienne que dit *Megasthenes*, que certain peuple des Indiens qui n'ont point de bouche, dont ils sont appelez *Astomes*, & ne māgent ny ne boiuet point, font brusler & fumer, & en viuēt de l'odeur du parfum : où est-ce que lon en prendroit là, veu que la Lune n'est point arrosée de pluye ?

Theon aiant dit cela : Tu as, luy dis-ie, fort dextre-
ment & gentilemēt par ceste rīsee osté tout le four-
cil, le chagrin, & l'austerité de ce propos, ce qui me
donne hardiēse de luy respondre, par ce que si ie
faulx, ie n'en attens pas de punition fort aspre ny
fort seuerē : car à la verité ceulx qui descroyent &
reiettent du tout cela, ne sont pas les plus contrai-
res à ceulx qui se le persuadent, mais ceulx qui ne
veulent pas doucement considerer ce qu'il y a
de vray-semblable apparence & de possible. En
premier lieu doncques ie dis, qu'il n'est pas neces-
saire, sil n'y a point d'hommes qui habitent en la
Lune, qu'elle ait esté faite en vain & pour neant,
à nulle fin : car nous voions que ceste terre cy mes-
me n'est pas par tout habitee, ny par tout labou-
ree, ains vne petite portion d'icelle, comme si c'e-
stoient quelques promontoires, & quelques demy
Isles sortans hors de la mer pour y faire naistre,
nourrir & viure les plātes, les arbres & le animaux,
le reste en est desert & deshabité, ou pour les gran-
des froidures, ou pour les excessiues chaleurs, & la
plus grande partie en est couuerte & submergee
au dessoubs de la grande mer Oceane. Mais pour
ce que tu aimes tousiours & estimes Aristarchus,
tu n'escoutes pas Crates quand tu lis,

L'Ocean dont les hommes & les Dieux

Sont engendrez, de son corps spacieux

La plus grand' part du rond terrestre couure.

mais pourtant il s'en fault beaucoup que cela ait
esté fait pour neant: car la mer iette & rend des va-
peurs molles, & les plus doux vents nous viennent

A au plus fort de l'esté des regions gelees & inhabitables pour le froid des neiges qui s'y fondét, & se respandent par tous noz pais, & est colloquee au milieu, comme dit Platon, certaine gardienne & maistresse ouuriere qui fait le iour & la nuict. Il n'y a doncques rien qui empesche que la Lune ne soit vuide d'animaux, & qu'elle ne baille des reflexiõs à la lumiere qui se respand tout alenuiron d'elle, & receptacle aux rayons des astres qui confluent & se meslent ensemble dedás elle, pour cuire les eua-porations esleuees de la terre, & quant & quant

B pour oster au Soleil son ardeur trop cuisante & trop enflammee. Et en deferant beaucoup aux anciens propos que nous auons eu de main en main de noz peres, nous dirons qu'elle estensee & reputeediane, vierge & sans generation, mais au demourant salutaire, & de grand secours & profit au monde: car de tout ce que nous auõs dit, amy Theon, il n'y a rien qui preuue ne qui monstre que l'habitation en la Lune soit impossible: car son tournoyement estant fort doux, tranquille & gracieux, il adoulcit & polit l'air prochain, & l'espand alentour en bonne disposition, de maniere qu'il n'y a point occasiõ de craindre, que ceux qui ont vescu là n'en tombent ny n'en glissent, si ce n'est qu'elle mesme tombe. Et quant à la diuersité & multiplicité de son mouuement, il ne procede pas d'inegalité, erreur, ou incertitude aucune, ains les Astrologues monstrent en cela vn ordre & vn cours admirable, l'enfermans dedans des cercles qui se tournent par d'autres cercles, aucuns suppo-

sans qu'elle ne bouge quant à elle, autres la faisans **D**
 mouuoir tousiours egaleme[n]t & vniemét de mes-
 me vifesse, car ce sont les ascensions de diuers cer-
 cles, les tournoyemens & habitudes des vns enuers
 les autres, & puis enuers nous, qui font fort ordon-
 neement les hauteurs, bassesses, & les depressions
 qui nous apparoissent en son mouuement, & ses
 disgressions en latitude, le tout conioinct à la reuo-
 lution ordinaire qu'elle fait en longitude. Quant
 à la grande chaleur & continuelle inflammation
 du Soleil, tu cesseras de la craindre si tu opposes
 premierement aux douze conionctions les douze **E**
 oppositions, & puis la continuation de mutation
 aux excessiues extremitez, lesquelles ne durent pas
 long temps, les reduisant à vne propre & peculiere
 temperature, & leur ostant ce qu'il y a de trop en
 toutes les deux: car il est vray semblable que ce
 qui est entre deux a vne saison fort semblable à la
 prime vere. Et puis le Soleil enuoye iusques à nous
 ses rayons par vn air gros & trouble, où il imprime
 sa chaleur nourrie par les euaporations, là ou l'air
 estant là subtil & transparent, respand & disgrege
 les rayons, n'aiants aucun entretenemét ny aucun **F**
 corps à quoy s'attacher. Quant aux arbres & aux
 fructs icy, ce sont les pluyes qui les nourrissent,
 mais ailleurs, comme en la haulte Bœoce alen-
 tour de Thebes chez vous, & aux enuironns de Syc-
 ne, ce n'est pas l'eau du ciel, mais de la terre, qui les
 nourrit, la terre la beuuant, & estant secourue de
 vents rafraichissants & de rosee, elle ne cederait
 pas en fertilité à la mieux trempee & arrosée qui
 soit

A soit au monde, tant elle est bonne & forte. Et les mesmes especes d'arbres, en nostre pais, s'ils ont esté bien hyuernez, & qu'ils aient eu vn bien aspre & long hyuer, ils produisent beaucoup de bon fruct: mais en Afrique, & chez vous en Ægypte, ils craignent fort & s'offensent du froid. Et la province de Gedrosie & de Troglodytide, prochaine de la mer Oceane, estant fort sterile pour sa seiche- resse, & sans aucuns arbres, neantmoins dedans la mer adiacente elle nourrit des arbres de haulteur & grandeur merueilleuse, & verdoye iusques au

B fond, dont ils appellent les vns Oliuiers, les autres Lauriers, les autres Cheueux d'Isis. Et ceste plan- *Ces sont plu- sieurs plan- tes qui s'ap- pellent au- trement sem- peruiues.* te qui s'appelle Anacamperotes, estant arrachée de terre, non seulement vit tant que lon veut, mais qui plus est elle iette verdure. Et entre les grains que lon seme, les vnes, comme nommee- ment le Centaurium, si on les seme en vne bonne & grasse terre, que lon les trempe & arrose, ils sortent de leur naturelle qualité, & perdent toute leur vertu, par ce qu'elles aimēt la secheresse, & en profitēt en leur propre nature: il y en a d'autres qui ne

C peuuēt pas seulement supporter les roscs, comme la plus part des plantes Arabiques qui se fenēt, se flestrissent & se meurent, si on les mouille. Quelle merueille donc est-ce, s'il croist en la Lune des raci- nes, des semences & des plantes, qui n'aient point besoing de pluyes ny des froidures d'hyuer, ains qui soient propres à vn air delié & sec, cōme celuy de l'esté: Et comment n'est il vray semblable que la Lune iette des vents tiedes, & que du branle de

son agitation ne sorte de douces haleines, & des D
subtiles rosee & humiditez legeres qui s'espandēt
par tout, pour fournir aux plantes verdoyantes, at-
tendu qu'elle est de sa temperature non ardente
ny alteree de secheresse, ains plus tost molle, moit-
te, & engendrant toute humidité? car il ne vient
d'elle à nous pas vn effect de siccité, mais d'humidi-
té & de mollesse feminine plusieurs, les croissan-
ces des plantes, putrefactions des chairs, les tour-
nemens & relaschemens des vins, les attendrissē-
mens des bois, les faciles enfantemēs des femmes.
Mais ie crains d'irriter & prouocquer Pharnaces E
qui ne dit mot, en alleguant, comme ils disent
eux, les flus & reflux de la grande mer Oceane, les
haures & destroits de mer qui s'enflent & se haul-
sent par la Lune, augmētant les humeurs. Et pour-
tant ie me tourneray plustost deuers toy, amy
Theon, car tu nous dis en interpretant ces vers
du poēte Alcman,

De Iupiter & de la Lune fille,
Dame Rosee.

qu'en ce lieu la il appelle l'air Iupiter, lequel estant
humecté par la Lune se conuertit en rosee: car elle F
est, mon bel amy, de nature presque toute contrai-
re au Soleil, non seulement en ce que tout ce qu'il
espaissit, desicche & endurecit, elle a accoustumé de
le humecter, fondre & amollir, mais qui plus est
d'humecter & refroidir sa chaleur, quand elle viēt
à donner sur elle, & se mesler à elle. Ceux donc-
ques qui estiment que la Lune soit vn corps de
feu, & bruslant, faillent; & pareillement ceux qui
veulent

A veulent que les animaux y habitans aient toutes les choses necessaires à la naissance, vie, nourriture, & entretenement qu'ont ceux de par deçà, ne considerent pas la diuersité grande & inegalité qui est en la nature, là où il se treuve des varietez & differences plus grandes entre les animaux des vns aux autres, que non pas avec les autres substances, qui ne sont pas animaux: & faudroit dire qu'il n'y eust point d'hômes au monde sans bouche, qui se nourrissent de senteurs seulement, s'il semble que les hommes ne peussent viure sans nourriture solide. Mais Hesiodé au contraire nous donne à entendre couuertement par ces vers,

Le fol ne sçait de combien sert la mauue,

Ny l'aphrodile, & que vault la guimaue.

La puissance que nous exposoit Ammonius, & que Epimenides nous monstroit mesme par effect, enseignant que la nature soustient l'animal de bien peu d'entreenemēt, & prouueu qu'il y en ait aussi gros qu'une oliue, qu'il n'a besoing d'autre nourriture. Or ceux qui habitent sur la Lune, si aucuns y en a, doiuent estre dispos & legers, & faciles à
C nourrir de tout ce que lon veult, & que la Lune mesme, comme le Soleil aussi estant vn animal de feu plusieurs fois grand comme la terre, se nourrit & entretient des humiditez qui sont dessus la terre, comme aussi font, ce disent-ils, tous les autres astres qui sont en nombre infiny, tant ils estiment que les animaux de là sus viuent legerement, & se contentent de peu de choses. Mais ny nous ne voions cela, ny ne considerons que la region, la na-

ture, la dispositiō & temperature est toute autre & D
 accommodée à eux. Tout ainsi comme si nous ne
 pouuans approcher de la mer, ny la toucher, ains
 en aiants seulement la veuë de tout loing, & en-
 tendans que l'eau en est amere, salee, & non beu-
 uable, quelqu'vn nous venoit dire qu'elle nourrit
 de grands animaux en grand nombre, & de toutes
 formes dedans son fond, & qu'elle est toute pleine
 de grandes bestes qui se seruent de l'eau, ne plus
 ne moins que nous faisons de l'air, il nous seroit
 aduis qu'il nous conteroit des fables, & des nou-
 uelles estranges, controuuees & faittes à plaisir. E
 Ainsi semble il que nous soions affectionnez &
 disposez enuers la Lune, descroians qu'il y ait au-
 cuns hommes qui habitent là, & croy que eux s'es-
 merueillent encore bien plus voians la terre qui
 est comme la lye, & la vase du monde leur appa-
 roissant atrauers des nuees & brouillas humides,
 petit lieu, bas & abiect, & immobile, sans clarté ny
 lumiere quelconque, si cela petit peut produire,
 nourrir & entretenir des animaux qui aient mou-
 uement, respiration, chaleur. Et si d'adventure ils
 auoient iamais ouy ces vers d'Homere,

Horrible lieu, villain & detestable

Aux Dieux estant soubs la terre habitable,

Autant comme est la terre loing des cieux.

ils penseroient certainement qu'ils auroient esté
 escripts de ceste terre cy, & que l'Enfer & le Tartar-
 e auroient esté reculez icy, & que la terre egale-
 ment distante des cieux & des enfers, ce seroit la
 Lune. Comme ie parlois encore, Sylla me dit : Ar-
 rests

A reste toy vn peu Lamprias, & prens garde que tu ne passés point la porte, comme lon dit en commun prouerbe, en faisant donner la fable en terre, & que tu ne troubles & confondes tout le ieu, qui pour le present a vne autre scene & vne autre disposition. Je seray doncques le ioueur, dis-ie, mais deuant que d'y entrer plus auant, ie vous diray l'auteur, fil n'y a rien qui l'empesche, commençant ainsi comme fait Homere,

Ogygie est vne Isle loing en mer,
 distante de l'Angleterre, en nauiguant deuers le
 B couchant de cinq iournees de navigation, & y en
 a encore trois autres distinctes egalemēt d'elle, &
 les vnes des autres, en tirant deuers l'Occident esti-
 ual, en l'vne desquelles les Barbares du pais feignēt
 que Saturne est detenu prisonnier par Iupiter. Et
 pour garde tant de luy que des Isles, & de toute la
 mer adiacente, qui se nomme Saturnienne, le
 Geant Ogygius ou Briareus est là colloqué, & que
 la grande terre ferme, par laquelle la grande mer
 est tout alentour circulairement bordée, est distan-
 te des autres Isles de moindre espace, & de celle
 C d'Ogygie enuiron de cinq mille stades, à y aller en
 vaisseaux à rame, par ce que la mer y est platte &
 basse, difficile à nauiguer aux grāds vaisseaux rōds,
 à cause de la vase qu'y apporte la multitude des ri-
 uieres, qui venans de la grand' terre se degorgent
 dedans, & y font de grands bancs qui atterrent la
 mer, & la rendent malaisée à nauiguer, dont on a
 eu anciennement opinion qu'elle estoit glacee. Les
 costes d'icelle terre ferme au long de la mer sont

habitees alentour d'vne grande baye qui n'est pas^D moindre que celle des maretz Meotides, dont l'emboucheure est vis à vis à droite ligne de celle de la mer Caspienne. Ils se nomment & s'estiment eux habitans de terre ferme, & nous autres insulaires, comme habitans en vne terre qui tout alentour est enuirōnee & baignee de mer. Et pésant que ceux qui iadis y furent avec Hercules & y demourerent, se meslans parmy les peuples de Saturne, remeirent sus la nation Grecque, laquelle commençoit à s'y esteindre, & à estre vaincue & supplantée de la langue, des loix, & façons de faire^E des Barbares, & la feirent de rechef florir & retourner en vigueur. Et pourtant le premier honneur y est deferé à Hercules, & le second à Saturne. Or quand l'estoile de Saturne que nous appellons Phēnon, & eux Nycturus, arriue au signe de Taurus, qui se fait en l'espace de trente ans, ils sont long temps à preparer ce qui est necessaire à vn solennel sacrifice, & au voyage d'vne longue navigation, auquel il fault que ceux à qui le sort touche aillent avec rames. Estans doncques embarquez & partis, ils demeurent long temps en pais estrange^F, où ils ont diuerses aduentures, l'vn d'vne sorte, l'autre d'vne autre, & que ceux qui se sauuent & eschappent de la marine, abordent premierement en ces Isles opposites la, qui sont habitees de peuples Grecs, là où ils voient que le Soleil ne demeure pas absconsé vne heure durant, l'espace de bien trente iours, que cela est leur nuict, dont les tenebres sont bien peu obscures, & comme le crepuscule

A scule du iour : qu'apres auoir demeuré là quatre vingt dix iours grandement carellez & honorez, comme estants tenus pour saincts , & tels appelez, apres ils sont conduits par les vents , & traicttez en l'Isle de Saturne, là où il n'y a point d'autres habitans qu'eux , & ceux qui y ont esté enuoyez deuant eux : car il leur est loisible apres treize ans qu'ils ont seruy à Saturne, de s'en retourner en leur pais & en leurs maisons , mais que la plus part aiment mieux demourer là doucement que de s'en retourner , aucuns pour ce qu'ils sy sont desia ac-

B coustumez , les autres pour ce que sans labour & sans affaires ils ont abondance de toutes choses, tant pour faire sacrifices, & pour l'entretienement de la despense ordinaire à ceux qui versent continuellement à l'estude des lettres, & de la philosophie, par ce qu'ils disent que la nature de l'Isle & la douceur de l'air enuironnant est admirable : & qu'il y en a eu quelques vns qui en auoient voulu partir, ausquels Dieu auoit resisté & empesché leur partement, se mōstrant à eux, cōme à ses familiers amis, non seulement en songes, & par signes

C exterieurs, mais aussi visiblement, se presentans à eux des esprits familiers & Demons, & deuisans avec eux: car ils disent que Saturne mesme y est, dedans vne grande cauerne d'vn rocher reluisant, cōme s'il estoit de fin or, endormy, par ce que Iupiter luy a preparé le sommeil au lieu de fers aux pieds, pour le garder de bouger : mais qu'il y a des oiseaux qui volants dessus, luy apportent de l'ambrosie, & que toute l'isle en est remplie d'vne

odeur & parfum admirable, qui s'espond comme d
vne fontaine odorante hors de ceste cauerne la
par toute l'Isle, & que ces Demons la seruent &
font la court à Saturne, aians esté les courtisans &
familiers amis, du temps qu'il tenoit l'Empire &
royauté sur les hōmes & sur les Dieux, & qu'aïans
la science de deuiner les choses futures, ils en pre-
disent beaucoup d'eux mesmes: mais les plus gran-
des, & de plus grande importance, quād ils retour-
nent de veoir Saturne ils les reuelent, par ce que
tout ce que Iupiter propense, Saturne le songe,
mais que son resueil est de toutes passions Titani-
ques, & perturbations d'esprit en luy. Le sommeil
* * doux & gracieux, & la diuine & royale nature
en iceluy toute nette, incontaminee & pure. Là
doncques aiant cest estranger esté porté, & y ser-
uāt Dieu en repos & à loisir, il acquit de l'Astrolo-
gie autant de suffisance comme il s'en peult acquer-
rir, en penetrant le plus auant qu'il est possible en
la Geometrie, & au reste de la Philosophie. Il s'ad-
donnoit aussi aucunement à la naturelle, mais luy
estant pris vne enuie & desir de veoir & visiter à
l'œil la grande Isle (car ainsi appellent ils la terre
ferme là où nous sommes) apres que les trente ans
furent passez, & ses successeurs arriuez, aiant pris
congé de tous ses parents & amis, il mōta sur mer,
equippé au demourant sobrement & legerement,
mais portant quand & soy bonne prouision d'ar-
gent en des vases d'or. Or de vous raconter parti-
culierement tout ce qui luy aduint, combien de
nations il visita, combien de pais il passa, commēt
il

A il estudia és lettres sainctes, & fait profession en toutes sainctes confrairies, & toutes religions, vn iour tout entier ne suffiroit pas à le vous reciter par le menu, ainsi comme il le nous racontoit s'en souuenant tresbien, & iusques aux moindres particularitez. Mais quant à ce qui appartient à la presente dispute, escoutez le: car il demoura bien longuement à Carthage, y estant grandement honoré & respecté, par ce qu'il trouua certaines peaux de parchemin factees, qui auoient esté transportees secrettement hors de la ville au premier sac d'icelle, & auoient esté cachees bien long temps dedans la terre. Si disoit qu'il falloit, & m'admonestoit fort de le faire, entre les Dieux apparents adorer & honorer sur tous la Lune, cōme celle qui estoit la principale guide & maistresse de nostre vie. Dequoy m'esmerueillant & le priant de me le declarer & exposer vn peu plus claiement: Les Grecs, dit-il, ô Sylla, disent beaucoup de choses touchant les Dieux: mais non pas tout bien, comme premierement de dire qu'il y a vne Ceres & vne Proserpine, ils ont raison, mais de les mettre ensemble, & toutes deux en vn mesme lieu, non: car l'vne Ceres est en terre, dame & maistresse de ce qui est sur la terre, & l'autre est en la Lune, & s'appelle par ceux qui sont habitants en la Lune, Coré ou Proserpine: Proserpine, pour ce qu'elle porte lumiere & clarté: & Coré, pour ce que nous appellons Coré la prunelle de l'œil, dedás laquelle se voit l'image de celuy qui regarde, tout ainsi comme la clarté du Soleil resplendit en la Lune. Et quant à ce que

lon dit qu'elles vont errantes & s'entrecherchent D
 l'vne l'autre, il y a aussi de la verité: car elles s'en-
 treappetent, quand elles sont separees l'vne de
 l'autre, & s'entre-ambrassent souuent en l'vmbre.
 Et que ceste Coré soit tantost au ciel & en la lu-
 miere, & tantost en tenebres & en la nuit, cela
 n'est pas faulx, mais il y a seulement erreur au nō-
 bre du temps. Car nous la voions, non pas six
 mois durant, mais de six en six mois deffoubs la
 terre, comme deffoubs sa mere prise de l'vmbre,
 & peu souuent se rencontre que cela aduienne
 dedans cinq mois, par ce qu'il est impossible E
 qu'elle abandonne Pluton estant sa femme, com-
 me Homere mesme sous paroles couuertes a
 gentilement dit,

En la campagne Elysienne au bout

Et à la fin de la terre.

Car là où finit l'vmbre de la terre, c'est cela qu'il
 appelle le bout, & la fin de la terre, là où nul mes-
 chant ne qui ait vescu impuremēt, ne sçauroit ia-
 mais paruenir. Mais les gens de biē apres leur mort
 y estants portez, y mēent vne vie aisee, non pas
 pourtant heureuse ny diuine iusques à la seconde F
 mort. Mais quelle elle est, amy Sylla, ne m'en in-
 terroge point, car moy mesme le declareray cy
 apres. Le commun estime que l'homme soit vn
 suppost composé, & ont raison de le croire ainsi,
 mais ils faillent en ce qu'ils l'estiment composé de
 deux parties seulement, par ce qu'ils estiment que
 l'entendement soit vne partie de l'ame, par ce que
 l'entendement est meilleur que l'ame, d'autant que
 l'ame

A l'ame vault mieux, & est plus diuine que le corps, & fait ceste composition de l'ame avec l'entendement la raison, & avec le corps la passion, dont l'une est le principe de la volupté & de la douleur, & l'autre de la vertu & du vice. Estants doncques ces trois parties cōioinctes ensemble, la terre en a baillé le corps, la Lune l'ame, & le Soleil l'entendement en la generation de l'hōme ** & dōne l'entendement la raison à l'ame, comme le Soleil la lumiere à la Lune. Et des morts dont nous mourons, l'une fait des trois deux, & l'autre de deux vn, & l'une

B est en la region de Ceres * luy sacrifier. Et aussi les Atheniens appelloient les trespassez, les Demetriens ou Cerealiens anciennement : & l'autre * mort en la Lune, region de Proserpine, & est domesticque, de l'une Mercure le terrestre, de l'autre le celeste. L'une desliel'ame d'avec le corps soudainement, & avec force & violence : & Proserpine doucement avec long temps, l'entendement d'avec l'ame : & c'est pour cela que lon l'appelle Monogenes, cōme qui diroit vnique, ou vnigenite. Car ce qui est de meilleur en l'homme deuiet seul quād

C il est separé par elle, & l'un & l'autre aduiet selon nature. Toute ame sans entendement & avec entendement sortant du corps, il est ordonné par fatale destinee, qu'elle vague certain tēps, non pas egal, en la region qui est mōienne entre la terre & la Lune. Car celles qui ont esté iniustes & desordonnees, y paient là les peines de leurs pechez : & les bonnes & honnestes iusques à ce qu'elles aient nettoyé, & par expiation chassé hors toutes les in-

fections qu'elles pourroient auoir contractees de **D**
la contagion du corps, cōme de l'auteur de tout
mal, & ce en la plus douce partie de l'air, que lon
appelle le verger de Pluton, là où il fault qu'elles
demeurēt vn certain temps prefix. Et puis, ne plus
ne moins que si elles retournoient d'vne peregrina-
tion vagabonde de long exil en leur país, elles
goustent de la ioye, telle que la sentent ceux qui
font profession és sainctes ceremonies meslee de
trouble & d'esbahissement chascun avec sa propre
esperance. Car il en poulse & chasse plusieurs, les-
quelles appetent desia la Lune. Quelques vnes **E**
prennent plaisir à estre au bas, & regardent encore
derechef cōme au fond, mais celles qui sont mon-
tees amont, y sont seurement colloquees. Premie-
rement cōme victorieuses elles sont couronnees
de couronnes que lon appelle la cōstance des çles,
pour autant qu'en leur vie elles ont refrené la par-
tie desraisonnable & passible de l'ame, & l'ont ren-
due subiecte & obeissante au frein de la raison. Se-
condement elles ressemblēt à veoir à vn rayon de
Soleil. Tiercement l'ame qui est la-sus esleuee, y est
affermie & fortifiee par l'air qui est à l'enuiron de **F**
la Lune, & y prent force & roideur, ne plus ne
moins que les ferremens de la trempe. Car ce qui
est encore rare & laxé, se referre & affermit, & de-
vient luyfant & transparent, de maniere qu'il se
nourrit de la moindre euaporation du monde. Et
c'est ce que Heraclitus a voulu dire, quand il dit,
que les ames en la region de Pluton odorent. Et là
premieremēt elles voyent la grandeur de la Lune,
& sa

A & sa beauté, & sa nature, qui n'est simple ny sans mixtion, ains estant comme vne composition faite d'astre & de terre. Car comme la terre meslee de vent & de liqueur deuiet molle, & le sang meslé parmy la chair, luy donne sentiment, aussi disent ils que la Lune meslee avec la quinte essence celeste, iusques au fond, en deuiet animee, & feconde, & generatiue, & quant & quant egaleement contre-pesce de pesanteur & de legereté. Car le mode mesme estant ainsi composé des choses qui vont naturellement contre-bas & contre-mont,

B est du tout exempt de mouuement local de lieu à autre, ce qu'il semble que Xenocrates mesme par vne diuine imaginatiō ait entendu, en aiant pris le commencement de Platon. Car c'est Platon qui le premier a affermé que chascun astre est composé de feu & de terre, par les natures moiennes donnees en certaine proportion, d'autant que rien ne peult venir ny cheoir au sentiment de l'homme, qui n'ait quelque portion meslee de terre & de lumiere: & Xenocrates dit, que le Soleil est composé du feu & du premier solide, & la Lune du second solide, & de son propre air: & la terre de l'eau, & du feu, & du tiers solide: & que du tout ny le solide seul à par soy, ny le rare n'est capable ny susceptible d'ame. Voyla quant à la substance de la Lune: & quant à la largeur & grandeur, elle n'est pas telle, cōme les Geometres la disent, mais beaucoup de fois plus grande, & mesure peu souuent l'vmbre de la terre de sa grandeur, non pource qu'elle soit petite, mais pource qu'elle y adiouste

vn treschaud mouuement, à fin que bien tost elle **D** passe l'endroit tenebreux, en emportant les ames des bienheureux qui se hastét & crient, par ce que tant cōme elles sont dedans l'vmbre, elles ne peuvent plus ouir l'armonie des corps celestes, & quāt & quant au deffoubs les ames des damnez qui sont punies, se lamentent & crient diuersement à trauers ceste vmbre. C'est pourquoy en l'eclipse plusieurs ont accoustumé de mener du bruit, & de faire sonner & bruire des poëles & chaudières de cuiure alentour de ces ames. Encore les effroye ce que lon appelle la face de la Lune, quand elles en **E** approchent, pource qu'elle leur semble chose espouventable à veoir, ce qu'elle n'est pas. Mais ainsi comme la terre, sur laquelle nous sommes, a plusieurs grands & profonds golphes, l'vn, celuy de la mer Mediterranee, qui se respand entre les deux coulottes d'Hercules au dedans de la terre vers nous, & d'autres au dehors, cōme la mer Caspienne, & celuy de la mer rouge, aussi sont-ce des fondrières & profondes valles de la Lune, & appelle lon le plus grand des trois, le gouffre de Hecaté, là où les ames souffrent & font souffrir les peines des **F** maux qu'elles ont faitts ou soufferts depuis qu'elles ont esté nees: les deux autres petits, les passages par où il fault que les ames passent, & appelle lon ce qui en regarde vers le Soleil, le champ Elysien, & ce qui regarde vers la terre, le chāp de Proserpine. Si ne demourent pas tousiours les Demōs deffus icelle, ains descendent quelquefois icy bas pour auoir le soing & superintendance des oracles,

A oracles, & assistent & concelebrent les plus hautes ceremonies, aians l'œil sur les meffaiçts, & les punissans, & preseruans aussi le bon tant és perils de la guerre que de la mer. Et si en cela ils commettent eulx mesmes quelques fautes, ou par cholere, ou par enuie, ou par iniuste grace & faueur, ils en payent & portent la peine. Car ils sont reiettez contre terre, & attachez à des corps humains. Mais du nombre de ces meilleurs la estoient ceulx qui seruoient & accompagnoient Saturne, ainsi comme eulx mesmes disoient, & deuant encore ceulx

B qui iadis en Cádiz s'appelloient les Dactyles Idees, & en la Phrygie les Corybantes, & ceux de la Bœoce en la ville de Lebadie, que lon nomme les Trophoniades, & infinis autres en diuers lieux de la terre habitable, dont les noms, les temples, & les honneurs durent & demeurent encores iusques au iourd'huy, mais les puiffances d'aucuns defail-
lent, estants transferez par vn tresheureux changement en autre lieu. Ce qui aduient aux vns plus tost, aux autres plus tard, quand l'entendement vient à estre separé de l'ame, laquelle se fait par l'a-

Cmour, & le desir de iouir de l'image du Soleil, en laquelle & par laquelle respandit la beauté diuine desirable & heureuse, que toute nature appéte diuersement & desire, l'vne en vne sorte, & l'autre en vne autre. Car la Lune mesme tourne continuellement, pour le desir qu'elle a de se conioindre à luy, comme la source de toute fertilité. Si demeure la nature de l'ame en la Lune, retenant quelques vestiges, & quelques songes de la vie: au moien de-

quoy estime que cela ait esté tresbien dit, D

L'ame s'en est, comme vn songe, enuolee.

Ce qu'elle ne fait pas incontinent qu'elle est separee d'auec le corps, ains apres quand elle se treuve seule & segregee de l'entendement. Et de tout ce que iamais dit Homere, il n'y a point vn passage plus diuin, ne plus diuinement dit, que celuy la, où il dit de ceulx qui sont aux enfers,

Après ie vey d'Hercules la semblance,

Car au ciel est sa veritable essence,

Parmy les Dieux:

par ce que chascun de nous n'est point ny le courage, ny la crainte, ny la cupidité, non plus que ny la chair, ny les humeurs, ains est la partie d'ot nous discourons & entendons: mais l'ame estant moulee & formee de l'entendement, & moulant & formant le corps en l'embrassant de tous costez, elle en reçoit vne impression & forme, tellemēt qu'encore qu'elle soit separee & de l'entendement & du corps, neantmoins elle retient encore la figure & la semblance bien long temps, de sorte qu'à bon droit on l'en appelle l'image. Et de ces ames la, cōme i'ay desia dit, la Lune est l'element, par ce que E
les ames se resoluēt en icelle, ne plus ne moins que les corps des trespassez se resoluent en la terre: & celles qui ont esté vertueuses & honnestes, aians aimé le repos de l'estude, sans s'embrouiller d'affaires, se resoluent & esuanouissent promptement, parce qu'estans laissees de l'entendement, & n'v-sans plus des passions corporelles, elles se resoluent & esuanouissent incontinent: mais celles des ambi- F
tieux,

A tieux, & de ceulx qui se font meslez d'affaires, des amoureux, qui ont aimé les corps, & des courageux, se ramenās la memoire des choses qu'ils ont faittes en leur viuāt, ne plus ne moins que des songes en dormant, se promēnent vagantes çà & là, comme celle d'Endymion: & pource que leur inconstance, & l'estre trop subiettes aux passions, les transporte & les retire hors de la Lune à vne autre generation, ne les laissant point reposer, ains les deceuāt & abusant. Car il n'y a plus rien de petit, ny de rassis, ny de constant & accordant, depuis
B qu'estans delaissees de l'entendement, elles viennent à estre saisies des passions corporelles, ains & de telles ames viennent & naissent puis apres des Titiens & des Typhons tels, comme celuy qui iadis par force & violēce saisit la ville de Delphes, & renuersa sans dessus dessous le sanctuaire de l'oracle, ames destituees de toute raison, & qui se laissent aller à la superbe violence de toutes les passios: toutefois encore, apres long traict de temps, la Lune reçoit ces ames la, & les raccoustre: & le Soleil inspirant derechef & semāt à leur faculté vitale de
C l'entédemēt, en fait de toutes nouvelles ames: & la terre, pour le tiers, leur baillāt de nouveaux corps, car elle ne donne rien apres la mort de ce qu'elle prend à la naissance: & le Soleil ne prend rien, mais il repret & reçoit l'entendement qu'il a donné. Mais la Lune donne & reçoit, conioinct & desioinct, vnit & separe, selon diuerses facultez & puissances, dont l'vne se nomme Ilythia, celle qui conioinct: & Diane, celle qui diuise & déioinct:

& des trois Deesses fatales ou Parques, celle qui s'appelle Atropos est colloquee dedans le Soleil, qui donne le principe de la naissance: & Clotho logee en la Lune, est celle qui ioinct, mesle & vnit. Et la derniere Lachesis, est en la terre, qui y met aussi la main, avec laquelle la fortune a bien grande part Car ce qui est sans ame est imbecille de foy, & né à souffrir de toute autre chose. Mais l'entendement est souuerain sur tout le reste, & n'y a rien qui le puisse faire souffrir. Et l'ame est moyenne & meslee des deux, comme la Lune a esté faite & créée de Dieu vne composition & mixtion des choses hautes & basses, aiant la mesme proportion enuers le Soleil que la terre a enuers elle. Voyla, ce dit Sylla, ce que i'entendy de ce mien hoste passant estranger, ce qu'il disoit auoir entendu des Dæmons, qui seruoient & ministroient à Saturne. Et vous, ô Lamprias, le pouuez prendre en telle part que bon vous semble.

POVRQVOY LA PROPHE-

TISSE PYTHIE NE REND PLUS

LES ORACLES EN VERS.

BASIOCLE S.



Vous auez tant faict à promener par tout cest estranger, pour luy monstrier les statues & ouurages publicques, Philinus, qu'il est soit bien tard, & que ie suis las de vous attendre. PHILINVS. Aussi marchions nous

tout

A tout bellement, Basilocles, en semant des propos, & les moissonnant aussi tost avec combat, pource qu'ils estoient cachez en embusche, & guerriers nous germans & leuans par le chemin, comme feirent anciennement les hommes semez de Cadmus. Enuoyérons nous doncques querir quelqu'un de ceulx qui y ont assisté pour les nous raconter, ou si toymesmes, en faueur de nous, prendras la peine de ce faire? Il fault que ce soit moy qui le face, Basilocles, car il seroit bien malaisé que tu en peusses recouurer d'autres par la ville, d'autant que i'en ay veu la plus part qui sont derechef montez avec cest estranger au Corycium & à la Lycourie. Comment cest estranger est il si fort curieux de voir, & de si douce & amiable compagnie? mais il est encore plus studieux & desireux d'apprendre, docte & sçauant, & encore n'est-ce point ce qui est plus digne d'admirer en luy, ains est vne douceur grande accompagnée d'une singulierement bõne grace. La viuacité aigüe de son entendement luy suggeroit matiere de contredire, & de mettre en auant des doubtes, mais c'estoit sans estre fascheux en ses propositions, ny rude en ses responses, de maniere que pour peu que lon hante & cõuerse avec luy, on est cõtrainct de dire,

Oncques mauuais pere ne t'engendra.

Car tu cognois bien Diogenianus l'un des plus hommes de bien qui soit au monde. Je ne le cognois point, Philinus, quant à moy, mais ie voy beaucoup de gens qui en disent autant de ce ieune homme. Mais quel commencement & quelle oc-

cation eurent voz propos? Ceulx qui estoient ver- **D**
 fez & exercitez en la lecture des histoires recitoiēt
 & lisoient de bout à autre toutes les compositions,
 sans se soucier de ce que nous les prions d'abreger
 leurs côtes, & la plus part des inscriptions. Et quāt
 à l'estranger, il prenoit assez de plaisir à voir & con-
 siderer tant de belles statues, en si grand nombre,
 & si artificiellement elabourees : mais il admiroit
 la fleur de la bronze, comme ne ressemblant point
 à vne crasse ny à vne rouille, mais à vne teinture
 d'azur reluyfant & brillant, de sorte qu'il demoura
 comme tout estonné & rauy quand il veit les sta- **E**
 tues des Capitaines de marine. Car il commençea
 là à faire sa visitation, comme naïuement bien re-
 presentans la marine en leur couleur, & vn gouffre
 d'eau. Les anciens ouuriers, dit-il, vsoient ils point
 de quelque mixtion, & de quelque composition
 expresse, pour donner ceste teinture à leurs ouura-
 ges? Car quant au cuyure de Corinthe, qui est tant
 renommé, on tient que ce fut par vn accident &
 cas d'aduēture qu'il prit ceste belle couleur, & non
 par artifice, aiant le feu embrasé vne maison, où il
 y auoit quelque peu d'or & d'argent, & grande **F**
 quantité de bronze serree, lesquels metaux estants
 dissoults & fondus ensemble, le nom de la masse en
 demoura à la bronze, pource qu'il y en auoit plus
 grande quātité que des deux autres. Adonc Theon
 prenant la parole : Nous en auons, dit-il, entendu
 vn autre propos qui est bien plus ruzé : c'est qu'en
 la ville de Corinthe vn fondeur aiant trouué vne
 cachette où il y auoit beaucoup d'or, & craignant
 d'en

A d'en estre descouuert, il en prenoit peu à peu, & le mesloit tout bellement parmy son cuyure, qui en prenoit vne merueilleusement belle mixtion & temperature, & en vendoit ses ouurages bien chèrement, à cause qu'on les aimoit & estimoit pour la beauté de la couleur, mais & l'vn & l'autre est faulx. Car c'estoit certainement vne mixtion & vne preparation faite par art, cōme encore maintenant ils meslent de l'or avec de l'argent, & en font vne certaine iaunisse passe, qu'ils treuuent exquisé, mais à moy elle me semble vne couleur de malade, & vne deprauation sans beauté quelconque. Quelle autre cause doncques, dit Diogenianus, estimes tu qu'il y ait, pour laquelle le cuyure prenne icy ceste couleur? Theon respond, Attendu que des premiers & plus naturels corps qui sont ou qui seront du feu, de l'air, de l'eau, & de la terre, il n'y en a pas vn qui approche du cuyure ne qui y touche, que l'air tout seul, il est bien force que ce soit l'air qui le face, & que à cause de luy il ait la differēce qu'il a d'avec les autres, veu mesmement qu'ils ne bougent iamais d'ensemble, & qu'ils s'entretouchēt tousiours. Ou bien cela est chose toute notoire, voire deuāt mesme que Theognis fust né, comme dit le poëte Comicque. Mais veux tu scauoir pour quelle proprieté, & par quelle puissance l'air colora ainsi le cuyure en le touchant? Diogenianus aiant respōdu, que ouy: Aussi fais ie bien moy, mon fils, ce dit Theon: cherchons la doncques ensemble, & deuant encore, pour quelle occasion l'huyle le remplit de rouille, plus que ne

fait tout autre humeur ne liqueur. Car il ne se peut dire que ce soit l'huyle mesme qui luy attache la rouille, attédu qu'elle est pure & nette, sans ordure quelconque, quand elle en approche. Non certes, dit le ieune homme, & fault qu'il y ait quelque autre cause que l'huyle : car la rouille venant à trouver l'huyle qui est subtile, pure & transparente, elle apparoiſt fort clairement, là où és autres liqueurs, elle se cache & ne se monstre point. C'est bien dit, mon fils, & veritablement. Mais si tu veux confiderer vn peu la raison qu'Aristote en allegue, & ie te la veux dire. Il dit doncques que la rouille suruenant penetre insensiblement, & se dispart à trauers les autres liqueurs, qui sont de parties inegales & de rare substance, mais que pour la solidité serree de l'huyle, elle la contient & demeure ensemble. Si doncques nous pouuons presupposer quelque chose de semblable, nous n'aurons pas faute de moien de charmer & endormir vn peu ceste doute. Comme donc nous eussions cōfessé qu'il disoit vray, & prié de poursuiure, il dit, que l'air de la ville de Delphes estant gros, espais, fort & vehement, à cause de la reflexion & contrepoulsment des montagnes d'alenviron, & d'auantage mordant & incisant, comme tesmoigne ce qu'il fait incontinent digerer la viande : penetrant doncques l'air, à cause de sa tenuité & subtilité, & couppant le cuyure, il en fait sortir force rouille & force terrestreité, laquelle il arreste puis apres & reprime, par ce que l'espeſſeur de l'air ne luy donne, & ne permet point d'yssue : ainsi ceste rouille s'arrestant

pour

A pour sa quantité iette ceste fleur de couleur, & prent lueur & splendeur en sa superficie. Nous approuuâmes ceste deduction de raison : mais l'estranger dit, que l'une des suppositions seule estoit suffisante pour ceste raison: car la tenuité ou subtilité semble estre vn peu contraire à l'espeſſeur que lon suppose de l'air. Et si n'est point necessaire de la supposer, car le cuyure vieillissant de luy mesme exhale & met dehors ceste rouille, laquelle l'espeſſeur de l'air arrestant, & la figeant, rend euidente pour sa quantité. Theon adonc replicquant: Et qui

B empesche, dit-il, qu'une mesme chose ne puisse estre subtile & espeſſe tout ensemble, cōme sont les tyſſus de soye ou de fin lin, desquels Homere dit,

Par le dessus de son voile volant

L'huyle liquide alloit à bas coulant?

donnant à entendre par cela la subtilité deliée de la tyſſure, de sorte qu'elle ne souffroit pas que l'huyle passast à trauers, ains couloit & glissoit par dessus, tant elle estoit frappee & serree, qu'elle ne la transmettoit point. Et si pourroit on se seruir de la subtilité de l'air, non seulement pour labourer le cuyure, & en faire sortir la rouille, mais aussi

C à ce qu'il rend la couleur plus plaisante & plus azuree, en meslant la lueur & splendeur parmy le bleu. Apres cela s'estant fait vn peu de pause, les guides historiens de recherche nous alleguerent les paroles d'un ancien oracle en vers qui parloit, ce me semble, de la Royauté du Roy Ægon d'Argos. Si dit Diogenianus que plusieurs fois luy estoit venu en l'entendement, de s'esmerveiller de la basseſſe

& mauuaise façon des vers des anciens oracles, **D** combien que le Dieu Apollo soit appellé le conducteur des Muses, comme celuy auquel n'appartient pas moins la beauté de l'elegance de la composition, que la bonté de la voix, & le plaisir du chant, & qu'il surpassoit de beaucoup & Homere & Hesiodé en la science de faire de beaux & bons vers, & toutefois nous voions plusieurs oracles pleins de fautes & d'erreurs, & quant aux mesures, & quant aux paroles. Et lors le poëte Serapion, qui venoit d'Athenes, se trouuant là : Comment, dit-il, estimez vous d'oc, que ces vers la soient de la composition d'Apollo ? Laissons de dire, comme vous confessez vous mesmes, qu'il s'en fault beaucoup qu'ils n'approchent de la beauté & bonté de ceulx d'Homere & d'Hesiodé : Nous ne nous seruirons pas de ceulx la, comme pour exemple des mieulx & plus elegamment faits : mais corrigeons nostre iugement preuenü & preoccupé d'vne mauuaise accoustumance. Prenant adonc la parole Boëthus le geometrien, car tu cognois le personnage qui s'est rengé à la secte d'Epicurus : As tu point, dit-il, ouy faire le conte de Pauson le peintre ? Non **F** pas moy, dit Serapion. Si est il digne d'estre ouy, dit Boëthus. Il auoit marchandé de peindre vn cheual se veautrant sur l'eschine, & il le peignit courant : dequoy se courrouceant le personnage qui luy auoit donné à peindre, Pauson ne s'en feit que rire, & renuersa le tableau : ainsi estant le dessus dessous, le cheual ne sembla plus courir, ains se veautrer. Le mesme, dit il, aduiét à certains propos

pos quand on les renuerse, & pourtant y en a il qui vous diront, que les Oracles ne sont pas beaux & bons, pource qu'ils sont de Dieu: mais au contraire les autres diront, qu'ils ne seront pas de Dieu, par ce qu'ils seront mauuais. Car cela est douteux & incertain, mais cecy est tout euident & manifeste, que les vers des Oracles ne sont pas bien elabourez: dequoy il ne fault point de meilleur iuge que toy, car tu composes & escriis des poëmes, qui quant à la matiere & au subiet sont escrits philosophiquement & austerement, mais qui quant à la suffisance, à la grace, & à la compositiõ, & structure de la diction, ressemblent plus tost aux vers d'Homere & d'Hesiodé, que non pas aux vers des oracles. Nous sommes malades, dit-il, Boëthus, & des oreilles & des yeulx, estants accoustumez, tant nous sommes delicats & mols, d'estimer & appeler plus beau ce qui est plus doux: & à l'adventure nous plaindrons nous de la prestresse Pythie, de ce qu'elle ne châte plus doucement que la menestriere Glauca, & de ce qu'elle ne se parfume point d'huyles odorantes, qu'elle ne se vest point de robes de pourpre: & quelques vns, pour ce qu'elle ne fait point de parfum de cynamome, ou de ladanum, ou d'encens, ains de laurier, ou de farine d'orge. Ne vois tu pas, dira quelqu'un, combien de grace ont les vers de Sappho, & comment ils delectent & destrempët de ioye les cœurs des escoutans? Là où la Sibylle avec sa bouche forcenee, comme dit Heraclitus, sonnans des paroles qui ne prouocquent point à rire, qui ne sont point

fardees, qui ne sont point parfumees, ataint de sa
 voix iusques à mille ans, à cause du Dieu qui parle
 par elle. Et Pindare dit, que Cadmus ouit de Dieu
 vne musique haultaine & droite, non douce, non
 molle ny delicate, non rompue de passages : car la
 nature qui est impassible, chaste & saincte, ne re-
 çoit ny n'admet point la volupté, ains a esté icy bas
 iettee avec le chant. Et la plus part d'icelle en est
 coulee aux aureilles des hommes. Serapion aiant
 dit cela, Theon se prenant à rire : Serapion, dit-il,
 a suiuy la façon de faire de ses mœurs, s'estant offert
 occasiõ de parler de la volupté, il en a voulu iouir
 en passant. Mais pourtant Boëthus, encore que
 ces vers des oracles soient pires que ceulx d'Ho-
 mere, nous n'estimons pas que ce soit Apollo qui
 les ait faits, ains seulemēt qu'il a donné le principe
 du mouuement selon que chascune des prophetif-
 ses est disposee à receuoir son inspiration : car sil
 falloit escrire & non pas prononcer les Oracles, ie
 pense que nous ne les reprédrons & blasmerions
 pas, disans que ce ne seroit pas escripture d'Apollo
 s'ils estoient moins elegamment escripts que ne
 sont ordinairement les lettres des Roys : car la pa-
 role, ny la voix, ny la diction, ny la mesure, ne sont
 pas du Dieu, ains sont de la femme : luy, donne
 seulement les imaginations, & allume en l'ame la
 lumiere pour esclairer l'aduenir, ce qui est & s'ap-
 pelle Enthousiasme. Mais en somme il n'y a moié
 d'eschapper de voz mains entre vous autres pro-
 phetes d'Epicurus (car on voit bien manifestemēt
 que tu te laisses aller, aussi bien que les autres, en
 ceste

A ceste secte-la) d'autant que vous reprenez & blasmez les anciennes prophetisses, de ce qu'elles faisoient de mauuais vers, & maintenant les modernes de ce qu'elles prononcent en prose, & en termes vulgaires les oracles, de peur qu'elles ne soient chapitrees de vous, si d'adventure elles en faisoient qui fussent sans teste, sans reins, & sans queuë. Et lors Diogenianus, le te prie, au nom des Dieux, dit il, ne te iouë point, mais dissouls nous ceste questiõ & doute qui est commune: car il n'y a personne qui ne demande & ne recherche la cause & raison, **B** pour laquelle l'oracle a cessé d'vser de vers & d'oraisons. Theon luy respondant: Mais maintenant, dit-il, mon fils, nous ferions tort & honte à noz guides historiens, ostant ce qui est leur propre office, & pourtant laisse leur faire premierement, & puis tu enquerras tout à loisir de ce que tu voudras. Or estions nous desia alendroit de la statue du Tyran Hieron, & l'estranger, combien qu'il sceust bien tout au reste, si estoit il si debonnaire & de bonne nature, qu'il escoutoit tout patiemment ce qu'on luy racontoit. Mais entendant qu'il y auoit eu vne **e** colonne dudit Hieron, de bronze, laquelle estoit tombee d'elle mesme, le propre iour que Hieron trespassa à Syracuse en la Sicile, il s'en esmerueilla: & sur l'heure ie luy en ramenay en memoire d'autres semblables exemples, comme est celuy de Hieron le Spartain, que deuant le iour qu'il mourut en la bataille de Leuctres, les yeulx de sa statue tomberent, & les deux estoles que Lyfander auoit offertes & dedices apres la bataille nauale du fleu-

ue de la chéure, & sa statue mesme de pierre ietta soudain tant de broffaille & d'herbe en si grande quantité, que la face en fut toute couuerte & offusquée. Et du temps des malheurs & calamitez que les Atheniens receurent en la Sicile, les dattes d'or du palmier tomberent, & les corbeaux vindrent marteller tout alentour à coups de bec, l'escu de l'image de Pallas : & la couronne des Gnidians, que Philomelus le Tyran des Phociens auoit donné à la baladine Pharsalia, fut cause de sa mort : car estât passée de la Grece en Italie, vn iour comme elle iouoit & dansoit au temple d'Apollo, en la ville de Metapont, aiant ceste couronne sur la teste, les ieunes gens de la ville se ruans sur elle pour auoir l'or de ceste couronne, & combattans les vns contre les autres à qui l'auroit, deschirerent en pieces la baladine. Aristote souloit dire, qu'Homere estoit celuy seul qui faisoit des noms & des termes qui auoient mouuements, pour la viuacité de leur expression: mais quant à moy ie dis, que les offrandes que lon a faittes en ceste ville de statues & autres ioyaux, se meuent aussi à predire & presignifier les choses à aduenir avec la diuine prouidence, & qu'il n'y en a pas vne partie qui soit vuide de sentiment, ains que tout y est plein de diuinité. Et Boëthus : Sans point de faulte, dit-il, il ne nous suffit pas d'enfermer Dieu vne fois le mois dedans vn corps mortel, mais encore le voudrions nous mesler parmy toute pierre & toute bronze, comme si la fortune & le cas fortuit n'estoient pas assez suffisans ouuriers de tels accidents, & tels euenemets,

A Comment, dis-je, te semble il doncques que ces choses la aduiennent fortuitement, & par cas d'adventure, & qu'il soit vray-semblable que voz Atomes glissent, s'esbranlent, ou gauchissent, non au parauant ny apres, mais seulement au point iustement, que chascun de ceulx qui ont fait ces offrandes, deuoit auoir quelque chose de pis ou de meilleur? Et Epicurus à ce que ie voy, te sert & profite maintenant des choses qu'il a dittes ou escriptes il y a trois cents ans: & Dieu, s'il ne se va emprisonner dedans toutes choses particulierement, & ne

B s'y va emmurer, à ton aduis, ne pourra donner à chose qui soit, principe de mouuement, ny cause de passion, ou euenement quelconque? Voila la response que ie feis lors à Boëthus: & autant luy en respondis-je touchant les vers de la Sibylle: car quand nous fusmes alendroit de la roche, qui est ioignant le Palais du Senat, sur lequel on tient que faisoit la premiere Sibylle, venant de la ville de Helicon, où elle auoit esté nourrie par les Muses, combien que les autres disent qu'elle arriua à Mallea, estât fille de Lamia, fille de Neptune. Serapion

C fait mention des vers, par lesquels elle mesme se louë, disant qu'elle ne cessera iamais de predire & prophetiser l'aduenir, non pas mesme apres qu'elle sera morte, par ce que quant à son ame elle sera lors ce que lon appelle la face de la Lune qui nous apparroist, & son vent & haleine se meslant avec l'air, ira çà & là, prognostiquât par voix & paroles que lon entendra en l'air, & de son corps qui sera trāsmué & cōuertý en terre, il en naistra des herbes,

& des plantes & boccages, que mangeront & pa-
 stureront les sacrees victimes, qui auront toutes
 fortes de formes, & diuerses qualitez en leurs en-
 trailles, par lesquelles les hommes predirōt & pre-
 cognoistront ce qui leur deura aduenir. Dequoy
 Boëthus se mocquoit encore plus euidentement.
 Et comme Zous dist, que combien que ces choses
 ressemblassent à des fables, si est-ce que plusieurs
 subuersions, plusieurs transmigrations de villes
 Grecques, plusieurs venues d'armees Barbares-
 ques, & destructions de Royaumes & principau-
 tez, portent tesmoignage aux propheties & predi-
 ctions antiques. Et ces recents & modernes acci-
 dents qui sont n'agueres en nos temps aduenus à
 Cumes & à Possol, n'estoient ils pas promis, chan-
 tez & prophetisez par les liures Sibyllins, que le
 temps a depuis comme debteur acquitez & payez?
 Les eruptions de feu d'vne môtagne, les bouillon-
 nemens de la Marine, les eruptions & iettemés de
 pierres ponces, & de cédre, par vents soubterrains,
 ruines & deuaftations de tant & de si grandes vil-
 les, que le lendemain ceux qui y venoient ne reco-
 gnoissoient plus où elles auoient esté situees & ba-
 sties, tant le pais estoit ruiné & confus. Il est bien
 malaisé de croire que cela ait iamais esté sans en-
 tremise d'œuure diuine, tāt s'en faut qu'on l'ait peu
 preuoir ny predire sans diuinité. Et Boëthus adōc,
 Et quel accident, dit-il, sçauroit on imaginer, beau
 sire, que le temps ne doie à la nature, & quelle
 chose pourroit estre si estrange, si prodigieuse, & si
 inopinee, tant en la mer qu'en la terre, ou touchant
 les

A les villes entieres, ou les hommes particuliers, que si quelqu'un le predit, par traict de temps, il ne luy vienne faict? combien que cela, à proprement parler, ne soit pas predire, ains dire simplement, ou plustost le ietter & le semer en l'air, à l'adventure, en l'infiny, des paroles qui n'ont point d'origine ny de fondement, ausquelles vagantes ainsi en l'infiny quelquefois la fortune se rencôtre & s'assemble par accident. Car il y a bien difference, à mon aduis, entre aduenir ce qui a esté dit, & estre dit ce qui aduiendra: car la parole qui dit ce qui n'est pas, **B** aiant desia en soy le vice & la faulte, n'attend pas iustement la foy & approbation de l'accident fortuit, ny n'vse pas de signe concludant pour prouuer qu'il sçait de certaine science predire qu'il soit aduenu apres qu'il l'a dit, attendu que l'infinité des accidents est capable de produire toutes choses: mais celuy qui coniecture bien, que le commun prouerbe dit, estre le meilleur deuin,

Celuy duquel la coniecture en vain

Reüsit moins, est le meilleur deuin,

il semble qu'il suit à la trace, & qu'il chasse par les **C** voyes le futur: là où ces Sibylles icy & ses Bacchantes ont ietté & semé à vau le temps, ne plus ne moins qu'en vne vaste & vague mer, sans iugemét ne coniecture quelconque, à l'adventure des mots & paroles de toutes sortes d'accidents, de passions & d'euénemens, lesquelles sont tousiours faulses, encore qu'il en aduiène quelque vne par cas d'adventure maintenant qu'elles se disent, côme elles seront peult estre veritables quand elles seront

fortuitement aduenues. Boëthus aiant ainsi discouru, Serapion luy repliqua : Boëthus dit vne iuste sentence, touchant des propositions qui sont dittes ainsi indetermineement sans certain subiect, Si la victoire est predicte à vn Capitaine, il a vaincu: Si la destruction d'vne ville, elle est perdue. Mais là où lon dit non seulement ce qui aduendra, mais aussi comment, & quand, & apres quoy, & avec qui, cela n'est point vne coniecture de ce qui à l'adventure fera, ains vne presignification & declaration de ce qui resoluëment sera: comme, pour exemple, le clochement d'Agefilaiis, E

Garde toy bien, ô nation Spartaine,
 Bien que tu sois magnanime & haultaine,
 Que royauté boitteuse ne se germe
 En toy, qui as l'alleure droite & ferme.

Et puis l'oracle qui fut donné de l'Isle que produisit la mer, là où est au iour d'huy Thera & Therasia, & de la guerre d'entre Philippus & les Romains,

Quand au combat les yffus des Troyens
 Auront deffait ceux des Phœniciens,
 Il se verra des effects incroyables, F
 Car de la mer les flots espouventables
 Ietteront feux & flammes à foison:
 Le ciel fendra des poissons la maison,
 D'estourbillons, de foudres, & tonnerres
 Meslez parmy de cailloux & de pierres,
 Et à l'endroit sortira de la mer
 Vne nouvelle Isle, que nul nommer
 N'aura iamais ouy: lors les debiles,

A En efforceant leurs bras & mains habiles,
Vaincront celuy qui sera plus puissant.

Car que les Romains en peu de temps aient subiugué les Carthaginois, apres auoir deffait Hannibal, que les Ætoliens avec le secours des Romains aient gaigné la bataille contre le Roy de Macedoine Philippus, & que finablement il soit sorty vne Isle du fond de la mer, avec grâde quantité de feu, & grand orage & tourmente, on ne sçauroit dire que cela soit aduenu & arriué casuellement & par cas fortuit, ains l'ordre môstre vne prescience.

B Et d'auoir predict aux Romains cinq cens ans au parauant le tēps auquel ils deuoient auoir la guerre cōtre toutes nations ensemble, qui fut quand ils eurent la guerre contre les esclaués qui s'estoient reuoltez: car en tout cela il n'y a rien de cōiecture, ny d'incertaine temerité: & de l'aller chercher en la fortune, c'est mettre les choses en l'insiny, là où il y a plusieurs pleiges qui nous donnent assurance du finy & déterminé, & qui nous montrent par où passe la fatale destinee: car ie n'estime pas qu'il y ait personne qui puisse dire, qu'ayant esté predict avec tant de circonstances, ce soit esté par fortune.

C Car qui pourroit empescher que lon ne peust dire aussi qu'Epicurus ne vous auroit pas escript son liure des opinions & doctrines principales, ains que les lettres se seroient ainsi trouuees & rencontres ensemble par fortune & casuellement, qui auroient ainsi composé le liure? En tenant ces propos nous allions tousiours en auant. Et comme en la salle des Corinthiens nous regardions le

Palmier de bronze , qui seul de tous les ioyaux offerts y est demouré , Diogenianus s'esmerueilla d'y veoir des grenouilles & des couleures tournees & labourees alentour de la racine , & aussi feismes nous, par ce que le palmier n'est point vn arbre palustre, ne qui aime les eaux, comme sont beaucoup d'autres plantes: ny les grenouilles n'appartiennēt & ne touchent de rien aux Corinthiens, pour estre vn signe & vne marque de leur ville , comme les Selinuntins ont quelquefois, à ce que lon dit , offert vne plante d'ache, qui s'appelle Selinon , faite d'or:& les Tenediens vne hache, ce qui est pris des cancre qui naissent en leur Isle , aupres d'vn promontoire qu'ils appellent Asterion , lesquels cancre seuls ont la figure d'vne hache imprimee dessus leur cocque: car quant à Apollo , nous estimōs que les Corbeaux, les Cygnes, les Loups, & les Esparniers, & toutes autres bestes luy seroient plus tost agreables que celles-la. Serapion adonc dit, que l'ouurier auoit voulu par cela donner à entendre, que le Soleil se nourrissoit des eaux , qu'il en naissoit, & qu'il les conuertissoit en viperes , soit qu'il eust entendu d'Homere,

Le clair Soleil sortit d'vn beau grand Lac,
ou qu'il eust veu, comme les Ægyptiens pour représenter l'Orient, peignent vn petit enfant assis dessus vn Alizier. Adonc me prenant à rire: A quoy faire, dis-ie, nous viens tu derechef fourrer icy ta secte Stoïque, & nous viens tu glacer tout doucement par entre noz propos voz euaporations, & allumemēs des astres, sans nous tirer à bas
le

A le Soleil ny la Lune, cōme font les femmes Thes-
 saliennes par leurs enchantemens, ains les faisant
 sourdre, comme de leur origine & principe de la
 terre & des eaux? car Platon a bien appellé l'hō-
 me arbre celeste, cōme estant dressé la racine con-
 tremont, qui est la teste. Mais vous ce pendant
 vous moquez d'Empedocles, pour ce qu'il dit que
 le Soleil par reflexion de sa lumiere celeste contre
 la terre resplendit derechef contre le ciel d'vne fa-
 ce intrepide, & ce pendant vous en faites vn ani-
 mal terrestre, ou vne plante palustre, en le peignāt
B dedans les eaux & pais des grenouilles. Mais re-
 mettons cela à la Tragicque & mōstrueuse estran-
 geté d'opinions des Stoïques, & ce pendant trait-
 tons accessoirement les accessoires ouurages des
 ouuriers mechanicques: car ils sont ingenieux &
 gentils en beaucoup de choses, mais aussi bien sou-
 uent ne se gardent il pas bien d'estre froidement
 curieux & ambitieux en leurs inuentions. Comme
 donc celuy qui peignit sur la main d'Apollo vn
 coq, voulut entendre le matin, & l'heure du leuer
 du Soleil, ou l'aube du iour: aussi pourroit on dire
C icy que ces grenouilles sont la marque du prin-
 temps, auquel le Soleil commence à dominer sur
 l'air, & à dissouldre l'hyuer, au moins s'il fault, se-
 lon que vous mesmes dittes, entendre que le So-
 leil & Apollo soit tout vn mesme Dieu, & non pas
 deux. Et Serapion: Cōment, ne le penfes tu donc-
 ques pas, & crois tu que le Soleil soit autre qu'A-
 pollo? Ouy, dit-il, comme c'est autre chose le So-
 leil que n'est la Lune. Mais encore y a il plus, car

la Lune ne cache pas souuent ny à tout le monde **D** le Soleil, là où le Soleil fait, que tous les hommes ensemble ignorent Apollo, diuertissant la pensée par le sentiment, & la destournant de ce qui est à ce qui apparoist. Apres cela, Serapion demanda aux guides historiens, pour quelle cause ceste salle n'estoit intitulee, la Salle de Cypselus, attendu qu'il l'auoit fondee & dediee, ains la salle des Corinthiens. Et comme eux se teussent, pour ce, à mon iugement, qu'ils n'en entendoient pas la cause, me prenant à en rire: Et comment, dis-je, pouuons nous penser que ces hommes icy le puissent sçauoir ou s'en souuenir, estants tous esbahis & estonnez de vous auoir ouy deuiser des impressions qui se font en l'air? car par cy deuant nous leur entendions dire, qu'apres que la Tyrannie de Cypselus eut esté ruinee, les Corinthiens voulurent attribuer à eux l'inscription de la statue d'or qui est en Pise, & ceste salle aussi du Thresor, y mettant vne inscription, comme du corps de toute la ville: ce que les Delphiens leur ottroyerent, & concederent selon qu'il estoit iuste. Mais les Eliens leur en porterent enuie: parquoy ceux de Corinthe feirent vn decret publicque, par lequel ils les exclurent & priuerent de la feste & solennité des ieux Istmicques, dont est venu que depuis il n'y a iamais eu pas vn champion du pais d'Elide qui ait cōbatu és ieux Istmicques. Et le meurtre des Mollionides que Hercules tua, aupres de la ville de Cleones, n'a point esté cause, comme aucuns estiment, que les Eliens en aient esté debouttez: car au

A contraire c'eust esté à eux à qui il eust appartenu
d'en exclurre & debouter les autres, si pour cela
ils eussent eu inimitié alencontre des Corinthiens.
Voila ce que i'en dis, quāt à moy. Et comme nous
fusmes en la salle des Acanthiens, & de Brasidas,
que lon appelle, l'vn des guides historiens qui nous
conduisoient, nous monstra la place où souloient
estre les Obelisques de fer, qu'auoit dediez la cour-
tisanne Rodopis. Dequoy Diogenianus se cour-
rouceant, C'est aussi grande honte, dit il, à ceste
ville d'auoir donné à vne putain place pour met-
B tre la decime du salaire qu'elle auoit gaigné à la
peine de son corps, comme d'auoir iniquement
fait mourir Ælope, qui estoit serf quand & elle. Et
Serapion, Vrayement, dit-il, tu as bon temps de te
courroucer de cela: mais regarde la hault, & y voy
entre les statues des Capitaines & des Roys, celle
de Mnefarete toute d'or, laquelle Crates disoit
auoir là plâté pour trophée de la luxure des Grecs.
Le ieune homme la regardant, Voire mais, dit-il,
c'estoit de Phryne que Crates disoit cela. Il est vray
ce dit Serapion, car son propre nom estoit Mne-
C farete, mais elle fut surnommee Phryne, par vn so-
briquet, pour ce qu'elle estoit iaunastre, comme
vne grenouille de buisson, qui se nôme Phryn, ainsi
que les surnōs ont suffocqué & fait eclipser beau-
coup de noms: car la mere d'Alexandre, qui auoit
nom Polyxene en son premier nom, fut depuis sur-
nōmee Myrtale, & puis Olympiade & Stratonice:
& Eumetis Corinthiene, iusques icy plusieurs
la surnomment du nom de son pere, Cleobuline.

Et Herophile de la ville d'Erythre, qui auoit l'art de deuiner, on l'appella depuis Sibylla. Et tu entendras dire aux Grammairiens, que Leda mesme au parauant s'appelloit Mnesinoé, & Orestes Achæus. Mais comment penses tu, dit-il, regardant Theon, souldre & respondre à ceste accusation de Phryne? Et luy en se riant: En sorte, dit-il, que ie te chargeray & accuseray toy mesme de t'amuser à reprendre ainsi les plus legeres fautes des Grecs: car ainsi comme Socrates reprenoit en Callias ce qu'il faisoit la guerre seulement aux parfums & odeurs curieuses, & ce pèdant il enduroit de veoir des danses, des faults de soupplèssè de ieunes garçons, & des baisers, & des bouffons & plaisans pour faire rire là compagnie. Aussi me semble il que tu veux chasser & exclurre du temple vne femmelette qui a vsé de la beauté de son corps vn peu trop deshonestement, & ce pendant tu vois le Dieu Apollo enuironné tout alentour de primices & de decimes de meurtres, de guerres & de pillage, & tout son temple plein de despouilles & de butin pris sur les Grecs, & ne t'en courrouces point, ny n'as point de pitié des Grecs lisans sur ces belles offrandes & ioyaux de treslaides inscriptions, Brasidas & les Acanthiens des despouilles des Atheniens, les Atheniens des Corinthiens, les Phociens des Theffaliens, les Orneates des Sicyoniens, les Amphictyons des Phociens. Mais à l'adventure que c'estoit Praxiteles seul qui faisoit Crates, de ce qu'il auoit là posé vn present qu'il faisoit à son amie. Et au contraire Crates l'en deuoit louer, de

A ce que parmy les images d'or des Princes & des Roys il y mettoit celle d'une courtisanne, reprochant & condamnant en cela la richesse, comme n'ayant rien de grād ny de venerable: car il est bien seant aux Princes & aux roys de mettre au temple d'Apollo des ioyaux qui soient tesmoins de la iustice, de la temperāce, & de la magnanimité, non pas de l'opulence bien doree & superflue, à laquelle ont part ceux mesmes qui ont le plus honteusement vescu. Mais vous n'alleguez pas cela, dit l'un de noz guides historiens, que Cresus feit faire vne

B statue d'or de sa boulegere, laquelle il offrit & dedia icy, non pas toutefois pour insolentement faire monstre de ses superflues richesses en ce temple, ains pour vne iuste & honneste occasion, qui fut telle. On dit que Alyattes pere de Cresus espousa vne seconde femme, de laquelle il eut & feit nourrir d'autres enfans. Ceste femme doncques dresfant embusche à la vie de Cresus, donna du poison à ceste boulegere, & luy cōmanda qu'elle en meist dedans le pain qu'elle feroit pour Cresus. La boulegere le luy feit secrettement entendre, & donna

C le pain empoisonné aux enfans d'elle: au lieu desquels Cresus estant venu à succeder au royaume, voulut recognoistre le bon seruice que luy auoit fait ceste femme, avec le tesmoignage mesme de Dieu, en quoy il feit vertueusement. Et pourtant, dit-il, est il bien seant de louer, & honorer, & aimer les ioyaux & offrandes des villes qui ont esté presentez & dediez pour telles occasions, comme celuy des Opuntiens: car comme les Ty-

rans des Phociens eussent rompu & fondu plusieurs ioyaux sacrez, & d'iceux fait de la monnoye, qu'ils auoient debitee & semee par les villes, les Opuntiens en recueillans le plus qu'ils peurent, en emplirent vne grande cruche qu'ils enuoyerēt icy & en feirent offrande à Apollo. Et quant à moy ie louë grandement ceux de Smyrne & d'Apollonie, qui enuoyerent icy des gerbes d'or: & encore plus les Eretriens & les Magnesiens qui feirent à nostre Dieu present des primices de leurs hommes, le recognoissans non seulement comme donateur des biens de la terre, mais aussi des enfans, & comme **E** autheur de la generation, & amateur des hōmes. Et blasme les Megariens de ce que seuls presque entre tous les Grecs, ils ont icy fait eriger vne image de nostre Dieu, tenant en main vne lance, à cause de la bataille qu'ils gagnerent sur les Atheniens, quand apres la deffaite des Medes ils vainquirent les Atheniens, & les chasserēt de leur ville, laquelle ils auoient occupee & prise sur eux. Il est vray que depuis ils luy feirent offrande d'vn peigne d'or à toucher la Lyre, aiants ce semble ouy dire au poëte Scytinus, disant de la Lyre, laquelle **F** le beau fils de Iupiter, Apollo, accorde, comprenāt tout le commencement & la fin,

Aiant en main le peigne reluisant,

Des beaux rayons du Soleil clair luisant.

Et cōme Serapion voulust encore adiouster quelque chose de semblable, l'estranger se prit à dire: Je prens, dit-il, bien plaisir à ouir deuiser de tels propos: mais il est force que ie demande la pre-

miere

A miere promesse qui m'a esté faite, que lon me ré-
 de la cause pour laquelle la Prophetisse Pythic a
 cessé de rendre les oracles en carmes & en vers.
 Parquoy, sil vous plaist, nous surferons la visita-
 tion du reste des ioyaux, & nous asseans icy, nous
 deuiferons vn peu de ceste matiere: car c'est vn
 propos qui repugne merueilleusement à la foy &
 croyance de l'oracle, qu'il fault necessairement que
 ce soit l'vn des deux, ou que la Prophetisse Pythic
 ne s'approche pas bien du lieu où est la diuinité, ou
 que le vent qui l'inspiroit est estaint, & sa force &
 B puissance faillie. Tournans doncques alentour du
 temple iusques au costé du midy, nous nous asseis-
 mes sur les entablemens d'iceluy, aupres du tem-
 ple de la Terre, voians de là l'eau de la fontaine
 Castalie, & le temple des Muses, tellement que
 Boëthus dit incontinent, que le lieu mesme aidoit
 à la doubte & demande que faisoit l'estranger: car
 il y auoit icy anciennement au lieu où sourd le ruis-
 seau, vn temple des Muses, tellement que lon vsoit
 de ceste eau à faire les effusions aux sacrifices, ainsi
 que tesmoigne Simonides,

C Là dessoubs, en vn bassin beau,
 Se garde la sainte & belle eau
 Des Muses à la teste blonde.

Et encore de rechef le mesme Simonides, vn peu
 plus curieusement, appellant la Muse Clio
 La saincte superintendante
 Des beaux bassins, où fait descente
 La font Castaline, que tant
 Tout le monde va souhaittant,

Qui des cauernes prophetiques
Sourd avec odeurs mirifiques.

D

Parquoy Eudoxus croyoit mal, qui estimoit que ce fust l'eau de Styx qu'il entendoit: mais ils colloquerent le temple des Muses, comme gardiennes & assistantes de la diuination aupres du ruisseau, & aussi le temple de la Terre, à laquelle appartenoit l'oracle, où se rendoient les responses en carmes & en chant: & y en a qui disent que ce fut icy que lon ouyt le premier carme Heroicque de telle substance,

Tous les oyseaux & abeilles volages,

E

Approchez cy voz cires & plumages,

lors que destituee de Dieu, elle perdit sa dignité.

Cela, dit Serapion, est plus raisonnable & plus cōuenable aux Muses, car il ne fault pas combattre alencontre des Dieux, ny oster avec la diuination la prouidence & la diuinité, ains plus tost chercher solution de ce qui semble estre contraire, & ce pendant n'abandonner point la foy & croyance religieuse, qui a esté de pere en fils tousiours tenue en nostre pais. Tu dis fort bien, dis-ie, Serapion.

Car nous ne desesperames point de la philosophie, cōme estant du tout perdue & estainte, pour ce que les philosophes au parauant prononçoient & publioient leurs sentences & doctrines en vers, comme faisoient Orpheus, Hesiodus, Parmenides, Xenophanes, Empedocles & Thales, & depuis ils celièrent d'vser de vers, excepté toy. Car tu as de rechef ramené la poësie en la philosophie, qui excite & éguillonne vifuiement les ieunes gens.

Ny

A Ny n'a point esté l'Astrologie rendue plus ignoble ne moins prisee, par ce qu'Aristarchus, Timochares, & Aristyllus & Hipparchus en ont escrit en prose, combien que Eudoxus, Hesiodus & Thales en eussent parauant escrit en vers, au moins sil est veritable que Thales ait escrit l'Astrologie que lon luy attribue. Et Pindare confesse qu'il doute de la façon de la melodie qui estoit negligee de son temps, & s'esmerueille pourquoy elle estoit mesprisee: car il n'y a rien de mauuais ny d'estrange à rechercher les causes de telles mutations: mais

B de vouloir oster les arts & les puissances, sil y a d'adventure eu quelque chose remuee ou alteree en elles, il n'est pas iuste ny raisonnable. A quoy Theon adiousta, On ne scauroit nyer certainemēt qu'il n'y ait eu en cela de grandes alterations & grandes mutations: mais si est-ce que de toute ancienneté il y a eu des oracles rendus & prononcez en prose, & encore touchant affaires de bien grande consequence. Car comme Thucydides mesme l'escrit, il fut respondu aux Lacedemoniens, qui demandoient de l'ysue de la guerre qu'ils auoient alencontre des Atheniens, Qu'ils auroient victoire, & demoureroient les plus forts, & qu'il leur seroit en aide requis ou non requis, & que

C sils ne rappelloient Pausanias, il recueilliroit l'argent * * Aux Atheniens qui enqueroient de l'euenement de la guerre qu'ils entreprenoient pour conquerir la Sicile, il fut respondu, qu'ils amenassent de la ville d'Erythres la prestresse de Minerue, & la femme s'appelloit Hesychia, c'est

à dire repos. Et comme Dinomenes Sicilien en-
 quist que ce seroit de ses enfans, l'oracle luy res-
 pondit qu'ils seroient tous trois Seigneurs & Ty-
 rans : & comme il replicquast, Ouy bien, mais ce
 fera peult estre à leur malheur, Sire Apollon : il
 respondit, Et cela encore t'est donné. Aussi sça-
 vez vous que Gelon fut hydropicque durant sa
 domination, Hieron trauaillé de la pierre : & le
 troisiéme, Thrasylbulus, se trouuant enuveloppé de
 guerres & seditions, en peu de temps fut chassé &
 deboutté de sa domination. Et Procles le tyran
 d'Epidaure, aiant fait mourir cruellement & ty-
 ranniquement plusieurs autres, tua encore Ti-
 marchus, qui s'en estoit fuy d'Athenes deuers luy,
 avec grosse somme de deniers, apres l'auoir reçu
 en assurance, & luy auoir fait beaucoup de caref-
 ses à son arriuee, & puis en ietta le corps en la
 mer dedans vne manne, & fit cela par l'entremise
 d'un Cleander d'Ægine, sans que les autres en
 sçeussent rien : & depuis, les affaires estants trou-
 blez, il enuoya icy à l'oracle son frere Cleotinus,
 enquerir s'il s'en deuoit enfuir & se retirer ailleurs.
 Apollon luy respondit, qu'il donnoit à Procles
 fuite & retraite, là où il auoit fait mettre la man-
 ne par son hoste d'Ægine, ou là où le cerf laisse ses
 cornes. Le Tyran doncques entendant que l'ora-
 cle luy comandoit de se ietter en la mer, ou
 bien de s'enterrer en terre, par ce que les cerfs
 enfouissent & cachent leurs cornes en terre quand
 elles sont tombees : il attendit encore quelque
 peu de temps, puis à la fin voiant que ses affai-
 res

A res empiroient de plus en plus tous les iours, il se
 cuyda sauuer à la fuitte : mais les amis de Timar-
 chus l'ayant surpris & tué, en ietterent le corps de-
 dans la mer : & qui est encore plus, les Retres, c'est
 à dire les responses qui furent donnees à Lycur-
 gus, pour ordonner le gouuernement de la chose
 publicque des Lacedemoniens, luy furent don-
 nees en prose. Et Alyrius, Herodotus, Philochor-
 rus, & Ister, qui ont le plus trauaillé à assembler les
 responses des oracles en vers, en ont aussi escript
 plusieurs sans vers. Et Theopompus, qui autant
B que nul autre s'est estudié à esclarcir l'histoire de
 l'oracle, reprant asprement ceux qui pensent que
 la prophetisse Pythie ne prophetisoit pas alors en
 carmes. Et puis s'efforçant de le prouuer, il n'en
 peut alleguer que bien peu d'exemples, comme
 estants tous les autres oracles des lors couchez en
 prose, comme aussi maintenant encore y en a il
 quelques vns qui courent en vers : par lesquelles
 allegations il a rendu vn fait fort diuulgé, qui est
 tel. Il y a en la prouince de la Phocide vn temple
 d'Hercules surnommé Misogyne, comme qui di-
C roit, ennemy des femmes : & est la loy & coustu-
 me du pais, que ccluy qui en est le presbtre pour
 l'annee qu'il est, ne touche nullement à femme ;
 à l'occasion dequoy ordinairement on eslit des
 vieillards à ceste presbtrise la. Toutefois quelque
 temps au parauant vn ieune homme, qui n'estoit
 pas meschant, mais ambitieux d'honneur, & aimât
 vne ieune garce, prit ceste prelature : du com-
 mancemēt il se conteint le mieux qu'il peut, & fuit

ceste garfe : toutefois vn iour qu'il estoit couché, D
 apres auoir bien beu & dansé, la ieune garfe l'estant venue veoir, il eut affaire à elle. Parquoy en estant troublé & espouuanté, il s'enfuit à l'oracle, & enquit Apollo sur le peché qu'il auoit commis, & eut ceste responce,

Dieu permet tout ce qui est necessaire.

Mais quand quelqu'un concederoit que nulle responce d'oracle se donneroit en nostre temps, sinon en vers, encore seroit il plus en doute des anciens, qui quelquefois en vers, & quelquefois en prose sans vers, rendoient les oracles. Mais ny l'un ny l'autre, mon fils, n'est ny faux ny estrange, prouueu que nous aions les opinions droictes & pures de Dieu, & que nous n'estimions point que ce fust Apollo qui anciennement composoit les vers, & qui maintenant suggere à la Pythie les oracles, cōme parlant dedans vn masque : mais d'autre costé il faudroit plus au long discourir & enquerir de cela. Mais pour le present, à fin d'en entendre quelque chose, souuenons nous que le corps se sert de plusieurs instrumens, & l'ame du corps & des parties d'iceluy, & l'ame est l'organe & instrument de Dieu. Or la perfection de l'instrument & organe est d'imiter & représenter cela, qui en vse entant comme il a de puissance, & exhibe l'œuvre & l'effect de la pensee mesme en soy, & le monstrier, non pas tel cōme il est en l'ouurier, pur & net, sans passion, sans erreur & sans faulte quelconque, ains meslé. Car par soy-mesme il nous est incogneu, & nous apparoit autre & par autre, & se remplit de la

A de la nature de cest autre la. Je laisse là la cire, l'or,
 l'argent & le cuyure, & toutes autres especes de
 matiere & de substance qui se peult mouler & im-
 primer, chascune desquelles reçoit vne forme de
 semblance imprimée, mais à ceste representation,
 l'vne y adiouste vne difference, & l'autre vne autre
 de soy mesme, comme il est aisé à voir par les infi-
 nies formes diuerses d'images, & d'apparences qui
 se voient d'vne mesme face en diuers mirouers
 plains, creux & courbez en rond, car on en voit de
 toutes sortes. Mais il n'y a ny mirouer qui repre-
 sente mieulx la face, ny instrument qui soit de na-
 ture plus souple & plus obeissant que la Lune, tou-
 tefois prenant du Soleil la lueur & splendeur al-
 lumée, elle ne la renuoye pas mesme deuers nous,
 ains meslée avec du sien, & luy change sa couleur,
 en luy donnant toute autre & differente puissan-
 ce: car il n'y a du tout point de chaleur, & sa lu-
 miere est si foible qu'elle default auant que d'ar-
 riuier iusques à nous. Et me semble que c'est ce qu'a
 voulu dire Heraclitus, quand il a dit, comme le Sei-
 gneur auquel appartient l'oracle qui est en la ville
 c de Delphes, ne dit, ny ne cache, mais il signifie. Ad-
 iouste donc à cela qui est bien dit & imaginé, que
 le Dieu qui icy est, vse de la Pythie quant à la veüe,
 & quant à l'ouyë, tout ainsi que le Soleil vse de la
 Lune, il montre & signifie par vn corps mortel, &
 vne ame qui ne peult arrester, & ne se pouuant ex-
 hiber immobile & rassize à celuy qui l'agite, ains
 se troublât encore d'auantage par les mouuemens
 & passions qui sont attachez à elle mesme. Car

ainſi comme les tournoyemens des corps qui ſ'en D
 vont tombans en rond contrebas, ne ſont pas les
 plus forts, ains tournans en rond par force, & ten-
 dans cõtre bas par nature, il ſe fait des deux vn en-
 ueloppement de volute & reuolution irreguliere.
 Auſſi le rauiffement d'eſprit, qui ſe nõme Enthou-
 ſiaſme, eſt vne meſlãge de deux mouuemens, dont
 l'ame eſt eſmeuë, l'vn de l'inspiration, l'autre de la
 nature. Car veu que es corps qui n'ont point d'a-
 me, & qui demeurent touſiours en meſme eſtat, on
 ne les ſcauroit par force mouuoir autrement que la
 qualitè de leur nature ne porte, ny remuer vne E
 coulombe rondemèt, comme vne boule, ny com-
 me vn corps quarrè, ny manier vne lyre comme
 vne flutte, ou vne trompette comme vne cithre,
 ny autre choſe quelconque, ſinon ainſi cõme par
 art ou par nature, elle eſt idoine à vſer: Comment
 ſeroit il poſſible de manier & traiter ce qui eſt a-
 nimè, qui ſe meut ſoymeſme, qui eſt capable de
 raiſon, de volontè & d'inclination, autrement que
 ſelon ſa precedente habitude, puiffance, ou nature?
 comme de mouuoir muſicalement vn qui ſeroit
 du tout ignorant & ennemy de la muſique, ou
 grammaticalement qui ſeroit ignorant & enne-
 my des lettres, ou doctement celuy qui n'auroit
 intelligençe ny experience de ſcience quelconque,
 il ne ſeroit pas au monde poſſible. En quoy Ho-
 mere meſme me rēd teſmoignage, ſuppoſant qu'il
 ne ſe fait rien du tout, ſans que Dieu en ſoit aucu-
 nement cauſe, & toutefois ne faiſant pas que Dieu
 ſe ſerue & vſe de toutes perſonnes à toutes choſes,
 ains.

Ains de chascque hōme, selon sa suffisance ou d'art, ou de nature. Qu'il soit vray, ne vois tu pas, amy Diogenianus, que quand Minerue veult persuader quelque chose aux Acheiens, elle leur met en auāt Vlysses : quand elle veult troubler & confondre le traitté de paix, elle cherche Pandarus : quand elle veult desconfire & mettre en route les Troyens, elle s'adresse à Diomedes: car l'vn estoit robuste de corps, & vaillant de courage : l'autre estoit bon archer, mais hōme sans ceruelle : & l'autre éloquent, sage & prudent. Car Homere n'estoit pas du mesme aduis que Pindare, aumoins si c'est luy, comme lon dit, qui a fait ces vers,

Si Dieu vouloit tu cinglerois en mer

Sur vne claye,

ains sçauoit qu'il y a des puissances & natures destinees à autres & autres effets, dont chascune a ses mouuements differents, encore qu'il n'y ait qu'vne seule cause mouuāte qui les remue toutes. Tout ainsi donc comme ce qui meut l'animal qui marche à pied, ne le peult faire voler, ny celuy qui est besgue, & a la langue grasse, ne le sçauoit faire disertement parler, ny crier fort qui a la voix foible & gresse : ce fut pourquoy on enuoya Battus en Afrique, quand il fut paruenue en sa force, pour y fonder & bastir vne ville, pource qu'il auoit la langue courte & grasse, & la voix petite, mais au demourāt auoit vne nature royale, propre à gouverner, & estoit hōme de bon sens. Aussi est il impossible que la Pythie sçache parler elegāment & doctemēt: car elle sera bien nee legitimemēt & hōne-

stement autant que nulle autre, & aura vescu bien D
sagement, mais aiant esté nourrie en la maison de
pauures laboureurs, & n'apportant aucune suffi-
sance d'art qu'elle ait apprise à l'eschole, ny d'autre
experiëce, elle descend au lieu de l'oracle. Et com-
me Xenophon estime qu'il faille que la fille à ma-
rier, quand elle est menec à la maison de son mary,
n'ait iamais rien veu ne rien ouy: aussi la Pythie
estant ignoräte & inexperte de toutes choses pres-
que, & aiant l'ame veritablement vierge, se vient
conioindre à Apollo. Mais nous voulös que Dieu,
pour signifier les choses futures, vse de herons, de E
roytelets, de corbeaux, & autres tels oyseaux par-
lans à leur mode, & ne voulons pas que les deuins
& prophetes, fils sont messagers & heraults de
Dieu, comme ils sont, exposent leurs predictions
en paroles claires & intelligibles, ains que la voix
de la prophetisse Pythie soit cōme celle d'un Cho-
rus de Tragédie de dessus vn eschaffaut, qui ne
profere point ses responses en termes simples,
ronds & naifs, sans fard quelconque, ains avec
magnificence poëtique de carmes esleuez & en-
fleuz, & vn desguisement de termes figurez, & en- F
core au son des aubois & des flustes. Que dirons
nous doncques des anciens? Non vne response
seule, mais plusieurs. Premièrement les anciennes
Pythies aussi bien prononçoient plusieurs oracles
en prose. Secondement ce temps la portoit des
complexions & temperatures de corps qui auoiët
ie ne scay quoy d'inclination coulante à la poësie,
ausquelles dispositions se ioignoient incontinent
d'abon-

A d'abondant les desirs, les affections, & dispositions des ames, de sorte qu'elles se trouuoient toutes prestes, & ne falloit plus que quelque peu de commencement venât de dehors qui esbranlast l'imagination & la conception, pour attirer à ce qui leur estoit propre non seulement les Astrologues & les Philosophes, comme dit Philinus, ains aussi quand ils se trouuoient bien trempéz de vin, & bien esbranslez de quelque affection, comme de pitié qui les eust espris, ou de ioye qui leur fust suruenue, ils se laissoient aller & glisser en vne voix approchante de chât, de maniere que les festins estoient remplis de carmes & de chansons, & les liures d'inuentions & de compositions d'amour : & quand Euripides a dit,

Amour enseigne à l'homme la musique,

Quoy qu'il n'en eust deuant nulle pratique.

il entendoit, non que l'amour meist en l'homme vne puissance de poésie ou de musique qui n'y fust pas au parauant, ains esueille, esmeut & eschauffe celle qui y estoit au parauant cachée & oyfue. Or maintenant disons, qu'il n'y a plus pas vn qui soit amoureux, ains que l'amour soit du tout estainct & pery, pource qu'il n'y a plus personne,

Qui en beaux vers & plaisans sons

Descoche de douces chansons

Au los de sa belle maistresse,

comme dit Pindare : mais cela est faulx, car il y a tousiours des amours qui remuent les ames des homes, mais ils ne s'adressent pas à celles qui sont bien nees & disposées à la musique & à la poésie.

Voilà pourquoy ils demeurent sans musique de flustes, ny de violons & de lyres, & toutefois ils ne sont pas moins babillards ne moins ardents en leurs amours, que les anciens. Et croy qu'il n'y a personne qui ne feist conscience de dire, que l'Academie, & toute la compagnie de Socrates & de Platon, eust esté sans amoureuse affection, attendu que lon lit encore au iourd'huy leurs devis de l'amour, & n'en ont point laissé de poëmes. Et quelle difference y a il de dire qu'il n'y auroit iamais eu de femme qui eust fait l'amour que Sappho, ne qui eust eu le don de prophetie que Sibylla & Aristonica, & celles qui ont en vers poëtiques publié leurs vaticinations & propheties? Car le vin, comme disoit Chæremon, se mesle & destrempe avec les mœurs de ceulx qui le boiuent. Or le rauissement prophetique, ne plus ne moins que celuy de l'amour, vse & se sert de la suffisance qu'il trouue en son subiect, & esmeut vn chascun de ceulx qui le reçoient, selon ce à quoy il est né. Ce neantmoins encore si nous regardons à Dieu & à sa providence, nous verrons que le changement s'en fera fait tousiours en mieulx: car l'usage de la parole ressemble proprement au debit & employ de la monnoye. Car la bõne & approuvee est celle qui est accoustumee & cogneuë, & qui a cours & pris l'une en vn temps & l'autre en l'autre. Il a doncques esté vn temps que la marque & monnoye de la parole qui auoit cours estoit les carmes, les chãts & canticques, par ce que alors toute histoire, toute doctrine de philosophie, toute affection, & brief

A toute matiere qui auoit besoing de plus graue & ornee voix, ils la mettoiét toute en vers poëtiques, & en chants de musique. Car ce que peu de gens escoutent maintenant à toute peine, alors tout le mōde l'oyoit, & prenoit grād plaisir à l'ouir chanter, & laboureurs & preneurs d'oyseaux, comme dit Pindare : mais pour la grande aptitude qu'ils auoient à la poësie, la plus part, quād ils vouloient faire des remonstrāces, les faisoient sur la lyre avec des chāsons: s'ils vouloiēt arguer, enhorter, inciter, ils le faisoient avec des fables, des allegories: & d'auantage les hymnes à l'hōneur des Dieux, les prieres, les chants de victoires, ils faisoient tout en carmes & en chant: aucuns pour la gentillesse de leur entendement, autres pour accoustumance. Parquoy Apollo ne voulut pas non plus enuier cest ornement & ce plaisir à la science de deuiner, ny ne voulut point bānir de la machine à trois piēds, sur laquelle se rendēt les oracles, la muse qui l'honoroit, ains plus tost l'y introduisit, aimant & excitant les natures poëtiques: & luy mesme leur donnoit des imaginations & conceptions de poësie, & c'aidoit à poulsier en auant ce qu'il y auoit de brauerie & de doctrine, cōme chose bien scante alors, & qui estoit grandement prisee & estimee. Mais depuis, cōme la vie des hōmes avec les fortunes & les natures vint à se chāger, l'vsage repoulsant & chāssant toute superfluité, osta les coëffes & aſſiquets d'or que lon souloit porter en la teste, & despouilla les robbes lōgues delices, & roigna les cheueux, qui estojēt par trop lōgs, deschaussa le brodequin,

f'accoustumants les hommes avec bonne raison à faire gloire de sobrieté & d'espargne alencontre des delices, & de la superfluité, & mettre en honneur la simplicité & la modestie plus tost que la pompe & la curiosité : ainsi se muant aussi la maniere de parler, & se despouillât quand & quand, l'histoire descendit, comme de dessus vn chariot, de la versification à la prose, & par ceste mesme façon d'escrire & parler sans liaison de pieds & mesures, fut separé le fabuleux d'avec le veritable: & la philosophie embrassant le stile clair, familier & apte à enseigner, plus tost que celuy qui estonne le monde pour estre figuré, commença à disputer & enquerir la verité en termes communs: & lors Apollo feit aussi cesser à la Pythie d'appeller ses citoiens Pyricaos, c'est à dire brusle-feus, & les Spartains Ophioboros, deuoreurs de serpens, les hommes Oreanes, & les fleuves Oremportes: & ostant aux oracles les vers, les mots estranges, les circunlocutions, & l'obscurité, il les apprit à parler à ceux qui venoient à l'oracle, comme les loix deuissent aux citez, & comme les Roys parlent à leurs peuples & subiects, & comme les escholiers escoutent leurs maistres, accommodant sa façon de parler, en sorte, qu'elle fust pleine de sens & de grace persuasive. Car il fault entendre que, cōme dit Sophocles,

Dieu quelque oracle aux sages tousiours dōne,
Mais peu ou mal les fols il n'araisonne.

Et depuis la foy & croyance a tellement esté conjoincte à la clarté & dilucidité, aiant esté changee avec les autres choses, que parauant ce qui n'estoit

A pas ordinaire ny commun, ains extrauagant & dit obscurement & couuertement, le vulgaire le tournoit en opiniõ de saincteté là deffoubs cachee, s'en estonnoit & le reueroit, mais depuis aimants à entendre les choses clairement & facilement, & non pas avec vne enfleure ny vn masque de paroles, ils commancerent à blasmer la poësie qui estoit alentour des oracles, non seulement comme contraire & repugnante à la facile intelligéce de la verité, & comme meslant de l'vmbre & des tenebres d'obscurité à la sentence, mais aussi en auoient desia la prophetie mesme pour suspecte, disans que les translations, les ænigmes ou paroles couuertes, & les ambiguitez dont vsé la poësie, estoient des retraits & cachettes pour se couvrir & cacher, quand il y auroit faulte à l'euenemēt. Et en eussiez ouy plusieurs qui contoient, qu'il y auoit des gens stilez & exercitez à composer vers, qui estoient alentour de l'oracle pour receuoir & recueillir les paroles, lesquels tissoient incontinent des carmes, des vers, & des mesures sur le champ, cõme des pãniers à mettre les paroles respõdues. Je laisse à dire combien d'occasion de blasmer & calomnier les oracles, ont apporté ces interpreteurs de noms, ces traitres abuseurs, leur aiant adiousté vne pompe & vne enfleure de paroles, dõt ils n'auoient point de besoing, ne que lon y feist aucun changement.

Il est bien certain aussi, que ces charlatãs, triacleurs & basteleurs, ioueurs de passe-passe, & toute ceste maniere de vagabonds qui vont chantant aux festes & sacrifices de Cybele & de Serapis, ont gran-

dement descrié & vilipendé la poësie, les vns à leur D
 seule façon d'aller ainsi errants par le monde, les
 autres par les sorts de quelques certaines lettres,
 dont ils forgent certains oracles qu'ils baillent à
 des valets, & des femmelettes qui se laissent abuser,
 principalement à cause qu'ils les voient reduits en
 vers, & à cause des mots poëtiques qu'ils y voient.
 De là est venu que la poësie s'estant ainsi laissée
 prophaner & publier à des trompeurs, des abu-
 seurs de gens, enchanteurs & faulx deuins, est de-
 cheute de la verité, & reiettee arriere du tripied
 prophetique. Si ne m'esbahis pas fil estoit aucu- E
 nefois besoing aux anciens de double entente, de
 circülocution & obscurité. Car il ne venoit point
 à l'oracle vn homme priué & particulier deman-
 der fil acheteroit vn esclau ou non : ou vn autre,
 fil auroit proffit en son traficq : ains y enuoyoit
 ou venoiet de grosses & puissantes citez, des prin-
 ces & des Roys, qui n'entreprenoient rien de petit,
 ny ne se venoient point cōseiller à Apollo de cho-
 ses legeres, lesquels il n'estoit pas expedient pour
 ceulx qui auoient charge de l'oracle, de fascher ny
 irriter, en leur faisant ouïr beaucoup de choses F
 contraires à leur volonté : car Dieu n'obeit pas à
 Euripides, comme luy donnant la loy & faisant
 vne ordonnance,

Phœbus doit seul aux hommes deuiner.

Car il vse de prophetes & de ministres mortels,
 desquels il doit auoir soing pour les conseruer à ce
 qu'ils ne soient outragez & tuez par les meschans,
 en luy faisant seruice, ny aussi ne doit il pas tenir
 ainsi

A ainsi cachee la verité, en destournât la declaration nue d'icelle, comme vne lumiere qui prent plusieurs reflexions, & se diuise en plusieurs parties, il en ostoit ce qu'il y auoit de fascheux & de dur. Or ne falloit il pas ny que les Tyrans sceussent, ny que les ennemis fussent aduertis de ce qui estoit proposé contre eulx. Pour ceulx-la doncques il enueloppoit en ses responses des doubtes & des ambiguites, lesquelles aux autres cachoient l'intelligence vraye de ce qui estoit respondu. Mais ceulx qui venoient à l'oracle eulx mesmes, & qui y prenoient de bien pres garde, ne failloient point à le bien entendre. Parquoy celuy est bien impertinent & de mauuais iugement qui accuse & calomnie Dieu, si l'estat des affaires estant changé, il pense qu'il ne fault plus aider aux hommes à la mode accoustumee, mais par vne autre maniere. D'auantage la poësie & versification n'apporte point à l'oraïson de plus grande vtilité, sinon que la sentence estant comprise & serree en certain nombre de paroles & de syllabes mesurees, on la retient & s'en souuient on mieux. Or falloit il que ceux qui estoient anciennemēt se souuinssent de beaucoup de choses, pour ce qu'on leur disoit beaucoup de signes & de marques de lieux & de temps, d'affaires, de sacrifices, de Dieux estrangers d'outre mer, & des monuments cachez des demy-Dieux malaisez à trouuer, mesmement en pais loing de la Grece: car au voyage de Chio & de Candie * * de Onesichus & de Phalātus, & de plusieurs autres Capitaines & chefs, de flottes de vaisseaux, cōbien falloit il

observer de signes & de coniectures pour trouuer
le siege & le lieu de repos qui leur estoit ordonné
à chascun? à l'observation desquels ils faillirent, au
moins aucuns, comme entre les autres Battus: car il
dit qu'il n'auoit peu gagner le lieu auquel il auoit
esté enuoyé, & s'en reuint derechef à l'oracle se
plaindre, & Apollo luy replicqua,

Mieux que moy sçais que tu n'as point esté

En la Lybie, où enuoyé ie t'ay:

Si tu y vas, tu feras grand' sagesse.

& le renuoya derechef ainsi. Et Lyfander n'ayant
pas bien sceu cognoistre la motte Archelide, que
son surnommoit autrement Alopecos, & la riuere
d'Oplites,

Et le serpent fils de la terre mere,

Le cauteleux assaillant par derriere,

il perdit la bataille, & fut tué en ces lieux-la par
Inachion Alartien, qui auoit pour sa deuse à son
escu vn Dragon peint. Et n'est ia besoing de vous
en reciter plusieurs autres anciés tels, qui sont mal-
aisez à rememorer & à retenir, car ie sçay que vous
les sçauiez bien. Mais maintenant graces à Dieu, les
affaires dont on vient enquerir nostre Dieu, sont
en repos. Et quant à moy ie l'aime bien mieulx
ainsi, & m'en contente: car il y a vne grande paix
& tranquillité, la guerre est cessée, & ne fault plus
courir ça & là par le monde. Il n'y a plus de sedi-
tions ciuiles, ny plus d'vsurpations de Tyrannies,
& d'autres anciens trauaux & miseres de la Grece,
lesquelles auoient besoing de diuerses drogues &
medecines pour y remedier. Mais là où il n'y a rien
de

A de diuersité, rien de secret, rien de dangereux, ains toutes les demandes & interrogatoires des particuliers sont de petites choses vulgaires & populaires, comme sont les questions que lon propose à l'eschole, Si lon se doit marier, Si lon doit entreprendre vn voyage par mer, S'il fault emprunter à vsure: & les plus grandes propositions & demandes des villes sont, De la fertilité des biés de la terre: de la multiplication du bestial: de la santé des corps: vouloir embrasser cela en des vers, forger de longues circunlocutions, vser de mots estranges &

B obscurs à des interrogatoires qui demandent vne courte, simple & claire responce, ce seroit à faire à vn Sophiste ambitieux, qui feroit gloire de bien composer des oracles. Et puis la Pythie de soy mesme est genereuse de nature, & quand elle descend là, & qu'elle est avec le Dieu, elle a plus de soing de la verité que de la gloire, & ne se soucie pas qu'il y ait des hommes qui la louent & qui la blasment, & seroit meilleur que nous mesmes fusions aussi tels. Mais au contraire, maintenant nous sommes comme en bransle & en crainte, que

C le lieu ne perde la reputation qu'il a eüe par l'espace de trois mille ans, & qu'il n'y ait quelques vns qui l'abandonnent & cessent d'y venir, comme si c'estoit l'eschole d'un Sophiste qui craignist de perdre son credit, & d'estre abandonné: & songeons des defenses, & feignons des causes & des raisons des choses dont nous ne sçauons rien, & qu'il ne nous appartient pas de sçauoir, pour recõforter & remettre celuy qui s'en plaint, & pour tascher de le

persuader, là où nous le deussions laisser aller : car D
ce sera luy mesme à qui il cuira le premier, aiant
telle opiniõ de nostre Dieu, qu'il approuue & a en
estime ces anciennes sentences des sages, qui sont
» escriptes à l'entree du temple, *Cognoy toy mesme,*
» Rien trop, principalemēt à cause de leur brefueté,
comme contenant en peu de paroles vne sentence
bien serree & pressée, & par maniere de dire, bien
battue à froid : & ce pendāt il reprent & accuse les
oracles modernes, pour ce qu'ils disent les choses,
la plus part du temps, briefuement, simplement &
de droit fil. Et ces dictz la notables des sages an- E
ciens ressemblent aux riuieres courantes par vn
destroit fort ferré, là où l'eau se presse si fort que
lon ne voit point atrauers, aussi ne comprend on
pas le fond de leur intelligence ny leurs sens. Mais
si tu consideres ce qui en est escript ou dit, par ceux
qui se sont efforcez de cõprendre iusques au fond,
ce que vouloit donner à entendre chascune d'icel-
les sentences, tu trouueras qu'à peine sçauroit on
trouuer des oraisons plus longues que celles la.
Or le langage de la Pythie est tel, comme les Ma-
thematiciens definissent la ligne droite la plus F
courte qui puisse estre entre deux poinçts : aussi ne
fait il aucune courbe ny aucun cercle, ny double-
entente, ny ambiguité, ains va de droit fil à la ve-
rité : & bien qu'il soit subiect à estre examiné &
dangereux d'estre mescreu, toutefois iusques icy il
n'a donné aucune prise ne preuue par où on l'ait
peu conuaincre de faulseté, & ce pendant il a rem-
ply tout ce temple de dons, de presens & offrâdes,

A non seulement des peuples Grecs, mais aussi des Barbares, & de beauté & magnificence de structure & fabricque des Amphictyons: car vous y voyez beaucoup d'adionctions de bastimens qui n'y estoient pas au parauant, & plusieurs reparations & restitutions en son entier des anciens, qui estoient ou fondus, ou gastez de vieillesse. Et tout ainsi comme nous voyons qu'aupres des grands arbres bien branchus & bien verdoyans, il en germe & pullule d'autres petits: aussi voions nous qu'aupres la ville de Delphes, l'assemblée de Pylæ florit &

B vient en vigueur, prenant pasture de l'abondance & affluence qui est icy, de sorte qu'elle commence à auoir apparence & forme des assemblees és eaux sacrees, telle qu'en mille ans au dessus elle ne l'a iamais peu acquerir semblable. Aussi ont les habitans de Galaxius au pais de Bœoce, senty & aperceu l'assistance & faueur de nostre Dieu, par la quantité & affluence grande de laiçt: car de toutes leurs brebis pissoit le laiçt, ne plus ne moins que l'eau viue qui sourd d'une fontaine, dont en grande haste ils emplissoient leurs tôneaux, & n'y

C auoit ny cruche, ny outre, ny vaisseau en leurs maisons, qui ne fust tout plein de laiçt. Et à nous autres encore nous baille il de plus euidentes & plus claires marques, & signes plus vtiles de sa presence & faueur, que ne sont ceulx-la, aiants mis nostre pais de seicheresse, solitude deserte, & poureté où parauant il estoit, en toute abondance, frequence de peuple, splendeur & honneur, où nous le voions maintenant. Il est vray que certainement ie

m'en aime mieulx moy mesme, de ce que i'ay esté **D**
bien affectionné & vtile à tenir la main à cela avec
Polycrates & Petreus, & aime aussi celuy qui nous
a esté l'auteur premier de ce gouvernement &
police, & qui a pris le soing avec nous de icy esta-
blir & mettre sus tout cela : mais il n'eust pas esté
possible qu'en si peu de temps il y eust eu vne si
grande & si euidente mutation, si Dieu ne nous
eust assisté & aidé à sanctifier & mettre en reputa-
tion son oracle. Mais tout ainsi qu'anciennement
il y auoit des gens qui reprenoiét l'ambiguité, obli-
quité & obscurité des oracles, aussi y en a il main- **E**
tenant qui calomnient la trop grande simplicité
de ceux qui se rendét à present, desquels la passion
est fort iniuste & fort folle : c'est comme font les
ensans qui sont plus aises & aiment mieulx voir
l'arc en ciel, les comettes, les courônes ou aires qui
apparoissent autour du corps du Soleil ou de la
Lune, qu'ils ne font pas le Soleil & la Lune mes-
mes : aussi ceulx-cy demandent des ænigmes, des
paroles couuertes, des figures, des translations, qui
ne sont que toutes reflexions de la diuination en
l'imagination & apprehension de nostre entende- **F**
ment mortel. Et s'ils n'entendét la cause suffisam-
ment à leur appetit de telle mutation, ils s'en vont
condamner Dieu, & non pas nous ny eux mesmes,
qui ne peuuent par le discours de la raison com-
prendre le conseil & l'intention de Dieu.

A D V D A M O N O V E S P R I T
 F A M I L I E R D E S O C R A T E S,
 E N F O R M E D E D E V I S.

A R C H I D A M V S.



'A y souuenance, Caphisias, d'auoir ouy vn propos qui n'est pas mauuais d'vn peintre qui faisoit comparaiſon de ceux qui venoient regarder les tableaux qu'il auoit peints : car il diſoit que les ignorâts ſpectateurs, & qui n'entendent rien en l'art de la peinture, reſſembloient à ceux qui ſaluënt en troupe tout vn peuple : & que les ſçauans & bien entendus en l'art, reſſembloient à ceux qui ſaluënt par nom & par ſurnom chaſcun de ceux qu'ils rencontrent : par ce que ceux la n'ont pas vne cognoiſſance exquiſe, ains ſuperficielle & groſſiere des ouurages : & au contraire ceux-cy faiſans iugement à part de chaſcune des parties de l'œuure l'vne apres l'autre, ne laiſſent rien à conſiderer, à remarquer & nommer, de ce qui y eſt bien ou mal fait. Si me ſemble que tout de meſme és vrayes & non peintes actiõs l'entendement des hommes laſches & pareſſeux ſe contente de ſçauoir & entendre ſeulement le ſommaire & l'iſſue du faiçt : mais au contraire celuy des hommes diligents amateurs des choſes belles & hõneſtes, ne plus ne moins qu'vn aigu & excellent

spectateur de vertu, comme d'une art grande, préd
 plus de plaisir à ouïr les particularitez par le me-
 nu, d'autant que la fin ordinairement a beaucoup
 de choses communes avec la fortune : mais le bon
 sens se voit mieux és causes, & en la vertu des par-
 ticulieres occurrences & affaires qui se presentent,
 quand la hardiesse se montre non estonnée, ains
 bien aduisee au fort des perils, où il fault que le
 discours de la raison soit meslé avec la passion
 qu'apporte la soudaineté presente du danger. Or
 pense donc que nous soions de ce genre la de spe-
 ctateurs, & nous recite maintenant des l'entree, B
 comment tout ce faict est passé, & a esté executé,
 & quels propos y ont esté tenus, estant vraysem-
 blable que tout y a esté dit en ta presence: car quāt
 à moy i'ay si grande enuie de l'entendre que ie ne
 feindrois point d'aller iusques à Thebes pour le
 sçauoir, si ce n'estoit qu'il semble aux Atheniés que
 ie fauorise encore à ceste heure aux Bœotiens oul-
 tre le deuoir. C A P H I S I A S. Certainement, Ar-
 chidamus, puis que tu as si grande enuie de sçauoir
 & entendre comme cest affaire est passé, pour la
 bienueillance que tu nous portes, il eust fallu, F
 comme dit Pindare, mettre deuant tout autre af-
 faire, le venir icy expres pour te le raconter : mais
 estans icy venus en ambassade, & nous trouuās de
 loisir, en attendant la responce que nous vouldra
 faire le peuple d'Athenes, restiuer & faire le fas-
 cheux, en refusant d'obtéperer à si ciuile requeste,
 d'un personnage tant affectionné enuers ses amis,
 seroit resueiller l'ancien reproche que lon faisoit
 aux

A aux Bœotiens, qu'ils haïssioient les lettres & le bien parler, lequel reproche commence à se passer & estaindre chez vostre Socrates, & si en ce faisant il semble que nous traittons d'affaires chez deux presbtres. Parquoy voiez & sachez si ces Seigneurs icy presens sont disposez à ouir le recit de tant de propos, & de tant de faicts, pour ce que tu me commandes d'y adiouster aussi les propos, car la narration n'en fera pas courte. ARCHIDAMVS. Tu ne les cognois pas, Caphisias, mais ils sont bien dignes d'estre cogneus: car ils sont yssus de gens de bien, & qui ont esté bien affectionnez enuers nostre país. Cestui-cy est Lyfithides neueu de Thra-sybulus, & cestui-cy Timotheus fils de Conon: ceux-cy sont les enfans d'Archinus, & les autres sont noz familiers amis, de sorte que tu as vn auditoire beneuole, & qui prendra plaisir d'ouir ceste narration. CAPH. Tu parles bien: mais d'où seroit il bon que ie commâcasse mon propos, pour ne redire point ce que vous sçauiez desia bien? ARCHID. Nous sçauons presque, Caphisia, l'estat auquel estoit la ville de Thebes, auant le retour des bannis, Comment Archias & Leontidas eurét intelligence avec Phœbidas Capitaine Lacedemonien, & luy persuaderent durant la paix de surprendre d'emblee le chasteau de la Cadmee, & cōment cela aiant esté executé ils chasserent aucuns des citoyens hors de la ville, & en meirent d'autres en prison, dominans ce pendant eux tyranniquemēt & violemment: ce que i'ay bien peu sçauoir, parce que i'estois hoste de Melon & de Pelopidas,

& tant qu'ils furent en exil hors de leurs maisons, D
 i'ay hanté & conuersé tousiours fort familieremēt
 avec eux. Aussi sçauons nous d'auantage comme
 les Lacedemoniens condamnerent Phœbidas en
 l'amende pour auoir occupé & saisi le chasteau de
 la Cadmee, & comme ils le rappellerent du voia-
 ge d'Olynthe, où ils l'enuoyoit, & neantmoins
 despescherent Lyfanoridas avec deux autres Ca-
 pitaines, au lieu de luy, & meirent grosse garnison
 dedans le chasteau. Aussi entendismes nous bien,
 comme Ismenias fut assez meschammēt tué, apres
 qu'on luy eut fait ie ne sçay quel proces, par ce E
 que Gorgidas escriuoit tout de poinct en poinct
 aux bannis par deça, de sorte qu'il ne te reste à re-
 citer sinon le retour d'iceux bannis, & la surprise
 des Tyrans. C A P H. Enuiron ces iours la, Archi-
 damus, tous nous autres qui estions de la ligue &
 de l'intelligence, fouldions nous assembler en la
 maison de Simmias, qui se reuenoit & guarissoit
 d'vne bleceure qu'il auoit receuë en la cuisse, & là
 conferions secretemēt ensemble, s'il estoit besoin,
 de noz affaires, mais à descouuert nous y commu-
 niquions des lettres & de la philosophie, y attirant F
 bien souuent Archias & Leontidas, qui n'estoient
 point alienes de telle conference & communica-
 tion, à fin de destourner toute souspeçon de telle
 assemblee: car Simmias aiant esté longuement en
 pais estrange parmy les Barbares, & en estant re-
 tourné à Thebes peu de temps au parauant, estoit
 plein de contes nouueaux & de propos estranges
 des nations Barbares, de sorte que quand Archias
 estoit

A estoit de loisir, il l'en escoutoit volontiers discour-
 rir, s'y trouuant avec nous autres ieunes gens, outre
 ce qu'il estoit bien aise que nous nous adonnissions
 à l'estude des lettres, plustost qu'à penser & pren-
 dre garde à ce qu'ils faisoient eux ce pendant. Et le
 iour propre auquel sur le soir quand la nuict close
 seroit venue, les bannis se deuoient trouuer secret-
 tement au pied de la muraille, il arriua de ceste vil-
 le vn homme que Pherenicus enuoyoit, que nul
 de nous ne cognoissoit, sinon Charon, & nous
 certifia que douze des plus ieunes & des plus gail-
B lards des coniuerez estoient avec des chiens en la
 montagne de Citheron, là où ils chassoient, pour
 se trouuer en la ville sur le soir, & qu'ils l'auoient
 enuoyé deuant, pour nous aduertir de cela, & pour
 sçauoir qui seroit celuy qui bailleroit la maison, en
 laquelle ils se cacheroient quand ils seroient arri-
 uez, à fin que quand ils en seroient bien aduertis
 ils s'y en veinssent rendre tout droit. Cest hom-
 me delibera de s'en retourner incontinent en dili-
 gence deuers les bannis : & lors Theocritus le de-
 uin me serrant fort la main, & regardant Charon
C qui marchoit deuant : Cestui-cy, dit-il, Caphisias,
 n'est pas philosophe, & n'a point de lettres exqui-
 ses ny de sçauoir excellent, comme son frere Epa-
 minondas, & neantmoins tu vois, comme estant
 naturellement poulsé & cōduit par les loix à l'hon-
 neur & à la vertu, il s'expose volontairement au
 danger de la mort pour deliurer son pais : & ce pé-
 dant Epaminondas qui a esté mieux instruit &
 nourry à la vertu que nul autre des Bœotiens, est

ainsi mouffe, & fait du restif quand il est question d'executer vne si grande entreprise pour la deliurance de son pais. A quelle meilleure occasion sera il iamais mieux disposé ny plus preparé à s'employer pour sa patrie? Le luy respondy, Nous faisons, gentil Theocritus, ce que nous auons trouué bon, conclud, & arresté entre nous, mais Epaminondas ne nous aiant peu donner à entédre, & faire croire ce qu'il pèse luy, qu'il vault mieux ne faire pas ce que nous entreprenons, à bon droit resiste à ce à quoy sa nature repugne, & n'approuue pas ce à quoy on le cōuie: car il ne seroit pas raisonnable de contraindre vn medecin, lequel promettrait de guarir le mal autremēt sans feu ny fer, d'vser d'incision ou de cautere. Comment, dit Theocritus, il n'approuuoit doncques pas la cōspiration? Non pas, dis-ie, de faire mourir aucun des citoyens qu'ils ne fussent premierement condamnez par la Iustice: mais bien, disoit-il, que si sans meurtre & effusion de sang des citoyés ils vouloient tascher à deliurer la ville, il leur aideroit fort volontiers. Et voiant qu'il ne nous pouuoit induire à croire ses raisons, & que nous poursuiuions nostre chemin, il nous pria de le laisser pur & incôtaminé du sang de ses citoyens, & sans coulpe espier & attendre l'occasion à laquelle avec iustice il peust s'attacher à ce qui seroit vtile pour le public: car le meurtre, dit-il, ne se contiendra pas dedans les limites qu'il faudroit, ains croy-ie bien, disoit-il, que Pherecides & Pelopidas à l'aduēture s'adresseront principalement à ceux qui sont auteurs de la tyrannie, &

qui

A qui sont meschans: mais vn Eumolpidas & vn Samiadas, hommes ardents de cholere & violens, prenant licence de la nuit, ne poseront iamais les armes, ny ne renguaineront ia leurs espees, qu'ils n'aient premierement réply toute la ville de meurtres, & qu'ils n'aient fait mourir plusieurs des principaux de la ville. Comme ie deuisois ainsi avec Theocritus, Anaxidorus nous aiant entre-ouis: car il estoit tout aupres de nous: Arrestez vous, dit-il, car ie voy Archias, & Lyfanoridas le Capitaine Spartain, qui sortent du chasteau, & semble qu'ils

B viennent le grand pas droit à nous. Nous arrestames, & Archias appellant Theocritus, & l'approchant à part de Lyfanoridas, deuisa longuement avec luy, le tirant hors du chemin, vn peu au dessous du tēple d'Amphion, de maniere que nous estions en vne extrême agonie, qu'ils n'eussent quelque suspicion de nostre entreprise, ou quelque decouuerture, de laquelle ils enquisent Theocritus. En ces entrefaittes, Phyllidas que tu cognois, Archidamus, qui estoit lors Greffier & Secretaire sous Archias, estant Capitaine general, arriua là,

C qui dit tout hault à Archias, Ils viendront. Et estant de nostre intelligence, me prit comme il auoit accoustumé par la main, & tout ouuertement commença à nous railler & mocquer de noz exercices, & de la luitte, & puis me tirant à part, assez loing des autres, il me demanda si les bannis viendroient pas ce iour la. Le luy respondy, que ouy. I'ay doncques, dit-il, bien à propos préparé le festin au iour d'huy pour festoyer Archias en mon logis,

& pour le liurer aisément entre leurs mains quand D
 il sera bien saoul, & qu'il aura bien beu. Tresbien,
 luy dis-ie, Phyllidas, & te prie de tascher à les as-
 sembler tous, ou le plus qu'il sera possible de noz
 ennemis ensemble. Il n'est pas facile, dit-il, &
 plustost est il impossible, car Archias esperant
 qu'une Dame d'estat & de qualité le doit là venir
 trouuer au iourd'huy, ne veut pas que Leontidas
 y soit, tellement qu'il nous est force de les diuiser
 & separer par leurs maisons: mais si Archias &
 Leontidas sont vne fois attrapez, ie pense que les
 autres s'enfuiront de belle heure, ou bien qu'ils de-
 moureront quoyz, se contentans bien que lon leur
 donne assurance de leur vie. Nous le ferons aussi,
 dis-ie, mais quel affaire ont ils avec Theocritus, au-
 quel ils deuissent si longuement? Phyllidas respon-
 dit, Je ne le sçay pas certainemēt, ny comme l'ayant
 ouy, mais i'ay entendu qu'il y a des signes fascheux
 & mauuais presages sur la ville de Sparte. Comme
 Theocritus fut retourné à nous, Phidolaus Haliar-
 tien nous venant alencontre: Simmias, dit-il, vous
 prie que vous l'attendiez vn peu icy: car il interce-
 de pour Amphitheus, par le moien de Leontidas, F
 taschant faire que la peine de mort luy soit com-
 muee en bannissement. Voila qui vient bien à
 poinct, dit Theocritus, & comme s'il eust esté fait
 à poste expressément: car ie te voulois demander,
 quelles choses lon auoit trouuees dedans la sepul-
 ture d'Alcmena, & quelle en estoit la veüe quand
 on l'a ouuerte en vostre pais, & si tu y auois esté
 present quand Agesilaüs y enuoya pour en faire
 rappor-

A rapporter les reliques à Sparte. Phidolaus respondit, le ne m'y trouuay pas present, & m'en courrouçay & tourmentay bien fort alencontre de noz citoyens, mais ils m'abandonnerent. Au reste on y trouua avec les ossemens & reliques du corps vn carquant de cuiure qui n'estoit pas grand, & deux vrnes de terre pleines de terre, laquelle pour l'antiquité s'estoit desia conuertie en pierre. Au dessus de la sepulture y auoit vne table de cuiure aussi, où il y auoit des lettres fort anciennes & merueilleuses: car on n'en peut iamais rien lire, combien que les

B lettres apparussent bien, apres que lon eut fait lauer & nettoyer le cuiure, mais c'estoit vne certaine forme de caracteres estrange & barbaresque, qui ressembloit fort aux lettres des Ægyptiens. Et pourtant Agefilaus en enuoya, ce disoit on, vne copie au Roy d'Ægypte, le priant de les monstrer à leurs presbtres, pour veoir s'ils y entendoient rien. Mais à l'aduenture que Simmias nous en pourroit bien dire quelques nouvelles, aiant enuiron ce temps la fort hanté & prattiqué avec les presbtres Ægyptiens pour la philosophie. Et ceux de la ville

C d'Aliarte ont opinion que la grande sterilité & le desbordement & inundation du lac n'aduint pas fortuitemment, mais que c'estoit vne vengeance diuine sur ceux qui auoient souffert & enduré que lon euentast celle sepulture. Et lors Theocritus apres auoir fait vn peu de pause, les Lacedemoniens mesme en font aussi menassez de l'ire des Dieux, ainsi que presagissent des signes & prodiges dont me parloit à ceste heure Lyfanoridas, qui

de ce pas s'en va en la ville d'Aliarte pour faire recomblent ceste sepulture, & y offrir les effusions funebres à l'ame d'Alcmena & d'Aleus suiuant ie ne sçay quel oracle, ne sçachant qui est cest Aleus: & retourné qu'il sera de là, il doit aussi chercher la sepulture de Dirce, que les Thebains ne cognoissent pas s'ils ne sont capitaines de la cheualerie: car celuy qui sort de cest office, mène celuy qui y entre seul de nuict, là où ils font quelques ceremonies sans feu, dont ils effacent & confondent puis apres les signes & les marques & puis s'en vont en tenebres, l'un deçà l'autre delà. Mais quant à moy **E** Phidolaus, ie croy qu'il ne la trouuera point autrement: car la plus part de ceux qui ont esté legitimement Capitaines de la cheualerie, ou plustost pour mieux dire, tous sont en exil, exceptez Gorgidas & Platon, lesquels ils n'interrogueroient iamais, par ce qu'ils les redoubtent. Et ceux qui sont en l'estat maintenant prennent bien la lance & l'anneau dedans le Chasteau de la Cadmee, mais au demourant ils n'en sçauent ny n'en monstrent rien. Ainsi que Theocritus disoit cela, Leontidas sortit avec ses amis, & nous entrans saluâmes **F** Simmias, estant assis sur son liêt, & croy qu'il n'auoit pas obtenu ce qu'il demandoit, car il estoit fort pensif & fort triste, & nous regardant tous au visage: ô Hercules, dit-il, les sauages & barbares meurs d'hommes! Et ne fut-ce doncques pas fort bien respondu à Thales, lequel aiant esté long temps hors de sa maison errant en pais estrange, à son retour, comme ses familiers & amis luy de-

A mandassent ce qu'il auoit veu de plus estrange & plus nouueau, il leur respondit, vn Tyran enuicill-ly: car celuy mesme, qui en son particulier n'a point receu de tort & d'outrage d'un Tyran, toutesfois pour la fascherie & la durescé qu'il y a d'auoir affaire avec eux, il est ennemy de tous ceux qui vsurpent vne souueraine domination, non subiette à rendre compte aux loix. Mais à l'aduenture, dit-il, Dieu y pouruoyera. Au demourant Caphisias, sçais tu qui est cest estrange venu vers vous? Ie ne sçay, dis-ie, de qui tu parles. Si est-ce, dit-il, que Leontidas me vient de dire, que lon voit la nuict vn homme qui se léue alentour de la sepulture de Lyfis, accompagné d'une grande suite d'hommes bien en ordre & en bon point, qui se loge là, & couche sur des paillasses, par ce que lon y voit le matin de petits liéts d'ozier franc & de bruyere, & si y voit on des marques de feu, & des effusions & oblations de lait, & que des le matin il demande aux premiers qu'il rencontre, sil trouuera les enfans de Polymnius au pais. Et qui pourroit estre, dis ie, cest hoste-la, car à r'ouir conter ce doit estre quelque gros personnage, & non pas vn homme priué, de bas estat. Non, ce dit Phidolaüs, mais quant à celuy la, quand il viendra il sera bien venu, & nous le receurons. Mais pour le present, Simmias, si d'aduenture tu sçais quelque chose touchant les lettres dont nous estions n'agueres en doute, declare le nous: car on dit que les prestres d'Ægypte entendent les lettres d'une table de bröze, que n'agueres Agesilaus

prit chez nous, dedās la sepulture d'Alcmena quād
 il la feit ouvrir. Je n'ay point veu ceste table la, Phi-
 dolaiis, respondit Simmias, mais Agetoridas Spar-
 tiate, aiant plusieurs lettres d'Agésilas vint en la
 ville de Memphis deuers le prophete Conuphis,
 avec lequel conferans de la philosophie, nous auōs
 demouré quelque temps moy & Platon, & Ello-
 pion Peparethien : & y vint enuoyé par le Roy A-
 gesilas, qui prioit Conuphis, que s'il entendoit
 quelque chose de ces lettres qui estoiet escrites en
 ce cuiure, qu'ils les luy interpretast & renuoyast in-
 continent. Si fut ce prophete trois iours à part soy
 à feuilleter toutes sortes de figures & caracteres
 des anciennes lettres, & finablement feit responce
 au Roy Agésilas, & nous dit de bouche à nous,
 que ces lettres commandoient aux Grecs, de cele-
 brer des festes & ieux en l'honneur des Muses, &
 que les formes des lettres estoient celles dont on
 vsoit du temps que Proteus regnoit en Ægypte,
 lesquelles Hercules fils d'Amphitryo auoit appri-
 ses, & que Dieu par icelles lettres conseilloit & ad-
 monestoit les Grecs de viure en paix & en repos,
 en instituāt des ieux aux Muses pour l'estude de la
 philosophie & des lettres, & en disputant les vns
 contre les autres avec raisons & paroles de la iusti-
 ce, mettans bas les armes. Quant à nous, nous iu-
 geames bien sur l'heure mesme que Conuphis di-
 soit la verité, mais encore bien plus le dismes nous,
 quand à nostre retour d'Ægypte, ainsi que nous
 passions le long de la Carie, quelques gens de l'isle
 de Delos, nous rencontrerent, qui feirent requeste
 à Pla-

A à Platon, cōme estant bien versé & exercité en la Geometrie, de leur soudre vn oracle estrange & fascheux à entendre que Dieu leur auoit donné: la teneur de l'oracle estoit, Que les Deliés & tous les autres peuples Grecs auroient cessation de leurs maux & miserés, quand ils auroiēt doublé son autel qui estoit au tēple de Delos. Car ils ne pouuoïēt imaginer que vouloit dire la substance de cest oracle, & si se feirent mocquer d'eux, quand ils cuyderent doubler la structure & fabrique de cest autel, car en aiant doublé chasque costé, ils ne se donnerent garde qu'ils auoient faict vn corps solide huit fois aussi grand comme il estoit au parauant par ignorance de la proportion qui double telle grosseur. Si recoururent à l'aide de Platon en ceste difficulté. Et luy se souuenant du presbtre Ægyptien leur dit, que Dieu se iouoit aux Grecs, qui mesprisoient les sciences, comme en leur reprochant leur ignorance, & leur commandant d'estudier à bon escient, & non pas par dessus, en la Geometrie, parce que ce n'estoit pas œuvre d'entendemēt mouffe, ne qui veist trouble, ains qui fust extremement exercité en la science des lignes, que de scauoir trouuer deux lignes moyennes proportionales: qui est le seul moien de doubler vn corps quarré, en augmentant également toutes ses dimensions: & quant à cela que Eudoxus le Gnidien, ou Helicon le Cyzicilien, le leur rendroïēt parfaict. Mais au reste, que Dieu n'auoit que faire de ce redoublemēt la, ny n'estoit pas ce qu'il vouloit dire, ains qu'il commandoit aux Grecs, de quitter les armes

pour cōuerfer avec les Muses, en adoucissant leurs passions par l'estude des lettres & des sciences, & ainsi se comporter ensemble en profitant, & non pas en portât dommage les vns aux autres. Côme Simmias parloit, mon pere Polymnius entra, & se feant aupres de Simmias: Epaminōdas, dit-il, vous prie, & toy, & vous tous qui estes icy, si vous n'avez quelque plus grand affaire, que vous ne failliez de l'attendre icy, voulant vous faire cognoistre cest estranger, qui est quāt à luy gentil & genereux personnage, & si est venu par deça avec vne genereuse & honneste intention, estant des philosophes Pythagoricques d'Italie, & est venu admonesté par quelques visions qu'il a euës en songeant, comme il dit, & quelques apparitions bien euidentes, pour offrir & respandre au bon vieillard Lysis, sur sa rumbe, des effusions que lon donne aux trespassez. Et aiant apporté quand & luy vne bonne somme d'or, il pense estre tenu de payer à Epaminondas la despense qu'il a faite à nourrir & entretenir le bon homme Lysis en sa vieillesse, & veult à touté force cōtre nostre gré & volonté, suruenir à nostre paureté. Dequoy Simmias estant tout resiouy, Tu nous parles d'vn merueilleux homme & digne certes de la philosophie, mais pour quelle cause ne vient il tout droit vers nous? Pource qu'il a couché la nuit sur la sepulture de Lysis, & à mon aduis, Epaminondas l'a mené à la riuere d'Ismenus pour le lauer, & puis ils s'en viendront ensemble icy vers nous: mais premier que parler à nous, il s'est logé sur la rumbe de Lysis, en propos, comme

A ie croy, d'en enleuer les os, pour les emporter quãd
 & luy en Italie, sil n'y auoit quelque Démon qui
 l'en empeschast la nuict. Mon pere aiant dit cela se
 » teut, & lors Galaxidorus: O Hercules, dit-il, com-
 » bien il est difficile de trouuer homme où il n'y ait
 » toujours quelque espece de vanité & de supersti-
 » tion! Car il y en a qui malgré eux sont quelques
 fois surpris de ces passións la, ou pour leur ignoran-
 ce, ou pour leur imbecilité, & les autres à fin qu'on
 les estime plus religieux, plus deuots & plus aimez
 des Dieux, referans leurs actions aux Dieux, com-
B me fils en estoient auteurs, & mettans au deuant
 des inuentions qui leur viennent en l'entendemét,
 des songes & des apparitions de fantasmes, & tou-
 te telle enflée apparence: ce qui à l'aduenture n'est
 pas mal feant ny inutile à ceux qui manient affai-
 res d'estat, & qui sont contraincts de viure au gré
 d'une tourbe populaire desordónee & temeraire,
 pour ramener & retirer avec la superstition, com-
 me avec vn mors de bride, vne populace. Mais ce
 masque non seulement me semble indecent &
 laid à la philosophie, mais aussi contraire à sa pro-
C fession, par laquelle elle nous promet de nous en-
 seigner tout ce qui est bon & vtile avec la raison,
 & puis apres referer le principe des actions aux
 Dieux, comme mesprisant la raison & deshonorãt
 la preuue de la demonstration en ce où elle semble
 plus estre excellente, en se tournant à ie ne sçay
 quels oracles, & ie ne sçay quelles visions de son-
 ges, en quoy le plus méchant bien souuent recon-
 tre autant, comme fait le plus homme de bien du

monde. C'est pourquoy il m'est aduis que nostre Socrates s'est seruy & a vſé de la forme d'enseigner qui est la plus digne d'un philosophe, simple, sans fard ne fiction quelconque, l'ayant choisie comme la plus franche & plus amie de la verité, & aiant renuoyé & reietté la vanité & la mine, comme vne fumee de la philosophie, aux Sophistes. Adonc Theocritus prenant la parole: Comment, dit-il, Galaxidorus, Melitus t'a il dōcques persuadé, aussi bien qu'aux iuges, que Socrates mesprisoit les choses diuines? car c'est dequoy il l'accusa enuers les Atheniens. Nullement, dit-il, quant aux choses diuines, mais prenant la philosophie des mains de Pythagoras, & d'Empedocles pleine de derisions, de fables, de superstitions & de fantasmes, & faisant la folle à bon escient, il l'a accoustumee de s'attacher sagement aux choses qui sont, & à reconnoistre qu'en raison sobre gist la verité. Soit ainsi, dit Theocritus, mais quant à l'esprit de Socrates qu'en disons nous? est-ce vne menterie & vne fable, ou quoy? Car quant à moy, il me semble que tout ainsi comme Homere feint que Minerue assistoit à tous les trauaux & perils d'Ulysses, ainsi que des le commencement la diuinité attacha à Socrates vne vision qui le guidoit en toutes actions de sa vie, laquelle vision seule marchant deuant luy estoit comme vne lumiere en affaires où lon ne voyoit goutte, & qui ne se pouuoient comprendre ny colliger par raison & prudence humaine, comme bien souuent l'esprit parloit avec luy, gouvernant & inspirant diuinement ses intentions.

A Et qui en voudroit auoir plus grand nombre de preuues & de plus merueilleuses, il les faudroit ouir de Simmias, & des autres qui ont vescu familièrement avec luy : mais quant à moy, i'en diray vn exemple que i'ay veu deuant mes yeux, & où i'ay esté present. Vn iour que i'allois chez le deuin Eutyphron, Socrates montoit à mont (comme il t'en peut bien souuenir Simmias, car tu y estois aussi) vers le lieu appellé Symbole, & vers la maison d'Andocydes, interrogant par le chemin tousiours, & harassant de questions Eutyphron, par maniere
B de ieu : & lors il s'arresta tout soudain, & s'appuya demourant attentif vn assez long temps, puis s'en retournant tout court, s'en alla par la rue des faiseurs de coffres, & fit rappeler ceulx de ses familiers qui estoient deuant, par ce que son esprit luy defendoit d'aller par là. Si y en eut la plus part qui retournerent quand & luy, entre lesquels i'en fus vn, suiuant tousiours Eutyphron : mais quelques autres ieunes hommes voulurent aller tout droict de propos deliberé, comme pour conuaincre l'esprit de Socrates, & attirerent avec eulx Charillus le
C ioueur de flustes, qui estoit aussi venu à Athenes quand & moy deuers Cebes : & ainsi comme ils cheminoient par deuant les boutiqueques des statuaires le long du palais où se tient la Iustice, ils trouuerent au deuant d'eulx vn grand troupeau de porceaux fort ferrez tous pleins de fange & de vilenie, & poulsans tous en foulle pour le grand nombre qu'ils estoient, & qu'il n'y auoit moien de se destourner, ils porterét aucuns de ces ieunes hom-

mes par terre, & enfangerent tous les autres. Si re-
 tourna Charillus au logis, les iambes & les cuysses
 & tous ses habillemens pleins de bouë, de sorte
 qu'il nous fait bien souuenir avec grandes risées de
 l'esprit familier de Socrates, nous esmerueillans
 comme la diuinité n'abandonnoit iamais ce per-
 sonnage la, qu'elle n'en eust tousiours soing en tout
 & par tout. Et Galaxidorus: Cuydes tu donc que
 cest esprit familier de Socrates ait esté quelque
 propre & peculiere puissance, & non pas vne par-
 celle de la commune necessité qui confirmoit cest
 homme par longue experience à donner le con-
 trepois & le panchement pour le faire incliner de-
 ça ou dela en choses obscures & difficiles à conie-
 cturer par discours de la raison? Car tout ainsi cō-
 me vne liure par elle seule ne mène pas la balâce,
 mais là où le pois est entre deux fers, si on l'adiou-
 ste à l'vn ou à l'autre costé, elle tire à soy & fait pā-
 cher le tout de ce costé la: aussi vne vne voix, ou
 quelque autre signe petit & leger n'est pas suffi-
 sant pour attirer vne graue pensèe à faire quelque
 chose, mais adiousté à l'vn des deux discours con-
 traire, elle soult toute doute & toute difficulté e-
 stant toute l'inegalité ostee, de sorte qu'il se fait
 alors vn mouuement & inclination. Adonc mon
 pere prenāt la parole: Mais i'ay, dit-il, entendu Ga-
 laxidorus, d'vn certain Megarien, qui l'auoit aussi
 ouy dire à Terpsion, que cest esprit n'estoit autre
 chose qu'vn esternuemēt de luy ou des autres qui
 estoient alétour de luy. Car si vn autre en sa com-
 pagnie esternuoit à la main droicte, soit qu'il fust
 deuant,

A deuant, ou qu'il fust derriere, il inclinoit à faire ce qui se presentoit : & si il estoit à la main gauche, il s'en deportoit : & si c'estoit luy mesme qui esternuast, quād il estoit en doute de faire ou non quelque chose, il se cōfirmoit à la faire : & si c'estoit lors que la chose estoit desia cōmancee, il l'arrestoit, & empeschoit son inclination à la parfaire. Mais c'est ce que ie trouue estrange, si il est vray qu'il vfast de ceste obseruation d'esternuer, cōment il disoit donques à ses amis, que c'estoit vn esprit familier qui l'incitoit ou le retenoit de faire aucune chose. Car

B cela, mon bel amy, ne pouuoit proceder que d'une folle vanité & d'une presumptueuse ostentation, non pas d'une verité & fraîche simplicité : en quoy nous estimons, que ce personnage la veritablemēt a esté grand & excellēt par dessus les autres, si pour quelque voix venant de dehors, ou pour quelque esternuemēt il se troubloit & se deportoit de continuer vne action qu'il eust encōmancee, & abandonnoit son dessein & sa deliberation : là où il semble au contraire, que les motiōs & inclinations de Socrates auoient vne fermeté & vne vehemence

C durable à quoy que ce fust qu'il se meist, cōme celles qui procedoient d'un droict, puissant & fort iugement & principe. Car il demoura volontairemēt en pauvreté toute sa vie, là où il pouuoit auoir beaucoup de biens si il en eust voulu receuoir de ses amis, qui eussent esté bien aises de luy en donner : il ne s'est iamais departy de la philosophie, pour tant de grands empeschemens qu'il en eust : & finalement luy estāt facile de s'enfuir, & de se sauuer par

le moien que ses amis luy en dōnoient, & l'instance qu'ils luy en faisoient, iamais il ne se laissa amollir ny plier aux prieres de ses amis, ny pour la mort presente ne desista point de se iouër en paroles, cōme de coustume, ains eut tousiours la raison ferme & stable au plus fort du peril. Cela ne sont pas actes d'homme qui se laissast transporter à vne voix ou à vn esternnement de quelque resolution qu'il eust prise, ains qui estoit mené & conduit par vne plus grande regence & plus puissante domination à son deuoir. P'entens aussi qu'il predict à quelques vns de ses familiers la perte & desfaiçte de l'armee des Atheniens en la Sicile. Et deuant cela encore, P'yrilampus fils d'Antiphō aiant esté pris par nous en la chasse, & en l'execution de la victoire de Delion blecé d'un coup de iaueline, quand il entendit de ceulx qui furent enuoyez d'Athenes vers nous pour traicter de la paix, que Socrates avec Alcibiades & Laches, estans descendus au chemin de Reriste, estoient retournez à sauueté, nous dit, que Socrates l'auoit par plusieurs fois rappellé, & quelques autres de ses amis & de sa bāde, lesquels s'enfuyants avec luy le long de la montaigne de Parnes, furent attainçts & tuez par nos gens de cheual, pour n'auoir pas obey à l'esprit familier de Socrates, & auoir pris vn autre chemin à la fuitte de la bataille, que celuy par où il les guidoit. Je pèse que Simmias mesme l'a ouy comme nous. Ouy certes, dit Simmias, plusieurs fois & de plusieurs personnes, car pour tels exemples l'esprit familier de Socrates fut fort celebré & renommé à Athenes.

Quoy

A Quoy d'ocques, ce dit Phidolaus, souffrirons nous, ô Simmias, que ce Galaxidorus icy en se iouant raualle si fort vne si grande œuure de la diuination, & la face esuanouir en ie ne sçay quelles voix, & ie ne sçay quels esternuemens, deſquels signes le vulgaire, & les hommes ignorants se seruent par rifee en choses legeres & de nulle consequence: mais où il est question de si grand danger, & d'affaires de telle consequence, alors il aduient ce que dit le poëte Euripides,

Là où il fault de la vie combattre,

B Il n'y a nul qui iouë ny follastre.

Et Galaxidorus, Si Simmias, dit-il, Phidolaus, en a ouy dire quelque chose à Socrates mesme, ie suis prest à l'ouir, & à luy pardonner avec vous: mais quant à ce que toy & Polymnis en dittes, il est facile à le refuter. Car cōme en la medecine le poulx & la pustule n'est pas de foy grande chose, mais bien signe de grande chose: aussi à vn gouuerneur & pilote de nauire, le bruit de la mer ou la veuë de quelque oiseau, ou de quelque petit nuau rare courant par l'air, signifie du vent, & vne violente tempeste en la mer: aussi à vne ame diuineresse vne voix ou vn esternuement de foy n'est pas grande chose, mais ils peuuent estre signes de bien grands accidets. Car en nulle art & sciēce, on ne mesprise le iuger peu de beaucoup, & par petites choses de bien grandes: comme si quelque ignorant, qui ne sçauroit pas la force des lettres, les voiant peu en nombre, & de forme vile & contempuble, ne pouuoit pas croire qu'un homme docte en peust lire

& reciter les grandes guerres qui ont esté par le **D** passé, & les fondations des villes, les gestes & fortunes aduenues aux grands Roys, & qu'il dist qu'il y auroit quelque chose qui tout bas luy diroit & declareroit ces histoires la, il donneroit vne belle enuie de rire & de se mocquer plaisammét de son ignorance, à ceux qui luy orroient dire cela. Aussi regarde que nous, pour ne cognoistre la vertu & l'efficace de chasque presage à signifier l'aduenir, ne nous courroucions sottement, si quelque homme prudét & sage par ces signes-la predict quelque chose incogneuë, & mesme sil dit que ce n'est **2** point vne voix ny vn esternuement, mais vn esprit familier qui luy ait déclaré. Car ie viens maintenant à toy Polymnius, qui admires & estimes Socrates, cōme personnage qui par sa ronde simplicité, sans fard ny vanité quelconque, a plus humanisé, par maniere de dire, c'est à dire, attribué à la raison humaine, la philosophie, sil n'appelloit pas son signe, vne voix ou vn esternuemét, ains tragicquement le nommoit vn esprit familier. Car au contraire ie m'esmeruillerois plus tost, si vn hōme si bien emparlé, si disert, & qui auoit le lāgage tant **P** à main, cōme Socrates, disoit que ce fust vne voix ou vn esternuemét, & non pas vn esprit diuin qui luy eust enseigné, comme si quelqu'un disoit, qu'il auroit esté blecé d'une fiesche, non pas de celuy qui auroit lasché la fiesche: & que la balance auroit pezé, & non pas celuy qui tiendroit & manieroit la balance: car l'œuure ne depend pas de l'instrument, mais de celuy à qui est l'instrument, & qui

A en vse pour faire son ouurage : & le signe & l'instrument dont vse & se sert celuy qui deuine, est ce qui prognostique & signifie . Mais comme i'ay dit, il nous fault escouter ce que Simmias nous en dira , comme celuy qui le sçait plus certainement. Et Theocritus : Ouy bien , dit-il , mais apres que nous aurôs veu qui sont ceulx cy qui entrêt ceans : & certes c'est Epaminondas qui nous amène ce personnage estrâger. Nous regardasmes tous vers la porte, & veismes Epaminôdas qui marchoit deuant, accôpagné de Ismenodorus, de Bacchilidas,

B & de Melissus le ioueur de flustes : l'estranger suiuoit apres , homme de belle presence, & face liberale, monstrant vne douceur grande & humanité en son visage, accoustré & vestu venerablemēt. Si luy fut baillé siege aupres de Simmias, & mon frere se seit aupres de moy, & chascun des autres ainsi comme il se trouua : & l'estant fait silence, Simmias adressant sa parole à mon frere : Et bien, dit-il, Epaminondas, qui est cest estranger icy, d'où est-il, & comment a il nom ? car c'est vn commencement ordinaire , & vne entree de cognoissance & d'entretien. Il a nom , respondit mon frere , Theanor, Simmias, natif de la ville de Crotone, l'vn de ceulx qui pardela font professiô de la philosophie, ne faisant point de deshônneur à la gloire du grand Pythagoras, ains estant icy venu de l'Italie par si long chemin pour confirmer par bonnes œuures, sa belle & bonne doctrine. Mais toy , Epaminondas, m'empesches de faire des bonnes œuures la meilleure & la plus belle . Car s'il est honneste

C

de faire bien à ses amis, il ne peult estre deshonne-
 ste d'en receuoir de ses amis, car pour estre grace, il
 est autant besoing qu'il y ait vn receuant, comme
 vn dōnant, estant la grace composee de tous deux,
 tendant à œuvre vertueuse, & celuy qui ne la re-
 çoit, comme vn ballon qui a esté bien enuoyé, il le
 deshonne, le laissant cheoir à terre, & demourer
 court. Car quel but y a il que lon soit si aise d'at-
 taindre en y tirant, & si marry de le faillir, comme
 de faillir à faire bien à vn homme qui en est digne,
 quand on le desire? Et encore en ceste comparai-
 son la, celuy qui fault à donner au but, lequel de-
 meure ferme, c'est sa faulte, mais icy celuy qui re-
 fuse & qui fuit, c'est celuy qui fait tort à la grace,
 laquelle par son refus ne peult atteindre là où elle
 pretend. Or t'ay-ie desia recité les causes pour les-
 quelles ie suis venu par deça, mais ie les veux reci-
 ter aussi à ces gens de bien icy presents, à fin qu'ils
 me soient iuges alencontre de toy. Quand les col-
 leges & societez des philosophes pythagoriés, qui
 estoient en chasque ville de nostre país, eurent esté
 dechassez par la part & sedition des Cyloniens,
 ceulx qui estoient encore ensemble, tenans leur
 conseil en la ville de Metapont, les seditieux mei-
 rēt le feu de tous costez en la maison où ils estoiet,
 & les y bruslerent tous ensemble, exceptez Philo-
 laus & Lysis, qui estoient encore ieunes, gaillards
 & dispos, lesquels se sauuerent à trauers le feu, &
 Philolaus se retirant au país des Lucaniens se sau-
 ua là avec ses amis, lesquels commançoient desia
 à se rallier & auoir du meilleur alencontre de ces
 Cylo-

A Cyloniens. Quant à Lysis on fut long temps que lon ne sceut qu'il estoit deuenu, iusques à ce que Gorgias Leontin, retournant de la Grece de par deça en la Sicile, apporta nouuelles certaines à Arcesus qu'il auoit parlé à Lysis, & qu'il se tenoit en la ville de Thebes. Si fut Arcesus en volenté de monter incontinent sur mer pour l'aller trouuer, tant il en auoit grand desir, mais pour sa vieillesse & foiblesse, se trouuât indisposé à faire vn tel voiage, il ordonna par testament que sur tout on rame-nast Lysis viu, si estoit possible, en Italie, ou pour

B le moins ses reliques & ses os, si d'aduéture il estoit mort : mais les guerres, les seditions & tyrannies qui ont esté depuis, ont empesché que ses amis n'ont peu de son viuant accomplir la charge qu'il leur auoit ordonnee. Mais depuis que l'esprit de Lysis, estant ia decedé, nous eut visiblement & manifestement annoncé sa mort, & que ceulx qui l'auoient veu & sceu certainement nous rapporte-
rent, comme il auoit eu vn liberal entretenement de sa vieillesse en vne maison pauure, où il auoit esté tenu & réputé cōme vn des enfans de la mai-
C son, & estoit decedé en tel estat, l'ay icy esté enuoyé ieune & seul par plusieurs & plus anciens, qui ont de l'argent, & vous en dōnent à vous qui n'en auez point, en recompense de beaucoup de grace & d'a-mitié qu'ils ont receu de vous. Car Lysis a esté hō-nestement enseuely par vous en honorable sepul-ture, & plus encore honorable luy est la grace qui en est payee à ses amis par ses confreres. Ainsi que l'estranger parloit, les larmes vindrent aux yeulx

de mon pere, qui plora longuement pour la sou-
 uenance de Lysis. Et mon frere se riant à moy, cō-
 me estoit sa coustume, Que ferons nous, dit il, Ca-
 phisia ? quitterons nous nostre pauureté pour de
 l'argēt, & si nous nous tairons ? Rien moins, dis-ic,
 nous ne la quitterons point nostre bonne amie,
 sage nourrice des ieunes gens : mais toy defens la,
 car c'est à toy à parler. Et toutefois, dit mon pere,
 ie n'auois doute que ma maison fust prenable à
 l'argent, sinon par cest endroit seulement du corps
 de Caphisias, qui auroit befoing d'vne belle robbe,
 à fin de se monstrier pompeusement à ceux qui luy **E**
 font l'amour qui sont en si grand nombre, & de
 beaucoup de viande & de nourriture, à fin de du-
 rer au travail des exercices, & aux combats qu'il
 luy fault soustenir aux escholes de la luitte : mais
 puis que celuy cy duquel i'auois plus de defiance,
 n'abandonne point la pauureté, ny ne laisse point
 comme vne teinture l'indigence paternelle & he-
 reditaire, ains encore qu'il soit ieune adolescent, il
 se repute bien paré, & fait gloire de frugalité, se cō-
 tentant de sa presente fortune, en quoy voudrons
 nous plus employer, & à quel vsage nous seruir de **F**
 l'argent ? Voudrons nous dorer noz armes, & cou-
 uir nostre bouclier, comme faisoit Nicias l'Athe-
 nien, d'or meslé avec de la pourpre ? Et r'achette-
 rons nous à toy, mō pere, vn beau mâteau de drap
 de Milet, & à ma mere vne belle cotte d'escarlatte ?
 car certes nous n'abuserons pas de ce present pour
 traicter nostre ventre, en nous festoyant plus gras-
 sement & plus opulument que de coustume,
 comme

A comme aians receu en nostre logis vn hoste sumptueux, qui est la richesse. Oste mon fils tout cela, dit mon pere, i'à Dieu ne plaise que ie voye iamais vn tel changemēt en ma maison. Et toutefois aussi ne demourerōs nous pas assis en nostre logis, pour l'y garder oisif, car telle grace seroit trop desagreceble & mal plaisante, & la possession sans honneur. A quoy faire donc le receurions nous, mon pere? Voila pourquoy il sembla dernièrement à Iason le Capitaine des Theffaliens, que ie luy eusse fait vne responce rustique & inciuile, quand il enuoya icy vne grosse somme d'or, & me pria de la recevoir en don. Et ie luy manday, qu'il me faisoit tort, & me commançoit la guerre, d'autant que luy affectant & aspirant à vne Monarchie, il me venoit tenter & solliciter de me corrompre par argent, simple citoyen d'vne ville libre & viuant sous les loix. Mais quant à toy, amy estrangier, i'approuue ta bonne volonte, par ce qu'elle est honneste & vertueuse, digne d'vn philosophe, & l'aime singulierement, mais ie te dis que tu apportes des drogues medicinales à hommes qui ne sont point malades. Tout ainsi doncques comme si aiant entēdu que lon nous feist la guerre, tu fusses venu nous apporter des armes & des bastons de defense pour nous secourir, & puis qu'estant arriué sur les lieux tu eusses trouué que nous fussions en paix & en bonne amitié avec noz voisins, tu n'eusses pas estimé deuoir donner & laisser ces armes la à ceulx qui n'en auroient que faire; aussi tu es venu pour nous porter & dōner aide & secours

alencontre de la pauureté, comme si elle nous tra-
 uailloit, mais au cōtraire elle nous est aisee & plai-
 sante à porter, & sommes bien aises de l'auoir en
 nostre maison logee chez nous, & pourtāt ne nous
 fault il point d'armes ny d'argent alencontre d'elle
 qui ne nous fait aucū desplaisir. Mais tu feras rap-
 port à tes freres de pardela, qu'ils vsent treshonne-
 stement de leurs biens & de leurs richesses, mais
 aussi qu'ils ont des amis pardeça qui vsent bien de
 la pauureté: au demourant quant à la nourriture,
 funerailles & sepulture de Lysis, il nous les a luy
 mesme bien rendues & payees, nous aiant ensei-
 gné entre autres belles & bōnes choses, à ne crain-
 dre point, & ne nous fascher point de la pauureté.
 Theanor adonc prenant la parole: Cōment, dit-il,
 si c'est faulte de cœur que de craindre la pauureté,
 comment aussi ne sera-ce faulte de iugement de
 redoubter & fuir la richesse? Cela n'est il pas hors
 de tout propos, mesmement si ce n'est pas avec
 raison, ains par mine seulement, ou par vne vanité
 & vne sottise qu'on la reiette & la refuse? Et quelle
 raison y a il qui sceust defendre l'acquisition &
 possession des biens, qui se fait par tous iustes &
 honnestes moiens, comme fait Epaminondas? mais
 plustost pour ce que tu t'es assez donné à enten-
 dre en la responce que tu as fait touchant cecy au
 Thessalien Iason, ie te demande Epaminondas,
 estimes tu qu'il y ait quelque sorte de dōner argent
 qui soit iuste & legitime, & qu'il n'y en ait nulle
 d'en prendre, ou si tous ceulx qui donnent & tous
 ceulx qui prēnent pechent? Non, ie ne le pense pas,
 respondit

A respondit Epaminondas, ains estime que des biens & richesses, comme de toute autre chose, il y a vne largition & possession qui est honneste, & vne autre qui est deshóneste. Et bien, dit Theanor, celuy qui donne volontiers & de bon cœur ce qu'il doit, à sçauoir fil ne le donne pas honnestement? il le confessa. Et celuy qui reçoit ce qui se donne honnestement, ne le prend il pas aussi honnestement? Ou peult il estre plus loyale & iuste prise d'argent, que celle qui se prend de celuy qui donne iustement? Le croy qu'il n'y en sçauroit auoir de plus

B iuste, dit Epaminondas. Entre deux amis donc, fil est iuste que l'vn donne, il est iuste aussi que l'autre prenne: car és batailles il se fault bien destourner de deuant celuy des ennemis dont on a receu quelque plaisir: mais aux bien-faiçts il n'est ny beau ny hóneste de fuir ne reietter celuy qui donne iustement entre amis: car si la pauureté de foy n'est point mauuaise, aussi n'est pas la richesse à ainsi reietter & mespriser. Non vrayement, ce dit Epaminondas: mais il fault que tu consideres avec nous, qu'il y a en nous plusieurs cupiditez & de plusieurs

C choses, les vnes naturelles, que lon appelle, & nées avec nous, se germans en nostre chair pour les voluptez qui luy sont necessaires: les autres sont estrangeres venuës de vaines opinions, lesquelles prenás force & vigueur par traict de temps & longue accoustumance en vne mauuaise nourriture, bien souuent tirent à bas & atterrent nostre ame avec plus de force & de violence que ne font pas les naturelles. Or la raison par bonne accoustu-

mance & exercitacion vertueuse nous dōne moien D
 d'en espuiser beaucoup, de celles mesmes qui sont
 nées avec nous, mais il fault employer toute la for-
 ce & puissance de l'accoustumance & exercitacion
 encontre les concupiscences qui sont estrangeres,
 & qui viennent d'ailleurs, pour les consumer, re-
 trencher & chastier par toutes voyes de repressiōs
 & retentions raisonnables: Car si la resistance que
 fait la raison à l'appétit de boire & de manger force
 bien souuent la faim & la soif, bien plus facile luy
 fera il de retrécher l'auarice & l'ambition, en s'ab-
 stenant & gardant des choses qu'elles conuoient, E
 tant qu'à la fin elles en demeureront toutes des-
 confites. Ne te semble il pas ainsi? L'estranger le
 confessa. Vois-tu doncq, qu'il y a difference entre
 l'exercitacion, & l'œuure à laquelle se dresse l'exer-
 citacion? Et tout ainsi comme de l'art qui enseigne
 les exercices du corps, vous pourriez dire, que
 l'œuure en seroit l'æmulation, l'effort & la conten-
 tion pour obtenir le pris de la courōne alencontre
 de son aduersaire, & l'exercitacion la preparation
 que fait le cōbattant pour y rendre son corps apte
 & dispos par continuation d'exercices: aussi me F
 confesseras tu qu'il y a difference entre la vertu &
 l'exercitacion à la vertu. L'estranger le confessa.
 Or me dy doncques premierement, s'abstenir de
 villaines & illicites voluptez, que penses tu que ce
 soit, exercitacion à la continence, ou plustost l'œu-
 ure & la preuue de la continence? Je pense que ce
 soit l'œuure & la preuue: & l'exercitacion & assue-
 factiō à l'abstinēce, n'est-ce pas ce que vous mes-
 mes

A mes faittes, quand apres vous estre trauaillez le
 corps, & apres auoir prouocqué comme des bestes
 sauuages voz appétits, vous vous mettez à table &
 y demourez lóg temps, les tables chargees de tou-
 tes exquisés & diuerses viandes, sans y toucher, &
 les laissez à voz vallets pour s'engorger & faire
 grand' chere: & ce pendant vous prenez quelque
 bien peu de chose simple, estants desia voz concu-
 piscéces toutes estaintes & amorties: car l'abstinen-
 ce des voluptez permises est exercitation alencon-
 tre des defendues. Ouy certes, dit l'estranger. Il y
 B a doncques aussi, amy, quelque exercitation de la
 iustice alencontre de l'auarice & de la conuoitise
 d'auoir, qui n'est pas de n'aller point la nuict des-
 rober & piller les maisons de ses voisins, ny de ne
 destrouffer point les passans, ne si aucun ne trahit
 point ses amis & son país pour de l'argent, cestuy-
 la ne s'exerce pas contre l'auarice: car la Loy, peult
 estre, & la crainte refrene & retiét sa cupidité d'of-
 fenser autruy: mais celuy qui souuétefois s'abstient
 & se garde volontairement des iustes gains, & qui
 luy sont concedez & permis par les loix, celuy la
 C s'exerce & s'accoustume à se tenir loing de toute
 iniuste & illegitime prise d'argent. Car il n'est pas
 possible qu'en grandes voluptez, mais mauuaises
 & pernicieuses, l'ame se puisse contenir de les ap-
 peter, si au parauant souuentefois estant en pleine
 liberté d'en iouir, elle ne les a mesprisees, & n'est
 pas aisé de passer par dessus, & mespriser des grãds
 proufits meschãs, & de grands gains qui se presen-
 tent, à qui de longue main n'a domté & chastié la

conuoitise de gagner & d'auoir, laquelle par assez **D**
 d'autres habitudes & actions est nourrie & exer-
 citee à vouloir tousiours impudemment gagner,
 & fuit apres les iniustices, s'abstenant bien fort à
 grand' peine & malaisémēt d'outrager quelqu'un
 pour son proufit. Mais elle n'assaudra iamais vn
 personnage qui ne se fera point abandonné à re-
 ceuoir des dons & largesses de ses amis, ny à pren-
 dre des presents des Roys, qui aura renoncé mes-
 mes aux benefices de la fortune, & qui aura esloi-
 gné & retiré l'auarice brillant apres vn thresor qui
 luy sera apparu: iamais, dis-ie, elle ne l'assaudra **E**
 pour le tenter de faire quelque iniustice, ny iamais
 ne luy troublera son entendement, ains s'en seruira
 paisiblement à faire toute chose honneste, aiant le
 cœur assis en bon lieu, & ne sentāt rien dedans qui
 ne soit grand & bon. Voila les hommes dont Ca-
 phisias & moy sommes amoureux. Et c'est pour-
 quoy, Simmias, nous prions cest homme de bien
 estranger, de nous laisser suffisamment exercer en
 la pauureté, pour paruenir à celle vertu. Apres que
 mon frere eut acheué ce propos, Simmias aiant
 deux ou trois fois croullé la teste, C'est vn grand **F**
 homme, dit-il, c'est vn grand homme qu'Epami-
 nondas, dequoy est cause ce bon pere Polymnius,
 qui des le cōmancemēt a dōné vne telle nourritu-
 re & educatiō en la philosophie à ses enfans: mais
 quant à cela, amy estrāger, accorde t'en avec eulx.
 Au demourāt ie te demande, si c'est chose qui nous
 soit loisible de sçauoir, si tu remueras les reliques
 de Lysis hors de sa sepulture, & les transporterás
 en

A en Italie, ou bien si tu nous les laisseras icy entre ses amis & bien-veullans, qui seront bien aises d'estre logez avec luy quand nous ferons par de là. Et Theanor se riant à luy, Il semble, Simmia, que Lysis se trouue bien par deçà, & n'en veuille point bouger, n'y ayant eu faulte de rien honneste, par le moien d'Epaminondas. Mais il y a quelques saintes ceremonies particulieres que nous obseruons es sepultures de noz confreres Pythagoriens, lesquelles si nous n'auons euës à nostre trespas, nous ne pensons pas auoir attainé la fin heureuse que

B nous desirons. Quand doncques nous eusmes par songes cogneu la mort de Lysis (car nous auons certain signe, auquel nous cognoissons si c'est l'image d'un viuant ou d'un trespasé) plusieurs eurent fantasie qu'estant mort en pais loingtain, estranger, il auroit esté autrement inhumé, & qu'il le falloit remuer de là où il estoit, à fin qu'estant transporté il eust les seruices des obseques accoustumees en nostre societé. Et estant venu par deçà en ceste pensee, & aiant esté incontinent conduit par ceux du pais en sa sepulture, sur le soir ie luy ay versé les

C effusions des mortuaires, euocquant son ame, à fin qu'elle me vint instruire comment ie deuois me gouverner en cela: & la nuit se passant ie n'ay rien veu, mais bien m'a il semblé que j'ay ouy vne voix qui me disoit que ie ne remuasse point ce qui ne se deuoit point remuer, par ce que le corps de Lysis auoit esté saintemēt inhumé par ses amis, & que son ame estant desia iugee auoit son congé pour s'en aller à vne autre natiuité, accouplée avec vn

autre Démon. Et le matin en aiant conferé avec **D**
 Epaminondas, & entendu la maniere comme il
 l'auoit inhumé, i'ay cogneu comme il auoit esté
 bien instruiet iusques aux plus secrets poincts de
 nostre religion, & qu'il auoit vn mesme Démon &
 esprit pour guide de sa vie, si ie ne suis mal expert
 à cōiecturer par la nauigation le pilote: car les che-
 mins sont bien larges de la vie, mais il y a peu d'hō-
 mes que les Demons y conduisent. Theanor donc
 aiant dit cela, ietta son regard sus Epaminondas,
 comme si derechef il eust voulu contempler ses
 mœurs & son naturel, par l'inspection de sa face. **E**
 En ces entrefaittes le chirurgien arriué destia le
 bendage de la playe de Simmias, comme pour le
 penser: & Phyllidas qui entra apres luy avec Hip-
 posthenidas, commanda à Charon & à Theocri-
 tus de nous leuer, puis nous tira à part en vn coing
 du portique, estant fort troublé à veoir son visage.
 Et comme ie luy demandasse, Qu'y a il de nou-
 ueau, Phyllidas? Il n'est, dit-il, rien arriué de nou-
 ueau pour moy: car ie l'auois preueu & vous l'a-
 uois bien pedit, redoubtant la lascheté de Hip-
 posthenidas, que vous ne luy communiquissiez point **F**
 vostre entreprise, ny ne le receussiez point en la
 compagnie. Ces paroles nous meirent en vn grād
 estonnement. Et Hipposthenidas, Ne dy point
 cela ie te prie, dit-il, au nom des Dieux, ny ne
 veuilles estre la cause de la destruction de ceste
 ville, & de nostre ruine quāt & quant, en pensant
 que temerité soit hardiesse, & ayes patience que
 ces personnages retournent à sauueté en la ville,
 fil

A fil est ainsi en la fatale destinee. Et Phyllidas aguifé de cholere, Dy moy, dit-il, Hipposthenidas, cōbien penses tu qu'il y ait d'hommes qui sachent nostre secret? l'en cognois, dit-il, ce me semble, iusques à trente. Puis qu'il y en a doncques tant, dit-il, pourquoy est-ce que toy seul as esté alencontre, & empesché ce qui auoit esté cōclud & arresté par tous, aiant enuoyé vn homme à cheual aux bannis qui estoient desia acheminez pour venir icy, & leur as mandé qu'ils s'en retournaissent arriere, & qu'ils ne poursuiussent pas leur chemin pour au iourd'huy?

B Pour ce, dit-il, que la fortune leur a d'elle mesme procuré, à la plus part, leur retour. Quand Hipposthenidas eut dit cela, nous nous en trouuasmes tous troublez: & Charon entre les autres iettant son œil fiché bien asprement sur luy, O meschant hōme que tu es, dit-il, que nous as tu fait? Rien de mal, dit Hipposthenidas, si laissant ceste aspreté de voix courroucée, tu veux auoir patience d'ouir & entendre les raisons d'vn homme qui est de ton aage, & qui a le poil aussi blanc comme toy: car fil n'est question que de monstrier à noz citoyens que

C nous sommes hardis & courageux, sans faire compte d'aucun peril de la vie, il y a encore beaucoup du iour, n'attendons point le soir à venir, allons nous-en tout de ce pas courir sus aux Tyrans avec noz espees au poing, tuons les, mourons y, & ne nous espargnons point. Cela n'est difficile ny à faire, ny à souffrir, mais de deliurer la ville de Thebes de tant d'ennemis armez qui la tiennent, & d'en ietter dehors la garnison des Spartiates,

pour deux ou trois hommes morts il n'est pas facile: car Phyllidas n'a pas tant appresté de vin pour son banquet, qu'il y en ait suffisamment à enyurer les mille cinq cens soldats de garde d'Archias: mais encore que nous tuions aussi celuy la, Crippidas & Arcesus sobres attendent la nuit pour faire le guet. Qu'est il besoing doncques de nous haster d'attirer noz amis en vne mort toute euidente & certaine, mesmement que noz ennemis sont aucunement aduertis qu'ils reuiennent? Car pourquoy est-ce qu'il auroit esté fait par eux commandemēt à ceux de Thespies de se tenir prests avec leurs armes au troisiéme iour qui est cestuy cy, & qu'ils se tinssent en ordre pour partir quand les Capitaines des Lacedemoniens les manderoient, & si doiuent comme i'entens au iourd'huy faire mourir Amphitheus quand Archias sera venu, apres l'auoir interrogué & luy auoir donné la torture. Ne sont ce pas de grands signes que l'entreprise leur est decouuerte? Ne vult il pas bien mieux differer vn peu de temps iusques à tant seulement qu'ils aient appaisé les Dieux? Car les deuins aiants sacrifié vn bœuf à Ceres. disent que le feu du sacrifice denonce vne grande sedition, & vn grand peril à la chose publique: & ce qui merite bien que toy particulièrement, Charon, y prennes garde, c'est que hier Hypatodorus fils de Erianthes, homme de bonne sorte au demourant, & qui ne sçait rien de ce que nous auons entrepris, me dit, Charon est bien ton familier amy, Hipposthenidas, & à moy non geres: aduertis le donc, si bon te semble, qu'il se prenne gar-

A ne garde de quelque danger fascheux & estrange qui le regarde : car la nuit passée en songeant il me fut aduis que sa maison estoit comme en travail d'enfant, & que luy & ses amis en estants eulx mesmes en destresse faisoient prieres aux Dieux pour elle, & luy assistoient à ce travail tout alentour, mais qu'elle mugissoit criant & iettant ie ne sçay quelles voix non articulees, iusques à ce que finalement il en sortit du dedans vn grand feu, dont la plus part de la ville fut incontinent embrasée, & le chasteau de la Cadmee tout couuert

B & enuelpé de fumee, mais la flamme n'en vola pas à mont. Voila la vision que cest homme me raconta, Charon, & qui me meit sur l'heure en vne grande treueur, & encore bien plus quand i'ay entendu que ce iourd'huy les bannis doiuent arriuer en vn logis. Je suis en merueilleuse angosse de crainte, que nous ne nous emplissions de misereres & de maulx, sans en pouuoir faire aucun d'importance à noz ennemis, sinon de mettre toute la ville en combustion : car ie suppose que la ville sera des nostres, & la Cadmee sera

C comme elle est, pour eulx. Adonc Theocritus prenant la parole, & arrestant Charon qui vouloit replicquer quelque chose à cest Hippothenidas : Mais au contraire il n'y a signe, dit-il, qui m'asseur plus à continuer ceste entreprise, encore que i'aye tousiours eu de bons presages pour les bannis en tous les sacrifices que i'ay fais, que ceste vision que tu nous as recitee, s'il est ainsi que tu dis, qu'un grand feu clair ait esclairé & enflammé tou-

te la ville, sortant d'une maison amie, & que la re-
 traitte & demourance de noz ennemis ait esté
 noircie & obscurcie de fumée, laquelle n'apporte
 jamais rien de meilleur que larmes & toute con-
 fusion: & qu'il sorte d'entre nous des voix non ar-
 ticulees, cela, encore que lon le veuille prendre
 en mauuaise part à cause de la voix, sera quand no-
 stre entreprise souspeçonnée d'une suspicion ob-
 scure, douteuse & incertaine tout ensemble, ap-
 paroistra & obtiendra. Au reste les mauuais signes
 des sacrifices touchent non au public, mais à ceux
 qui sont maintenant les plus forts. Comme Hip-
 posthenidas parloit encore, ie luy demanday: Mais
 qui as tu enuoyé deuers eux, car s'il n'est bien auã-
 cé nous enuoyerons bien apres. Ie ne sçay, Ca-
 phisias, à vous dire la verité, si vous le pourriez
 atteinre, car il a vn des meilleurs cheuaux qui soit
 en toute la ville de Thebes, & est homme que vous
 cognoissez tous, car c'est celuy qui gouerne les
 chariots de Melon, & auquel Melon a luy mes-
 me des le commencement descouuert l'entreprise.
 Et à l'heure mesme l'apperceuant, Est-ce point,
 dis-ie, Chlidon que tu veux dire, Hipposthenidas,
 celuy qui l'annee passée gaigna le pris de la course
 des cheuaux à la feste de Iuno? Celuy la mesme,
 dit-il. Et qui est donc celuy la que ie voy qui at-
 tend, il y a ia long temps à la porte? C'est Chli-
 don luy mesme, dit-il, par Hercules. O Dieux,
 ya il point encore quelque chose de pis aduenu?
 Et luy voiant que nous le regardions, s'approcha
 tout bellement de nous. Hipposthenidas luy
 faisant

A faisant signe de la teste qu'il parlast deuant tous, & qu'il n'y auoit point de danger, d'autant qu'ils estoient tous gens de bien: **I**e les cognois tresbien, dit-il, Hippolthenidas, & ne t'ayant trouué ny en ta maison, ny en la place, i'ay bien pensé que tu serois venu deuers eux, & m'y en suis venu à la plus grande haste que i'ay peu, à fin que vous entendisiez au vray comme tout est allé: car cōme tu m'auois commandé qu'à toute diligence i'allasse rencontrer noz gens en la montagne, ie m'en suis allé en mon logis pour y prendre mon cheual. **S**i ay demandé à ma femme la bride, mais elle ne me l'a sceu bailler, ains ay attendu bien long temps en la chābre, & apres l'auoir bien cherchee par tout, & remué tout ce qu'il y auoit de mesnage en nostre maison, apres s'estre bien iouee de moy, finalement elle m'a confessé l'auoir prestee à nostre voisin, sa femme la luy aiant demandee à emprunter hyer au soir: dequoy ie me suis fort aigremēt courroucé à elle, & luy en ay dit des iniures: & elle de l'autre costé s'est mise à me dōner des maledictions abominables à dire, & à faire priere aux Dieux, **q**ue malheureuse fust mon allee, & plus encore malencōtreux mon retour, ce que les Dieux veulent plustost retourner sur sa teste d'elle mesme: à la fin elle m'a rāt irrité que ie l'ay tresbien battue, & y est incōtinent accouru grand nōbre de voisins & de femmes, de sorte qu'apres auoir fait & souffert vne grand' honte, à peine suis peu venir iusques à vous, pour vous prier d'euoyer vn autre qui face vostre message à ces hōmes que vous scauez,

car quāt à moy ie suis pour le present hors de moy, D
& me trouue tout mal. Il nous prit sur l'heure à
tous vn merueilleux changement de volonté &
d'affection, car au lieu que vn peu deuant nous
nous courroucions de ce que lon auoit empesché
leur venue, lors pour la soudaineté de l'occasion
& la briefueté du tēps, voians qu'il n'y auoit plus
moien de reculer, nous en estions en transe & en
crainte, toutefois monstrant bon visage à Hippo-
sthenidas, & le prenant par la main, ie l'encoura-
geay, luy donnant à entendre que les Dieux mes-
mes nous conuioient à l'execution de nostre en- E
treprise. Cela fait Phyllidas s'en alla chez luy pour
donner ordre à son festin & attirer Archias à bien
boire & faire grand chere, & à Charon pour tenir
sa maison preste à receuoir les bannis quand ils ar-
riueroyent: & cependant Theocritus & moy re-
tournaſmes deuers Simmias, à fin qu'aiants trou-
ué l'occasion à propos nous parlissions encore à
Epaminondas, lequel estoit desia entré bien auant
en vne belle question que Galaxidorus & Phido-
laüs auoient au parauant entamee, demandans de F
quelle substance & de quelle nature & puissance
estoit l'esprit familier de Socrates, dont on parle
tant. Or n'entendismes nous pas ce que Simmias
respondit au propos de Galaxidorus, mais bien
dit-il, qu'en aiant vne fois interrogué Socrates luy
mesme, il ne luy en auoit point rendu de responce,
& pour ceste cause que iamais depuis il ne l'en
auoit voulu enquerir: mais bien disoit-il, qu'il
auoit souuent esté present quand Socrates disoit,
qu'il

A qu'il estimoit hommes vains & menteurs ceux qui disoient auoir veu à l'œil quelque chose de diuinité, & au contraire qu'il prestoit l'oreille à ceux qui disoient auoir ouy quelque voix, & les en enquerroit à certes & diligemment, dont il nous donnoit à penser & coniecturer entre nous à part, & à souspeçonner que ce Démon de Socrates ne fust point vne vision, ains vn sentiment de voix & intelligence de paroles qui le venoit à toucher par quelque extraordinaire maniere: comme en songeant ce n'est pas vne voix que les dormans oyent,

B mais ce sont opinions & intelligences de quelques paroles qu'ils cudent ouir prononcer: mais ceste intelligence des songes aduient veritablement aux dormans, à cause du repos & de la tranquillité du corps, mais les veillans ne peuvent ouir qu'à grande peine les aduertissemens diuins, estants trauaillez du tumulte des passions, & de la distraction des affaires, à l'occasion dequoy ils ne peuvent prester leur entendement & pensee à ouir les declarations que les Dieux leur font. Mais Socrates aiant vn entendement pur & net, non agité

C d'aucunes passions, & ne se meslant avec le corps sinon que bien peu pour les choses necessaires, estoit facile à estre touché, subtil & delié pour soudainement estre alteré, par ce qui l'attaingnoit, & ce qui l'attaingnoit nous pouuons coniecturer que c'estoit, non vne voix ou vn son, mais la parole d'vn Démon, qui touchoit sans voix la partie intelligente de son ame, avec la chose qu'elle luy declaroit: car la voix ressemble à vn coup qui est

donné à l'ame, laquelle par les aureilles est con- D
 trainte de receuoir la parole quand nous parlons
 les vns aux autres. Or l'entendement de la nature
 diuine méne & conduit l'ame bien née par la cho-
 se qui luy fait entendre, sans auoir besoing d'autre
 coup, & l'ame luy cede & obeit selon qu'il luy las-
 che ou luy roidit les instincts & inclinations non
 violement pour resistance que luy facent les
 passions, mais soupplés & maniables comme des
 resnes lasches. Et ne s'en fault esbahir, veu que
 lon voit que de petits timons tournent & virent
 de grandes carraques, & d'vn autre costé les rouës E
 des potiers de terre, qui pour peu qu'on les touche
 de la main tournent fort aisément: car bien que
 ce soient instruments sans ame, toutefois ils sont
 contrepesez si faciles & si agiles à rouer, pour la
 polissure qu'on leur donne, qu'ils cedent à la cau-
 se mouuante pour peu d'esbranlement qu'il y ait.
 Or l'ame de l'homme estant roidie & tendue d'in-
 numerables inclinations, comme de cordages, est
 beaucoup plus agile que nul instrument ny outil
 qui soit au monde, qui la sçait manier par raison,
 depuis qu'elle a pris vn peu d'esbranlement à estre F
 esmeuë vers la chose entendue: car les principes
 des instincts & des passions tendent tous à ceste
 partie qui entend, & elle estant vne fois esbranlee
 & secouee, elle tire, tend & roidit tout l'homme,
 en quoy nous est donné à entendre combien de
 force & de puissance a la chose entenduë: car les
 os sont insensibles, les nerfs & la chair pleins d'hu-
 meurs, & la masse de toutes ces parties ensemble
 pesante

A pesante, gifante sans mouuement. Mais aussi tost que l'ame met quelque chose en son entendemēt, & que l'entendement esmeut les inclinations à cela, il se leue tout debout, & se roidissant de toutes ses parties il court, comme s'il auoit des çles, à l'actiō. Et si n'est pas la maniere de ce mouuement, ou roidissement & promptitude difficile, & moins encore impossible à comprendre, par laquelle l'ame si tost qu'elle a entendu attire quant & quant par instincts & inclinations toute la masse du corps: car ainsi comme la raison comprise & entendue sans aucune voix esmeut l'entendement,

B aussi me semble il qu'il n'y a pas beaucoup d'affaire, que vn entendement plus diuin, & vne ame plus excellente ne mēne vn autre entendement inferieur, & le touchant par dehors de la touche que la raison peut toucher à l'autre raison, ne plus ne moins que la lumiere a sa reflexion de la lumiere rebattue. Car à la verité nous nous entredonnons à cognoistre noz conceptions & pensees les vns aux autres, comme tastonnans en tenebres par le moien de la voix. Mais les intelligences des Dēmons, aians leur lumiere, reluyfent à ceux qui sont susceptibles & capables de telle lueur, n'aiants besoing ny des noms ny des verbes, dont vsent les hommes en parlant les vns aux autres, par lesquelles marques ils voient les images & especes des intelligēces & pēsees les vns des autres, mais les intelligences propres ils ne les cognoissent pas, sinon ceux qui ont vne propre & diuine lumiere, comme nous auons dit, combien

que ce qui se fait par le ministère de la voix, con-
 D forte aucunement & aide ceux qui ne peuvent
 croire. Car l'air estant feru & moulé de sons ar-
 ticulez, & deuenant de tout en tout, parole &
 voix, imprime l'intelligence en l'ame de celuy qui
 escoute, tellement que selon ceste similitude la,
 quelle merueille y a il si ce qui est entendu par ces
 superieures natures altere l'air, & l'air alteré pour
 sa qualité facile à receuoir impressions, signifie &
 donne à entendre aux hommes excellents, & de
 rare nature & diuine, la parole de ce qui a enten-
 du. Car ainsi comme les coups qui se donnent
 E contre des boucliers de cüyure s'entendent de
 loing, quand ils procedent du fond du milieu, à
 caute de la resonnance & du retentissement, là
 où ceux qui sont donnez contre autres sortes de
 boucliers, se perdans insensiblement, ne s'enten-
 dent point: aussi les paroles des Dēmons & es-
 prits volans aux oreilles de tous, resonnent & re-
 tentissent seulement aux ames de ceux qui ont les
 mœurs raffises, & les ames tranquilles, lesquels
 nous appellons hommes celestes & diuins. Or le
 vulgaire a bien opinion que la diuinité communi-
 F que avec les hommes en dormant, & puis il trou-
 ue estrāge, & luy semble incroyable, si lon leur dit
 que les Dieux esmeuent tout de mesme les esueil-
 lez, & qui ont le plein vsage de raison. Comme
 qui diroit, qu'vn musicien ioueroit bien de sa lyre
 quand toutes les chordes seroient lasches & des-
 tendues, mais quand elle est bien accordee &
 tendue, qu'il n'y touche ny n'en iouē point: car ils
 n'en

A n'en apperçoient pas la cause qui est dedans eux, c'est à sçauoir le discord, le trouble & la confusion, dequoy estoit exempt Socrates nostre familier amy, comme l'oracle le prophetisa, qui fut donné à son pere, luy estant encore ieune enfant. Car il luy commanda de luy laisser faire tout ce qui luy viendroit en l'entendement, & ne le forcer de rien, nyle destordre, ains de donner la bride lasche à l'instinct & naturel de son enfant, en priant seulement pour luy à Iupiter eloquent & aux Muses, & au demourant ne se soucier point de rechercher

B curieusement plus auant de Socrates, comme aiant dedans luy vn guide & conducteur de sa vie, meilleur que dix mille maistres & pedagogues. Voila, Phidolaus, ce que nous auons senty & iugé, tant du viuant de Socrates que depuis sa mort, touchant son Démon ou esprit familier, en reietant & ses voix, & ceux qui alleguent ces esterneuements, & toutes autres semblables resueries. Mais quant à ce que nous en auons ouy dire à Timarchus de Cheronee, touchant cela, pour ce que lon pourroit estimer, que ce seroient contes faicts à plaisir, il les vault mieux taire. Nullement, ce dit Theocritus, mais ie te prie de les nous vouloir reciter. Car encore que les fables n'expriment pas bien la verité, si est-ce qu'elles la touchent aucunement. Mais premierement dy nous qui estoit ce Timarchus, car ie ne l'ay point cogneu. Il est bien vraysemblable, dit-il, Theocritus: car il estoit fort ieune quand il mourut, & pria qu'on l'inhumast aupres de Lamprocles

le fils de Socrates, qui estoit decedé peu de iours **D**
 au parauant, aiant esté son grand amy, & de mes-
 me aage que luy, & comme ieune homme de gen-
 tille & bonne nature, qui n'agueres auoit com-
 mancé à gouter de la philosophie, desirant sça-
 uoir quelle estoit la nature & la puissance du De-
 mon de Socrates, aiant communiqué sa delibera-
 tion à moy seul & à Cebes, il alla descendre de-
 dans le trou de Trophonius, apres auoir fait pre-
 mierement les sacrifices accoustumez en cest ora-
 cle, & y aiant demouré deux nuités & vn iour,
 comme ia plusieurs desesperassent de son retour, **E**
 & ses parents & amis le plorassent, vn matin il en
 sortit fort resiouy, & apres auoir rendu graces au
 Dieu, si tost qu'il se peut eschapper de la presse, il
 nous raconta beaucoup de merueilles qu'il auoit
 veuës & ouyes, & nous dit qu'estant descendu en
 l'oracle, il trouua premierement des tenebres fort
 obscures, & puis apres auoir fait sa priere, il de-
 moura gisant par terre bien longuement, ne pou-
 uant pas bien certainement asseurer si il dormoit,
 & songeoit, ou si il veilloit : toutefois il luy fut
 aduis qu'il entendit vn bruit qui luy vint donner à **F**
 la teste, & que les coustures de son test s'ouuri-
 rent, par où il rendit l'ame au dehors, laquelle
 estant separee se trouua bien aise, quand elle se
 veit en vn air clair & serain. Si luy sembla pre-
 mierement qu'elle respira, aiant au parauant long
 temps esté tendue & serree, & deuint plus grande
 qu'elle n'estoit, comme vne voile qui est estendue.
 Et luy fut aduis qu'il ouit sourdement, comme vn
 son

A son tournant alentour de sa teste, dont la voix estoit fort douce à ouir: & de là regardant il ne veit plus la terre, mais bien des Isles enluminees & esclairees d'un feu delicat, lesquelles changeoient entre elles de places & de couleurs, selon que la lumiere se diuersifioit en ces mutations, & qu'elles luy sembloient en nombre innumerables, de grandeur excessiues, non toutes de mesme pourpris, mais toutes rondes, & luy sembloit que du mouuement d'icelles, qui tournoient en rond, le ciel en resonnoit, pour ce qu'à l'egalité vnie de leur mouuement respondoit & estoit conforme la douceur & suauité de la voix & de l'armonie composée de toutes, qui en resultoit. Par le milieu d'icelles y auoit vne mer ou vn lac espandu, resplandissante de diuerses couleurs à trauers vn bleu ferain, & qu'entre ces isles il y en auoit peu qui nauigassent par le droict cours de l'eau, & qui trauersassent de là, & plusieurs autres se trainoiēt inegalement & obliquement, de sorte qu'il sembloit qu'elles deussent tomber, & que ceste mer en aucuns endroicts auoit vn grand fond du costé du Midy: mais du costé de Septentrion y auoit des grands marets & platis, & en beaucoup d'endroits elle se respendoit sur la terre, & aux autres elle s'en retiroit, ne faisant pas de grandes sorties: & quant aux couleurs l'vne est simple, & vrayement couleur de pleine mer, l'autre non pure, ains confuse meslee de couleur d'eau de lac. Quant aux reuolutions de ces Isles tournans ensemble, elles les retirent vn peu, & iamais ne cōioingnent la fin

avec le commencement, ny ne font pas vn cercle **D**
 entier & parfait, ains gauchiffent vn peu les bouts
 faisants en tournant vne ligne de tortis & volute.
 Au milieu d'icelles & vers l'endroit le plus grand
 de l'ambiént est enclinee la mer vn peu moins
 des huit parts de l'vniuers, ainsi comme il luy
 sembloit, & auoit icelle mer deux bouches & ou-
 uertures, par lesquelles elle receuoit deux riuie-
 res de feu opposites l'vne à l'autre, de sorte que
 son bleu en estoit pour la plus grande partie offus-
 qué & effacé par vne blancheur. Si dit qu'il pre-
 noit grand plaisir à veoir & considerer toutes ces **E**
 choses la : mais quand il vint à regarder contre-
 bas, il y appercent vne grande fondriere toute
 ronde, comme qui auroit couppé vne boule en
 deux, mais fort profonde & merueilleu semét hor-
 rible, pleine de tenebres, non pas quoyes, ains tur-
 bulentes & bouillonnantes souuent, dont lon en-
 tendoit innumerables mugiffemens & gemisse-
 mens de bestes, les cris infinis d'enfans, & les la-
 mentations de femmes & d'hommes meslez en-
 semble, des bruits, des clameurs & des tumultes de
 toutes sortes, mais sourds & s'amortiffans, comme **F**
 venants d'vn abisme bien profond, & qui l'espou-
 uentoit terriblemēt, iusques à ce qu'apres vn espa-
 ce de temps, il y eut quelqu'vn, lequel il ne voioit
 pas, qui luy dit, ô Timarchus, Qu'est-ce que tu
 desires d'entendre? & qu'il luy respondit, tout: car
 qu'y a il icy qui ne soit admirable? Il est bien vray,
 dit-il, mais quant à nous, nous auons bien peu de
 part és regiós superieures, parce qu'elles appartiennent

A nent à autres Dieux. Mais la portion de Proserpine l'vne des quatre, laquelle nous gouvernons, est bornee par la riuere de Styx : tu la peux bien, si tu veux, visiter. Et comme il luy demandaſt que c'eſtoit que Styx, c'eſt, dit-il, le chemin qui mène aux Enfers, diuiſant les parties contraires de lumiere & de tenebres avec ſa cyme. Car elle prent, comme tu vois, du fond des Enfers, & touche à l'extrémité de la lumiere tout alentour, bornant la dernière partie de l'vniuers, lequel eſt diuiſé en quatre regiments. Le premier eſt celuy de vie, le ſecond

B du mouuement, le tiers de generation, & le dernier de corruption: eſtant le premier attaché au ſecond par l'vnité en ce qui n'eſt pas viſible, & le deuxieme au troiſieme par l'entendement au Soleil, & le troiſieme avec le quatrieme par la nature en la Lune. Et de chaſcune de ces liaiſons-la vne Fec ou Parque en tient la clef, fille de la Neceſſité: de la premiere, celle qui ſe nomme Atropos, c'eſt à dire inflexible : de la ſeconde, Clotho la filandiere: & de la troiſieme en la Lune, Lacheſis le fort, là où ſe fait le ply de la naiſſance. Car toutes les autres

C Iſles ont des Dieux, mais la Lune appartenant aux Dæmons terreſtres fuit la liſiere de Styx, eſtant vn peu plus haulte, en approchant vne ſeule fois de cent ſeptante meſures ſecondes. Ceſte liſiere de Styx approchant, les ames crient d'effroy. Car Enfer en rauit pluſieurs qui gliffent, & la Lune en reçoit d'autres qui d'abas nagét à elle, celles auſquelles opportunément la fin de generation eſt tombée, exceptees celles qui ſont impures & contami-

nees, lesquelles elle foudroyant & bruyant horridement ne souffre point approcher, ains lamentans leur malheur, voians qu'elles ont failly à leur entente, s'en retournent derechef à bas à vne autre natiuité, comme tu vois. Le ne voy rien, ce dit Timarchus, sinon plusieurs estoiles qui en ceste fondriere faultent, & les autres plongent, & d'autres qui reluyent d'abas. Ce sont des Dæmons que tu vois, sans les cognoistre : car voicy comment il en va. Toute ame d'homme est participâte de raison, mais ce qui en est meslé avec la chair, & avec les passions, estant alteré par les voluptez & douleurs **B** deuiet irraisonnable : mais toutes ne s'y meslent pas de mesmes, autant l'vne que l'autre, parce que les vnes se plongēt toutes dedās le corps, & estants troubles de passions courent çà & là toute leur vie : les autres sont en partie meslees avec la chair, & en partie laissent dehors ce qui est le plus pur & moins alteré, & n'est pas tiré à bas, ains demeure comme nageant & flottât par dessus, & touchant seulement au sommet de la teste de l'hōme, le reste estant enfondré dessous au fond, & est comme vn signal suspēdu au dessus du coupeau de l'ame, **F** qui est droict à plomb au dessous, & sort ce signal au dehors, autant comme l'ame luy obeit, & ne se laisse pas maistriser aux perturbations & passions. Or ce qui en est plongé & enfoncé dedās le corps s'appelle ame, mais ce qui est entier & incorrompu, le vulgaire l'appelle l'entendement, estimant qu'il soit dedans eulx, comme és mirouers, ce qui y apparroist par reflexion, mais ceulx qui en iugent droicte-

A droitement à la verité l'appellent Dæmon , comme estant au dehors. Ces estoiles donc que tu vois, qui semblent esteintes , pense que ce sont les ames qui sont totalement plongees & noyees dedans les corps : & celles qu'il semble qu'elles se rallument & retournent à reluire derechef , & qui se remontent d'embas, secouâts quelque brouillats & quelque obscurité , comme quelque fange & ordure, estime que ce sont celles, qui apres la mort retournent hors des corps , mais celles qui vont ainsi au dessus , ce sont les Dæmons des hommes qui ont

B entendement. Parforce toy de voir le lien, par lequel il est attaché à l'ame. Aiant entendu cela, ie commençay à y prendre plus garde , & à contempler ces estoiles branlantes les vnes plus , les autres moins, comme nous voyons les pieces de liege qui nous monstrent , flottants sur la mer , l'endroit où sont les filets des pescheurs, les vns qui tournoient comme les fuseaux & bobines, quand on file, aians vn mouuement tout inegal & perturbé , & ne le pouuans dresser à droit fil : & disoit la voix que

C & ordonné , estoient ceulx qui auoient des ames bien obeissantes aux resnes de la raison, pour auoir eu bonne nourriture & honneste education, & ne monstrans pas leur brutalité terrestre , fangeuse & sauvage : mais celles qui fouruoient inegalement & desordonnément , tantost hault & tantost bas, comme se battans à l'attache , sont celles qui estriuent alencontre du ioug par rebelles & desobeissantes meurs, à cause de leur mauuaise institution.

Car aucunefois en est on maistre, & les tourne lon D
à droict, vne autrefois elles sont courbees par les
passions, & tirees par les vices, ausquels derechef
elles resistent vne autre fois, & se roidissent alen-
contre, & les forcent. Car la liaison qui les lie, est
comme vn mors de bride mis en la bouche de la
brutalité irraisonnable de l'ame. Quand donc ce-
ste bride les retire, elle améne la penitence & re-
pentance que lon appelle apres les pechez, & la
hôte des voluptez illicites & prohibees, qui est vne
douleur & vn remors de l'ame refrence par celuy
qui la gouerne, & qui luy commande, iusques à B
ce qu'estant ainsi chastiee, elle deuienne obeissante
& toute priuee, comme vne beste bien domtee,
sans battre ne luy faire mal, entendant prompte-
ment les signes & marques que luy môstre le Dæ-
mon. Celles la doncques à peine & bien tard se
rengent à la raison, mais de celles la qui sont obeif-
santes des leur origine & commencement de leur
naissance, & qui escoutent leur propre Dæmon,
sont les prophetes qui ont la grace de predire les
choses futures, & des hommes saincts & deuots, du
nombre desquels tu as entendu que l'ame de Her- F
modorus Clazomenien abandonnoit du tout son
corps, & en sortoit & de iour & de nuict, & alloit
errant en plusieurs lieux, & puis apres s'en retour-
noit aiant assisté à plusieurs choses qui s'estoient
faites & dittes bien loing de là, iusques à ce que ses
ennemis par la trahison de sa femme, surprénans
son corps destitué de son ame, le bruslerét dedans
sa maison: cela n'est pas veritable: car son ame ne
sortoit

Afortoit pas du corps, mais obeissant tousiours à son Dæmon, & luy laschant le nœud, luy donnoit moien de courir & d'aller çà & là en plusieurs lieux, de forte qu'ayant veu & ouy beaucoup de choses au dehors, elle luy venoit rapporter, mais ceulx qui luy bruslerent son corps, ainsi comme il dormoit, en sont encore maintenant tormentez en la fondriere du Tartare: ce que, ieune homme, tu sçauras plus certainement dedans trois mois, & pour ceste heure va t'en. Quand ceste voix eut acheué de dire, Timarchus se retournant çà & là

Bvoulut bien regarder qui c'estoit qui luy parloit, mais sentant derechef vne grande douleur de teste, cōme qui luy eust pressée à force il perdit toute cognoissance & tout sentiment de luy, & de tout ce qui estoit autour de luy, & bien tost apres estant reuenu à soy, il se trouua couché dedans le trou de Trophonius aupres de l'entree, comme il l'estoit couché au commencement. Voyla la fable de Timarchus, lequel depuis iustement trois mois apres, ainsi que la voix luy auoit predict, estant retourné à Athenes, vint à mourir. Nous en estants esbahis

Cle contasmes à Socrates, qui nous sceut bien mauuais gré de ce que nous ne luy en auions rien dit du viuant du trespaslé, par ce qu'il en eust bien volontiers enquis & interrogué luy mesme plus particulièrement & plus clairement. Tu as donc, ô Theocritus, ouy le conte & le propos de Timarchus, mais regarde qu'il ne nous faille appeller à nostre secours cest estrangier, pour la decision de ceste question, laquelle est fort propre & conuena-

ble à hōmes deuots & de religion . Et pourquoy, D
dit Theanor , Epaminondas ne nous en dit il son
opinion , attendu qu'il a esté nourry & institué en
mesme discipline & eschole que nous? Et lors mon
pere se prenant à rire, c'est son naturel, amy estran-
ger, d'estre ainsi peu parlant, & taciturne, & crain-
tif à parler , mais insatiable d'apprendre & d'ouir:
& pourtant Spintharus Tarentin aiant demouré
assez long temps par deçà avec luy, disoit qu'il n'a-
uoit iamais parlé à homme qui sceust tant , ne qui
parlast moins que luy. Mais dy nous donc ce que
tu sens toy mesme, touchât ce qui a esté dit. Quant E
à moy, dit-il, j'estime que ce propos & discours de
Timarchus , comme sacré & inuiolable, doit estre
consacré à Dieu , sans y toucher : mais ie m'esbahy
fil y aucun qui decroye ce que Simmias a dit , veu
qu'ils nomment bien des cygnes sacrez , des dra-
gons, des chiens, & des cheuaux, & neant moins ils
n'appellent pas Dieu *φίλογυς*, c'est à dire aimant les
oyseaux, mais ils l'appellent *φιλάνθρωπος*, c'est à dire
aimant les hommes. Tout ainsi doncques comme
vn homme qui aime les cheuaux , n'aime pas tous
les particuliers qui sont compris sous ceste espece F
la, mais en choisissant tousiours quelqu'un excel-
lēt par dessus les autres , il le dresse à part & le
nourrit, & l'aime singulierement : Aussi les diuins
esprits qui sont au dessus de nous, choisissent les
meilleurs de nous à part du troupeau, auxquels ils
impriment leurs marques, & les estiment dignes
d'une propre & particuliere education, les dres-
sans non avec resnes & longes, mais avec la raison,
par

A par certains signes & marques, dont les vulgaires, qui n'ont rien par dessus le reste du troupeau, n'ont aucune cognoissance ny experience. Car ny les communs chiens n'entendent les signes des veneurs, ny les communs cheuaux les sifflets des escuyers, ains ceux qui ont esté bié dressez & appris, qui au moindre sifflet & houppet du mōde, entendent incontinent ce qu'on leur cōmande, & se rendent là où il fault. Ce que Homere mesme semble auoir entédu, & cogneu la differéce qu'il y a entre nous autres hōmes. Car entre les deuins il en appelle aucūns *διογοπίλους*, regardeurs d'oysseaux, autres *ιερείς*, regardeurs de sacrifices, & les autres, il estime qu'ils predisent & preuoyent les choses secretes & à aduenir, en entendāt parler les Dieux mesmes,

Mais Helenus en son diuin esprit

De ces deux Dieux le conseil bien comprit.

Et vn peu apres,

Je l'ay ouy dire aux Dieux immortels.

Car ainsi cōme ceux qui ne sont pas domestiques & familiers des Roys, Princes & Capitaines, entendent leurs conseils & volontez par le moien des signes de feu, ou par le son des trompettes, mais à leurs plus feaux & familiers ils parlent eux mesmes de vne voix : Aussi Dieu parle à peu de gens & rarement, & au commun des hommes il donne des signes, dont est composee l'art de diuination. Car les Dieux prennent peu d'hommes en recommandation pour orner ainsi leurs vies, ains seulement ceux qu'ils veulent rendre singulierement heureux & vrayemēt diuins. Mais au reste les ames

deliurees de toute generation, estants desormais **D**
de loisir, libres & desliées d'auec le corps, deuie-
nent puis apres Dæmons, qui ont soing, cure & so-
licitude des hommes, selon que dit Hesiodé. Car
ainsi comme les champions qui ont autrefois fait
profession de la luitte, & des autres exercices du
corps, apres encore qu'ils ont cessé de plus exercer
le mestier pour raison de leur vieillesse, ne laissent
pas pourtant du tout le desir & appetit de gloire,
ny l'affection qu'ils ont autrefois eüe à leurs corps,
ains prénent encore plaisir à voir les autres ieunes
s'exercer, & les encouragent, & s'efforcent encore **E**
de courir quand & eulx : Aussi ceux qui sont hors
des trauaux & labeurs de la vie humaine, pour la
vertu de leurs ames deuenans Dæmons, ne mes-
prisent pas totalemēt ce qui est pardeça, ains estās
fauorables à ceulx qui s'estudient & aspirent de
paruenir à vne mesme fin qu'ils sont paruenus, &
se bendans auec eulx, les incitent & exhortent à la
vertu, mesmemēt quand ils les voient ia prochains
du but de leur esperance, s'efforçans & ia presque
y touchants. Car ceste diuinité de Dæmons ne
s'accouple pas auec tous hommes : ains tout ainsi **F**
cōme ceulx qui sont sur le bord de la mer ne peu-
uent faire autre chose à ceulx qui nagent en haul-
te mer, encore bien loing de la terre, sinon que de
les regarder, sans mot leur dire : mais ceulx qui ap-
prochent pres de la coste, ils accourent à eulx, &
entrans vn peu dedans en la mer, ils leur aident &
de la voix & de la main, tant que finablement ils
les tirēt à port de salut: Ainsi fait enuers nous, Sim-
mias

A mias, le Démon, car ce pendant que nous sommes plongez & noyez en affaires, & que nous changeons de plusieurs corps, comme de plusieurs charriots & voictures, passâts de l'un en l'autre, il nous laisse efforcer de nous mesmes, tirer au collier, & tascher à nous sauuer, & gagner le port de nous mesmes : mais quand il y a vne ame qui ia par innumerables generations a supporté & enduré de longs traux, & aiant presque acheué sa reuolution s'efforce de tout son pouuoir, & ahanne aiaigrement avec force sueur, pour tascher à sortir de-

B hors, tendant contremont, à celle la Dieu permet que son propre Démon luy soit en aide, & donne aussi congé à qui veult des autres de la fauoriser, & l'un en prend l'une, & l'autre l'autre, à seconder & aider à se sauuer, elle aussi de sa part l'escoute, pour ce qu'elle approche, & finablement se sauue, mais celle qui n'obeit & n'obtéper pas à son Démon, n'a pas bonne yssue de son faict. Cela dit, Epaminondas me regardant : Il est desormais heure, dit-il, que tu t'en ailles au parc des exercices, Caphisia, à fin que tu ne failles point à tes compagnons, &

C ce pendât ie feray compagnie, & auray le soing de Theanor, prenans congé, quand bon semblera, de la compagnie. Je luy respōdis, faisons le donc ainsi, mais Theocritus, Galaxidorus & moy, te voulons tenir quelque petit propos. En la bonne heure, qu'ils dient ce qu'ils voudront : & quant & quant se leuât nous mena au coing où le portique commence à tourner, & nous l'environnans, taschions à le persuader de vouloir participer à l'entreprise,

Il nous respondi qu'il sçauoit tresbien le iour que **D**
deuoient reuenir les bannis, & qu'il auoit donné
ordre avec ses amis, qu'ils se teinssent tous prests
avec Gorgidas pour vser de l'occasion, mais qu'il
ne feroit mourir pas vn citoyen qui ne fust con-
damné par la iustice, si ce n'estoit que bien vrgente
necessité le pressast à ce faire: & qu'autrement sans
cela encore estoit il expedient & conuenable pour
le peuple de Thebes, qu'il y eust quelques vns qui
ne fussent point coupables de ce meurtre; & nets
de tout ce qui s'executeroit par voye de faict, d'au-
tant que le peuple en entrera moins en souspeçon, **E**
& pensera que nous l'enhortions à se soubleuer à
toute bonne fin. Nous trouuâmes bon son aduis,
& luy s'en retourna deuers Simmias, & nous de-
scendîmes au parc des exercices, où nous rencon-
trâmes noz amis, & l'vn en prenant l'vn, & l'autre
l'autre, en l'instant luy disoit ou demâdoit aucune
chose, & le preparoit à l'execution de nostre des-
seing, & là veîmes Archias & Philippus tous huy-
lez qui s'en alloient au festin. Car Phyllidas crai-
gnant qu'ils ne feissent deuât mourir Amphitheus,
prit incontînēt Archias apres qu'il eut reconuoyé **F**
Lysanoridas, & le mettant en esperance de iouir
de la dame qu'il desiroit, luy promettant qu'elle
feroit au festin, il feit tant qu'il luy persuada de ne
penser plus à autre chose qu'à se donner du bon
temps, & faire bōne chere avec ceulx qui auoient
accoustumé d'yurōgner & paillarder avec luy. Le
soir venu le froid commença à estraindre, & se leua
vn vent qui feit que chascun se retira de meilleure
heure

A heure en la maison, & nous rencontrants Damoclidas, Pelopidas & Theopompus, les receusmes, & d'autres receurent les autres: car ils se diuiserent incontînēt qu'ils eurent passé le mont de Citheron, & le froid qu'il faisoit au cœur d'hyuer leur donna moien de s'affubler sans souspeçon le visage, & passer ainsi sans estre descouverts à trauers la ville. Il y en eut à qui en entrant dedans la porte de la ville, il esclaira à la main droicte sans tōnerre, & leur sembla vn bon presage pour la seuretē & la gloire, cōme si cela leur eust mōstré que leur executiō seroit

B heureuse, sans danger, & honorable. Quand nous fusmes doncques tous dedans, iusques au nombre de cinquāte deux hōmes, il ne s'en falloit que deux, cōme desia Theocritus faisoit vn sacrifice à part en vne petite sallette, nous entendismes vn grand rabbattemēt, & vint vn vallet nous dire que c'estoient deux hallebardiers d'Archias qui battoiet à la porte, estant enuoyez à grāde haste deuers Charon, & qu'ils cōmādoient qu'ō leur ouurist, & se courrouçoient de ce que lon demouroit tāt: dequoy Charon estant troublé, commanda qu'on leur ouurist

C promptement: & luy leur allant au deuāt avec vne courōne sur la teste, cōme aiant sacrifié aux Dieux, & estant à table, il demanda à ces deux hallebardiers ce qu'ils vouloient. Archias & Philippus, ce dirent ils, te mandent que tu t'en viennes tout de ce pas vers eulx. Charon leur demanda quelle occasion il y auoit, pourquoy ils le mandoient à si grande haste, & s'il y auoit rien de nouueau: Nous n'en sçauōs rien, dirent ces sergēs, mais que veux tu

que nous leur reportions? Dittes leur que ie m'en **D**
vois laisser ma couronne, & prédre ma robbe pour
m'en aller incontinent apres vous : car si ie m'en
allois quand & vous, cela pourroit estre occasion
de troubler & esmouuoir quelques vns qui pour-
roient souſpeçonner que vous me meneriez pri-
ſonnier. C'est bien dit, reſpondirent les archers,
fais le ainſi : car auſſi bien nous fault il aller porter
quelque mādement des Seigneurs aux ſoldats qui
ſont de garde. Ainſi ſ'en allerent les hallebardiers.
Charon retournant deuers nous, nous dit ces nou-
uelles, qui nous meirent tous en grand effroy, pen- **E**
ſans pour vray que nous fuſſions deſcouverts, &
en ſouſpeçonnoient la plus part Hippoſthenidas,
aiant taſché à empescher & deſtourner le retour
des bannis, leur enuoyant au deuant Chlidon, &
voiant qu'il auoit failly à ce deſſein, qu'il eſtoit
vrayſemblable, que de peur il eſtoit allé reueler &
deſcourir noſtre conſpiration, quand il auoit veu
la choſe reduitte au point du peril : car il n'eſtoit
point venu avec les autres en la maiſon où nous
eſtions tous aſſemblez, & brief il n'y auoit celuy
qui ne iugeaſt qu'il eſtoit vn traître meſchant. **F**
Touteſois nous eſtions tous d'aduis qu'il falloir
que Charon allaſt où il eſtoit mādé, & qu'il obeiſt
aux Magiſtrats qui l'auoient enuoyé querir. Et luy
faifant venir ſon fils, Archidamus, qui eſtoit le plus
beau qui fuſt en toute la ville de Thebes, de l'a-
ge enuiron de quinze ans, fort laborieux & affe-
ctionné aux exercices de la perſonne, plus hault &
plus fort que nul autre garçon de ſon aage. Si nous
dit

A dit, Seigneurs, ie n'ay que cest enfant seul, & l'aime, comme vous pouuez penser, ie le vous liure entre voz mains, vous priant au nom de tous les Dieux & de tous les Dēmons, que si vous trouuez qu'il y ait aucun tour de male foy en moy vers vous, vous le faciez mourir, & ne luy pardonnez point. Au demourant ie vous supplie, vaillans hommes, preparez vous bien alencōtre de ce festin des Tyrans, n'abandonnez pas laschement à faulte de cœur voz corps à outrager & perdre à ces villains meschans, ains en faites la vengeance, gardās voz courages inuincibles à vostre patrie. Ainsi que Charon nous disoit ces paroles, il n'y eut celuy de nous qui ne prisast grandement sa magnanimité, & sa loyale preudhommie, mais nous nous courrouceasmes de ce qu'il auoit doubte que nous eussions desiance de luy, & luy dismes qu'il emmenast son fils. Et en toute sorte, ce dit Pelopidas, tu n'as pas fait sagement pour nous, que tu ne l'as enuoyé deuant en quelque autre maison : car quel besoing est il qu'il perisse ou soit en peril sil est trouué parmy nous ? Et encore est il temps de l'en enuoyer, à celle fin que si d'adventure il nous aduiuent quelque meschef, il demeure, pour vn iour cy apres faire la vengeance des Tyrans. Il ne sera pas ainsi, dit Charon, car il demeurera icy avec nous, & courra la mesme fortune que nous : car il ne seroit pas hōneste de le laisser en la main de noz ennemis. Et pour ce mon fils ayes bon cueur, plus ferme que ton aage ne porte, essayant de ces hazards & trauaux necessaires, avec plusieurs bons &

vaillass citoyens pour la liberté & la vertu. Et nous auons encore bien bonne esperance que le fait nous reüssira, & qu'il y a quelque Dieu qui regarde & prend en protection ceux qui trauaillét pour la iustice. Il y eut plusieurs à qui les larmes vindrent aux yeulx en oyant dire de telles paroles à Charon, mais luy inflexible sans s'attredrir le cœur, les yeulx secs, confia son fils entre les mains de Pelopidas, embrassant chascun de nous, en nous touchant en la main, & nous dónant courage s'en alla vers la porte. Et encore eussiez vous plus admiré la gayeté, la constance & fermeté de son fils, comme vn nouveau Neoptolemus, sans pallir ny muer de couleur pour quelque dâger qu'il y eust, ny s'estonner de rien, au contraire il tira du fourreau l'espee de Pelopidas, & regarda si elle tréchoit bien. En ces entrefaites vint deuers nous Diotonus, l'vn des amis de Cephisodorus, avec son espee, armé d'vne bonne cuirasse sous sa robbe, lequel aiant entendu que Charon auoit esté mandé par Archias, blasma nostre longue attente, & nous encouragea d'aller promptement aux maisons des Tyrans: Car en ce faisant, dit-il, nous les preuendrons: sinon, encore vault-il mieulx que nous les combattions dehors, separez les vns des autres, & non tous en foule, que d'attédre renfermez dedâs vne maison, que les ennemis nous y viennent couper à tous la gorge, ou nous prendre côme vne ruche d'abeilles. Aussi nous pressoit Theocritus le deuin, disant que les signes des sacrifices estoient bons & salutaires, nous promettant toute seureté.

Parquoy

A Parquoy nous commãceafmes tous à prendre noz armes & à nous preparer , quãd Charon retourna avec vn bon & ioyeux visage, en riant, & nous regardant tous en la face, difant que nous eussions bon courage, par ce qu'il n'y auoit point de dâger, & que nostre affaire estoit fort bien acheminé: Car Archias & Philippus si tost qu'ils ont entédu que ie venois à leur mädement, estants ia demy yures, ne se pouuans pas presque soustenir tant ils ont beu, se font à grand' peine leuez de la table & venus à la porte de la salle. Archias a commãcé à me

B dire, Nous entendons, Charon, que les bänis sont en ceste ville cachez, y estants entrez à cachettes. Et moy faisant de l'esbahy: & où dit-on qu'ils sont, dis-ie? Nous ne sçauons, dit Archias, & c'est pourquoy nous t'auons mandé que tu vinsses deuers nous, si d'aduétude tu en auois point ouy dire quelque chose de plus certain. Et moy demourât comme tout estonné, vn peu d'espace pensif, discours en moy-mesme que ce deuoit estre quelque descouuerture incertaine qui leur auoit esté faite, & que ce ne deuoit auoir esté pas vn de ceulx qui

C sceussent l'entreprise qui la leur eust descouuerte, par ce qu'ils n'ignoroiet pas la maison où ils se deuoiet assembler, & qu'il falloit que ce fust quelque indice incertain, ou quelque bruit de ville qui fust venu iusques à leurs aureilles. Si iuy dis, que du viuant d'Androclides nous auions bien souuent ouy plusieurs tels bruits & propos vains, qui auoient couru par la ville, mais maintenant ie n'ay rien entédu ny ouy de semblable: toutefois i'iray m'en en-

querir si tu veux, Archias, & si i'en trouue quelque **D**
chose d'importance ie le vous viendray dire. C'est
bien dit, ce dit Phyllidas, ne laisse rien à rechercher
& enquerir diligēment pour ces Seigneurs, Cha-
ron : car il est bon de ne rien mespriser, ains prédre
garde à tout, & auoir l'œil au guet: c'est vne belle &
bōne chose que la preuoyance, & d'estre tousiours
à l'herte. Aiāt dit cela, il a pris Archias, & l'a ramené
en la salle, où ils sont tous. Et pour ce n'attendons
plus, mes amis, ains apres auoir fait noz prieres aux
Dieux de nous estre en aide, allons nous en. Cha-
ron aiant dit cela, nous faisons chascun prieres aux **E**
Dieux, & nous entredonnons congé l'vn à l'autre.
Il estoit l'heure iustement que chascun a accoustu-
mé d'estre à table pour souper, & le vent croissant
auoit amené vn peu de neige, tombāt avec vn peu
de pluye, tellement qu'il n'y auoit personne par les
ruēs quand nous passāmes. Ceulx doncq qui a-
uoient esté ordonnez pour aller alencontre de
Leontidas & Hypatas, qui demouroient l'vn au-
pres de l'autre, sortirent en robes, n'aiants autres
armes que chascun leurs espees, & estoient Pelo-
pidas, Damoclidas & Cephisodorus, mais Charō, **F**
Melon, & les autres ordonnez pour assaillir Ar-
chias, auoient leur deuant de cuirasses, & sur leurs
testes de grands chappeaux de branches de Pin &
de Sapin, aucuns d'eulx aiants des cottes de fem-
mes vestues, contrefaisans les yurongnes, comme
fils fussent venus en mommon avec ces femmes.
Et qui pis est, Archidamus, la fortune egalāt la las-
cheté & bestise de noz ennemis à noz hardiesses &
à noz

A à noz preparatifs , & aiant diuersifié nostre entreprise des le cōmancement , de tres-dangereux entremets , se rencontra encore sur le poinct mesme de l'execution , là où elle apporta le trauail d'vn tres soudain , tres-dangereux & insperé accident: car comme Charon, apres auoir parlé à Archias & à Philippus, s'en fust reuenu à la maison , & nous disposast en ordre pour aller executer nostre entreprise , il arriua vne missiue qui venoit d'icy , escripte par Archias le souuerain presbtre , à Archias son hoste & ancien amy , laquelle luy declaroit,

B comme il est vraysemblable, le retour des bannis, & la surprise qu'ils deuoient executer , la maison où ils s'estoient assemblez, & ceux qui estoient de leur ligue & intelligence . Mais Archias estant desia tout estourdy de vin , & tout transporté du desir & de l'attente des femmes qu'il attendoit , encore que le messager luy dist que c'estoit pour affaires de consequence qu'elles estoient escrites, il prit bien les lettres, mais il respondit, A demain les affaires : & meit les lettres dessoubs son oreil-lier , & demandant sa coupe commanda qu'on

C luy versast à boire , enuoyant Phyllidas à toute heure veoir si ces femmes venoient point. Ceste esperance entretenant ainsi le festin nous arriuasmes la dessus, & passasmes à trauers les seruiteurs iusques à la salle , là où nous nous arrestasmes vn peu à la porte , considerans chascun de ceux qui estoient à la table. Or la veüe des chappeaux que nous auions sur les testes , & les robes de femmes vestues , les abusa vn peu à nostre arriuee , de

maniere qu'il y eut vn peu de silence, iusques à ce **D**
 que Melon le premier mettant la main à l'espee se
 rua à trauers la salle. Et Cabirichus, qui estoit Pre-
 uost de la febue, le prit par le bras, ainsi qu'il passoit
 au long de luy, en f'escriant: Est-ce pas cy Melon
 Phyllidas? Melon secoua sa prise en desguainant son
 espee quand & quand, & courât sus à Archias, qui
 se cuidoit leuer, ne cessa de le frapper à coups d'es-
 pee, iusques à ce qu'il l'eust rendu mort. Charon
 aussi tost frappa Philippus sur le col, lequel se cou-
 uroit & targeoit des pots qui estoient sur la table,
 iusques à ce que Lysitheus vint du costé de la ta- **E**
 ble, qu'il renuersa par terre, & par dessoubs le tua.
 Quât à Cabirichus, nous l'adoucissions & l'admo-
 nestions de ne se mettre point en effort de secourir
 des Tyrans, ains de tascher avec nous à deliurer la
 patrie de tyrannie, luy qui estoit sainct & consacré
 pour le bien & le salut du public: mais n'estant pas
 aisé à ramener à la raison, & à ce qui luy estoit plus
 expedient, à cause qu'il estoit à demy yure, tout
 branlant en doubte il se leua de sa place, & nous
 presenta le fer de sa iaueline, laquelle par la cou-
 stume du pais les Preuosts portent tousiours quâd **F**
 & eux: ie la pris par le milieu, & la leuay dessus ma
 teste, luy criant qu'il la laschaft, & qu'il se sauuaft,
 ou qu'il seroit tué. Mais en ces entrefaittes Theo-
 pompus qui estoit à costé s'approchant de luy, luy
 donna de l'espee à trauers le corps, en luy disant,
 Demeuregisant icy avec ceux à qui tu as seruy de
 flatteur: car il ne t'appartient pas d'estre couron-
 né, estant la ville de Thebes libre, ny de faire plus
 sacri-

A sacrifice aux Dieux, deuant lesquels tu as maudit ton pais, quand tu as souuent fait prieres pour la prosperité de ses ennemis. Cabirichus estant tombé mort, Theocritus qui estoit assistant amassa la iaueline sacree, & la retira hors du sang: & cela fait, nous tuasmes encore quelque peu de leurs seruiteurs, qui foserent mettre en defense, mais ceux qui se teindrent quoy, nous les enfermasmes dedans la salle, ne voulans pas qu'en sortant ils allassent publier par toute la ville ce qui auoit esté fait, auant que nous sceussions cōment il estoit allé

B des autres. Et en estoit allé en ceste sorte. Pelopidas & sa suite vindrent à la porte de Leontidas, où ils battirent tout bellement, & au seruiteur qui demanda de dedans qui c'estoit, ils dirent que c'estoient des lettres de Callistratus que lon apportoit d'Athenes à Leontidas. Le seruiteur l'alla dire à son maistre, qui luy commanda d'ouuir, & oster la barre: mais si tost que la porte fut vn peu entrebaillee, se ruans dedans en foule ils renuerserent par terre le seruiteur, & passant à trauers la court allerent droit à la chambre de Leontidas, qui se

C doubta incontinent de ce que c'estoit: si desguaina son espee & se meit en defense, estant bien homme iniuste & tyrannique, mais fort & robuste de corps, & magnanime de courage, toutefois il oublia de tuer la lumiere & estaindre sa lampe, pour en tenebres se couler à trauers ceux qui luy couroient sus, mais estant veu par eux à la lumiere de ceste lampe, si tost que la porte fut ouuerte il donna vn coup d'espee dedans le flanc à Ce-

phifodorus, & puis s'attacha à Pelopidas qui estoit **D**
le second, criant & appellant ses seruiteurs à l'ai-
de, mais Samidas avec d'autres les engarderent
d'y aller, avec ce qu'ils n'oserent pas se hazarder
de venir aux mains contre des plus nobles citoyens
de la ville. Si y eut là vne rude escrime à outran-
ce entre Pelopidas & Leontidas, dedans la porte
mesme de la chambre qui estoit estroite, estant
tombé entre eux deux Cephifodorus tirant aux
traicts de la mort, de maniere que les autres ne
pouuoient secourir Pelopidas, tant qu'à la fin le
nostre aiant receu vne petite bleceure en la teste, **E**
& en aiant donné plusieurs à Leontidas, il entom-
ba par terre, & fut tué dessus le corps de Cephifo-
dorus, lequel estoit encore tout chaud, car il veit
tumber son ennemy, & donna la main à Pelopi-
das, & dit adieu à tous les autres compagnons,
& puis rendit l'ame tout ioyeux & content. Apres
qu'ils eurent fait là ils s'en allerent de ce pas trou-
uer Hypates, & leur estant aussi la porte ouuerte,
ils le tuerent, ainsi qu'il se pensoit sauuer, fuyant
par dessus les tuiles chez ses voisins, puis de là re-
tournerent nous trouuer, & nous trouuerent de- **F**
hors au long du portique. Ainsi apres nous estre
embrassez les vns les autres, & auoir vn peu parlé
ensemble, nous nous en allasmes droit aux prisons,
là où Phyllidas appellant par son nom le geolier,
celuy qui auoit charge des prisonniers: Archias,
dit-il, & Philippus te mandent, que tu leur amé-
nes promptement en diligence Amphitheus. Le
geolier considerant l'importunité de l'heure, &
que

A que la parole de Phyllidas n'estoit point bien ras-
 fise, ains qu'il estoit encore tout bouillant & émeu
 du combat passé, se doubtant de l'escarmouche:
 Quand est-ce, dit-il, qu'on a iamais veu, que les
 Capitaines enuoyassent querir à telle heure vn pri-
 sonnier? & quand par toy? & quelle enseigne de
 par eux m'apportes tu? Comme ce geolier luy te-
 noit ces propos, il luy donna d'vne iaueline de
 barde, qu'il tenoit en sa main, au trauers du corps,
 & le ietta mort par terre, ce meschant homme la,
 que plusieurs femmes foulèrent aux pieds le len-
B demain, & luy cracherent au visage. Et nous rom-
 pans les portes de la prison appellasmes par son
 nom le premier Amphitheus, & puis les autres, se-
 lon que chascun de nous auoit plus d'amitié ou de
 familiarité avec eux: & eux entendans noz voix se
 leuerent incontinent de dessus leurs pallissades sur
 pieds, tirans bien aises leurs chaines apres eux: les
 autres aiants les pieds dedans des ceps leur ten-
 doient les mains, & nous prioient que nous ne les
 laississions point là. Ainsi que nous les destachiōs,
 plusieurs des voisins qui auoient entendu le bruit
C accouroient desia, & estoient bien ioyeux, & les
 femmes, selon que chascune auoit entédu de ceux
 qui leur appartenoient, ne se contenans pas és
 mœurs & coustumes des Thebains, s'en couroient
 les vnes vers les autres, & en demādoient des nou-
 uelles à ceux qu'elles rencontroient par les rues: les
 autres trouuans ou leurs peres ou leurs marits, les
 suiuoient, & personne ne les en gardoit: car la pi-
 tié & commiseration qu'on en auoit, leurs larmes,

leurs prieres & supplications estoient de grande D
 efficace & de grand amour à cest effect. Les cho-
 ses estants en tel estat, entendans qu'Epaminon-
 das & Gorgidas, avec leurs amis, estoient desia as-
 semblez dedans le temple de Minerue, nous nous
 en allasmes droit à eux, & y vindrent aussi plu-
 sieurs gens de bien & d'honneur de la ville, y af-
 fluant tousiours de plus en plus grand nombre. Et
 apres que lon leur eut conté cōme tout estoit pas-
 sé, & prié de nous vouloir aider à acheuer le de-
 mourant, en se rendans sur la place, tous ense-
 mble, incontinent ils crièrent à ceux de la ville, Li- E
 berté, Liberté, & distribuerēt des armes à ceux qui
 se venoient ioindre à eux, qu'ils prenoient dedans
 les temples, qui estoient tous pleins de despouilles
 de toutes sortes, gaignees sur les ennemis, & en pre-
 noient aussi dedans les boutiques des fourbisseurs
 & armeriers voisins. Aussi y vint Hipposthenidas
 avec ses amis & ses seruiteurs, amenant outre quād
 & soy des trompettes, qui estoient d'adventure
 venus pour seruir à la feste d'Hercules, incontinent
 les vns sonnerent l'alarme sur la place, les autres
 aux autres endroits de la ville de tous costez pour F
 estonner les ennemis, comme estant toute la ville
 reuoltee contre eux, lesquels faisant encore de la
 fumee, pour n'estre point apperceus, s'enfuyoient
 dedans le chasteau de la Cadmee, attirants apres
 eux ceux que lon appelloit les Meilleurs, qui
 auoient accoustumé de faire toute la nuit vn
 corps de garde par dehors alentour de la Cadmee.
 Les Capitaines qui estoient au chasteau voians
 leurs

A leurs gents se ruer ainsi à la foule & en grand effroy au dedans, & nous sur la place en armes n'y aiant en toute la ville endroit aucun qui fust quoy, ains l'alarme estant par tout, & le bruit, & tumulte en montant contremont, ils ne furent pas d'aduis de descendre, encore qu'ils fussent iusques au nombre enuiron de cinq mille, craignans le danger, ains prirent leur excuse sur l'absence du Capitaine Lysanoridas, qui s'estoit tousiours tenu avec eux iusques à ce iour la: ce fut pourquoy depuis les Lacedemoniens trouuants moien de l'auoir par argent de Corinthe, là où il s'estoit retiré, le feirent mourir. Mais lors nous rendans par composition le chasteau de la Cadmee, ils s'en allerent, bagues sauues, avec leurs gents de guerre.

DE LA MALIGNITE

D'HERODOTE.

BE A V C O V R de gens, Alexandre, se trompent à la diction de l'historien Herodote, par ce qu'elle leur semble simple, naïfue, & coulant facilement par dessus les choses: mais il y en a encore plus d'autres, qui sont en meisme erreur quant aux mœurs: car non seulement c'est extreme iniustice, comme disoit Platon, de vouloir sembler iuste quand on ne l'est pas: mais aussi est-ce acte de singuliere malignité, de contrefaire le doux & le simple, &

estre maling si couuertement que malaisement on ^D
 le puisse descouuir. Et pour ce qu'il montre sa
 malignité principalement alencontre des Bœo-
 tiens & des Corinthiens, sans toutefois s'abstenir
 d'offenser aussi les autres, i'ay pensé qu'il apparte-
 noit à mon deuoir de defendre en cela l'honneur
 de noz ancestres avec la verité, contre ceste partie
 de ses escripts : car qui voudroit poursuiure les au-
 tres bourdes & menteries qui sont en son histoire,
 il en faudroit faire plusieurs gros liures. Mais com-
 me dit Sophocles,

Suasion a emprainte la face

E

De merueilleuse & fort viue efficace,
 mesmement quand elle est emprainte en vn lan-
 gage qui a grace & force telle pour couvrir les fau-
 tes, & entre autres la malice des mœurs d'un histo-
 riographe. Philippus Roy de Macedoine disoit à
 ceux des Grecs, qui se departoient de son alliance
 pour se mettre en celle de Titus Flaminius, qu'ils
 changeoient leurs ceps à d'autres plus polis, mais
 plus longs aussi : Ainsi peult on dire que la mali-
 gnité d'Herodote est plus polie & plus delicate
 que celle de Theopompus, mais qu'elle picque ^F
 aussi & qu'elle touche plus au vif, cōme les vents
 coulis qui nous donnent par vn estroit pertuis,
 pour ce que lon n'y prent pas garde, nous offen-
 sent plus que ne font ceux qui sont au large espan-
 dus. Et me semble qu'il vaudra mieux premiere-
 ment descrire, comme en gros & en general, les
 traces & marques pour discerner vne narration,
 non simple ny debonnaire, mais malicieuse & ma-
 ligne,

A ligne , pour les appliquer puis apres à chasque point que nous examinerons, pour veoir si elles y conuiendront. Premièrement doncques celuy qui vse de plus fascheux noms & verbes, là où il y en a de plus gracieux pour exprimer les choses faites, comme, pour exemple, là où lon pourroit dire, que Nicias estoit trop adonné aux ceremonies enuers les Dieux, qui diroit que Dieu luy auroit troublé l'entendement, ou qui aimeroit mieux appeller la façon de faire de Cleon fureur & temerité que legereté de parler, on pourroit dire que ce-

B luy la tiendroit du maling, prenant plaisir à la chose, veu la maniere de la reciter. Secondement, quand il y a bien du mal en quelqu'un, mais qui n'appartient rien à l'histoire, & neant moins l'historien l'empoigne & l'insere en la narration des affaires qui s'en fussent bien passez, & tirant sa narration hors de propos, & la faisant extranaguer, à fin qu'il y enuolpe l'infortune de quelqu'un, ou quelque mauuais accident, ou acte reprehensible qui luy sera aduenu, il est tout euident que celuy la prent plaisir à mesdire. Voila pourquoy au contraire

C Thucydides, combien que Cleon eust fait vne infinité de fautes, il n'en fait iamais yn recit appert: & touchant l'orateur Hyperbolus, en passant il l'appelle mauuais homme, & puis le laisse là. Et Philistus a laissé toutes les iniustices & violences que comemit le Tyran Dionysius, qui furent en grand nombre, contre les peuples barbares, lesquelles n'estoient point entrelasées parmy les affaires des Grecs: car les sorties & digressions

des histoires sont principalement à raconter quel-
ques fables ou quelques antiquitez. D'auantage
celuy qui parmy les louanges de quelque person-
nage entreiette vne mesdisance & vn blasme, celuy
la semble encourir en la malediction du poëte
Tragique,

Maudit sois tu qui vais faisant recueil,

Des maux de ceux qui gisent au cercueil.

Et puis ce qui est opposite à cela chascun le sçait,
car omettre à dire quelque chose belle & bonne,
semble n'estre point reprehensible ny subiect à
rendre cõpte, si se fait il pour tant par malignité,
mesmement quand l'obmission tõe en lieu là où
elle eust esté bien pertinente au fil de l'histoire: car
louer froidement n'est pas moins maling que blas-
mer affectueusement, où à l'aduenure encore pi-
re. Le quatriéme signe de maligne nature en vn
historien est, à mon compte, quãd vne chose se ra-
conte en deux ou plusieurs manieres, & que l'hi-
storien s'arreste à celle qui est la pire. Car il est bien
permis aux Sophistes & Rhetoriciens, ou pour
gagner, ou pour acquerir reputation de bien di-
re, de prendre à orner ou defendre vne mauuaise
proposition: car ils n'impriment pas vne foy de
ce qu'ils disent, & si ne nient pas eux mesmes qu'ils
entreprennent à prouuer choses incroyables con-
tre l'opinion commune. Mais celuy qui escrit vne
histoire fait son deuoir quand il escrit ce qu'il sçait
de verité, mais des choses douteuses, obscures &
incertaines, celles doiuent sembler les veritables
qui sont les meilleures plustost que les pires: & y

A En plusieurs qui du tout obmettent & laissent les pires, comme de Themistocles, Ephorus aiant dit qu'il auoit sceu la trahison que machinoit Pausanias, & ce qu'il traittoit avec les lieutenans du Roy de Perse: Mais il ne luy consentit point, dit-il, ny ne presta oncques l'oreille à sa sollicitation, de vouloir participer à ses esperances. Et Thucydides a de tout poinct obmis ce propos la, comme le condamnant, & ne le trouuant pas veritable. D'auantage es choses que lon confesse auoir esté faittes, mais on ne sçait pas pour quelle cause & à quelle intention, celuy qui les prend par coniecture en la pire part, est mauuais & maling, comme les poëtes comicques, qui affermoient que Pericles auoit allumé la guerre des Peloponesiens pour l'amour de la courtisane Aspasia, & à cause de Phidias, là où au cōtraire ce n'auoit esté ny par ambition, ny par opiniastreeté, ains plustost pour rabbatre l'orgueil des Peloponesiens, & ne ceder en rien à ceux de Lacedemone. Car en actes approuuez & affaires louables, il suppose vne cause faulse & mauuaise, & tire par ses calomnies en souspeçons extrauagantes, touchant l'intention secrette & occulte de celuy qui a fait l'œuure, laquelle il ne peut ouuertement reprendre ne blasmer: comme ceux qui disent de la mort d'Alexandre le Tyran, que sa femme Thebe feit mourir, que ce ne fut pas vn acte de magnanimité, ny de haine du mal & du vice, ains d'vne ialouzie & d'vne passion feminine: & ceux qui disent que aussi Caton d'Vtique se tua soy mesme, craignant que Cēsar ne le feist mou-

rir honteusement, ceux sont enuieux & malings en toute extremité. La narration aussi historicque prent vne malignité, selon que l'œuure & le faict est recité, comme si lon dit que ç'a esté plus tost par argent que par vertu, que quelque grand exploict a esté faict, comme il y en a qui disent de Philippus: ou facilement & sans aucun trauail, comme d'Alexandre le grand, & non par sagesse & prudence, mais par faueur de la fortune: comme les malueillans & enuieux de Timotheus peignoient en des tableaux, les villes qui d'elles mesmes se venoient renger dedans ses filets, ce pendant qu'il dormoit. Car il est euidét que c'est pour amoindrir la gloire, beauré & grandeur d'iceux actes, si on leur oste la magnanimité, la diligence, la vertu, & les auoir faits & executez par eux mesmes. D'auantage ceux qui directement veulent iniurier quelqu'vn, luy improperent qu'il est, ou querelleux, ou temeraire, ou iniurieux, s'ils ont la langue effreneé: mais ceux qui obliquement, comme delaschants des coups de flesches d'vn lieu obscur, mettent sus des charges & imputations, & puis tournans par derriere, & se pensans cacher, en disant qu'ils ne croyent pas ce qu'ils desirent estre fort creu, & reniant la malignité, ils se treuuent, outre la malignité, condamnez encore d'effrontee impudence. Voisins de ceux la sont aussi ceux qui parmy des improperes & blasmes adioustent quelques louanges, comme du temps de Socrates, vn Aristoxenus l'ayant appellé ignorât, mal appris, dissolu, il y adiousta puis apres, il est vray qu'il

A qu'il ne fait tort à personne. Car ceux qui avec quelque artifice & finesse flattent, aucunesfois parmy beaucoup de desmesurees louanges, meslent quelques legeres reprehensions, iettans parmy leur flatterie, comme vn peu de faulse, quelques paroles franchement & librement dites: aussi le maling pour faire croire ce qu'il blasme, met aupres vn peu de louāges. Lon pourroit encore specifier & designer d'autres signes & stiles de la malignité, mais ceux cy suffisent pour nous donner à cognoistre le naturel & l'intention de l'auther, dont il est question. Premicrement doncques commenceant à Vesta, comme lon dit, à Io, la fille d'Inachus, tous les Grecs estimēt qu'elle a esté deificie & honoree d'honneurs diuins par les nations barbares, de maniere qu'elle en a laissé son nom à plusieurs mers, à plusieurs nobles ports, pour sa grād' gloire & renōmee, & a esté la source & l'origine premiere de plusieurs tresnobles, tresillustres & royales races. Et ce gentil historien icy dit, que ce fut vne femme qui s'abandonna à emmener aux marchands Pheniciens, craignant qu'elle ne fust trouuee grosse, par ce qu'elle auoit desia volontairement esté depucellee par vn maistre de nauire, & fait à croire aux Pheniciens qu'ils tiennent de tels propos d'elle: à quoy il dit aussi que se rapporte le tesmoignage des hommes doctes de Perse, que les Pheniciens la rauirent & emmenerēt avec d'autres femmes, monstrant en cela quelle est son opinion & sa sentēce, que le plus bel acte & le plus grand que feirent oncques les Grecs, à sçauoir

la guerre de Troye, a esté vne sottie, comme entreprise pour vne meschante femme. Car il est tout euident, ce dit-il, que si elles n'eussent voulu, elles n'eussent pas esté rauies ny emmenees. Il faudra doncques aussi que nous confessions, que les Dieux ont fait sottement de se monstrer courroucez & indignez contre les Lacedemoniés pour le violement des filles de Scedafus de Leuctres, & de ce qu'ils chastierent Ajax, pour auoir forcé Cassandra: car il est certain, selon Herodote, que si elles ne l'eussent voulu, elles n'eussent pas esté violees: & toutefois luy mesme dit apres, qu'Aristomenes fut pris vif par les Lacedemoniés, & Philopœmen depuis Capitaine general des Atheniens, & Attilius Regulus Consul des Romains fut aussi pris par les ennemis, tous personages tels qu'à peine pourroit on trouuer ny de plus grands Capitaines, ny de plus vaillans hommes, mais il ne s'en fault pas autrement esmerueiller: car lon préd bien des Lyons, des Leopards, & des Tygres tous vifs. Et Herodote accuse des femmes qui ont esté violees, defendant ceux qui les ont forcees, & est tant amateur des barbares, qu'il absoult Busiris du mauuais nom qu'il auoit, de tuer ses hostes, & de sacrifier des hommes, & attribuant aux Ægyptiens toute iustice & toute diuinité, il retourne ce crime abominable, de meurtrir ainsi ses hostes & sacrifier les hommes, sur les Grecs. Car il escrit en son second liure, que Menelaus aiant recouré des mains de Proteus sa femme Heleine, & aiant esté par luy honoré de grans & riches

A riches presens, se porta tres-iniustemēt & tresmeschamment enuers luy . Car ne pouuant auoir le temps à propos pour faire voile, il songea vne chose damnee & maudite, c'est qu'il prit deux petits enfans du país, & les chastra, à l'occasion dequoy estant hay de ceux d'Ægypte & poursuiuy, il s'en fuit avec ses vaisseaux en la Libye. Quant à moy ie ne sçay qui est celuy des Ægyptiens qui tient ce beau propos la, mais au contraire sçay-ie bien qu'en Ægypte ils retiennent encore beaucoup d'honneurs qu'ils font à la memoire de Menelaus

B & de Heleine. Et continuant en ceste mesme façon de faire, il dit que les Perses abusent charnellement des garçons, l'aiants appris des Grecs: & toutefois comment est il possible que les Perses aient appris ceste intemperance & villanie-la des Grecs, attendu qu'il est confessé de tous, que les enfans que lon en amenoit estoient tous chastrez avant qu'ils veissent la mer de la Grece? Et que les Grecs auoient appris des Ægyptiens à faire pompes & processions, & assemblees de festes, & à adorer les douze Dieux, & que Melampus auoit appris le nom mesme de Bacchus des Ægyptiens, & l'auoit enseigné aux autres Grecs. Quant aux mysteres & ceremonies secretes de Ceres & de Bacchus, qu'elles auoient esté apportees d'Ægypte par les filles de Danaus, & que les Ægyptiens se battent & demenent grand deuil, mais pourquoy ils le font qu'il ne le veult pas dire, ains que cela demeure couuert & caché soubs silence. Quant à Hercules & à Bacchus, que les Ægyptiens estimēt

Dieux, & les Grecs hommes fort anciens, il ne fait **D** en nul lieu mention de ceste reseruee distinction, combié qu'il die en quelque endroit qu'Hercules est du second ordre des Dieux, & Bacchus du troisieme, comme aians eu principe de leur essence & n'estants pas eternels, & toutefois il afferme que ceux la sont Dieux, & pense qu'il leur faut faire funerailles anniuersaires, comme aians esté mortels & demy-Dieux, & non pas leur sacrifier comme à Dieux; autant en dit-il de Pan, renuerfant les plus saincts & plus venerables sacrifices des Grecs par ces vanitez & fables controuuees des *Ægyptiens*, **E** Encore n'est-ce pas le pis, car il dit que Hercules estoit descendu de la race de Perseus, & tient que Perseus estoit Assyrien, selon que disent les Persees, mais les Capitaines des Doriens monstrent qu'ils sont de droicte ligne descendus des *Ægyptiens*, descriuans la genealogie des ancestres de Danaë & d'Acrisius. Car quant à Epaphus, à Io, à Iasus, il les a tous laissez, s'efforceant de monstret non seulement que les autres Hercules sont *Ægyptiens* & Pheniciens, mais aussi d'estranger de la Grece, & attribuer aux barbares ce troisié- **F** me cy, combien que de tous les anciens doctes hommes, ny Homere, ny Hesiode, ny Archilocus, ny Pysander, ny Stesichorus, ny Alcman, ny Pindare, ne facent aucune mention d'un Hercules *Ægyptien* ou Phenicien, ains en cognoissent tous vn seul, le Beotien & Argien: & qui plus est entre les sept Sages, qu'il appelle Sophistes, il asseure que Thales estoit Phenicien de nation, & d'ancienne

A cienne extraction descendu des barbares. En vn
 autre endroit, iniuriant les Dieux sous le masque
 » de la personne de Solon : O Cresus, dit-il, tu m'in-
 » terroques des choses humaines, sçachant bien que
 » les Dieux sont enuieux & pleins d'inconstante in-
 » certitude. Il attribue à Cresus le sentiment & l'o-
 pinion qu'il auoit luy mesme des Dieux, adioustât
 malignité à l'impieré & au blaspheme. Quant à
 Pittacus, il ne s'en sert qu'en choses bien legeres, &
 qui ne sont de consequence aucune, & ce pendant
 passe par dessus ce qui est le plus beau & le plus
 B grand faict qu'il fait oncques. Car cōme les Athe-
 niens & les Mityleniens eussent guerre ensemble,
 touchant le port de Sigëum, Phrynon Capitaine
 des Atheniens aiant desié à combattre teste à teste
 le plus hardy des Mityleniens, il se presenta au de-
 uant de luy, & feit si dextrement qu'il enueloppa
 le Capitaine, qui estoit grand, fort & puissant, de-
 dans vn filé, & le tua. Et comme les Mityleniens
 pour cest acte de prouësse luy offrirrent de beaux
 & riches presens, il prit vn iuelot qu'il darda tant
 qu'il peut, & leur demanda seulement autant de
 C terre comme en contenoit le traict de son iuelot,
 dont vient que iusques au-iour-d'huy encore ce
 champ la s'appelle Pittacium. Que dit doncques
 Herodote ? Quand il est arriué à cest endroit la, au
 lieu de reciter la vaillance de Pittacus, il raconte la
 fuite d'Alceus, qui s'enfuit de la bataille, & ietta
 ses armes : en quoy il appert que fuyant à escrire les
 actes vertueux, & ne taisant pas les vicieux, il porte
 tesmoignage à ceulx qui tiennent que l'enuie, qui

est la douleur du bien, & la ioye du mal d'autruy, D
 sortent & partent de la racine d'une mesme mali-
 gnité de vice. Apres cela les Alcmeonides, qui fu-
 rent hōmes genereux, & qui deliurerent leur pais
 de tyrannie, sont par luy imputez & accusez de
 trahison. Car il dit qu'ils receurent Pisistratus, re-
 tournant d'exil, & luy aiderent à le faire reuenir, à
 la charge qu'il espouseroit la fille de Megacles: &
 33 que la fille dit à sa mere, O ma bonne mere, Pisi-
 33 stratus, voyez vous, ne me cognoist pas selon la loy
 33 de nature. Et les Alcmeonides indignez de telle
 meschanceté, chasserent le Tyran. Et à fin que les B
 Lacedemoniens ne se sentissent pas moins de sa
 malignité, que les Atheniens, voyez comment il
 contamine Othryadas, celuy qui est entre eulx
 estimé & admiré par dessus tous les autres pour sa
 33 vaillance: Vn des trois cents, dit-il, qui estoit de-
 33 mouré seul, aiant honte de s'en retourner à Sparte,
 33 ses compagnons estans tous demourez morts sur
 33 le champ, s'accabla luy mesme en la place dessous
 33 vn monceau de boucliers & de pauois. Car vn peu
 au dessus il dit, que la victoire estoit demouree am-
 biguë & douteuse, & maintenāt par la honte d'O- F
 thryadas il confirme, que les Lacedemoniens per-
 33 dirent la bataille: Car c'est honte de viure estant
 33 vaincu, & grand honneur de suruiure estant victo-
 33 rieux. Je laisse donc à noter, que descriuāt par tout
 Cresus pour vn fol, glorieux, digne d'estre mocqué
 en toutes choses, il dit neantmoins, que quand il
 fut prisonnier il instruisit & enseigna Cyrus, qui
 en prudence, vertu & grandeur d'entendement
 surpassoit

A surpassoit tous les Roys qui furent oncques, n'ayant par le tesmoignage de son histoire attribué autre bien à Cresus, sinon qu'il honora les Dieux de grandes offrandes & ioyaux qu'il leur donna, qui fut le plus sceleré acte du monde, ainsi comme il le décrit: car son frere Pantaleon du viuât mesme du pere, entra en querelle de la succession du Royaume avec luy qui demoura vainqueur, & depuis qu'il fut paruenü à la couronne, il feist prendre l'un des plus grands amis de son frere, hôme noble qui luy auoit esté aduersaire, & le tirant en la boutique **B** d'un foulon, le feist tant carder à coups de cardes & de peignes de cardeur, qu'il en mourut, & de ses deniers qu'il confisqua, il en feist faire ces ioyaux & offrandes qu'il enuoya aux Dieux. Deioces Medois, qui par vertu & iustice acquist la royauté, il tient que ce ne fut pas par iustice, ains par simulation de iustice. Mais ie ne me veux point arrester à rechercher les exemples des barbares: car il nous en donne assez en escriuant des Grecs. Il dit doncques que les Atheniens & plusieurs autres Ioniens auoient honte de ce nom la, & ne vouloient point **C** estre appellez Ioniens, & que ceux d'entre eux que lon estime les plus nobles, & descendus du Senat mesme des Atheniens, engendrerent des enfans de femmes barbares, apres auoir tué leurs peres & leurs enfans, à l'occasion dequoy icelles femmes feirent vne ordonnance entre elles, & la baillerent de main en main à leurs filles, de ne boire & ne manger iamais avec leurs marits, ny ne les appeller iamais par leurs noms, & tient on que les Milesiés

qui sont auourd'huy, sont descendus de ces femmes la. Et aiant dit nettement que tous ceulx qui celebroident la feste nommee Apaturia, estoient Ioniens: & tous, dit-il, la celebrent exceptez les Ephesiens & les Colophoniens. par ce traict la il priue ces deux citez la de la noblesse & antiquité de la nation. Il dit aussi que les Cumeiens & les Mityleniens auoient entre eux complotté de liurer à pris fait entre les mains de Cyrus, Pactyas, l'vn de ses Capitaines qui s'estoit rebellé contre luy: mais ie ne sçay pas certainement, dit-il, pour combien, parce que lon ne l'asseure pas. toutefois il ne falloit pas imprimer vne telle note d'infamie à vne ville Grecque, sans en estre bien certainement assure. Et apres il dit, que ceulx de Chio l'arracherent du tēple de Minerue tutelair pour le liurer aux Perses, & qu'ils le feirent apres en auoir receu pour loyer le champ qui s'appelle Atarnes. Et toutefois Charon Lampfacenien recitant le faict de ce Pactyas ne taxe aucunement d'vn tel sacrilege ny les Mityleniens, ny ceulx de Chio, ains dit ainsi en ces propres termes: Pactyas entendāt comme l'armee Persienne s'approchoit, s'enfuit premierement à Mitylene, & puis en Chio, & en fin Cyrus l'eut entre ses mains. Et en son troisieme liure descriuant l'expedition des Lacedemoniēs alencontre de Polycrates le Tyran, il dit, que les Samiens disent & pensent que c'estoit pour leur rendre la pareille du secours qu'ils leur auoient fait en la guerre qu'ils eurent contre la ville de Messene, qu'ils entreprirent de guetroyer le Tyran, & de remettre les ban-

A nis en leurs maisons & en leurs biens, mais que les Lacedemoniens nyoient fort & ferme ceste cause la, & qu'ils disoient que ce n'estoit point ny pour affranchir l'Isle de Samos, ny pour donner secours aux Samiens qu'ils entreprirēt ceste guerre la, ains plus tost pour chastier les Samiens, qui auoient surpris & volé vne couppe d'or, qu'ils enuoyoit à Cresus, & encore vn corps de cuyrassé que le Roy Amasis leur enuoyoit. Et toutefois nous sçauons certainement, qu'en tous ces temps la il n'y auoit cité aucune en la Grece qui fust tāt desiruse d'honneur, ny tant ennemie des Tyrans, comme celle de Lacedemone. Car pour quelle autre couppe ny pour quelle cuyrassé chasserent ils de Corinthe & d'Ambracie les Cypselides, & de Naxos Lygdamis, & d'Athenes les enfans de Pisistratus, de Sicyone Æschynes, de Thebes Symmachus, de Phocce Aulis, de Milet Aristogenes, & ruinerent aussi la principauté vsurpee sur la Theffalie par Aristomedes & Angelus, lesquels ils feirent deffaire par le Roy Leotychides, de quoy il est plus amplemēt & plus diligemment escrit ailleurs? Et selon

C rodote ils faisoient vne extreme follie & meschanceté, sil est vray que quittans vne tresiuste & tres-honorable occasion de ceste guerre, ils confessassent, qu'ils estoient allez courir sus à des pauures gens affligez & opprimez par vn Tyran, pour vne vengeance & vne auarice mechanicque. Mais encore quant aux Lacedemoniens, il leur a donné ceste attainte, par ce qu'ils se sont rencontrez desous sa plume, mais en ce mesme endroit, la ville

de Corinthe qui estoit hors du chemin, il la vous
 a remplie en passant chemin, comme lon dit com-
 munement, d'une tresgriue imputation & bien
 mauuaise calomnie: Les Corinthiens aussi, dit-il,
 fauoriserent & aiderent affectueusement à ceste
 expedition pour vne grande iniure & outrage que
 ils auoient iadis receu des Samiens, qui est tel:
 Periander le Tyran de Corinthe enuoyoit trois
 cents ieunes enfans de ceulx de Corfou des meil-
 leurs maisons au Roy Aliattes, pour les chastrez:
 ces enfans arriuerent en Samos, là où les Samiens
 les receurent, & leur enseignerent de s'aller seoir
 comme supplians requerants franchise dedans
 le temple de Diane, & leur mirent aupres d'eux
 pour les nourrir des gasteaux faicts de fleur de
 froment & de miel. Voyla ce que ce bel historien
 appelle outrage des Samiens enuers les Corin-
 thiens, & pourquoy il dit que les Lacedemoniens
 furent irritez & prouocquez contre eulx, pource
 qu'ils auoient sauué, & gardé d'estre chastrez, les
 enfans des Grecs. Mais celuy qui attache ce repro-
 che aux Corinthiens, môstre que la ville estoit plus
 meschante que n'estoit le Tyran. Car quant à luy,
 il se vouloit venger de ceulx de Corfou qui luy
 auoient fait mourir son fils: mais les Corinthiens
 quel tort auoient ils receu des Samiens, pourquoy
 ils leur deussent ainsi courir sus, lesquels s'estoient
 opposez, & auoient empesché vne si grande cruau-
 té & meschanceté: mesmement qu'ils resuscitoient
 vn maltalent & vne racune apres trois generatiōs,
 & en faueur d'une tyrannie qui leur auoit esté fort
 griefue

Agriefue & fort dure à supporter, & laquelle destruite & ruinee, encore ne cessoient ils point d'en effacer & abolir toute la memoire. Voyla quel estoit l'outrage que les Samiens auoient fait aux Corinthiens: mais la punition des Corinthiës contre les Samiës, quelle estoit elle? Car si à bon escient ils estoient indignez contre les Samiens, il estoit conuenable, non qu'ils irritassent les Lacedemoniens, mais plus tost qu'ils les diuertissent de commander la guerre cõtre Polycrates, à fin que le Tyrان n'estant point defait ny ruiné, eulx ne fussent

Biamais affranchis, ny deliurez de seruitude tyrannique. Mais qui plus est, quelle occasion auoient les Corinthiens d'estre courroucez alencontre des Samiës qui auoient voulu, & n'auoiët peu, sauuer les enfans des Corcyreïens, attendu qu'ils ne vouloient point de mal aux Gnidiens qui les sauuerët & les rendirët? combien que les Corcyreïens, quât à ce faiët la, ne parlent aucunement des Samiens, mais quant aux Gnidiens, ils ont des hõneurs, des immunitèz & des decrets faits à leur honneur. Car nauigans en l'Isle de Samos ils chasserent du tẽple

Cles gardes de Periander, & prenãs les enfans les reporterët à Corfou, ainsi cõme ont laissë par escrit Antenor le Candiot, & Dionysius le Chalcidien en ses fondatiõs. Or que les Lacedemoniens aient entrepris ceste expedition, non pour punir les Samiens, mais pour les deliurer du Tyrان, & pour les sauuer, ie n'en veux croire que le tesmoignage des Samiës mesmes. Car ils disët qu'ils ont la sepulture faiëte honorablemët aux despës de leur chose pu-

blicque de Archias citoyen de Sparte, dont ils hono-
 rēt fort la memoire, qui y mourut lors en com-
 battant vaillamment, à l'occasion dequoy les pa-
 rents encore & descendents d'iceluy portent bon-
 ne affection, & font tout le plaisir qu'ils peuuent
 aux Samiens, comme Herodote luy mesme le tes-
 moigne. Et au cinquieme liure il escrit, que Cli-
 sthenes l'un des plus hommes de bien & des plus
 nobles de toute la ville d'Athenes, persuada à la re-
 ligieuse Pythie de prophetiser faulx, mettant rous-
 iours en auant aux Lacedemoniens, de deliurer la
 ville d'Athenes des trente tyrans, attachant à vn
 tresglorieux & tresiuste chef-d'œuvre, la calomnie
 d'une si grande impieté & si damnable crime, &
 ostant à Dieu la belle & bonne prophetie, digne de
 Themis, laquelle ainsi que lon tient prophetise a-
 uec luy. Il dit aussi que Isagoras cedoit sa femme à
 Cleomenes qui le venoit voir: & comme sa cou-
 stume est, meslant quelques louanges parmy ses vi-
 » tuperes pour se faire croire: Cest Isagoras, dit il fils
 » de Tisander, estoit de maison noble, mais ie ne
 » scaurois dire quelle estoit sa race d'ancienneté, si-
 » non que ses parents sacrifioient à Iupiter Carien. F
 A dire vray, c'est vn plaisant & facecieux moc-
 queur que ce bel historien, qui enuoye ainsi Isa-
 goras en la Carie, comme fil l'enuoyoit aux cor-
 beaux du gibet. Et quant à Aristogiton, ce n'est
 point par l'huis de derriere secrettement, ains par
 la grande porte tout ouuertemēt, qu'il le chasse en
 la Phœnice, disant qu'il estoit anciennement venu
 des Gephyreïens, non pas de ceulx qui sont en
 Eubœe

A Eubœe ou en Eretrie, cōme quelques vns cuydent, ains dit, qu'ils sont Phēniciens, & se le persuade ainsi. Mais ne pouuant du tout oster aux Lacedemoniēs la gloire d'auoir deliurē la ville d'Athenes de la seruitude des trente Tyrans, il tasche à effacer ou bien de deshonorer vn acte tresnoble par vne fort villaine passion. Car il dit, qu'ils s'en repentirent tout incontinent, cōme n'aiants pas bien fait d'auoir, par induction d'oracles faulx & supposez, ainsi chassē de leur pais des personages qui estoient leurs amis, & leurs hostes & allicz, & qui

B leur auoient promis de rendre la ville d'Athenes entre leurs mains, & de l'auoir rendue à vn peuple ingrat: & depuis ils enuoyerent querir Hippias l'vn des Pisistratides iusques à Sigeum pour le remener & remettre à Athenes, mais que les Corinthiens s'opposerent à eulx, & les en diuertirent, en leur discourant & monstrant combien de miseres & de maulx la ville de Corinthe auoit endurez, pendāt que Periander & Cypselus l'auoient tenue soubs domination tyrannicque, combien que de tous les actes de Periander il ne s'en sçauoit dire vn plus

C scelerē ny plus cruel que celuy des trois cents enfans qu'il enuoya pour faire chastrer: & neantmoins cestui-cy oze bien dire, que les Corinthiens estoient indignez & irritez alencōtre des Samiens, qui les auoient sauuez & gardez de tomber en vn tel inconuenient, comme s'ils leur eussent fait iniure: tant la malignité de ses propos est pleine d'inconstance, de repugnance & de contradiction, qui sont à tout propos en sa narration. Apres cela ve-

nant à descrire la prise de la ville de Sardis, il diminue & diffame l'acte le plus qu'il peult, aiant bien l'audace si effrontee, que d'appeller les nauires que les Atheniens enuoyerent au secours des Ioniens, qui festoient rebellez contre le Roy, origines du mal, pource qu'elles auoient essayé d'affranchir & tirer hors de seruitude tant & de si belles villes Grecques occupees par violente domination des Barbares. Quant aux Eretriens il n'en fait qu'un bien petit de mention en passant seulement, & passe sous silence un tresgrand & glorieux acte qu'ils feirent alors. Car estant ia toute Ionie en combustion, & approchant l'armee naualle du Roy, ils luy allerent au deuant au loing en pleine mer de Pamphylie, là où ils la defeirēt en bataille, puis retournans en arriere, & laissant leurs vaisseaux en la ville d'Ephese, ils allerent mettre le siege deuant la ville capitale de Sardis, & assiegerent Tissaphernes dedans le chasteau où il s'en estoit fuy, voulans aller leuer le siege de la ville de Milet, ils le meirent à execution, & feirent leuer les ennemis de deuant, les aians mis en un merueilleux effroy: mais quand ils veirent vne multitude d'ennemis qui leur venoient sur les bras, alors ils se retirerent. Plusieurs Chroniqueurs recitent ainsi ceste histoire, & entre autres Lysanias le Mallotien en ses Chroniques d'Eretrie, & eust esté bien seant, sinon pour autre occasion, au moins apres la prise & destruction de leur ville, y adiouster cest acte de vaillance & de prouesse: & au contraire luy dire, que aians esté deffaits en bataille, les Barbares les

pour-

A poursuiuirent iusques dedans leurs vaisseaux, de-
 quoy toutefois Charon Lampfacenien ne fait au-
 cune mention, ains escrit ainsi de mot à mot : Les
 Atheniens se meirent en mer avec vingt galeres,
 pour aller secourir les Ioniens, & allerent descen-
 dre à Sardis, là où ils prirent tout, excepté la for-
 teresse du Roy, & cela fait s'en retournerent à Mi-
 let. Et au sixiesme liure, aiant recité comme ceulx
 de Platées s'estoient donnez aux Lacedemoniens,
 & qu'ils leur remonstrerent, que plus tost ils se de-
 uoient retirer deuers les Atheniens, qui estoient
B leurs voisins & suffisans pour les defendre, il y ad-
 iouste puis apres, non par opinion ou souspeçon,
 mais comme le sçachant de certaine science, que
 les Lacedemoniens lors cōseilloient cela, non pour
 affection ny bonne volonté qu'ils leur portassent,
 mais pource qu'ils estoient tous contents de voir
 les Atheniens en trauail, s'estants attachez avec les
 Bœotiens. Il fault donc si Herodote n'est maling,
 que les Lacedemoniens aient esté eux mesmes
 trompeurs & malicieux, & les Atheniens bestes,
 ne voians pas qu'on les trompoit, & que les Pla-
C teiens furent ainsi iettez en auât, non pour amour
 ny pour honneur qu'on leur portast, mais pour
 vne occasion de guerre. Et puis il est manifestemēt
 conuaincu d'auoir faulsemēt controuué l'excuse
 de la pleine Lune contre les Lacedemoniens, pour
 laquelle attendre il dit qu'ils faillirent à se trouuer
 à la iournee de Marathon au secours des Athe-
 niens. Car non seulement ils ont commencé plu-
 sieurs voiajes, & donné plusieurs batailles au com-

mancement du mois, & au croissant de la Lune, **D**
 mais à ceste mesme bataille de Marathon, qui fut
 le sixiesme de Novembre, il s'en fallut bien peu
 qu'ils n'arriuaissent à tēps, de maniere qu'ils trou-
 uerent encore les morts de la desconfiture sur le
 champ, & toutefois il a ainsi escrit touchāt la plei-
 „ ne Lune: Il leur estoit impossible de faire cela, par
 „ ce qu'ils ne vouloient pas rompre l'ordonnance,
 „ d'autant qu'il n'estoit que le neuvieme du mois, &
 „ ils respondirent, qu'ils ne pouuoient partir que la
 „ Lune ne fust au plein. Ainsi doncques attendoient
 ils la pleine Lune, mais tu transeres la pleine Lu- **E**
 ne au commencement du mois, estant lors qu'ils
 partirent le premier quartier, & confonds le cours
 du ciel, l'ordre des iours, & toutes choses. Et pro-
 mettant par l'inscription de ton histoire d'escrire
 les faictz des Grecs, tu employes ton eloquence à
 magnifier & amplifier les gestes des Barbares: &
 faisant semblant d'estre fort affectionné enuers les
 Atheniens, ce neantmoins tu ne fais aucune men-
 tion de la procession qui se fait à Agres en l'hon-
 neur de Proserpine, pour luy rendre graces de la
 victoire dont ils font la feste. Mais cela luy sert **F**
 alencontre de la calomnie qu'on luy met sus, qu'il
 auoit flatté les Atheniens en son histoire, pour en
 auoir vne grosse somme de deniers qu'il en auoit
 euē: car s'il eult leu cela aux Atheniens, ils n'eussent
 pas laissé ce meschant Philippides, qui alla semon-
 dre les Lacedemoniens de venir à la bataille de
 laquelle luy mesme venoit, mesmement qu'il fut
 d'Athenes à Sparte en deux iours, ainsi comme il
 dit,

A dit, si les Atheniens apres la bataille gaignee n'eussent enuoyé querir le secours de leurs alliez. Si est-ce que Diyllus Athenien, qui n'est pas des pires historiens, escrit qu'il eut des Atheniens la somme de dix taléts à la proposition de Anvtus. Au reste aiant narré le faict de la bataille de Marathō, plusieurs estiment que luy mesme en destruit l'exploit pour le nôbre des morts qu'il en met, par ce qu'il dit, que les Atheniens feirent vœu à Proserpine la rustique, qu'ils luy sacrifieroient autant de cheures cōme ils tueroient de Barbares: mais depuis quand

B ils veirent, apres la descōfiture, que le nombre des morts estoit infiny, ils supplierent la Deesse de les dispenser de leur promesse, & les quitter pour cinq cents cheures qu'ils luy sacrifieroient tous les ans. Mais passons cela, voions ce qu'il dit apres

„ la bataille. Mais les Barbares, dit-il, avec les autres

„ vaisseaux se tirans au large en mer, & allans prendre en l'Isle les Esclaves qu'ils auoient apportez

„ d'Eretrie, doublerét la pointe de Sunion, en intention de preuenir les Atheniens auant qu'ils peussent gaigner la ville d'Athenes: & eurent les Atheniens opinion, qu'ils auoient pris ce conseil la par

„ l'intelligence & le complot qu'ils auoient avec les

„ Alcmeonides, qui auoient cōuenu avec les Perfes

„ de leur faire signe en leur monstrant vn escu, quād

„ ils seroient rentrez en leurs vaisseaux. Ils doublerét doncques la pointe de Sunion. En ce lieu ie passe outre ce qu'il appelle les prisonniers d'Eretrie esclaves, qui monstrerent autant de courage & de hardiesse en ceste guerre la, & autant de desir d'ac-

querir hōneur que nuls autres des Grecs, mais leur D
 vertu fut indignement affligee. Et encore fais ie
 moins de compte de ce qu'il diffame les Alcmeo-
 nides, entre lesquels estoient les plus grandes mai-
 sons & les plus notables hommes de la ville : mais
 le pis est, que toute la grandeur de la victoire en
 est toute renuersee, & la fin de ce tant renommé
 faict d'armes reuiet presque à rien, & ne semble
 pas que ç'ait esté vne bataille ny vn exploit si
 grand que ce fut, ains seulement vne legere rencon-
 tre & escarmouche contre les Barbares descédans
 de leurs vaisseaux, ainsi comme les maluenillans E
 enuieux disent en detractant du faict, si est ainsi
 qu'en fuyant à val de route dedās leurs vaisseaux,
 ils n'aient pas couppé les chables de leurs nauires,
 se laissans aller au vent, qui les porta plus au dedās
 de l'Attique, ains qu'on leur ait leué & monstré en
 l'air vn escu signal de la trahison, & que de propos
 deliberé ils aient fait voile vers la ville d'Athenes,
 en esperāce de la surprendre, & qu'aians sans faire
 bruit doublé la pointe du Suniō ils se soient trou-
 uez flottans alendroit du port de Phalerus, & que
 les principaux & plus apparents des Atheniēs leur F
 eussent trahy la ville, desesperās de la pouuoir sau-
 uer: car puis apres deschargeant les Alcmeonides, il
 attribue la trahison à d'autres. Il est certain, dit-il,
 que lon mōstra l'escu, & ne le scauroit on dire au-
 trement. comme si l'auoit luymesme veu. Mais il
 estoit impossible que cela se feist, si les Atheniens
 eussent vaincu tout à faict : & quād il eust esté fait,
 les Barbares ne l'eussent iamais apperceu qui s'en
 fuyoient

A fuyoient à vau de routte, en grand effroy & grãde
 agonie, chassez à force coups d'espee & de traict
 iusques dedans leurs vaisseaux, en quittant la cam-
 pagne le plus viste qu'ils pouuoïent. Mais puis apres
 quand il fait semblant de respondre pour les Alc-
 meonides, refutant les crimes que luy mesme le
 premier des hommes leur auoit mis sus: Je m'en es-
 merueille, dit-il, & ne croy point le propos de ceste
 imputation, que iamais les Alcmeonides par intel-
 ligence avec les Barbares aient môstré l'escu, vou-
 lans que les Atheniens vinssent soubs la domina-
B tion des Barbares & d'Hippias. Il me fait souuenir
 d'vne certaine clause, Tu le prédras, ou l'ayant pris
 tu le lascheras: aussi tu accuses, & apres tu defens, tu
 escriis des calomnies alencontre des personnes illu-
 stres, & puis tu les refutes apres, te descroyant toy
 mesme: car tu t'es ouy toy mesme disant, que les
 Alcmeonides auoient haulsé l'escu pour signal aux
 Barbares deffaits & fuyans à vau de routte. Et tou-
 tefois en ce que tu les defens & respôds pour eux,
 tu te môstres calóniateur: car fil est vray ce que tu
 escriis en cest endroit, que ces Alcmeonides fussent
C autant ou plus ennemis des Tyrans que Callias fils
 de Phenippus, & pere de Hipponicus, où est-ce que
 tu pourras doncques asseoir la coniuration d'eulx
 alencontre de la chose publique que tu as escrit en
 tes premiers liures? disant qu'ils feirét alliãce de ma-
 riage avec Pisistratus, & moiennãt ceste alliance le
 feirét reuenir d'exil à la tyrãnie, & ne l'en eussét ia-
 mais chassé, n'eust esté que leur fille se plaignit de ce
 que Pisistratus ne la cognoissoit pas selon la loy de

mariage & de nature. Voila les variations, contra-^D
 dictions & repugnances qui sont en la calomnie
 contre les Alcmeonides. Mais en preschant les
 louanges de Callias fils de Phenippus, & y atta-
 chant son fils Hipponicus, lequel ainsi qu'il dit luy
 mesme, estoit de son temps des plus riches homes
 d'Athenes, il cōfesse que pour s'insinuer en la bon-
 ne grace de Hipponicus & le flatter, il a mis en ieu
 ce Callias, sans qu'il en fust besoing, ny que la ma-
 tiere subiecte le requist aucunemēt. Chascun sçait
 que les Argiens ne refuserent point d'entrer en la
 commune ligue des Grecs, mais qu'ils ne voulu-^E
 rent point marcher ny estre sous le commande-
 ment des Lacedemoniens qui estoient leurs plus
 grands ennemis, & qui les haïssioient plus qu'hom-
 mes du monde, & il ne se pouuoit faire autremēt.
 Mais luy subioinct vne cause fort maligne: Quād
 ils veirent, dit-il, que les Grecs les vouloient com-
 prendre en la ligue, sçachans bien que les Lacede-
 moniens ne leur feroient iamais part de la prerog-
 ative de commander, ils la demanderent, à fin
 qu'ils demourassent en repos avec quelque occa-
 sion couloree. Ce qu'il dit apres que Artaxerxes^F
 depuis long temps recorda aux Ambassadeurs des
 Argiens qui estoient allez deuers luy iusques en
 Suse, & qu'il leur dit qu'il n'estimoit qu'aucune
 cité de la Grece luy fust plus amie que celle d'Ar-
 gos, il y adioust puis apres selon sa coustume pour
 se couvrir: Quant à cela ie ne le sçay pas biē certai-
 nement, mais bien sçay- ie que tous hommes sont
 subiects à faire des faultes, & ne croy pas que les Ar-
 giens

Agiés en aient fait des plus villaines: mais ie suis, dit-
 » il, tenu de dire ce que lon dit, & nō pas de le croire
 » du tout: & ce propos la, dit-il, soit dit pour tout le
 » cours de mon histoire. Car cela mesme se dit, que
 » c'estoient les Argiens qui auoient appellé le Roy
 » de Perse pour faire la guerre à toute la Grece, à
 » cause qu'ils ne pouuoient par armes faire teste aux
 » Lacedemoniens, & aimoient mieulx auoir toute
 » autre peine que la douleur presente & le regret
 » qu'ils en auoient. N'est-ce pas, comme il conte
 luy mesme, que vn Æthiopien dit touchant les
B parfums & la pourpre des Perses, que les huiles &
 les habillemēs des Perses estoient trompeurs: autāt
 luy pourroit on dire, que trōpeuses sont les paroles
 & trōpeuses les figures du parler d'Herodote, tout
 y est enueloppé, & tournoyāt alenuiron, & rien de
 clair ny de sain: comme les peintres qui rendent les
 choses claires plus apparentes & plus eminentes
 par les vmbres qu'ils mettent alenuiron: aussi par
 ses façons de dire, qu'il ne dit pas ce qu'il dit, il roi-
 dit plus ses calomnies, & par ses ambiguitez rend
 les suspitions plus profondes. Mais si les Argiens
C ne sont voulu entrer en ligue cōmune avec tous
 les autres Grecs, ains s'en sont abstenus pour vne
 ialousie de commander, ou vne emulation de vail-
 lance alencōtre des Lacedemoniens, qu'ils n'aient
 grandement deshonoré la memoire de leur pro-
 geniteur Hercules, & leur ancienne noblesse, on
 ne scauroit dire du contraire, comme s'il eust esté
 mieux seant aux Siphniens, ou aux Cithniens, qui
 sont deux petites Isles, de combattre pour la li-

berté de la Grece , que non pas aux Spartiates , en D
 estriuant alencontre d'eux , & contestant de la
 prerogatiue de commander , & ce pendant faillit
 de se trouuer à tant de grands & honorables com-
 bats & trauaux. Et si ce ont esté eux qui aient ap-
 pellé le Roy de Perse cõtre la Grece, pour ce qu'ils
 ne pouuoient par armes faire teste & resister aux
 Lacedemoniens , pourquoy est-ce qu'ils ne se de-
 clarerent tout ouuertement du party des Medois,
 depuis que ce Roy fut arriué en la Grece? Et s'ils
 ne vouloient pas s'aller rendre au camp du Roy
 barbare, pour le moins demourans à la maison E
 que ne faisoient ils quelque dommage au pais des
 Lacedemoniens? que n'occupoient ils de rechef la
 contree de Thyree , ou par quelque autre moi-
 en s'attachoient ils aux Lacedemoniens , & ne les
 empeschoient: car en ce faisant ils eussent peu por-
 ter grand dommage aux Grecs, s'ils les eussent gar-
 dez d'aller au camp de Platées avec vn si bon nô-
 bre de bons combattans à pied. Mais il fait en cest
 endroit les Atheniens grands , & les appelle sau-
 ueurs de la Grece , faisant en cela bien & droite-
 ment, s'il n'y auoit beaucoup de blasmes & de vi- F
 tuperes meslez parmy ses louanges. Mais mainte-
 nant quand il dit que les Lacedemoniens furent
 abandonnez par les autres Grecs , & que neant-
 moins estants delaissez seuls apres auoir fait plu-
 sieurs grandes vaillances ils estoient morts gene-
 reusement, ayant mesmement veu au parauant que
 les Grecs fautorisans le party des Medois auoiēt in-
 telligence avec le Roy Xerxes, n'est il pas tout eui-
 dent

A dent par cela qu'il ne disoit pas tous ces propos la à la louange des Atheniens, mais plustost qu'il les louoit, à fin de mesdire de tous les autres Grecs? car qui se pourroit maintenant courroucer & fascher de ce qu'il iniurie ainsi atrocement & outrageusement les Thebains & les Phociens, veu qu'il condamne de trahison, qui ne fut oncques, mais qui pourroit auoir esté ainsi comme il coniecture, ceux mesmes qui se sont exposez à tous perils de la mort pour la liberté de la Grece? Des Lacedemoniens mesmes il nous fait doubter, mettât en incertitude

B s'ils sont morts en combattant, ou bien s'ils se sont rendus, separant d'avec eux par bien legeres coniectures ceux des Thermopyles. Et en racontant le naufrage qui aduint aux vaisseaux du Roy de Perse, où il fut perdu vne grande richesse, Aminocles, dit-il, fils de Cresines, natif de Magnesie, en fut grandement enrichy, car il rencontra vne infinité de deniers & de vaisselle d'or & d'argēt. Il n'a pas seulement laissé passer cela sans vne morsure de malignité: car celuy la qui n'estoit pas gueres heureux au demourant par ceste rencontre deuint fort riche,

C par ce qu'il luy estoit aduenu vn malencōtreux accident qui le tenoit en grande tristesse, c'est qu'il auoit tué son fils. Il est doncques tout euident qu'il a fait venir & mis en auāt en son histoire toute ceste réconte de thresors & vaisselle d'or & d'argēt, & de toute ceste richesse que le flot de la mer ietta sur le riuage, expressément pour bastir le lieu & la place à mettre le meurtre qu'Aminocles auoit cōmis en la personne de son propre fils, aiant Ari-

Stophanes le Bœotien escrit, qu'il auoit demandé ^D
 quelque argent aux Thebains qu'ils luy auroient
 refusé, & qu'il auoit voulu deuifer & conferer des
 lettres avec les ieunes hommes de la ville, mais que
 les magistrats de la ville le luy auoient defendu, tât
 ils estoient rudes & grossiers, haïssans toutes bon-
 nes lettres, il n'y en met autre preuue ny coniectu-
 re quelconque: mais Herodote en porte tesmoi-
 gnage, veu les choses dont il impute & charge les
 Thebains, les vnes en mentant faullement, les au-
 tres par ignorance, les autres comme leur vou-
 lant mal, & aiant querelle alencontre d'eux, car ^E
 il assure que les Theffaliens eurent intelligence
 avec les Medes du commencement par necessité,
 en quoy il dit verité: & puis deuinant des autres
 Grecs, qu'ils eussent volontiers abandonné les
 Lacedemoniens, il y subioinct, que ce n'estoit pas
 de leur bon gré, mais par contrainte & necessité,
 d'autant qu'on les prenoit ville apres ville. Et
 neantmoins il ne donne pas aux Thebains l'excu-
 se de la mesme contrainte, combien qu'ils eussent
 enuoyé cinq cents hommes soubs la conduite du
 Capitaine Mnamias, pour la defense du destroit ^F
 de Tempes, & au pas des Thermopyles, autant
 comme le Roy Leonidas en demanda, lesquels
 seuls demourerent avec luy, & avec les Thespiens,
 là où tous les autres l'abandonnerent apres qu'ils
 se veirent enuironnez par derriere: & comme le
 Roy barbare s'estant fait maistre des aduenues fust
 sur leurs confins, Demaratus Spartiate estant amy
 d'Apaginus, chef de la ligue, pretendait à la prin-
 cipau-

A cipauté, pour le droit d'hospitalité qu'ils auoient entre eux, le donna à cognoistre, & le feit amy familier du Roy barbare: tous les autres Grecs estoient sur la mer, & n'y auoit personne qui par terre alast au deuant des ennemis. Voila comment ils receurent à la fin les conditions d'appointemēt avec les Barbares, se trouuans surpris d'une tresgrande necessité: car ils n'auoient ny mer ny vaisseaux comme les Atheniens, ny n'estoient logez es plus reculees parties du fond de la Grece, comme les Spartiates, ains estoient distants d'une iournee & demie seulement du camp des Barbares, & auoient tenté la fortune aux destroits des aduenues avec les Spartiates seuls, & avec les Thespiens, où ils auoient eu du pire, & auoient esté deffaiçts. Et neantmoins cest historien icy est si iuste qu'il dit, que les Lacedemoniēs se voians delaissez & abandonnez de tous alliez, se fussent à l'adventure laissez aller à entendre à appointment: & ne pouuāt effacer vn si beau & si glorieux acte, ny nier qu'ils nel'eussent fait, il le va cõtaminant par ceste mauuaise imputation & suspicion en escriuant ainsi:

e Les alliez doncques & confederez estants renuoyez, s'en retournerent en leurs païs, & obeirent au mandement de Leonidas, & les Thespiens & les Thebains demourerent seuls avec les Lacedemoniens: Mais quant aux Thebains, ce fut malgré eux & contre leur volonte, par ce que Leonidas les retenoit, comme en ostage: & les Thespiēs de leur bon gré, car ils dirent que iamais ils n'abandonneroient Leonidas, ny ceux qui estoient

avec luy. Ne montre il pas clairement en cela **D**
 qu'il a quelque mal-talent & mal-veuillance a len-
 contre des Thebains particulieremēt, pour la quel-
 le non seulement il calomnie faulſement & iniu-
 ſtement la ville de Thebes, mais il ne ſ'eſt pas ſou-
 cié de faire en ſorte que ſa calomnie fuſt ſeulement
 vray-ſemblable, ne qu'il ne fuſt point repris de ſa
 conſcience, meſme de ſe contredire en bien peu de
 lignes: car aiant vn peu deuāt eſcrit, que Leonidas
 voiant les confederez & alliez n'eſtre pas bien en-
 couragez, & n'auoir pas le cœur de prendre la for-
 tune, il leur commanda de ſe retirer. Au contraire **E**
 vn peu apres il dit qu'il retint les Thebains par for-
 ce contre leur volonté, leſquels il eſt pluſtoſt vray-
 ſemblable qu'il euſt chaffe à force, quād ils euſſent
 voulu demourer, ſ'ils euſſent eſté accuſez ou ſouſ-
 peçonnez de ſ'entendre avec les Medois: car veu
 qu'il ne vouloit point de ceux qu'il ſentoit mal af-
 fectionnez & mal encouragez, quel profit auoit il
 de laiſſer parmy les ſiens qui deuoient combattre,
 des hommes qui luy eſtoient ſuſpectz? car vn Roy
 des Spartiates, & capitaine general de tous les
 Grecs n'auoit pas vn tel entendement ny iugemēt **F**
 de vouloir retenir cōme oſtages quatre cents hom-
 mes aiant armes, avec trois cents qu'il en auoit,
 meſmement lors qu'il ſe voyoit enueloppé d'en-
 nemis qui luy courroient ſus tout à vn coup, & par
 deuant & par derriere: car ſi bien au parauant il
 les euſt menez quand & luy en lieu d'oſtages, au
 moins eſt il bien vray-ſemblable qu'à l'extremité,
 ou que eux ne ſe ſouciās plus de Leonidas ſ'en fuſ-
 ſent

A sent allez librement, ou que Leonidas eust redouté autant d'estre enuironné par eux que par les Barbares. Mais outre cela, n'eust-ce pas esté vne sottise digne de mocquerie au Roy Leonidas, de commander aux autres Grecs qu'ils se retirassent, estât son intention & sa resolution de bien tost s'en aller mourir, & le defendre aux Thebains à fin qu'il les gardast aux autres Grecs, luy qui estoit resolu de s'en aller mourir: car si veritablement il les menoit quand & luy en lieu d'ostages, ou bien au lieu d'esclaves, il ne les deuoit pas retenir avec ceux

B qui estoient certains & resolus de mourir, ains plustost les liurer aux Grecs qui s'en alloient d'avec luy. Et la cause qui restoit, que lon pouuoit dire qu'il les retenoit à l'aduenture à fin qu'ils mourussent quand & luy, ce bel historien a osté encore ceste occasion la, par ce qu'il a escrit de la cupidité de gloire du Roy Leonidas en ces propres termes:

C Leonidas faisant ce discours en luy mesme, & voulant que ceste gloire appartaint aux Spartiates seuls, renuoya les confederez chascun en leurs pais, plustost que pour ce qu'ils fussent de conseils & opinions contraires: car c'eust esté vne excessiue sottise, de retenir ses ennemis pour les rendre participants d'une gloire dont il deboutoit & priuoit ses amis. Il appert doncques par les effects, que Leonidas ne se desffioit point des Thebains, mais qu'il les estimoit & tenoit pour ses bons & loyaux amis: car il passa par dedans Thebes en menât son armee, & à sa requeste obtint ce que nul n'auoit iamais obtenu, de coucher dedás le temple d'Her-

cules, & raconta le matin aux Thebains la vision **D**
 qu'il y auoit eüe. Car il luy fut aduis qu'il veit tou-
 tes les plus grādes & principales villes de la Grece
 en vne vaste mer agitee de fort aspre & violente
 tourmente, là où elles flottoient & branloient fort
 inegalement, mais que celle de Thebes surpassoit
 toutes les autres: car elle s'esleuoit à mont iusques
 au ciel, & puis soudain se baissoit si bas qu'on la
 perdoit de veüe, ce qui estoit proprement la figure
 de ce qui leur aduint puis apres. Mais Herodote
 en escriuant le combat de Leonidas, a obscurcy
 par silence la plus noble action qui y fust, disant **E**
 seulement qu'ils moururēt tous dedans le destroit
 de la vallee, alentour d'une motte. Mais il fut au-
 trement fait, car quand ils s'apperceurent la nuict
 qu'ils estoient enuironnez par les ennemis, ils se
 leuerent & s'en allerent droit, la teste baissée, dedās
 le camp des ennemis, & mesmement vers la tente
 du Roy, en intention de le tuer s'ils l'y trouuoient,
 & de mourir alentour de luy. Si allerent iusques
 à sa tente tuans tousiours ceux qui par le chemin
 se trouuoient deuant eux pour leur faire teste, ou
 bien leur faisant prendre la fuitte. Mais ne pou- **F**
 uans trouuer Xerxes en vn camp si vaste, si spa-
 cieux, errans çà & là à le chercher par tout, à la fin
 à grande peine furent ils deffaicts par les Barbares,
 qui s'espandirent tout alentour d'eux de tous co-
 stez. Or escriurons nous en la vie de Leonidas tous
 les autres actes de grande hardiesse, & les mots
 notables des Spartiates qu'Herodote a laissez à di-
 re: mais toutefois en passant, il ne sera point mau-
 uais

A uais d'en coter encore icy quelques vns. Auant
leur partement de Sparte on leur feit des ieux fu-
nebres, là où affisterent à les veoir leurs peres &
leurs meres: & luy meſme Leonidas reſpondit à vn
qui luy diſoit, qu'il menoit bien peu de gens avec
luy pour combattre: mais beaucoup, dit-il, pour
mourir. Et à ſa femme qui luy demandoit au ſor-
tir, ſ'il luy vouloit rien dire, en ſe retournant il luy
dit, qu'elle ſe remariaſt avec quelque homme de
bien, & qu'elle portast de bons enfans. Quand il
fut dedans la vallee des Thermopyles, il auoit en
B ſa compagnie deux de ſa race qu'il deſiroit ſau-
uer. Si donna vne lettre à l'vn d'eux pour la por-
ter là où elle ſ'addreſſoit: mais l'autre ne la voulut
point prendre, diſant en cholere, Je ſuis venu pour
combattre, & non pas pour porter lettres. A l'au-
tre il commanda d'aller porter quelque parole aux
Magiſtrats de Sparte, mais luy reiettant les let-
tres, & prenant le bouclier, ſ'alla mettre en ſon
rang pour combattre. Qui eſt-ce qui ne repren-
droit vn autre qui auroit fait telle omiſſion? Mais
ceſtui-cy aiant pris la peine de ramaffer & de met-
C tre par eſcript le baſſin d'Amafiſ à lauer les pieds,
le latron qui mena les aſnes, qui donna les ou-
tres de vin aux gardes, & pluſieurs autres telles
badineries, celuy la ne ſera iamais eſtimé auoir ob-
mis par negligence, ny par meſpris ou oublian-
ce, tant de beaux actes & de dictz ſi notables, mais
par vne malice & mauuaistié & iniuſtice enuers
quelques vns. Si dit que les Thebains eſtants
avec les autres Grecs combattirent, mais que ce

fut par ce qu'ils estoient retenus par forcé : car **D** non seulement Xerxes, mais aussi Leonidas, auoient des fouëtteurs qui les suiuoient, ie croy, avec des fouëts pour fouëtter ceux qui restiuoient, & ceux la contraignoient à coups de fouët les Thebains de combattre cõtre leur volonté, là où ils s'en pouuoient aller & s'en fuir, & que volontairement ils auoient pris intelligence avec le Roy barbare, là où il n'y auoit personne qui les vint secourir. Et puis apres il escrit que les autres se hastans pour gagner la motte, les Thebains se separans tendirent les mains aux Barbares, & s'ap- **E** procherent d'eux, disans vne tres-veritable parole, qu'ils tenoient le party des Medes en leur cõeur, & qu'ils auoient baillé au Roy l'eau & la terre, mais toutefois qu'estants retenus par force ils estoient venus en ce destroit de Thermopyles, & qu'ils ne pouuoient mais de la blesseure que leur Roy auoit receuë: en faisant ces remõstrances là ils gagnerent leur cause, mesmement qu'ils auoient les Thessaliens pour tesmoins de leur dire. Voyez comment ceste iustification pouuoit bien estre entendüë & ouye entre tant de clameurs barba- **F** resques de tant de milliers d'hommes, & tant de bruits meslez & confus, tant de fuittes, tant de chasses & poursuittes, & les tesmoins ouys & examinez. Et les Thessaliens qui alloient par toute la vallee parmy tant de gens que lon tuoit, parmy tant de corps que lon fouloit aux pieds, harenguans & plaidans pour les Thebains, d'autant que peu au parauant eux aiants conquis par
armes

A armes toute la Bœoce, iusques à la ville de Theſpies, ils les en chasserent, les aiants deffaits en vne bataille, & aiants tué leur Capitaine Lattamias: car voila les alliances & intelligences que les Bœotiés auoient avec les Theſſaliens en ce temps la, & rien d'equité ny d'humanité des vns enuers les autres. Mais encore, comment est-il possible que les Thebains eussent esté sauuez par le tesmoignage des Theſſaliens? car les Barbares, ce dit-il, en tuerent les vns qui approcherent d'eux, & en flastrirent les autres en plus grand nombre des

B marqués & picqueures du Roy, commenceant au Capitaine mesme Leontiades. Mais ce n'estoit pas seulement Leontiades, qui estoit Capitaine des Thebains aux Thermopyles, ains Anaxander, comme l'escrit Aristophanes, aiant pris les noms des magistrats de Thebes des archiues mesmes publiques: & aussi le met ainsi Nicander Colophonien: & n'y a iamais eu personne deuant Herodote qui ait scen, que le Roy Xerxes eust fait flastrir ne picquer aucun Thebain, car cela eust esté vne grande defense contre sa calomnie, & eust esté vn beau moien à celle ville

C de se glorifier de telles picqueures, comme aiant voulu Xerxes ainsi punir pour ses plus grands & plus mortels ennemis Leonidas & Leontiades: car il fait fouëtter & pendre le corps de l'vn tout mort, & fait picquer l'autre tout viu. Et cestuy cy a pris la cruauté dont ils vserent enuers Leonidas mort, pour vne preuue manifeste que ce Roy barbare haïſſoit plus que tous les hommes du mode

Leonidas, lors qu'il viuoit. Et ce pendant il dit **D** que les Thebains qui tenoient le party des Medes, furent mocquez & picquez comme esclaves aux Thermopyles, & puis, apres encore auoir esté picquez, ils combattirent bien asprement pour les Barbares deuant la ville de Platées. Et me semble que qui luy diroit comme fait Clisthenes à ce beau danseur Hippoclidès, qui morguoit avec les
 „ cuiffes en vn festin, Tu as dâsé la verité: Il respon-
 „ droit, Il n'en chault à Hippoclidès. Et en son huitième liure il dit, que les Grecs estonnez & effroyez prirent resolution de s'enfuir de la coste **E** d'Artemisium au dedans de la Grece, & que ceux d'Eubœe les prians qu'ils voulussent demourer encore vn petit de temps, iusques à ce qu'ils peussent se delcharger de leurs femmes & de leurs familles: ils n'en feirent compte, iusques à ce que Themistocles prenant de l'argent en donna à Eurybiades & à Adimantus Capitaines des Corinthiens, & alors ils demourerent & combattirēt par mer cōtre les barbares. Pindare, qui estoit natif non de cité cōféderee avec les autres Grecs, mais d'vne que lon soupçonnoit de tenir le party des Medes, **F** neantmoins faisant mētion de ceste bataille d'Artemisium y adiouste ceste belle exclamation,

Ceux d'Athenes ont planté

Le glorieux fondement

De la Grecque liberté.

Et Herodote au contraire, que quelques vns veulent dire auoir orné & embelly la Grece, tient que ceste victoire la fut vn acte de concussion & de larcin

A larcin, & que les Grecs combattirent malgré eux, estants abusez par leurs Capitaines qui en auoient pris de l'argent pour ce faire. Encore ne fut ce pas là le bout de sa malignité. Car tous sçauēt & confessent que les Grecs aiants eu du meilleur par mer en ceste coste la, neantmoins cederent le chef d'Artemisium aux barbares, apres auoir ouy la nouvelle de ce qui estoit aduenu au pas des Thermopyles : car il n'eust de rien seruy de s'arrester là, à garder la mer de la Grece, veu que la guerre estoit au dedans iusques à leurs portes, & que Xerxes auoit

B gagné les passages. Et Herodote fait, que les Grecs, deuant qu'ils eussent eu la nouvelle de la mort de Leonidas, tenoient conseil, & estoient en propos de s'enfuir : car il dit ainsi, Mais aiants esté mal traictez, mesmement les Atheniens qui auoient plusieurs de leurs vaisseaux bien offensez, deliberoient de prendre la fuitte vers la Grece. Toutefois permettons luy de nommer ainsi, ou plus tost de reprocher ainsi la retraicte de deuant la bataille: mais l'ayant appellé deuant fuitte, & l'appellant encore de present fuitte, il la nommera encore

C apres fuitte, tant il s'attachoit amerement à ce vilain mot de fuitte. Mais, dit-il, il vint avec vn bateau aux barbares vn homme natif d'Estiee, leur apporter la nouvelle de la fuitte des Grecs du chef d'Artemisium : ce que eux ne pouuans croire, retindrent le messager en bonne & seure garde, & enuoyerent quelques galeres subtiles pour descourir. Que dis tu? comment escriis tu, que ceux s'enfuiert comme vaincus, que les ennemis mes-

mes apres la bataille ne peuuent croire qu'ils D
 fuient, comme les pensans beaucoup plus forts? Et
 puis on estimera qu'il soit digne de foy, quand il
 escrit d'un hōme particulier, ou d'une ville à part,
 veu qu'en un seul mot il oste la victoire à toute la
 Grece ensemble? Il abbat le trophée que tous les
 Grecs dresserent, & arrache les inscriptions qu'ils
 meirent en l'honneur de Diane le long de la coste
 d'Artemisium, faisant trouuer que ce n'estoit que
 tout vent d'orgueil & vaine vanterie. l'Epigram-
 me & inscription estoit de telle teneur,

Après auoir par martiale encombre
 Icy deuant iadis en mer deffait
 Des nations d'Asie infiny nombre,
 Les preux enfans d'Athenes en ont fait
 Edifier, pour memoire du faict,
 Ce monument à Diane la sainte,
 Lors que par eux eust esté en effect
 Des fiers Medois toute l'armee esteincte.

Il ne décrit point l'ordre de la bataille, en quel
 rang & place chascune ville combattoit: & en la
 retraicte, que luy baptise du nom de fuite, il dit,
 que les Corinthiens nauiguoient les premiers, & F
 les Atheniens les derniers. Il falloit donc qu'il ne
 foullast pas ainsi villainement aux pieds ceux qui
 tenoient le party des Medois, luy qui est estimé
 de plusieurs auoir esté natif de Thuries, & qui
 se ioinct luy mesme aux Halicarnassiens, lesquels
 estants d'extraction Doriens, vindrent avec leurs
 femmes & leurs enfans faire la guerre aux Grecs.
 Mais tant s'en fault qu'il allegue premierement
 les

A les contrainctes & necessitez qu'eurent les villes qui tindrent pour les Medois, qu'il recite des Theffaliens, qu'estants capitaux ennemis des Phociens, ils leur manderent neantmoins deuât qu'ils conferueroient leur pais, sans que lon y feist dommage quelconque, s'ils leur vouloient bailler cinquante talents d'argent: il escrit en cest endroit la
 » en ces propres termes. Les Phociens estoient seuls
 » des Grecs qui en ce quartier la ne tenoient point
 » le party des Medois, non pour autre cause, ainsi
 » comme ie trouue, apres auoit bien tout confide-
B ré, que pour la haine qu'ils portoient aux Theff-
 » saliens: & si les Theffaliens eussent esté du costé
 » des Grecs, ie croy que les Phociens eussent tenu
 » le party des Medois. Et neantmoins bien peu
 apres il dira, que treze villes des Phociens furent
 entierement arses & bruslees par ce Roy barbare, le pais tout gasté, & le temple de la ville d'Abes
 consumé par feu, les hommes & les femmes passées au fil de l'espee, ceux qui ne peurent à temps
 gagner la cyme du mont de Parnasse: & toute-
 fois il met au rang de ceux qui estoient les plus af-
C fectionnez partisans des Barbares, ceux qui ai-
 moient mieux endurer toutes les extremitez de
 miserables que peult apporter la guerre, que d'aban-
 donner la defense de l'honneur de la Grece: &
 n'ayant peu reprendre les faicts des hommes, il
 sest amusé à songer de faulces imputations, & des
 soupçons qu'il forge & compose avec sa plume
 alencontre d'eux, ne voulant que lon iuge de leurs
 intentions par leurs actions, s'ils n'auoient pas la

mesme volonté & opinion que les Theſſaliens, D
 comme ſils euſſent laiſſé à eſtre de la trahiſon,
 pour ce que la place auroit deſia eſté priſe par au-
 tres. Si donc quelqu'vn voulant taſcher à excuſer
 les Theſſaliens de ce qu'ils ſ'entendirent avec les
 Medes, diſoit qu'ils ne l'auroient pas voulu, mais
 que pour la haine qu'ils auoient contre les Pho-
 ciens les voians adherents & alliez avec les Grecs,
 ils ſe feroient au contraire tenus du coſté des Me-
 des, contre leur volonté & iugement, ne ſemble-
 roit il pas eſtre vn effronté flatteur, & qui en fa-
 ueur d'autruy, cherchant d'honneſtes couuertu- E
 res à de villains faiçts, deſtordoit la verité? Je croy
 que ouy, quant à moy. Comment doncq ne ſera
 il trouué vn manifeſte calomniateur celuy qui di-
 ra, que les Phociens n'aient pas ſuiuy le meilleur
 party pour la vertu, mais pource qu'ils ſçauoient
 que les Theſſaliens auoient volonté & iugement
 contraires? Car encore ne deſtourne il pas la ca-
 lomnie ſur des autres, comme il a bien accouſtu-
 mé de faire ailleurs, en diſant l'auoir ouy dire à
 d'autres, ains dit que luy meſme en conferant tou-
 res choſes, n'en trouue point d'autre occaſion. Il F
 falloit doncq qu'il alleguaſt quant & quant ſes
 preuues & indices par leſquels il ſe perſuadoit, que
 ceux qui font les actions toutes ſemblables aux
 gens de bien, aient la volonté & l'intention meſ-
 me que les meſchants. Car l'occaſion qu'il alle-
 gue de l'inimitié, eſt vne friuole digne de riſce, par-
 ce que l'inimitié que les Æginetes auoient alen-
 contre de ceux d'Athenes, ny les Chalcidiens con-

Are les Eretriens, ny les Corinthiens contre les Megariens, ne les empescha pas de se ioindre à la ligue de la Grece, pour la defense de la liberté commune, côme aussi à l'opposite, les Macedoniens leurs plus aspres ennemis, & qui plus chastioient les Thessaliens, ne les destournerent pas de l'intelligence & alliance avec les Barbares. Car le peril commun couuroit & cachoit les inimitiez particulieres, de sorte que quittans & se despouillans de leurs passions priuees, ils attachoient leur consentement ou à l'honesteté pour la vertu, ou à leur

B profit pour la necessité. Et neantmoins oultre celle necessité, de laquelle ils se trouuerent surpris, & contrains de se soubmettre aux Medois, ils se retournerent de rechef du costé des Grecs, dequoy Laocrates mesme Spartiate leur porta publicquement tesmoignage. Et Herodote luy mesme, comme estant forcé & contrainct, confesse en la description de la guerre de Platées, que les Phociens se ioignirent aux Grecs. Et ne se fault pas esbahir, s'il est ainsi violét & aspre alencontre de ceux qui ont esté infortunez, veu mesmes que ceulx qui se trouuerent aux affaires, & qui hazarderent leur estat

C pour le bien public, il les remue & trāspose au rang des ennemis & des traistres. Car ceulx de Naxos enuoyerent trois galeres armées au seruice & secours des Barbares, mais l'vn des Capitaines, nommé Democritus, persuada aux autres deux, de se renger plus tost avec les Grecs. Voyla comment il ne scauroit louer sans blasmer, ains à fin qu'vn homme particulier soit loiié, il fault que toute vne

ville soit vituperée & tout vn peuple, dequoy luy **D**
 porte tesmoignage entre les anciens Hellanicus,
 & entre les recents & modernes, Ephorus, disant
 l'vn que les Naxiens vindrent au secours des Grecs
 avec six, & l'autre avec cinq galeres : & Herodote
 se conuainct soy mesme, d'auoir controuué & fal-
 sifié cela : car les particuliers historiographes des
 Naxiens escriuent, que parauant ils auoient re-
 poulsé Megabates lieutenant du Roy, qui avec
 deux cents voyles estoit venu surgir en leur Isle, &
 que depuis encore vn autre lieutenant du Roy
 Datis en passant leur auoit bruslé cent villes. Et fil **E**
 est ainsi, comme Herodote luy mesme dit ailleurs,
 que eulx mesmes destruisirent leur ville, & mei-
 rent le feu dedans, & sauuerét leurs personnes de-
 dans les montagnes, n'eussent ils pas eu vne bonne
 occasion de porter secours à ceulx qui auoient
 esté cause de la ruine & destruction de leur païs,
 & non pas de se ioindre avec ceulx qui combat-
 toient pour la liberté commune? Mais que ce n'ait
 pas tant esté pour louer Democritus, comme pour
 blasmer les Naxiens, qu'il ait cōtrouué ceste men-
 songe, il le monstre clairement, par ce qu'il tait & **F**
 omet à dire le vaillant exploit d'armes que feit
 alors ce capitaine Democritus, ainsi comme Simo-
 nides l'a déclaré par cest Epigramme,

Democritus fut le tiers qui chocqua
 En la bataille, où par mer suffocqua
 La flotte Grecque au bras de Salamine,
 Celle de Mede, & la mit en ruine,
 Il recourut vn des vaisseaux amis,

A Et en prit cinq de ceulx des ennemis.

Mais qui se courrouceroit pour les Naxiens contre luy? Car fil y a des Antipodes, comme quelques vns tiennent, qui habitent le rond de la terre desfous nous, ie pense que ceulx là encore ont ouy parler de Themistocles, & du conseil qu'il donna aux Grecs de combattre dedans le destroict de Salamine, là où depuis il feit bastir vn temple à Diane la sage conseilliere, en l'Isle de Melite, apres que le Roy barbare fut desconfit. Ce gentil historien icy refusant, tant qu'en luy est, d'aduouër cest ex-

B ploict, & taschant d'en transferer la gloire à vn autre, escrit ainsi de mot à mot: En ces entrefaittes, ainsi comme Themistocles fut de retour en sa galere, il y eut vn Athenien nommé Mnesiphilus qui luy demanda ce qu'ils auoient resolu: & entendant qu'il auoit esté conclud de retirer leurs vaisseaux au destroict du Peloponese, pour illec combattre par mer deuant le Peloponese: le te dis, replicqua Mnesiphilus, que s'ils remuent leur flotte de deuant Salamine, tu ne combattras plus iamais par mer pour ton pais, car chascun se retirera au sien bien tost apres. Parquoy fil y a moi en au monde, va tascher à rompre ceste resolution, & fais tât enuers Eurybiades qu'il demeure plus tost icy. Et puis subioingnant que ce cõseil agreea merueilleusemēt à Themistocles, & que sans rien respondre à cela, il sen retourna droict trouuer Eurybiades, derechef il escrit en ces propres termes: Se seant aupres de luy, il luy recite le conseil que luy auoit recordé Mnesiphilus, se l'attribuant à luy, & y adiousta

„ encōte d'autres choses. Voyez vous comment il **D**
 attache à Themistocles vne opinion de malignité,
 de s'attribuer vn conseil comme sien, qui estoit de
 l'invention de Mnesiphilus? & puis se mocquant
 encore d'auantage des Grecs, il dit, que Themisto-
 cles n'estoit pas homme prudent, & qu'il ne voyoit
 point pourquoy on l'auoit surnōmé Vlysses pour
 sa prudence: mais que Artemisia qui estoit natifue
 de mesme ville que luy, sans que personne luy eust
 enseigné, ains l'ayant excogité d'elle mesme, auoit
 predit à Xerxes que les Grecs ne luy pourroient
 pas resister ny faire teste long temps, & qu'ils se se- **E**
 pareroient & escarteroient chascun en leurs villes,
 „ & s'enfueroient: & n'est pas vraysemblable que si
 „ tu fais marcher ton armee de terre vers le destroit
 „ du Peloponese, qu'ils t'attendent, & ne se soucie-
 „ ront plus de combattre par mer pour les Atheniés:
 „ là où si tu te hastes de cōbattre par mer, ie crains &
 „ doute que si ton armee de mer reçoit aucun dom-
 „ mage, que cela ne face quelque preiudice à celle de
 „ terre. Il ne s'en fault que des vers qu'Herodote ne
 face de ceste Artemisia vne Sibylle, prophetisant
 les choses à venir ainsi exactement: & pourtant **F**
 Xerxes luy donna la charge & commission de re-
 mener ses enfans en la ville d'Ephese, car il auoit
 oublié, comme on peult penser, d'amener des fem-
 mes de sa Royale ville de Suze, s'il eust pensé que
 ses enfans eussent eu besoing d'estre accompagnez
 & cōduits par escorte de femmes. Je ne veux point
 parler de ce qu'il a controuué & faulsemēt inuēté
 contre nous, mais examinōs vn peu ce qu'il a con-
 trouué

A trouué contre les autres. Il dit doncques, que les Atheniens disent, que Adimantus le capitaine des Corinthiens, quand on fut aux mains avec les ennemis s'enfuit de peur, non pas siant en arriere, ny se retirant peu à peu d'entre les ennemis, ains tout ouuertement, mettant voiles au vent, & faisant faire la volte à tous ses vaisseaux, & puis qu'une fregate allant apres luy, l'attaingnit à la queuë de l'Isle de Salamine, & que de dessus la fregate il y eut
» quelqu'un qui luy cria: Adimantus, tu t'en fuis tra-
» hissant & abandonnant les Grecs, mais toutefois
B ils n'ont pas laissé de gagner la bataille, & d'estre
» victorieux sur les ennemis. Ceste fregate la estoit,
comme il fault penser, descendue du ciel. Car quel
besoing estoit il d'vser là de feinte & machine, tra-
gicque, veu que en tous autres endroiçts il surpasse
tous les poëtes tragicques du môde en toute faul-
seté & vanité? Adimantus doncques croiant à ce-
ste voix retourna en l'armee, estât ainsi despesché.
» C'est le bruit qu'en sement les Atheniens, mais les
» Corinthiens ne le confessent pas, ains disent qu'ils
» furent les premiers qui chocquerent & combatti-
C rent en ceste bataille nauale, & en cela aussi leur
» porte tesmoignage tout le reste des Grecs. Tel est
cest hôme en plusieurs endroiçts, il seme ainsi des
calomnies & des imputations des vns contre les
autres, à fin que l'un ou l'autre ne faille point, com-
ment que ce soit, d'estre trouué meschant, ainsi
côme en ce lieu il luy succede bien à propos. Car
si sa calomnie est creuë, les Corinthiens en demou-
reront deshonorés: & si elle est decreuë, les Athe-

niens: ou il fault que les Atheniens n'aient pas **D**
 menty contre les Corinthiens, mais luy mesme
 contre tous les deux. Qu'il soit vray, Thucydides
 introduisant l'ambassadeur Athenien, parlât alen-
 contre des Corinthiës en la ville de Lacedemone,
 & haultement parlât de leurs faicts & gestes con-
 tre les Medes, & mesmement de ceste bataille de
 Salamine, ne met sus aux Corinthiens aucune im-
 putation de trahison, ny de lascheté d'auoir aban-
 donné leur rang: Car il n'est pas vraysemblable,
 que les Atheniens eussent reproché vne telle villa-
 nie à la ville des Corinthiës, veu qu'ils la voyoient **E**
 engrauée au troisieme lieu apres les Lacedemone-
 niens, & apres eux és inscriptions des monuments
 que lon en consacroit aux Dieux, & en Salamine,
 ils leur permirét d'enterrer leurs morts ioignant la
 ville, comme estants gens de bien, & qui s'estoient
 portez vaillamment, avec vne telle inscription,

Nous habitons iadis, amy passant,
 La ville où sourd Pyrene iallissant,
 Et maintenant la seiche Salamine
 Contient noz os, aians sur la marine
 Icy deffait vaisseaux Pheniciens, **F**
 Guerriers Medois & soldats Persiens,
 Pour la sacree Achaïe defendre,
 Que sous le ioug Barbares vouloient rendre.

Et la representation de sepulture vuide qui est de-
 dans le destroiët du Peloponese, a aussi vne telle
 inscription;

Nous cy gifans auons perdu la vie,
 Pour engarder Grece d'estre afferuie.

a Et sur les offrandes d'un Diodorus, capitaine de galere des Corinthiens, au temple de Latone, il y a aussi vne autre inscription telle,

Les mariniers de Diodorus ont
Fait à Latone offre des armes, dont
Estoient armez les Perfes, en memoire
Qu'en mer sur eulx ils eurent la victoire.

Adimantus luy mesme, auquel Herodote ne cesse iamais de dire iniure, & de faire contumelie, disant qu'il se partit seul de tous les Capitaines pour s'en fuir, & qu'il n'attendit pas le choc de la bataille,

b regardez quel honneur on luy a fait,

Adimantus, estrange, se repose
En ce tombeau, lequel a esté cause
Que la Grece est couronnee au iourd'huy
De liberté, qui fust serue sans luy.

Il n'est pas vray-semblable qu'on eust fait tant d'honneur à vn homme lasche, couard & traistre, apres sa mort, & n'eust pas eu l'audace de mettre & imposer à l'une de ses filles le nom de Nausinica, qui signifie, victoire nauale: & à l'autre, Acrothiniū, qui signifie, despouille gaignee sur les ennemis: & à la troisieme, Alexibia, qui signifie, secours contre la force: & à son fils, Aristeus, qui signifie, grand guerrier, si l'eust acquis quelque grande reputation & illustre gloire par ces faicts la. Et d'auantage il n'est pas croyable non plus, ie ne diray pas qu'Herodote, mais nō pas le dernier des hōmes de la Carie, ait ignoré celle glorieuse & memorable priere que feirēt lors les Dames Corinthiennes à Venus, qu'il luy pleust inspirer à leurs hōmes vn

amour de donner la bataille aux Barbares. Car ce fut vne chose renommee par tout, & en fait Simonides vn Epigramme, qui est engraué sur des images de bronze qui sont dedás le temple de Venus, lequel on dit auoir esté anciennement basty par Medee, les vns, à fin qu'elle cessast de plus aimer son mary, les autres à fin que son mary Iason cessast d'aimer vne Thetis : & est l'Epigramme tel,

Sainte Venus n'a voulu de la Grece
Abandonner aux Medois la foiblesse,
Pour la deuote instance & oraison
Que faite en ont ces Dames, à raison
Dequoy on a ces statues dressees
Pour honorer leurs diuines pensees.

C'estoit cela qu'il falloit escrite, & en faire mention plus tost que d'aller inserer en son histoire, qu'Aminocles auoit tué son fils. Mais outre, apres s'estre bien saoulé de charges & imputations qu'il met sus à Themistocles, & l'accusant qu'il ne cessoit de robber & piller toutes les Isles secrettemēt, au desceu des autres Capitaines ses compagnons, finalement encore oste-il aux Atheniens la couronne de la principale vaillance, & la met sur la teste des Æginetes, escriuant ainsi: Les Grecs aiant enuoyé les primices de leurs despouilles & butin au temple de Delphes, y feirent demander à Apollo, si il auoit eu suffisante part d'icelles despouilles, & si il s'en contentoit. Et il respondit que des autres Grecs ouy, mais des Æginetes non, ausquels il demãdoit le pris du premier honneur de vaillance qu'ils auoient emporté à la bataille de Salamine.

A Ce n'est pas aux Tartares ny aux Perses, ny aux Ægyptiens qu'il attribue sa parole, en feignant & mentant, cōme fait Æsopé aux corbeaux, aux singes, ains se sert de l'oracle mesme d'Apollo Pythié, pour debouter les Atheniens du premier lieu & degré d'honneur de la bataille de Salamine, & à Themistocles du second qui luy fut adiugé au destroit du Peloponese, parce que là chascun des autres s'attribua à soy le premier lieu & à luy le second: & ainsi le iugement n'ayant point eu de conclusion, à cause de l'ambition des Capitaines, tous

B les Grecs se departirent, n'aiants pas voulu par envie deferer à Themistocles le premier honneur de la victoire. Et en son neuvième & dernier liure, ne luy restant plus à mesdire & detracter, sinon des Lacedemoniens, & de ce beau chef-d'œuvre qu'ils feirent contre les Barbares deuant la ville de Platées, il escrit que les Lacedemoniens, qui parauant auoient eu fort grand' peur que les Atheniens ne s'accordassent avec Mardonius, & n'abandonnassent les autres Grecs, quand ils eurent acheué de murer le destroit du Peloponese, & mis en seureté

C leur país, ils ne se soucierent plus des autres, & les laisserent là, faisans feste & grande chere chez eux, en se mocquant des ambassadeurs des Atheniens, & les retenants sans les despescher. Et comment doncques sortirent du país cinq mille Spartiates, aiant chascun d'eulx sept Ilots avec luy? & comment prenant sur eulx vn si grand peril vainquirent & desconfirent ils tant de milliers de Barbares? Escoutez en la cause. Il y auoit, dit-il, à Sparte

» vn homme qui estoit accouru de Tegee appellé D
 » Chileus, duquel aucuns des Ephores estoient ho-
 » stes & amis. Ce fut celuy qui leur persuada de
 » mettre leur armee aux champs, leur remonstrant
 » que la closture & muraille du destroit ne seruiroit
 » de rien au Peloponese, si vne fois les Atheniens se
 » ioignoient avec Mardonius: & si d'aduéture quel-
 » que particulier affaire eust retenu ce Chileus la en
 » Tegee, la Grece ne fust point demouree victorieu-
 » se. Puis derechef ne sçachant qu'il doibt faire de
 » ceulx d'Athenes, il les remue & les met tantost
 » hault tantost bas, disant qu'estants en dispute du E
 » second lieu d'honneur alencontre des Tegeates,
 » ils feirent mention des Heraclides, & qu'ils alle-
 » guerent les vaillâces qu'ils auoient autrefois faites
 » contre les Amazones, & les sepultures des Pelopo-
 » nesiens morts deuât le Chasteau de la Cadmee, &
 » que finalement ils vindrent descendre sus la bat-
 » taille de Marathon, tant ils auoient d'enuie & de
 » conuoitise de mener & conduire le costé gauche
 » de l'armee. Et vn peu apres, il met que Pausanias
 » & les Spartiates volontairement leur cederent la
 » superiorité de cōmander, & leur prierent de pren- F
 » dre le costé droict de la bataille, & leur bailler le
 » gauche, à fin qu'ils combattissent de front contre
 » les Perses, comme si les Atheniens eussent restiué à
 » combattre contre les Barbares, pour ce qu'ils ne
 » l'auoient pas accoustumé. Combien que c'est vne
 » mocquerie de dire qu'ils ne voulussent pas com-
 » battre contre des ennemis qu'ils n'auoient pas ac-
 » coustumez. Mais il dit plus, que tous les autres
 » Grecs;

A Grecs, cōme les Capitaines les voulussent mener
 » camper en vn autre lieu, si tost qu'on les remua, les
 » gens de cheual, dit-il, s'en fussent volontiers fuis
 » dedans la ville de Platées, mais pour le moins alle-
 » rent ils fuians iusques au temple de Iuno: en quoy
 il accuse tous les Grecs ensemble de desobeissance,
 de lascheté, couardise, & de trahison: & finable-
 ment il escrit qu'il n'y eut que les Lacedemoniens,
 & les Tegeates qui chargeassent les Barbares, & les
 Atheniens qui combattissent alencontre de ceulx
 de Thebes, priuant egaleme[n]t toutes les autres vil-
B les de leur part de la gloire d'un si bel acte, par ce
 qu'il n'y en eut pas vn qui meist la main à l'œuure,
 ains demourerent tous appuiez sur leurs armes à
 regarder le passe-temps, abandonnans & trahissans
 ce pendant sans rien faire, ceulx qui combattoient
 pour leur salut, iusques à ce que bié tard les Phlia-
 siens & les Megariens, entendans que Pausanias
 auoit ia deffait ceulx qu'il auoit trouuez en teste,
 vindrent courans donner sur les gens de cheual
 des Thebains, là où ils furent aussi tost desconfits,
 mais les Corinthiens ne se trouuerent pas à ceste
C rencōtre, par ce qu'ils auoient pris le chemin hault
 des costaux, & par ainsi ne rencontrerent pas la
 cheualerie des Thebains. Car les gens de cheual
 Thebains voiāts les Barbares mis à vau de routte,
 se ietterent deuant eulx, pour couvrir leur fuite, &
 les secoururent de grande affection, pour leur ren-
 dre le gré & la grace, sil vous plaist, en recompēse
 des picqueures qu'ils leur auoient faites au visage,
 dedans le destroict des Thermopyles. Mais on

peult voir & entendre par ce que décrit Simonides des Corinthiens le rang & le lieu qu'ils tenoient en ceste bataille, & le deuoir qu'ils y firent en combattant contre les Barbares deuant Platees, par ces vers,

Les habitants d'Ephyre ville pleine
 De mainte source & ruisseau de fontaine,
 Gents au mestier de la guerre sçauans,
 Et ceulx qui sont à Corinthe viuans,
 Ville à Glaucus, au milieu combattoient,
 Qui pour tesmoings des trauaux qu'ils portoiēt,
 Depuis ont fait vn ioyau precieux B
 De fin or pur, qu'ils ont facté aux Dieux.
 D'eulx & des leurs tousiours la renommee
 De mieulx en mieulx en sera estimee.

Simonides a escrit cela d'eulx, non comme tenant eschole des lettres en la ville de Corinthe, ny comme aiant expres entrepris d'escire vn cantique à leur louange, mais comme escriuant vne histoire de ces affaires la en vers Elegiaques. Mais cestuy-cy anticipe la preuue & conuiction de ceste menterie par telles raisons que lō luy pouuoit obiicer: D'oū viennent doncques tant de grands charniers de sepultures, tāt de monuments de morts, sur lesquels les Plateiens iusques au-iour-d'huy font encore des effusions anniuersaires aux ames des trespassez les autres Grecs assistans? car à mon aduis il accuse & condamne encore plus villainement de trahison leurs ancestres par ces mots qui en ensuiuent: Et les sepultures que lon voit encore alentour des Platees, i'entens, dit-il, que depuis les succes-

A successeurs aians honte de ceste faulte, de ne se-
 estre leurs parents trouuez à ceste bataille, les ont
 esleues comme des fosses pour le regard de la po-
 sterité. Herodote est seul d'entre tous les hommes,
 qui ait ouy reputer ceste absence de la bataille,
 trahison : & Pausanias, Aristides, les Lacedemoniens
 & les Atheniens ne cognoissoient pas bien
 ceux qui auoient fait default de se trouuer à la bat-
 taille, & toutefois ny les Atheniens n'empesche-
 rent point les Æginetes, qui estoient leurs aduer-
 saires, d'estre compris en l'inscription, ny ne con-
Buainquirent point les Corinthiens de s'en estre fuis
 de la bataille de Salamine, par ce que la Grece
 porte tesmoignage au contraire. Et toutefois He-
 rodote dit, que dix ans apres ceste guerre des Me-
 des, Cleadas citoyen de Platées, estant amy & ho-
 ste public des Æginetes, entassa vn monceau de
 terre en façon de charnier, qu'il appella le charnier
 des Æginetes, pour leur gratifier en cela. Et à quoy
 teint il donc que les Lacedemoniens & les Athe-
 niens, qui estoient si ialoux de ceste gloire, que peu
 s'en fallut qu'ils ne vinssent aux mains les vns con-
Ctre les autres, pour l'erection du Trophee, qu'ils ne
 debouterent & dechasserent ceux qui par lascheté
 auoient failly de se trouuer à la bataille, ou qui
 s'en estoient fuis, des pris d'honneur, ains souffri-
 rent que leurs noms fussent engrauez sur le Tro-
 phée, & sur les grandes statues qui en furent faites
 pour memoire : ains leur feirent part du butin &
 des despouilles, & finalement engrauerent ceste
 inscription sur l'autel publique,

Les Grecs vainqueurs par haults exploits de D
guerre,

Aians chassé les Perfes de leur terre,
Ce franc autel commun à toute Grece
Ont erigé à la digne haultesse
De Iupiter, qui de leur liberté
Contre Medois protecteur a esté.

N'a ce point esté Cleadas, Herodote, ou quelque
autre, qui flattât les villes Grecques ait engraué ce-
ste inscription? Quel besoing dōques estoit il qu'ils
se trouuassent en vain à fouir la terre, & à entasser
des charniers & des tombeaux pour le regard de la E
posterité, veu qu'ils voyoient leur gloire consacree
& immortalisee par les plus illustres & plus nobles
marques publiques & monuments dediez? Et qui
plus est, encore dit on que Pausanias pēsant desia à
vsurper la tyrānie, en vne offrāde qu'il fait au tēple
d'Apollo en Delphes, fait mettre ceste inscription,

Pausanias souuerain Capitaine
Des Grecs, aiant l'armee Persienne
Toute defaite, en a publiquement
A Apollo donné ce monument.

Et bien qu'il communiquast aucunement la gloire F
de ceste execution aux Grecs, dont il se disoit sou-
uerain Capitaine, ce neantmoins les Grecs ne le
voulans supporter, ains s'en plaignans, les Lacede-
moniens enuoyerēt à Delphes faire effacer à coups
de ciseau ceste escripture, & y feirent engraue les
noms des villes, comme la raison & iustice le vou-
loit: & toutefois comment est il vraysemblable,
ou que les Grecs se soient courroucez de ce qu'ils
n'auoient

A n'auoient point de part à ceste inscription, s'ils se sentoient coupables de ne s'estre point trouuez en la bataille, ou que les Lacedemoniens faisant effacer & racler le nom de leur capitaine, y feissent engrauer & escrire les noms de ceulx qui les auoient abandonnez & trahis au danger? car c'est chose fort indigne si Sochares & Dipnistus, & tous les autres qui feirét le deuoir de gents de bien & vailants en ceste iournee la, ne se douleurent & ne se plainirét point, que les Cythniens ny les Meliens fussent inscrits sur les Trophees, & qu'Herodote attribuât ceste bataille la à trois villes seules, efface & racle toutes les autres des Trophees, & des lieux dediez & sacrez: car de quatre batailles qui furent lors données contre les Barbares, il dit que les Grecs s'enfuirent du chef d'Artemisium, & au pas des Thermopyles, ce pendant que leur Roy & souuerain Capitaine s'exposoit pour eux au peril de la mort, ils se tenoient clos & couuerts en leurs maisons, & ne s'en soucioient point, ains celebriét les festes & ieux Olympiques & Carniens. Et en descriuant la bataille de Salamine, il parle tant de la royne Artemisia, qu'il n'vse pas autant de paroles à reciter tout le discours & le succes de la bataille. Et finablement touchant celle de Platées il dit, que les autres Grecs assis à leur aise ne sceurent rien du combat, iusques à ce que tout fust fait, cōme Pigres Artemisien, se iouât & follastrât en des vers, escrit, qu'évne guerre des rats & des grenouilles ils auoiēt accordé qu'ils combattroient sans crier ny mot dire, à fin que les autres n'en apperceussent rien.

Et puis il dit, que les Lacedemoniens ne furent de rien plus vaillants ny meilleurs combattans que les Barbares, mais qu'ils les desfirent, par ce qu'ils estoient nuds & desarmez au combat. Et Xerxes estât luy mesme present en personne, s'ils n'estoient chassez à coups de fouët par derriere, on ne les pouuoit iamais faire aller attacher les Grecs, mais en ceste iournee de Platées aiants chagé d'ames & de courage, cōme il fault dire, ils n'estoient de rien moindres en hardiesse, force de corps, & fermeté de cœur, que les Grecs. Mais la robbe se trouuant destituee d'armes les affola, par ce qu'estants tous nuds, ils auoient à combattre cōtre les Lacedemoniens qui estoient bien seurement armez. Quelle gloire doncques, ny quelle grandeur reuiet aux Grecs de ces quatre batailles, s'il est ainsi que les Lacedemoniens combattirēt contre des hommes nuds & desarmez? & les autres, encore qu'ils fussēt sur les lieux, ne sceurent neantmoins rien du combat, iusques à ce que tout fust fait: & si les charniers que chascune ville honore d'anniuersaires annuels estoient tous vuides, & les tripieds & autels des Temples des Dieux pleins de faulx escritteaux: & Herodote seul a sceu & cogneu la verité, & tous ceulx qui ont iamais ouy parler des affaires des Grecs ont esté deceus & trōpez par le bruit commun qui court touchant ces faicts d'armes la, cōme estants excellents & merueilleux. Qu'en fault il doncques penser & dire? Que c'est vn homme qui paint bien au vis, que son lāgage est beau & doux, qu'il y a de la grace, de l'artifice & de la beauté

en ses

4 en ses narrations: mais comme vn poëte musicien,
 quand il recite doucement, elegamment & deli-
 catement vne fable, non pas comme bien l'enten-
 dant & au vray la sachant, cela delecte & resiouit
 tous ceux qui l'escoutent: mais il se fault garder
 comme d'vne mousche cantharide entre les roses,
 de la mesdisance, de la bassesse, de faire grand cas
 de peu de chose, qui se glissent par dessoubs ces
 bien pollies, lissees & vnies façons de parler,
 à fin que sans y prendre garde nous ne
 mettions en nostre teste de faulses,
 estranges & absurdes opinions
 & persuasions des meil-
 leurs & plus nobles
 hommes & vil-
 les de la
 Gre-
 ce.
 *

Les deuifans au discours, Onesicrates;
Soterichus, Lyfias.

Ce traité n'appartient point, ou bien peu, à la Musique de plusieurs voix accordees & entrelassees ensemble, qui est au iourd'huy en vsage, ains à la façon anciëne, qui consistoit en la conuenance du chât avec le sens & la mesure de la lettre, & la bõne grace du geste: & le style ne semble point estre de Plutarque.



LA femme du preudhomme Phocion souloit dire, que ses bagues & ioyaux estoient les beaux faiçts d'armes de son mary: mais quant à moy ie dis que mes bagues & ioyaux, & tout l'ornement, non de moy en particulier seulemēt, mais aussi en cõmun, de tous mes amis & parents, est la diligence de mon maistre, & son affection à m'enseigner les lettres: car nous sçauons que les plus nobles victoires des grands Capitaines, sauuent de peril eminent & present quelque nombre de soudards, ou bien vne ville, ou, au plus, toute vne nation, mais pour cela ils ne rendent point meilleurs ny leurs soudards, ny leurs citoyēs, ny ceux de leur nation: & au contraire la science & erudition, qui est la vraye substance de la felicité, la cause efficiente de prudence, se treuve vtile, non

*Science
Sainct
de science
u. 4. re*

A non seulement à vne maison, à vne ville, & à vne nation, mais vniuersellement à tout le genre humain. D'autant doncques que le profit du sçauoir & des lettres est plus grand que de toutes les ruses de guerre du monde, d'autant en est aussi la souuenance & la rememoration plus digne. Or n'agueres le gentil Onesicrates auoit cōuié à vn festin en sa maison, le second iour des Saturnalles, certains personnages sçauans & experts en la musique, & entre autres Soterichus d'Alexandrie, & Lysias vn qui prenoit pësson de luy, & apres que les ceremonies ordinaires en tels banquets eurent esté faittes,

B il se prit à dire à la cōpagnie: Le croy mes amis, qu'il ne seroit pas fort à propos maintenāt à ce banquet de rechercher qui est la cause efficiente de la voix humaine, par ce que c'est vne question qui demãderoit vn plus grand loisir & plus loing du repas: mais pour ce que les meilleurs Grammairiens définissent la voix, Que c'est vn air frappé, sensible & perceptible à l'ouïe, & qu'hier nous enquismes de la Grãmaire, & trouuasmes que c'est vn art qui fait profession de figurer avec des traicts & lignes, les

C voix, & les mettre en depos d'escripture pour le thresor de la memoire: voions maintenant quelle est la seconde science apres celle la, à qui il cōuient & appartient traiter & s'embesongner de la voix, ie pense quant à moy que c'est la Musique. Si est chose deuote, religieuse & preallable aux hommes, de louer & remercier les Dieux de ce qu'ils leur ont donné à eux seuls la voix articulée. Ce que Homere mesme a bien remarqué en ces vers,

Voix

Gramm

Les fils des Grecs le courroux appaisoient D
 Du clair Phebus, par ce qu'ils ne faisoient
 Que tous les iours ses louanges chanter,
 Et de beauté suprême le vanter:
 Pean qui l'arc à faute point n'entese,
 Son cœur oyant luy en tressailloit d'aïse.

Or sus doncques gentils supposts de la Musique
 rememorez à la compagnie, qui en a esté le pre-
 mier inuëteur, & que c'est que le temps y a depuis
 adiousté, qui ont esté les plus excellés maistres qui
 aient exercé ceste science, & d'auantage à combien
 de choses & quelles est vtile cest exercice. Voila E
 ce que proposa nostre maistre. Et Lyfias prenant
 la parole, Tu demâdes, dit-il, Onesicrates vne que-
 stion qui a esté proposée par plusieurs: car la plus
 part des philosophes Platoniques, & les meilleurs
 des Peripateticiens se sont employez à cōposer &
 escrire de l'ancienne musique, & de la corruption
 qui depuis y a esté adioustee: mais les plus sçauans
 Grammairiens & Musiciens ont mis ou employé
 beaucoup de peine à en escrire, aussi y a il beau-
 coup de dissension entre eux. Heraclides au recueil
 qu'il a fait des hommes qui ont esté excellents en F
 la musique, escrit qu'Amphion a esté le premier
 qui a inuenté l'usage de chanter sur la Cithre, & la
 poésie Citharistique, estant fils d'Antiope & de Ju-
 piter qui luy enseigna ceste façon de chanter, ce
 qui se preuue par vn roolle qui est soigneusemēt
 gardé en la ville de Sicyone, auquel sont nom-
 mees les prestresses d'Argos, les poëtes, & les mu-
 siciens. En ce mesme aage fut aussi Linus, natif
 de

A del'Isle d'Eubœe, qui composa des lamentations funebres: & Anthes natif d'Anthedone, au pais de la Bœoce, qui a fait des hymnes: & Pierius natif de la ville de Pierie, qui composa le poëme des Muses: & Philammon natif de Delphes qui feit la nariuité d'Apollo & de Diane en chansons, & fut ce luy aussi qui inuenta premierement les danses que lon dâse au Temple d'Apollo en Delphes. Et Thamyris natif de la Thrace eut la meilleure voix, & chanta plus melodieusement qu'homme qui fust de ce temps la, tellemēt qu'il prouoqua les Muses,

B & chanta à elles, ainsi comme disent les poëtes. Lon escrit que ce fut luy qui composa la guerre des Titans alencontre des Dieux. Aussi dit on, que Demodocus natif de Corcyre fut vn ancien musicien, lequel feit la destruction de Troye, & les nopces de Venus & de Vulcain. Et que Phemius natif d'Ithaque feit le retour des Grecs, qui retournerent de Troye avec Agamemnon. Si dit que la diction de ces poëmes la n'estoit pas prose solüe, & sans mesure de pieds, ains qu'elle estoit comme celle de Stesichorus & des autres anciens compositeurs de chansons, qui faisoient des carmes, & puis y adioustoient des chants: car il dit, que Terpander mesme estoit vn poëte de chansons à chanter sur la cithre, qui selon chascune loy adioustoit à ses carmes & à ceux d'Homere des chants qu'il chantoit és ieux de pris, où les Musiciens chantoient les vns contre les autres: & dit que ce fut luy qui imposa le premier les noms aux loix, c'est à dire, aux airs & façons de chanter sur la

cithre: à l'imitation duquel Terpander, Clonas fut **D** le premier qui composa les loix des flustes, & les Profodies, c'est à dire, cantiques d'entree és sacrifices, & fut aussi poëte qui escriuit des Elegies & des vers hexametres. Et Polymnestus le Colophonien, qui fut apres luy, vfa semblablement de mesmes poëmes. Or les loix des flustes dont vsoient ces bonnes gens la, Onesicrates, estoient Apothetus, Elegies, Comarchios, Schenion, Cepion, Tenedius, & Trimeles. Mais depuis furent inuentees celles que lon appelle Polymnasties: mais les loix du ieu de la Cithre furent long temps deuant **E** celles des flustes inuentees du temps de Terpander, qui deuant nomma celles de la Cithre la Bæotienne, Æoliene, Trochaique, & Aiguë, Cepion & Terpandriene, & encore Tetrædiene: aussi a encore fait ce mesme Terpander des poëmes ou preludes de la Cithre en vers. Or que les loix des Cithres des anciens fussent composees en vers hexametres, Timotheus le donne à cognoistre: car meslant les premieres loix en ses carmes, il vfa de la diction Dithyrambique, à fin qu'il ne semblast incontinent qu'il pechast contre l'ancienne **F** musique. Ce Terpander a esté excellent en l'art de iouer de la cithre: car on trouue aux tables anciennes des ieux Pythiques, qu'il en a emporté quatre fois le pris tout de rang, & est fort ancien en l'ordre des temps: car Glaucus d'Italie le met plus ancien mesme que n'est Archilocus, en vn traitté qu'il a fait des poëtes & musiciens anciens, car il dit qu'il est second apres ceux qui ont institué le

A le ieu des flustes : & Alexandre en son recueil de ceux de la Phrygie, escrit qu'Olympius fut le premier qui apporta en la Grece le battement des chordes, & aussi les Idees Dactyles, & que Hyagnis fut le premier qui ioua des flustes, & puis apres son fils Marsyas, & puis Olympus, & que Terpander imita les carmes d'Homere, & les chants d'Orpheus. Mais quant à Orpheus, il semble qu'il n'imita personne, attendu que deuant luy il n'y en auoit pas vn, sinon les poëtes pour chanter sur les flustes, ausquels les œuures d'Orpheus ne ressembtent aucunement. Et ce Clonas poëte des loix des flustes, qui fut vn peu apres le temps de Terpander, fut natif de Tegee, ainsi comme disent les Arcadiens : ou bien, ainsi que disent les Bœotiens, de la ville de Thebes. Apres Terpander & Clonas on met Archilocus, combien que quelques autres historiens escriuent, que Ardalus Trœzenien ordonna la Musique des flustes, & qu'il y eut aussi vn Polymnestus poëte, fils de Meles Colophonié, qui avec vne femme nommee Polymneste fait les loix des flustes. Il est vray **C** que ceux qui ont compilé les tables font mention, que Clonas fait ces deux loix Apothetus & Schœnion, & quant à ce Polymnestus, Pindare & Alman, poëtes de chansons, en font mention, & disent que Philammon ancien natif de Delphes, cōposa les loix de la Cithre, qui ont esté faittes par Terpander. En somme le chant sur la Cithre de Terpander cōtinua en sa simplicité iusques à l'aage de Phrynis : car il n'estoit pas anciennemēt loisible

de chanter ainsi sur la Cithre à volonté, comme lon fait maintenant, ny de transferer les harmonies ny les rythmes: car ils gardoient à chascune loy sa propre tension des cordes: c'est pourquoy elles estoient appellees loix, pour ce qu'il n'estoit pas loisible de transgresser en chascune de ces loix l'espece de tension des cordes qui luy estoit accoustumee: car apres auoir par acquit chanté vn peu des Dieux, ils sortoient incontinent à la poësie d'Homere & des autres poëtes, ce que lon peut veoir clairement par les preludes de Terpander: & fut faite la forme de la Cithre du temps de Cesion, disciple de Terpander, laquelle fut appellee Asiade, pour ce que les ioueurs de Cithre de Lesbos, qui est tout ioignant l'Asie, en vsèrent d'vne telle forme, & dit on que Periclitus fut le dernier ioueur de Cithre, qui gagna le pris és ieux Carniës en Lacedemone, estant natif de Lesbos, apres la mort duquel faillit à Lesbos la continuation de la succession des ioueurs de Cithre. Il y en a qui s'abusans cudent que Hipponax ait esté du mesme temps que Terpander, & il semble que Periclitus mesme ait esté plus anciẽ, que non pas Hipponax. Mais aiant exposé les loix du chant des flustes. & des Cithres ensemble, nous passerons maintenant à exposer celles qui sont propres aux ioueurs des flustes seulement: car on tient que le susdit Olympus estant ioueur de flustes, venu de la Phrygie, feit la loy des flustes sur Apollo, laquelle s'appelle Polycephalus, & dit on que cest Olympus est vn des descendans du premier Olympus, fils de Marsyas, qui

A qui fait les loix sur les Dieux : car estant aimé de Marsyas, & aiant appris de luy à iouer des flustes, il apporta les loix Harmoniques en la Grece, desquelles à present vsent les Grecs és festes des Dieux. Les autres disent que ceste loy de Polycephalus est de Crates, qui fut disciple d'Olympus, mais Pratinas escrit que ceste loy est d'un autre Olympus plus recent, & que l'autre loy, qui s'appelle Harmatias, ce fut le premier Olympus disciple de Marsyas qui la fait, & quelques vns tiennent que ce Marsyas auoit nom Masses, les autres disent Mar-

B syas, fils de Hyagnis, qui le premier inuenta l'art de iouer de la fluste. Mais que ç'ait esté Olympus qui ait fait la loy, qui s'appelle Harmatias, on le peut veoir par les tables des anciés poëtes que Glaucus a cõpilees, & peut on aussi par là mesme apprendre, que Stesichorus natif de Himere ne se proposa à imiter ny Terpander, ny Antilochus, ny Thales, ains Olympus, vsant de la loy Harmatias, & de l'espece qui est par dactyle, laquelle aucuns disent estre de la loy Orthiene : les autres disent que ce

C ce qu'il y a eu autrefois quelques ioueurs de flustes de la Mysie. Et y a aussi vne autre ancienne loy qui s'appelloit Cradias, que Hipponax dit, que Mimnermus iouoit : car du commencement les ioueurs de flustes iouoient des Elegies mises en chant, ce que nous montrent les tables & registres du ieu de pris des Musiciens, en la feste des Panatheneiens. Aussi y a il eu vn Sacadas Argien, poëte de chansons & d'Elegies mises en chant, lequel est

nombré entre les bons poëtes, & es tables est en-
 registré auoir gaigné le pris par trois fois aux ieux
 Pythiens. Pindare mesme en fait mention. Et
 cōme ainsi soit qu'il y ait trois modes selon Poly-
 mnestus & Sacadas, à sçauoir la Phrygiene, & la
 Doriene, & la Lydiene, que Sacadas feit en chaf-
 cune d'icelles vn tourdiō, & qu'il enseigna le Cho-
 rus à chäter le premier en mode Doriene, le secōd
 en Phrygiene, & le tiers en Lydiene, & que ceste
 loy la s'appelle Trimeres, à cause de ces trois tour-
 dions, toutefoix aux tables & registres des anciens
 poëtes qui sont en Sicyone, il est noté que ce fut ^E
 Clonas qui inuēta ceste loy Trimeres. Le premier
 estat doncques de la musique, qui a esté ordonné
 & institué en la ville de Sparte par Terpander,
 estoit tel. Le deuxiēme fut ordonné, ainsi que lon
 tient plus communément, par Thales Gortynien,
 Xenodamus Cytherien, & Xenocritus Locrien, &
 Polymnestus Colophonien, & Sacadas Argien,
 comme les principaux autheurs & cōducteurs: car
 ce ont esté ceux qui ont premierement institué en
 Lacedemone les danſes nues, qu'ils appellent Gy-
 mnopēdies, & en Arcadie les Demōstrations qu'ils ^P
 appellent, & en Argos les Endymaties: & estoient
 Thales, Xenodamus & Xenocritus poëtes de
 chants de victoire, qui s'appellent Pēans: & Po-
 lymnestus de ceux que lon appelle Orthiens, &
 Sacadas d'Elegies. Les autres disent que Xeno-
 damus a esté poëte de Hyporchemates, c'est à dire
 cantiques au son desquels on danſoit es festes des
 Dieux, & non pas des Pēans, comme Pratinas.

A Et encore au iour d'huy a lon en main vne chanson de cestuy Xenodamus, qui manifestement est vn Hyporcheme, duquel genre de poësie Pindare meisme vse. Et qu'il y ait difference entre vn Pean & vn Hyporchema, les œuures meisme de Pindare le monstrent, car il a escrit des vns & des autres. Et Polymnestus a fait aussi des loix du ieu des flustes, & en celle qui se nomme Orthie, il a vse de melodie, ainsi comme disent les Harmoniques, mais nous ne le scaurions assureer au vray, d'autant que les anciens n'en ont rien

B laissë par escript. Aussi doubte lon si Thaletas le Candiot a esté poëte de Peans: car Glaucus disant qu'il a esté apres Antilochus, escrit bien qu'il a imité ses chansons, mais qu'il les a estendues d'auantage, & qu'il entremessa le rythme Maronien, & celuy de Candie parmy sa melodie, dequoy iamais Archilochus n'auoit vse, ny Orpheus, ny Terpander: car on dit que ce Thaletas apprit à le faire du ieu d'Olympus, & qu'il fut tenu pour bon poëte. Quant à Xenocritus natif de Locres en

C Italie, il n'est pas resolu s'il a esté poëte de Peans: car on dit bien qu'il prenoit des subiects de faicts Heroïques, de maniere qu'il y en a qui appellent ses argumens des Dithyrambes. Glaucus dit bien, que Thaletas estoit plus ancien d'aage que Xenocritus. Et Olympus, ainsi comme a escrit Aristoxenus, est reputé auoir esté inuenteur du genre de Musique Enarmonique, car au parauant luy tout estoit ou Diatonique, ou Chromatique: & coniecture lon que l'inuention en fut de telle sorte: car

Olympus prattiquant le diatonique, & passant souvent son chant iusques à la note parypate diatonique, qui est, tantost de la paramese, tantost de la mese, & passant outre la Lichanos diatonique, il entendit la douceur & beauté de telle affection, & ainsi admirant la composition de telle proportion, & la trouuant bonne en celuy la, il la feit en la mode Doriene: car il ne touche point à ce qui est propre au genre Diatonique, ny au Chromatique. Tel fut le commencement de l'Enarmonique. Car ils mettent le premier vn Spondees, auquel nulle des diuisions ne monstre ce qui luy est propre ne **E**peculier, si ce n'estoit que eu esgard au vehement Spondiasme, on ne vouloit dire & coniecturer que ce fust Diatonique: aussi est il manifeste qu'il mettra faulx & discord, qui le mettra ainsi, pour autant qu'il est d'une diesse moindre que le ton posé aupres du prince Discordant, pource que si quelqu'un met en la puissance d'un ton, ce qui est propre au vehement Spondiasme, il aduendra qu'il mettra tout ioingnant l'un l'autre, deux Diatoniques, l'un simple; & l'autre composé: car l'Enarmonique renforcé sur la mese b fa b mi, dōt **F**lon vsé maintenant, n'est pas de ce poëte. Cela est facile à apperceuoir si lon prend garde en oyant vn qui iouë des flustes à la vieille mode. Car le demy ton és meses est incomposé. Voyla doncques le commencement des Enarmoniques. Mais depuis le demy ton a esté diuisé és Lydiens & Phrygiens, & semble que Olympus ait augmenté la musique, parce qu'il a introduit ce qui n'auoit point

A point encore esté trouué, & qui estoit ignoré de ceux qui auoient esté deuant luy, & qu'il a esté auteur de la Grecque & belle Musique. Il fault aussi parler des rythmes, c'est à dire nombres & mesures: car on a aussi inuenté certains genres & especes de rythmes, & y a eu diuers ouuriers de chants & de rythmes. Car la premiere innouation de Terpander introduisit vn beau moien en la musique, duquel il vsa luy mesme adherant à la belle forme: autant en feit Thaletas & Sacadas. Car ceux la sont suffisans à faire des rythmes sans

B sortir de la belle forme. Aussi y a il vne innouation de Alcman, prise de Stesichorus qui ne se despart non plus de la belle forme. Mais Crexus, Timotheus & Philoxenus, & ceux qui ont esté enuiron cest aage la, sont vn peu trop importunément amateurs de nouveutez en affectant ce luy que lon appelle maintenant humain & positif thematic. Car le peu de chordes, & la simplicité & grauité en toute sorte plaisoit à l'antiquité. Aiant doncques parlé de la premiere Musique, selon ma puissance, & des premiers auteurs

C qui l'ont inuētee, ie mettray icy fin à mon propos, & donneray lieu de parler à nostre amy Soterichus, homme non seulement aiant bien estudié en la musique, & y estant bien exercité, mais aussi en toute autre science & litterature liberale: car quāt à moy, ie suis plus exercité à la manuelle prattique de la musique. Lysias aiant ainsi parlé meit fin à son propos, & Soterichus apres luy parla ainsi: Onesicrates tu nous as conuiez à discourir de la ve-

nerable, & aux Dieux agreable, Musique: quant à moy ie prise grandement mon maistre Lyfias, tant pour son bon entendement, que pour sa memoire qu'il nous a monstree, en nous recitant les auteurs & inuenteurs de la premiere Musique, & ceux qui ont escrit d'icelle. Seulement luy veu-
 je ramenteuoir vne chose, c'est qu'il a prouué son dire par les registres & memoires de ceux qui en ont escrit, & non autrement. Mais quant à moy ie n'estime point que ç'ait esté vn homme qui ait inuenté tant de biens que nous apporte la Musique, ains cuide que ç'ait esté le Dieu qui est orné de toutes vertus, Apollo. Car ce n'a esté ny Marsias, ny Olympus, ny Hyagnis qui a trouué l'usage de la fluste, comme quelques vns estiment, ce que lon peult cognoistre par les danses & les sacrifices que lon fait au son des auboyes & des flustes à Apollo, ainsi comme Alceus, entre autres, a laissé par escript en quelqu'vn de ses Hymnes, & d'auantage l'assiette de son image en l'Isle de Delos, qui tient en sa main droicte son arc, & en sa gauche les Graces, dont chascune tient quelque instrument de Musique, l'vne tient la Lyre, l'autre le auboyes, & celle du milieu vne fluste, qu'elle approche de sa bouche. Et à fin que vous ne pensiez que i'aye controuué ce propos, Anticles & Hister le cotent ainsi en leurs Commentaires, & est ceste image si fort antique, & la dedicasse d'icelle, qu'ils disent qu'elle est faite du temps mesme que viuoit Hercules. Et d'auantage quand l'enfant apporte le laurier de la vallee de Têpe en
 la

A la ville de Delphes, il y a vn ioueur de auboy qui l'accompagne & marche apres luy, & mesmes les sacrifices que lon souloit anciennement enuoyer des Hyperborees iusques en l'Isle de Delos estoiet accompagnez de ioueurs de auboy, de flustes & de Cithres. Les autres disent encore plus, que luy mesme ioua des auboy, ainsi comme dit vn tres-bon poëte de chansons Alcman. Et Corinna y adiouste d'auantage, que ce fut Diane qui luy monstra à en iouer, tant est chose sainte & auguste que le ieu des flustes qui est inuention des Dieux: aussi

B en vsoient les antiques dignemēt, comme de tous autres exercices, là où ceux de maintenant reietans & dedaignans ce qu'il y a de grandeur & de maiesté en elle au lieu de celle virile, sainte, & aux Dieux agreable, Musique, ils en introduisent aux theatres vne toute effeminee, & affectee. C'est pourquoy Platon au troisième liure de sa Repub. se courrouce de telle musique, & reiette l'harmonie Lydiene qui est propre à laméter, comme aussi dit on que sa premiere constitution fut lamentable. Car Aristoxenus en son premier liure de la

C musique dit, qu'Olympus sonna des auboy vne lamétation funebre sur la mort de Python en mode Lydiene. Il y en a d'autres qui disent que ce fut Melampides qui l'inuenta, & qui cōmança le chant. Et Pindare en ses Peans dit, que la mode Lydiene fut premieremēt enseignée aux nopces de Niobe: les autres que ce fut vn Torebus qui vsa le premier de telle harmonie, comme l'escrit Dionysius Iambus. La Mixolydiene aussi est pleine

d'affections, & pour ceste cause conuenable aux **D**
 Tragedies. Aristoxenus escrit que ç'a esté Sapho
 qui la premiere a inuenté ceste Mixolydiene, de
 laquelle depuis les ioueurs de tragedies l'ont ap-
 prise & l'ont coniointe avec la Doriene, par ce que
 l'vne luy donne la magnificence & la dignité, &
 l'autre les affections, & la tragedie est meslee de
 ces deux choses-la, toutefois és roolles & registres
 de ceux qui ont escrit des Musiciens, il est dit que
 Pythocles ioueur de auboy en fut le premier
 inuenteur. Et Lyfis met que Lamprocles Athenien
 aiant apperceu que la disionction n'est pas là où **E**
 presque tous les autres la pensoient, ains est vers
 le hault & aigu, en fait vne telle forme, comme
 depuis la Paramese, iusques à l'Hypate des Hy-
 pates, La sous-Lydiene aussi, si elle est contrai-
 re à la Mixolydiene ressemblant presque à l'Ioni-
 que, fut à ce que lon dit trouuee par Damon Athe-
 nien. Mais de ces deux harmonies l'vne estant lu-
 gubre & lamentable, l'autre dissoluë & eneruee,
 Platon à bon droict les refusant, choisit la Dori-
 ene, comme celle qui est mieux seante aux vaillans
 & sobres hommes, non pas qu'il ignorast, comme **F**
 mesme Aristoxenus le dit en son second liure des
 Musiciens, qu'il y eust encore és autres quelque
 chose vtile à la conseruation de la chose publique.
 Car Platon estudia fort en la Musique, y aiant
 esté auditeur de Draco Athenien & de Metellus
 Agrigentin. Mais d'autant qu'il y a plus de granité
 & de dignité en la Doriene, il la prefera aux au-
 tres, toutefois il n'ignoroit pas que Pindare,
 Alcman

A Alcman, Simonides & Bacchilides auoient escrit plusieurs Parthenies, & encore des Profodies, des Pæans, voire des lamentations tragiques à la Doriene, & mesme iusques à des chansons amatoires. Il luy suffisoit de celles qui sont à la louange de Mars, de Minerue, & des Spondees, car elles sont bié propres & suffisantes, pour fortifier l'ame d'un homme. Aussi n'ignoroit il pas de la Lydiene, & scauoit fort bien de l'Ioniene, que la Tragedie vse de celle melodie. Aussi faisoient tous les anciens, lesquels n'estants pas ignorants des autres melodies, se contentoient toutefois d'vser seulement d'une. Car l'ignorance ou faulte d'experience n'estoit pas cause de ce qu'ils se rengeoient ainsi à l'estroit, & se contentoient de peu de chordes: & ne fault pas estimer que Terpander & Olympus par ignorance & faulte d'experience, ny tous leurs sectateurs, aient retrenché la multiplicité de chordes ny la varieté. Ce que tesmoignent les poëmes de Terpander & d'Olympus, & de leurs semblables: car estants simples, & n'aiants que trois chordes, ils sont plus excellents que ceux qui ont beaucoup de chordes, & qui sont bien diuersifiez, de sorte que personne ne peult imiter la maniere d'Olympus, & demeurent derriere luy tous ceulx qui vsent de plusieurs chordes, & de varieté. Or que les anciens s'absteinsent de la tierce, en la sorte spōdaique, nō par ignorance, ils le montrent assez en l'vsage de la pulsation. Car ils n'en eussent pas vsé d'accord avec la Parypate, s'ils n'en eussent bien cogneu l'vsage: mais il est certain que la beauté de l'affection

qui se fait en la sorte spondaïque par la troisieme, **D**
estoit cela qui amenoit leur sentiment à hauffer &
passer leur chant iusques à la Paranete, & mesme
raison y a il aussi de la Nete : car ils en vsoient à la
pulsation: à la Paranete en discord, & à la Mese en
accord. Mais en chant elles ne leur sembloient pas
propres à la sorte spondaïque, & non seulement
en ceulx la, mais aussi en la Nete du Tetrachorde
conioinct tous en vsent ainsi: car en la pulsation ils
le desaccordoient avec la Paranete & la Paramese,
& avec la Lichanos, mais en chant ils en auoient
honte, pour l'affection naturelle qui en resultoit. **E**
Il appert aussi manifestement par les Phrygiens,
que cela n'estoit point par ignorance à Olympus
ny à ses sectateurs, car ils en vsoient non seulement
en la pulsation, mais aussi au chant és sacrifices de
la Mere des Dieux, & en quelques autres chants
Phrygiens. Aussi est il tout euident des Hypates,
que ce n'estoit point par ignorance qu'ils s'en ab-
stenoient és Dorienes de ce Tetrachorde, car in-
continent aux autres tons ils en vsoient. Il est cer-
tain que c'estoit sciemment, mais pour euter l'af-
fection, ils l'ostoient en la mode Dorienne, honorās **F**
la beauté d'icelle, comme aussi és poëtes Tragic-
ques : car iusques au iour d'huy la Tragedie ne se
fert point encore du chromatique ny du rythme,
là où la Cithre, qui de beaucoup de generatiōs est
plus ancienne que la Tragedie, en vse. Et est aussi
manifeste que le chroma est plus vieil que n'est la
cithre. Car il fault prendre ceste ancienneté la de
l'ysage & de la pratique des hommes, pource que
selon

A selon la nature des genres des sons, l'un n'est point plus vieil ny plus ancien que l'autre. Si donc quelqu'un vouloit dire que *Æschylus* ou *Phrynicus* se soient abstenus d'vser du chromatique, pource qu'ils ne le sçauoiét pas, ne seroit il pas abusé grandement? Celuy la mesme pourroit dire, que *Panocrates* auroit aussi ignoré le genre Chromatique, parce que cestuy la aussi s'en absteinoit le plus souuent: mais il en a vſé par tout en quelques vns. Ce n'estoit doncques pas par ignorāce, mais par iugement & cōseil qu'il s'en absteinoit. Il imitoit doncques, ainsi cōme il disoit, la maniere de *Pindare* & de *Simonides*, & en general celle maniere que les modernes appellent l'ancienne. Mesme raison y a il de *Tyrteus Mātinian*, d'*Andreas Corinthien*, & de *Thrasyllus Phliasien*, & de plusieurs autres, lesquels nous sçauons s'estre abstenus par iugement du chromatique, de la mutation, de la multiplicité de chordes, & de plusieurs autres choses qui sont en vſage cōmun, cōme de rythmes, d'harmonies, de dictions, de chants & d'interpretations. Sans aller plus loing, *Telephanes le Megarien* estoit si fort ennemy des flustes, qu'il ne vouloit pas souffrir que les ouriers les meissent seulement dessus les auboyes, ains fut pour cela principalement qu'il s'absteint du ieu de pris Pythique. Et generally si pour n'vser point d'vne chose, quelqu'un vouloit coniecturer que ce fust par ignorance, il cōdamneroit doncques cōme ignorants, plusieurs de ceulx qui sont maintenant, comme il fera force qu'il condamne les *Dorioniens*. pource qu'ils mes-

prisent la mode Antigenidiene : car ils n'en vsent **D**
 point, & les Antigenidiens de la Dorioniene pour
 la mesme cause, & des ioueurs de cithre de la ma-
 niere de Timotheus. Car ils se sont presque tous
 mis aux rappetasseries, & aux poèmes de Polyidus.
 D'autre costé si lon considere sainement & avec
 experience, en comparāt ce qui lors estoit à ce qui
 est maintenant, lon trouuera que la varieté & di-
 uersité estoit alors mesme en vsage, car les anciens
 ont vsé de la varieté & diuersité aux rythmes qui
 estoit fort diuersé : ainsi fault il dire, que la varieté
 des rythmes, & la diuersité & difference aussi des **E**
 pulsations estoit lors plus variable : car ceulx de
 maintenant aiment le sçauoir, ceulx de iadis les
 rythmes & la belle grace. Il est dôcques manifeste
 que les anciens s'abstenoient de chants rompus &
 diminuez, non pource qu'ils ne les sceussent pas
 chāter, mais pource qu'ils ne les approuuoiet pas.
 Et ne le fault pas trouuer estrange, car il y a beau-
 coup de façons de faire en la vie humaine que lon
 sçait bien, dont lon n'vsé pas, mais on en est estran-
 ge, pour ce que l'vsage en est osté, à cause que lon
 y a monstré quelque chose qui n'estoit pas bien **F**
 seante. Mais que ce ne soit ny par ignorāce ny par
 faute d'experience que Platon ait reietté les au-
 tres gères de musique, ains seulemēt pour ce qu'ils
 n'estoient pas bien seants à sa maniere de chose pu-
 blicque, nous monstrerons puis apres qu'il estoit
 expert en l'harmonique : car en sa procreation de
 l'ame qu'il décrit au liure de Timēus, il montre
 l'estude qu'il auoit employee tāt és autres mathe-
 matiques

A matiques qu'en la musique, en ces paroles: Apres
 „ cela il remplit les doubles & les triples interualles,
 „ en retrenchant vne portion, & la mettant entre les
 „ deux, de sorte qu'en chascun interualle il y auoit
 „ deux medietez. Ce cōmancement la est bien d'un
 homme expert en l'harmonie, ainsi comme nous
 monstrerons cy apres. Il y a trois sortes de medietez
 primitiues, desquelles toutes autres sont tirees,
 l'Arithmetique, la Geometrique, & l'Harmonique:
 l'Arithmetique est celle qui surmonte & est sur-
 mōtee de nombre egal, la Geometrique de raison
 B egale & semblable, l'Harmonique ny de nombre
 ny de raison egale, mais de mesme partie de ses ex-
 tremitez. Platon doncques voulant non seulement
 montrer l'harmonie des quatre elements de l'a-
 me, & la cause pourquoy choses ainsi diuerfes s'ac-
 cordent ensemble en chascun interualle, il a mis
 deux medietez de l'ame, selon la raison musicale.
 Car en l'accord de Diapason en Musique, il y a
 deux interualles entre les deux extremitez, des-
 quelles nous monstrerons la proportion. Par ce
 que l'accord de Diapason consiste en la propor-
 e tion double, & pour le voir par exemple, la dou-
 ble proportion se fera es nombres six & douze.
 Cest interualle est depuis l'hypate des moiens, ius-
 ques à la Nete des disioincts, estāt le six & le douze
 les deux extremitez, la Hypate des moiens le nō-
 bre de six, & la Nete des desioincts le nombre de
 douze. Il reste de prēdre les nombres moyens en-
 tre ces deux extremes, dont les extremes soient l'un
 en proportiō sesquiterce, & l'autre en proportion

sesquialtere, qui sont les nōbres de huit & de neuf. **D**
 Car six est au dessoubs de huit en proportion ses-
 quitierce, & de neuf en proportion sesquialtere.
 Voyla quel est l'vn des extremes, & l'autre qui est
 douze est au dessus de neuf en proportion sesqui-
 tierce, & au dessus de huit en proportion sesqui-
 altere. Ces deux nombres doncques estants entre
 six & douze, & l'interualle du Diapason estant
 composé du Diatessaron, de laquelle & du Dia-
 pente de la quinte, il appert que la Mese, B fa b mi,
 aura le nombre de huit, & la paramese, A la mi re,
 le nombre de neuf. Cela fait, il y aura mesme ha- **B**
 bitude de l'Hypate à la Mese, que de la Paramese
 à la Nete du tetrachorde desioinct. La mesme
 proportion se treuve aussi és nombres: car la mes-
 me raison qu'il y a de six à huit, la mesme y a il de
 neuf à douze: & la mesme raison qu'il y a de six
 à neuf, la mesme y a il de huit à douze. Or est la
 proportion sesquitierce de huit à six, & de douze
 à neuf, & sesquialtere de neuf à six, & de douze à
 huit. Cela est assez pour monstrier comme Pla-
 ton auoit bien estudié és mathematiques, & y
 estoit fort expert. Mais que l'Harmonie soit vne **F**
 chose digne, grande & diuine, Aristote qui estoit
 „ disciple de Platō le dit ainsi, l'Harmonie est celeste,
 „ aiant la nature diuine, belle, & plus qu'humaine, &
 „ estāt partie en quatre de sa nature, elle a deux me-
 „ dietez, l'vne Arithmetique, l'autre Harmonique,
 „ & les parties d'icelle, les magnitudes & les extre-
 „ mitez, selon le nombre & equalité de mesure: car
 „ les chants sont appropriez en deux tetrachordes.

A Ce sont les paroles d'Aristote, qui dit, que le corps de l'harmonie est composé de parties dissemblables, & neantmoins accordantes les vnes avec les autres, mais toutefois que les medietez d'icelle s'accordent selon la raison Arithmetique, parce que la Nete accordée avec l'Hypate à la double, fait accord & consonance de Diapason : car elle a, ainsi que nous auôs dit parauant, la Nete de douze vnitez, & l'Hypate de six, & la Paramese accordât avec l'Hypate en proportiõ sesquialtere de neuf vnitez : mais de la Mese nous disons qu'il y a huiët vnitez,

B & les principaux interualles de la musique sont composez de ces deux la, à sçauoir de la quarte, qui est en proportion sesquiterce, & de la quinte, qui est en proportion sesquialtere, & le Diapason, l'octaue, est en proportion double, aussi se cõserue la proportion sesquioctaue, qui est la raison du ton. Voyla cõment les parties de l'Harmonie se surmõtent & sont surmõtees de mesmes exces, & les medietez des medietez, tant en exces de nombres que de puissance Geometrique. Aristote dôcques declare qu'elles ont telles puissances, que la Nete surmonte la Mese de sa troisieme partie, & que l'Hypate est surmõtee aussi de la Paramese semblablement, de maniere que ces exces sont du genre des choses relatives qui se referët ailleurs: car ils surmõtent & sont surmõtez de mesmes parties. Par mesmes raisons & proportiõs dôcques, les deux extremes sont surmõtees, & surmõtët la Mese & Paramese : c'est à sçauoir sesquiterce & sesquialtere, & tel est l'exces Harmonique: mais l'exces de la Nete, &

de la Mese par raison Arithmetique, demonstre ses D
 exces en egale partie, & autāt la Paramese de l'hypate : car la Paramese surmonte la Mese de proportion sesquioctave, comme de rechef la Nete est en double proportion de l'Hypate, & la Paramese de l'hypate, en proportion sesquialtere, & la Mese sesquitierce au regard de l'hypate. Voyla doncques comment est composee l'Harmonie, selon Aristote mesme, & de ses parties & de ses nombres, & si est composee fort naturellement de la nature, tant finissante que infinie, & du pair & non pair, elle & ses parties toutes: car elle totale est E
 pair, estant composee de quatre termes, & ses parties, & leurs raisons sont pairs & non pairs, & pairs non pairs : car la Nete est pair de douze vnitez : la Paramese non pair de neuf vnitez: la Mese pair de huit vnitez, & l'Hypate pair non pair, estant de six vnitez. L'harmonie doncques ainsi composee, & ses parties les vnes enuers les autres, tant en exces qu'en proportions, elle accorde avec soy mesme, & avec ses parties ensemble. Mais, qui plus est, les sentimens mesmes estans inferez dedans nos corps par Harmonie, principalement les celestes & di- F
 uins, la veuë & l'ouye, qui avec Dieu donnent l'intelligence & le discours de la raison aux hommes avec la voix, & la lumiere nous monstrent l'Harmonie, & les autres moindres qui les suyuent, en tant qu'ils sont sentimens, sont aussi composez par Harmonie, car eulx accōplissent tous leurs effects, non sans Harmonie, estāt bien inferieurs & moins nobles, que ces deux premiers la, mais non pas de-
 pendans

A pendans pourtant d'eulx : car ceulx la entrans dedans le corps accompagnez de ie ne sçay quoy de diuinité presente avec le discours de la raison, ont vne forte & excellente nature. Il appert doncques manifestement que les anciens Grecs faisoient fort grand compte, & non sans cause, d'estre des la ieunesse bien instruits en la Musique, estimants qu'il falloit former & temperer les ames des ieunes gens à la vertu & honnesteté par le moten de la musique, comme estant vtile à toutes choses honnestes, & que lon doit auoir en grande recommandation, mais singulierement & principalemēt pour les dangers de la guerre, ausquels les vns se seruoient de Auboys, comme les Lacedemoniens, aux quels se chantoit la chanson qu'ils appelloient Castoriene avec les auboys, quand ils marchoiēt en ordonnāce de bataille pour aller charger leurs ennemis. Les autres faisoient leurs approches, pour aller chocquer l'ennemy, au son de la lyre: comme lon treuve que les Candiots ont bien longuement vsé de celle sorte de Musique aux perils de la guerre: les autres, iusques à nostre temps, vsent du son des trompettes: & les Argiens allans au combat de la luitte aux ieux qui s'appellent Stheniens en leur ville vsioient du son des auboys. Ces ieux, ainsi que lon dit, furent premierement instituez à l'honneur & mēmoire de leur Roy Danaus, & depuis furent derechef consacrez à l'honneur de Iupiter surnommé Sthenien, toute fois encore iusques auiourd'huy au ieu de pris des cinq exercices, la coustume est que lon y iouē des au-

boys, encore que ce ne soit rien d'exquis, ny ancien que lon y iouë, ny tel qu'il auoit accoustumé d'estre au temps passé, comme le cantique qui fut iadis composé par Hierax, qui s'appelloit Eudromé, pour ceste sorte de combat: & bien que soit chose maigre & foible, si est-ce que lon y sonne encore des auboyz. Et és temps plus anciens ont dit, que les Grecs ne cognoissoient pas mesme la Musique theatrale, pource qu'ils en appliquoient & employoient toute la science au seruice & à l'honneur des Dieux, & à l'institution des ieunes gents, auant qu'il y eust aucun theatre edifié en la Grece, ains estoit la musique seulement employee à l'honneur des Dieux és temples & seruice diuin, & à la celebration des louanges des vaillans hommes, tellement qu'il est vray-semblable que ces paroles de Theatre, & de Theorein, qui signifie regarder l'esbattement des ieux, beaucoup deuant la structure mesme des Theatres, ont esté deriuees de ce mot Theos, qui signifie Dieu. Tant y a que de nos temps, il y a si grand accroissement de difference & de diuersité, que maintenant il ne se fait mention quelconque du genre de Musique pour enseigner, ne n'y a plus personne qui s'y applique, & qui en face profession, ains tous ceulx qui s'y mettent, s'addonnét à la theatrale pour delecter. Mais quelqu'un me pourra dire, Mon amy, penses tu que les anciens n'y aient rien adiousté ny rien innoué? Je confesse que si, & dis bien qu'ils y ont adiousté voirement de nouvelles inuentions, mais avec grauité & honnesteté: car les historiens qui

A ont escrit de ces choses la, ont attribué à Terpāder la Nete Doriene, parce que les anciēns au parauant n'en vsoient point en chantant : aussi dit on que la mode Mixolydiene a du tout esté inuētee depuis, & la mode de la melodie Orthiene, le cātique qui se nomme Orthien, par le trochēe pour sonner à l'arme, & refuciller les courages. Et s'il est vray ce que Pindare dit, que Terpander a esté inuenteur des chants que lon chātoit és festins appelez Scolia, il fault bien dire que les anciens ont inuenté quelque chose : qui plus est, on tient que Archilochus adiousta les Rythmes des Trimetres, & la transition & mutation en autres Rythmes qui ne sont pas de semblable genre, & la maniere comme il les fault coucher: d'auantage à luy premier s'attribuēt les Epodes, les Tetrametres, le Procritique, & le Profodiaque, & l'augmentation du premier, & par aucuns l'Elegie mesme: oultre cela la tēsion de l'Iambe au Pæan, montant, & de l'Heroique augmenté au Profodiaque & au Cretique: & puis encore que des Iambes les vns se prononcent durant le battement, les autres se chantent, on dit que ce a esté Archilochus qui a monstré tout cela, & que depuis les poētes Tragicques en ont aussi vsé, & que Crexus fut le premier qui en trāsporta l'vsage aux chansons Bacchanales des Dithyrambes: & dit on mesme que ce fut luy premier qui inuenta le battement apres le chant, parce que tous les anciens battoient les chordes quand & la voix. Aussi attribue lon à Polymnastus toute la mode que lon appelle maintenant Hypolidiene, & que ce fut luy

qui en feit la dissolutiō & la sortie bien plus grāde. **D**
 Et Olympus celuy à qui on attribue l'inuētion de
 la Grecque, belle & legale Musique, on dit que
 ce fut luy qui meit en auant le genre de l'Harmonie,
 & des Rythmes, le Profodiaque où il y a la
 loy de Mars, & le Chorion, duquel il vse fort és
 sacrifices de la Mere des Dieux, & y en a encore
 qui luy attribuent le Bacchius. Or est il certain
 que nul des anciens cantiques ne les a. Et Lasus
 Hermionien aiant amené les Rythmes aux Di-
 thyrambes & fuiuy la multiplicité de voix des au-
 boys, en vsant de plusieurs sons dispersez çà & là, **B**
 introduisit vne grande mutation en la Musique,
 qui n'estoit pas auparauant. Semblablement Me-
 lanippides qui vint apres, ne se contint pas en la fa-
 çon de Musique qui estoit en vsage, ny Philoxenus
 aussi, ny Timotheus mesme: car n'ayant la Lyre que
 sept chordes iusques à Terpander Antisseien, il la
 ietta en plus de sons. Et mesme la façon de sonner
 du auboy, de simple qu'elle estoit au parauant a
 esté changee en façon bien plus diuersifiée: car an-
 ciennement iusques à ce Melanippides poëte de
 Dithyrambes, les ioueurs de auboy prenoiēt leurs **F**
 salaires des mains des poëtes, & estoient les poë-
 tes les principaulx acteurs de la Musique, & les
 ioueurs de auboy n'estoient que leurs ministres
 soubz eulx, mais depuis ceste coustume la fut cor-
 rompue: à l'occasion dequoy Pherecrates poëte
 Comique introduit la Musique en habit de fem-
 me, aiant tout le corps deschiré de coups de ver-
 ges, & la Iustice qui luy demande la cause pour-
 quoy

A quoy & comment elle a ainsi esté fouctee, & la
Poësie luy respond ainsi,

Je le diray, car à le raconter

J'auray plaisir, & toy à l'escouter.

L'un des premiers qui m'ont fait cest excès

Si piteux, est vn Melanippides,

Qui avec douze escorgees battue

M'a fait si lasche, & si molle rendue:

Mais il estoit encore supportable

Au pris du mal qui maintenant m'accable,

Car vn certain Cinesias d'Attique,

B Maudit des Dieux avecques sa pratique,

De tourdions rompus hors d'Harmonie

A acheué de rudoyer ma vie.

Son Dithyrambe à gauche semble droit,

Comme vn bouclier, à l'un & l'autre endroit.

Encore m'a celuy la moins traittee

Cruellement, & non pas tant guastee

Comme Phrynis, lequel en me iettant

Son tourbillon, & me pirouettant,

Tournant, virant, trouua douze Harmonies

Selon sa mode en cinq chordes garnies,

C Mais toutefois celuy la s'il failloit

En vn costé, d'autre il le rhabilloit.

Timotheus apres (ma bonne Dame)

M'a déchirée à oultrance plus qu'ame,

P'entens celuy qui natif de la ville

De Milet m'a fait des maulx mill' & mille,

Et a passé à me greuer tous ceulx

Qui m'ont esté iamais plus oultrageux,

En amenant sa fade fourmilliere

De ses fredons mal plaisante maniere:
 Si par chemin seule il me rencontroit
 De mes habits il me desaccoustroit,
 En meliant avecques douze cordes.

D

& Aristophanes le poëte Comique fait aussi mention de Philoxenus, & dit qu'il auoit introduit les chansons aux danses rondes, & fait ainsi parler la Musique,

Avec ses chants Hyperboleiens,
 Nigleriens & Hexarmoniens,
 Comme il les nomme, il m'a toute remplie
 De fainte voix, laschee, & amollie,
 Comme vne raue.

E

les autres Comiques semblablement ont aussi blasonné les modernes qui ont ainsi deschiqueté en passages diminuez, & decouppé en petits morceaux la Musique: mais qu'elle ait pouuoir & efficace grande, soit à dresser, soit à tordre & deprauiuer les mœurs & les institutions, Aristoxenus l'a bien monstré: car il dit, que de son temps Telesias Thebain auoit esté de sa ieunesse instruit & nourry en la meilleure sorte de Musique, & y auoit appris des plus estimez cantiques & motets, comme entre autres de ceulx de Pindarus, de Dionysius le Thebain, & de ceulx de Lamprus, de Pratinas, & des autres poëtes lyriques, qui ont esté excellents pour bien toucher la Lyre: & auoit aussi appris à fort bien iouer du auboy, & suffisamment exercité en toutes autres parties de la science. Quand il eut depuis passé la fleur de son aage, il fut tellement surpris & deceu de ceste Theatrale musique

ainsi

A ainsi diuersifiée, qu'il mesprisa le beau & bon style des anciennes musiques & poësies, auquel il auoit esté nourry, pour apprendre celles de Timotheus & de Philoxenus, & encore entre les autres celles où il y auoit plus grande diuersité & plus de nouveauté: & que s'estant mis à cōposer des chansons selon les differēts styles à la mode de Pindarus, & à celle de Philoxenus, il ne peut iamais rencontrer à la mode de Philoxenus, & que la cause en fut la bonne nourriture & droite institution qu'il auoit eüe de son enfance. S'il y a doncques homme qui

B veuille bien & avec droit iugement vser de la musique, qu'il imite l'ancienne maniere, mais ce pendant qu'il la remplisse encore des autres sciences, & qu'il apprenne la philosophie pour le conduire comme par la main: car c'est elle qui peut iuger quelle sorte de carmes est conuenable à la musique, & quelle luy est vtile. Par ce qu'il y a trois genres principaux, esquels vniuersellement est diuisee toute la Musique, le Diatonique, le Chromatique & l'Harmonique, il fault qu'il sçache la poësie, laquelle vse de ces genres la, & qu'il ait quant

C & quant atteint la suffisance de sçauoir exprimer & coucher par escrit ses inuentions poëtiques. Premièrement doncques il fault penser que toute la science de Musique est vne accoustumance, sans sçauoir encore à quelle fin il fault apprendre chascune chose que lon monstre à celuy qui apprend, apres cela il fault aussi penser qu'à cest apprentissage & institutiō la on n'adiouste pas promptement l'enumeration des modes & manieres de

la musique, ains la plus part apprennent sans discretion temerairement, ce qui semble bon, & qui plaist à celuy qui apprend, ou à celuy qui enseigne, comme les Lacedemoniens par le passé, les Martinien, & les Pallenien choissoient vne des modes entre autres, ou bien peu en nombre, lesquels ils estimoient estre propres & conuenables à la reformation & correction des mœurs, & n'vsoient que de ceste musique la. Ce qui pourra clairement apparoir si lon enquiert & considere ce que chascune science prend pour son subiect à traiter: car il est certain que le genre harmonique est celuy qui concerne & qui donne cognoissance des intervalles, des composez, des sons, des tons, & des mutations de ce qu'ils appellent Hermosmenon, c'est à dire, bien-seant & conuenable, & ne luy est pas possible de passer plus auant: tellement qu'il ne fault pas requerir d'elle, qu'elle donne la cognoissance, & qu'elle puisse discerner, si le poëte a bien pris proprement & accommodeement pour exemple en musique, la mode Hypodorienne en son entree, ou la Mixolydienne & la Dorienne à son yssue, ou bien la Phrygienne, ou l'hypophrygienne au milieu, car cela n'appartient point à la matiere du genre Harmonique, & a besoing de beaucoup d'autres choses: car s'il ne cognoist bien la force de la propriété, ny le genre Chromatique, ny l'harmonique, il ne viendra iamais à auoir la puissance parfaite de la propriété, selõ laquelle les mœurs du poëme se monstrent: car cela est l'office & le chef-d'œuvre de l'ouurier: car il est manifeste

A feste que autre est la voix du composé, & autre celle du chant qui est dressé en ce composé la, de laquelle traiter & enseigner n'appartient pas à la faculté du genre Harmonique: autant en fault il aussi dire touchant le rythme: car nul rithme ne viendra avec la cognoissance & puissance de la parfaite propriété en soy: car ce que nous appelons propre, c'est tousiours eu esgard & le referant aux mœurs, dequoy nous disons que la cause est en la composition ou mixtion, ou en tous les deux ensemble, comme ce qu'Olympus a mis le

B genre Harmonique en la mode Phrygiene, meslé avec le Peon Epibate: car ce commencement la a engendré ce que nous appellons les mœurs en la loy & cantique de Minerue: car estant la melodie & le rythme artificiellement adioustee, & estant transmué le rythme seulement, & mis vn trochee au lieu d'un Peon, de là fut composé le genre harmonique d'Olympus. Et neantmoins demourant le genre Enarmonique & la mode Phrygiene, & outre cela encore tout le composé, les mœurs ont receu vne grande alteration:

C car l'Harmonie qui est en ceste loy de Minerue est bien differente en mœurs du commun vsage. Si doncques à celuy qui seroit expert en la musique estoit encore ioint le iugement & la faculté de iuger, il est certain que celuy la seroit vn parfait ouurier & maistre passé en la musique: car celuy qui sçait la mode Doriene sans sçauoir iuger & discerner la propriété, il ne sçaura ce qu'il fera, ny ne conseruera pas les mœurs, attendu que

Ion doute mesme des modulations Doriennes, à
 sçauoir si elles appartiennent à la matiere Harmo-
 nique ou non, comme quelques vns des Doriens
 le pensent. Pareille raison y a il de toute la science
 rythmique, car celuy qui sçait le Pëon ne sçaura
 pas incontinent la propriëté de son vsage, par ce
 que lon doute mesme des façons de rythmes
 Pëoniques, à sçauoir si la matiere Rythmique en
 peut donner le iugement & la cognoissance:ou si,
 comme quelques vns disent, elle ne sestend pas
 iusques à là: il fault donques qu'il y ait pour le
 moins deux cognoissances en celuy qui veult faire **B**
 discretion & iuger entre le propre & l'estrange:
 premierement celle des mœurs pour lesquelles
 toute la composition est faite, & puis des parties
 dont la composition est constituee. Cela donc-
 ques suffise, pour monstrier que ny l'harmonique,
 ny la rythmique, ny aucune de celles facultez de la
 musique, que lon nomme particulieres, n'est suf-
 fisante de soy mesme seule pour iuger des mœurs
 & des autres qualitez. Comme ainsi soit donc-
 ques que le Hermosmenon, comme qui diroit,
 le bien seant, se diuise en trois genres egaux, les **F**
 grandeurs des composez, les puissances des sons,
 & les puissances aussi des tetrachordes, les anciens
 n'ont traitté que d'un seul: car ceux qui ont esté
 deuant nous, n'ont considéré & escrit ny du Chro-
 me, ny du Diatone, ains seulement de l'Enarmo-
 nien, & de celuy la encore en vne seule grandeur
 de composé, qui s'appelle Diapason, l'octaue, &
 du Chrome, ils en estoient en different, & presque
 tous

A tous s'accordoient à dire, qu'il n'y auoit que celle Harmonie seule. Parquoy iamais n'entendra ce qui appartient à la matiere Harmonique celuy qui aura penetré iusques à celle cognoissance, ains appert qu'il fault qu'il suiue & les particulieres sciéces, & le corps aussi total de la musique, & encore les mixtions & compositions des parties : car celuy qui n'est que Harmonique, est confiné en vn certain genre seulement. A parler doncques en general vniuersellement, il fault que & le sentiment exterior, & l'entendement interieur, ail-

B lent & se rencontrent ensemble au iugement des parties de la musique, & non pas que l'vn preuiene & aille deuant, comme font les sentiments qui sont trop vistes & precipitez, ny aussi demeure derriere, comme font les tardifs & difficiles à emouuoir : mais il aduient aucunesfois en quelques sentiments l'vn & l'autre ensemble, qu'ils se hastent & demeurent à cause d'vne naturelle inegalité qu'ils ont. Il fault doncques oster au sentiment & retrencher ce qu'il y aura de trop, à fin qu'ils marchent ensemble : car il est neces-

C faire qu'il y ait tousiours trois choses, pour le moins, qui se rencontrent ensemble en l'ouye, le son, le temps, & la syllabe, ou la lettre : & aduiedra que du chemin selon le son, se cognoistra le hermosmenon, le bien proportionné du chemin selon le temps, le rythme, & du chemin selon la lettre ou la syllabe, ce qui s'appelle les mœurs : & quand ils marchent ensemble, il est force qu'il se face rencontre du sentiment, aussi est il manifeste que le

sentiment ne pouuant separer & discerner chascu-^D
 ne de ces trois choses, & les suiure & accompa-
 gner particulièrement, il est impossible qu'il puis-
 se cognoistre ne iuger ce qu'il y a de bien ou de
 mal en chascune particularité. Premièrement
 doncques il fault cognoistre de la continuation,
 car il est necessaire qu'il y ait en la puissance & fa-
 culté de iuger vne continuation, par ce que le bien
 & le mal ne sont pas determineement en tels sons,
 ou en tels temps, ou en telles lettres, mais en la
 fuite & continuation d'icelles, d'autant que c'est
 vne mixtion de parties qui ne peuuent estre con-^E
 ioinctes en vsage: & quant à la fuite, cela suffise.
 Apres cela il fault considerer que les hommes sça-
 uants maistres en la musique ne sont pas encore
 suffisans pour en iuger: car il est impossible d'es-
 tre parfaict musicien, & parfaict iuge des par-
 ties qui semblent estre de la totale musique, com-
 me de la science des instruments, & du chant, &
 de l'exercitation des sentiments, ie dis de celle qui
 rend à l'intelligence de sçauoir cognoistre l'Her-
 mosmenon, le bien proportionné, & du Ryth-
 me, & outre cela de la matiere Rythmique &^F
 Harmonique, & de la speculation touchant le
 battement & la diction, & fil y en a encore quel-
 ques autres, & pour quelle cause il est impossible
 d'estre bon iuge & apte à iuger d'icelles par elles
 mesmes: il nous fault tascher à l'entendre premie-
 rement, parce que des choses qui nous sont propo-
 sees à iuger, les vnes sont parfaittes, les autres im-
 parfaittes: parfaittes comme chascque œeuve poë-
 tique

A ristique qui est ou chantée ou jouée avec les aubois ou sonnée sur la cithre, & puis l'interprétation que lon appelle desdits poèmes, comme le jeu des flustes ou le chant, & autres semblables imparfaites, celles qui tendent à celles la, & qui sont pour celles la, comme sont les parties de celle que lon appelle interprétation. Secondement de la Poësie; car elle en est aussi, parce aussi bien pourroit ou iuger en oyant le ioueur, si les aubois sont d'accord ou non, & si le langage en est clair, ou au contraire: & chascune d'icelles choses est partie de

B l'interprétation des aubois, non pas la fin, ains qui se fait pour la fin: car les mœurs de l'interprétation se iugeront de là, & des causes semblables, si elles auront esté bien accommodées, propres au poëme composé, que l'agent aura pris à traiter, exprimer & interpreter: pareille raison y a il aussi des passions qui seront significées dedans lesdits poèmes par la poësie. Les anciens doncques, comme ceux qui principalement faisoient compte des mœurs, proféroient & estimoient d'avantage la façon de la musique graue, non curieuse ny affectée.

C Car on dit que les Argiens mesmes ordonnerent punition certaine a lencontre de ceux qui offenseroyent contre la Musique, & condamnerent en vne bonne amende celuy qui le premier ysa de sept cordes, & qui se mesla d'yser de la mode Mixolydiene. Mais Pythagoras ce grand & venerable personnage reprouvoit le iugement de la musique qui se fait par le iugement de l'ouyë: car il disoit que la vertu d'icelle estoit vne intel-

ligence bien subtile & bien delicee, & pourtant ne **D**
 la iugeoit il point par l'ouye, ains par l'harmoni-
 que proportionale, & estimoit que c'estoit assez
 d'arrester la cognoissance de la musique iusques
 au composé du Diapason, là où les Musiciés d'au-
 iourd'huy reiettent & desestiment totalement le
 genre qui est le plus beau, & dont les anciens pour
 sa grauité, faisoient plus de compte, & sont si las-
 ches & si paresseux qu'ils disent que la Diese har-
 monique: ne donne apparence quelconque des
 diuersitez de voix qui tombent sous le sentiment
 de l'ouye, & la bannissent de tout point de la mo- **E**
 dulation du chant, disans que ceux qui en ont es-
 crit, ou qui en ont autrefois vsé, estoient des res-
 ueurs: & pour prouuer que leur dire soit verita-
 ble, ils pensent apporter vne bien forte demonstra-
 tion, que la grosserie hebetee de leur sentiment,
 comme si tout ce qui fuit leur sentiment, & qu'ils
 ne sentent point, deuoit incontinent estre hors
 de la nature & de toute subsistence, & du tout inu-
 til. Et puis ils maintiennent qu'elle ne se peut pren-
 dre en consonance de voix, comme sont le ton
 & le demy ton, & autres semblables interualles: **F**
 & ce pendant ils ne se donnent pas garde que par
 ignorance ils pourroient doncques aussi chasser la
 tierce magnitude, la quinte & la septième, dont
 l'vne est de trois, l'autre de cinq, l'autre de sept
 Dieses: & generalement ils reietteroient, & re-
 prouueroiét tous les interualles qui sont nō pairs,
 comme inutiles, pource que nul d'iceux ne se
 peut prendre en accord ny consonance: car ce
 sont

A font ceux que la plus petite Dièse mesure en nombre non-pair : à quoy il ensuit necessairement que nul compartiment & partition de Tetrachorde n'est vtile, sinon celle seule, là où lon vse de tous interualles pairs, & celle la est celle du Syntone, Diatone, & Tonien Chrome: ce que dire ou penser seroit à faire à gents qui contrediroient non seulement à ce qui apparroist manifestement, mais aussi qui se repugneroient à eux mesmes: car eux vsent plus que nuls autres de telles partitions de Tetrachordes, là où tous les interualles sont ou

B non pairs, ou ont proportions de non pairs: car ils feignent & amollissent tous les Lichanos, & les Paranetes, & laschent aussi vn peu les sons & notes mesmes qui sont itables & fermes par ie ne scay quel interualle, où il n'y a point de raison, relâchans aussi les tierces & les Paranetes, estimants que cest vsage de composez soit le plus louable, là où la plus part des interualles sont sans raison ny proportion, estants relâchez non seulement les sons qui naturellement se peuuent remuer, mais aussi ceux qui sont immobiles, comme il est tout

C manifeste à ceux qui ont le sentiment assez exercité pour sentir & iuger telle chose. Or que la Musique soit bien seante & conuenable à vn grand & vaillant homme, le gentil Homere nous l'a bien donné à cognoistre: car pour nous monstrier comment elle est vtile à plusieurs choses, il fait qu'Achilles cuit & digere sa cholere contre Agamemnon par la musique, qu'il auoit apprise de son tres-sage gouverneur Chiron:

Ils l'ont trouué, comme il se soulassoit
 Avec sa lyre, où son temps il passoit,
 Fort douce, belle & proprement ouuree,
 Manche d'argent, qu'il auoit recouuree
 Pour son butin au sac d'Eétion,
 Ville par luy mise à destruction.
 Il en donnoit à son cœur alaigresse,
 Chantant dessus la gloire & la prouësse
 Des demy-Dieux, & vaillants cheualiers.

Note de là, & apprens, ce dit Homere, comment il
 fault vsfer de la Musique: car il chantoit dessus les
 glorieux faicts des vaillans hommes, & les gestes **E**
 des demy Dieux: cela estoit conuenable à Achilles,
 fils du tresiuste Peleus. Et d'auantage Homere en-
 seigne aussi le temps propre & conuenable, aiant
 trouué vne occupation & exercice bien seant à
 hôme qui n'estoit point empesché: car estât Achil-
 les homme de guerre & d'execution, il ne partici-
 poit neantmoins alors point aux hazards & perils
 de la guerre, pour le courroux qu'il auoit conçu
 alencontre du Roy Agamemnon: si pensa Home-
 re qu'il estoit conuenable que ce grand & heroi-
 que personnage Achilles aguifast son courage par **F**
 ces tresbeilles chansons, à fin que son cœur fust tout
 prest pour la saillie & escarmouche qu'il deuoit
 faire bien tost apres, ce qu'il faisoit en rememo-
 rant les hauts faicts d'armes qui auoient esté faicts
 par le passé. Telle estoit l'anciene Musique, &
 à telles choses vtile, car nous sçauons que Her-
 cules & Achilles, & plusieurs autres tels grands &
 vaillants personnages ont vsé de la Musique, la-
 quelle

A quelle Achilles auoit apprise du bon & sage Chiron avec la iustice & la medecine. En somme, l'homme de bon iugement estimera, que ce n'est point la faulte des sciences, sil y en a qui en vsent mal. Parquoy si quelqu'un des sa ieunesse aura esté bien appris & institué en la musique, il approuuera & recevra ce qui y est de louable & honeste, blasmera & reiettera aussi ce qu'il y aura de contraire : & non seulement en la musique, mais aussi en toutes autres choses, & se retirera de toute indigne & deshoneste action, receuant de la musique le plus grand & le plus doux contentement qui scauroit estre, & pourra estre cause d'un tres-grand bien, tant à luy qu'à tout son pais, n'vsant ny de faict ny de parole aucune qui ne soit bien seante & conuenable, gardant par tout, & en toutes choses, ce qui est bien seant à vne honeste personne. Et que les villes & citez les mieux policees & regies par meilleures loix, aient tousiours en soing de la genereuse & bonne musique, on en pourroit alleguer plusieurs tesmoignages, mesme-ment celuy de Terpander, qui iadis appaisa la grande sedition qui fut en Lacedemone, & Thales le Candiot que lon dit estre par le commandement de l'oracle d'Apollo allé en Lacedemone, là où il guarentit les Lacedemoniens, & les deliura de la pestilence qui les trauailloit grandement, & ce par le moien de la Musique, ainsi que l'escriit Pratinas: & Homere mesme dit, que les Grecs appaisoient la pestilence, qui les oppressoit, par la musique, disant ainsi,

Les fils des Grecs le courroux appaisoient D
 Du clair Phœbus, par ce qu'ils ne faisoient
 Que tous les iours ses louanges chanter,
 Et de beauté suprême le vanter,
 Pean qui l'arc à faute point n'enteze
 Son cœur oyant luy en tressailloit d'aïse.

J'allegue ces vers la, nostre bon maistre, pour le couronnement, & la fin de nostre discours de la Musique, attendu que toy le premier nous as donné à entendre la force & puissance d'icelle par ces mesmes vers: car à la verité le premier & le plus louable effect d'icelle est la recognoissâce & action E de graces enuers les Dieux. Et le second apres est vne purifiée temperature, & bien composee & accordee constitution de l'ame. Ces paroles dittes Soterichus y adiousta: voyla, mon bon maistre, les discours de la musique qui se peuuent tenir apres la table. Si fut Soterichus prisé & estimé de ce qu'il auoit discouru: car il monstra bien & à la vehemence de sa voix & à son visage, qu'il auoit affection grande & bien estudié en la musique: & mon maistre apres les autres dit, Je louë encore outre le demourant cela en vous deux, que l'vn F & l'autre a bien sceu garder & tenir son reng, car Lysias nous a festoyez de ce qui est propre & conuenable à vn ioueur de cithre, qui n'a rien plus que le ieu de la main, & Soterichus nous a enseigné ce qui concerne l'vtilité qui en procede, & la speculation, l'vsage, & la force & puissance, dont il nous a opulentelement & plantureusement traittez, & croy que tous deux m'ont, de propos deliberé

A beré, laissé la commission d'attirer la Musique aux bancquets & festins, car ie ne les veux point condamner de timidité, cōme s'ils auoient eu honte de ce faire. Mais s'il y a endroit de la vie des hommes où elle soit vtile & plaisante, c'est principalement aux festins, comme dit le bon Homere,

Le chanter est & danser delectable,

Proprement deu à la fin de la table.

Si ne faut il pas penser qu'il l'ait estimé vtile seulement, pour resiouir & delecter la compagnie, car il y a bien vne plus haute & plus profonde intelligence qui est cachee dessous ces vers la, par ce qu'il a amené la Musique au temps propre & opportun pour faire grand profit & grand secours aux hommes, i'entends aux bancquets & assemblees des anciens, là où il estoit expedient de l'introduire pour diuertir & temperer la force du vin, ainsi comme quelque part dit nostre Aristoxenus, par ce que le vin fait chanceler & bransler l'ame & le corps de ceux qui en vsent immoderement, & la musique par l'ordre, l'accord, & la mesure qui est en elle, les addoucit & les ramène en vne temperature toute contraire. Parquoy Homere dit, que les anciens ont vsé opportunément de ce moien la, & de ce secours pour les addoucir & rasseoir. Mais ce qui est le principal, mes compagnons, & qui rend la musique plus venerable, a esté par vous omis: car Pythagoras, Archytas, Platon, & tous les autres anciens sages tiennent, que le mouuement des cieux, & la reuolution des astres ne se fait point sans musique, parce qu'ils di-

sent que Dieu a fabriqué toutes choses par accord & harmonie: mais il seroit maintenant importun de plus allonger ce propos la, & est chose treffaincte & tres-musicale, que de sçauoir à toute chose donner le moyen & la mesure qu'il est requis. Cela dit, il commācea à entonner vn hymne, & apres auoir offert & respandu du vin à Saturne, & à ses enfans, & à tous les Dieux, mesmement aux Muses, il donna congé à toute la compagnie.

FIN DE TOVS LES OPVSCVLES
DE PLVTARQVE.

IMPRIME A PARIS PAR
MICHEL DE VASCOSAN
ET FEDERIC MOREL
IMPRIMEVRS
DV ROY.

M. D. LXXIIII.

PRIVILEGE DV ROY.



CHARLES par la grace de Dieu Roy de France, à nos amez & feaulx Conseillers les gents tenants nos Cours de Parlement à Paris, Thoulouze, Bourdeaux, Rouen, Dijon, Grenoble, Aix & Renes, Preuost de Paris, Seneschaux de Lyon, Thoulouze, Guyenne, Anjou, Baillifs de Rouen, Orleans, Touraine, & à tous nos autres Baillifs, Seneschaux, Preuosts, leurs Lieutenans, & chascun d'eulx comme il appartiendra, salut & dilection. Nos chers & bien amez Michel de Vascosan, & Federic Morel son gendre, Libraires & Imprimeurs en l'Vniuersité de Paris, nous ont fait dire & remonstrer, que par nos Lettres patétes du second iour de Mars, mil cinq cents soixante, & pour les causes y contenues, nous aurions fait election de la personne dudit Vascosan, & iceluy retenu pour nostre Imprimeur, luy donnant priuilege general priuatiuemēt à tous autres, de imprimer tous & chacuns liures Grecs, Latins ou François, & autrement, comme il est porté par nosdites Lettres: & depuis sur ce qu'il nous auroit fait entendre, que au preiudice d'icelles vn certain Libraire estranger demourant à Anuers, se seroit ingeré d'imprimer le liure des Vies de Plutarque, apres auoir esté traduit de Grec en François par nostre amé & feal Messire Jacques Amyot grand Aumosnier de France, & à present Conseiller en nostre Conseil priué, & Euesque d'Auxerre, estant ledit liure ia imprimé par ledit Vascosan. Nous par autres nos Lettres patentes du XII Nouembre l'an mil cinq cents soixante trois, aurions ordonné defences estre faittes, mesmes à son de trompe & cry public, à tous Libraires, Imprimeurs & autres, de vendre lesdicts liures de Plutarque ainsi traduiçts par iceluy Amyot, fils ne sont imprimez par ledit Vascosan.

Et le quatrieme de Mars, 1571, Nous aiant esgard aux grands & laborieux trauaux que Federic Morel gēdre dudit Vascosan a employé en l'impression de plusieurs beaux & recommandables liures Grecs, Latins, François & autres, l'aurions retenu en l'estat de nostre Imprimeur ordinaire, tant en Hebreu, Grec, François, que autres langues, vacquāt par le trespas de feu Robert Estienne, & sur ce luy ottroyé nos Lettres patentes, lesquelles par nostre commandemēt auroient esté publiees en nos Cours de Parlement & des Aides, Chambre des Comptes, & en l'Auditoire de nostre Preuost de Paris. A present aians iceulx de Vascosan & Morel son gendre receu la translation des Oeuures Morales & meslees dudit Plutarque, faiçte de son original Grec en nostre langue françoise par iceluy mesmes Amyot Conseiller en nostredict Conseil priué, & Euesque d'Auxerre, ils les auroient imprimez, & en cela employé vn soing exquis, & vne telle industrie que merite cest ceuvre si recomman-

dable, & d'une telle consequence pour l'honneur de nostre France: mais ils doutent tomber de rechef au mesme ou pareil inconuenient, où ledit de Vascofan s'est trouué apres ladite impression par luy faite desdites Vies de Plutarque, traduites par ledit mesme Auteurs, & que les autres Imprimeurs, tant au dedans que dehors nostre Royaume, poursuyuans pour l'aduenir leur ambition & auarice qui les a conduits à imprimer lesdites Vies, voulussent faire de mesmes pour le regard desdites Oeuures morales & meslees, & que l'impunité de leurs premieres fautes leur donnaist occasion de faire de mal en pis, au moien de quoy vn œuure si beau & recommandable ne demeureroit en la perfectiõ qu'il a meritè: pour à quoy obuier ils nous ont fait supplier tres humblement leur pourueoir.

N O V S à ces causes, & que tant la personne d'iceluy Amyot, auteur de ladite translation, est tresrecommandable de grandes & inestimables vertus cogneues de nous pendant le long temps qu'il a esté nourry aupres de nostre personne en grands & importans affaires: que pareillement la grandeur & consequence d'une translation si parfaite & si accomplie, qu'il ne reste plus à y desirer autre chose qu'une impression qui suyue, au plus pres où il sera possible, la dignité & merite d'un tel liure, que nous desirons sortir en lumiere sous ceste impression faite par lesdits de Vascofan, & Morel: lesquels nous auõs prins & choisis pour estre nos Imprimeurs. Et pour certaines autres cõsiderations à ce nous mouuans, Auons en continuant & reiterant lesdicts priuileges, facultez, & tout le contenu en nosdites Lettres, ottroyees tant audit Vascofan que audit Morel son gendre, & chascun d'eulx, & de nouueau, entant que besoing seroit, donné & donnons priuilege, licence & permission audit de Vascofan & Morel, & chacun d'eux, de imprimer, ou par leurs gents faire imprimer, vendre & debiter tous & chascuns les Liures d'icelle translation desdites Vies, Oeuures morales & meslees de Plutarque, faite de leur original Grec en nostre langue françoise par iceluy Amyot nostredit Conseiller & grand Aumosnier de France: fait & faisons inhibitions & defenses à tous Imprimeurs, Libraires, & autres de quelque estat, condition, pais ou nation qu'ils soient, nos subiects ou estrangers, qu'ils n'ayent à imprimer, vendre, trocquer, debiter, tenir, ne auoir, soit en public ou priué, aucuns desdits Liures & Oeuures de Plutarque translatees comme dessus, sur peine d'amende corporelle, arbitraire, & de confiscation desdits liures qui se trouueront ainsi imprimez par autres que par lesdits de Vascofan & Morel, ou l'un d'eulx: voulans en outre que ceulx par deuers lesquels lesdits liures se trouueront imprimez par autres que iceulx Vascofan & Morel, ou l'un d'eulx, soient tenus endicter, declarer & nommer le personnage & le lieu de qui ils l'auront eu, pour apres estre procedé cõtre les coupables comme il appartient par raison.

Et à fin que personne n'en puisse pretendre cause d'ignorance, Nous auons enioinct & enioignons ausdits de Vascofan & Morel de mettre & inserer dans ledit Liure vn sommaire en bref de cesdites

dittes presentes, auquel nous voulons pareille foy estre adioustee qu'à l'original d'icelles, le contenu desquelles nous vous mandons, commandons & tresexpressément enioignons entretenir, garder & obseruer, & contre les transgresseurs & coupables, leurs adherents & complices, proceder par toutes voyes & manieres deuës & raisonnables, & comme infraçteurs & violateurs de nos ordonnances, vouloir, & commandement. Et par ce aussi que lon pourra auoir affaire de cesdittes presentes en plusieurs & diuers lieux, Nous voulons que au vidimus d'icelles fait & collationné par l'vn de nos amez & feaux Secretaires, telle foy soit adioustee comme au propre original. Auquel en tesmoing de ce nous auons fait mettre nostre seel.

DONNE à Paris le vingt-sixieme iour d'Aouft, l'an de grace mil cinq cents septante deux. Et de nostre regne le douzieme. Et au desloubz est escrit, Par le Roy, Maistre Gilles de Riant Maistre des Requestes ordinaires de l'hostel, & Seigneur de Villerey, present.

Ainsi signé,

DESBALDIT.

Et sont lesdittes Lettres scelees du grand seel de France, à cire iaulne, sur simple queü.

